

Х. АБДУРАҲМОНОВ, А. РАФИЕВ,
Д. ШОДМОНҚУЛОВА

ЎЗБЕК ТИЛИНИНГ АМАЛИЙ ГРАММАТИКАСИ

*Маданият ва санъат ўқув юртлари
учун ўқув қўлланма*

Қайта ишланган ва тўлдирилган
2- нашри

ТОШҚЕНТ «ЎҚИТУВЧИ» 1992

Масъул мұҳаррир: филология ғаллари доктори, профессор
H. Maҳмудов

A 4602020400—216 65—92
353 (04) — 92

© «Ўқитувчи» нашириёти, 1992

ISBN 5—645—01629—7

Шартли қисқартмалар

- Ас. М. — Асқад Мұхтор
А. О. — Абдулла Оріпов
А. Қ. — Абдулла Қаҳжор
А. Қод. — Абдулла Қодирий
Газ. — Газетадан
И. Р. — Иброҳим Раҳим
М. И.—Мирзакалон Исмоилий
Мирм. — Мирмуҳсин
М — Мүкимий
Н. — Навоий
О. — Ойбек
О. Ё. — Одил Еқубов
О. Ҳус. — Оқилжон Ҳусанов
П. Қ. — Пиримқул Қодиров
Р. Ф. — Раҳмат Файзий
С. Абд. — Собир Абдулла
С. Аи.—Суннатулла Анорбоев
С. Аҳм. — Сайд Аҳмад
С. З.—Саида Зуннунова
«Саодат» журнали
Ү. — Үйғун
Ч. Айт. — Чингиз Айтматов
Я. — Яшин
Ү. Ү. — Үктам Үсмонов
Ү. Үм. — Үллас Үмарбеков
Ү. Ҳ. — Үткір Ҳошимов
Ғ. Ғ. — Ғафур Ғулом
Ҳ. О. — Ҳамид Олимжон
Ҳ. Ғ. — Ҳамид Ғулом
Ҳ. Ҳ. — Ҳамза Ҳакимзода

СУЗ БОШИ

«Ўзбек тилининг амалий грамматикаси» ўқув қўлланмаси маданият ва санъат ўқув юртларининг тала-баларига мўлжалланган бўлиб, унинг асосий вазифаси бўлғуси маданият ходимларига ҳозирги ўзбек адабий тилининг норматив қоидаларини сингдириш орқали уларниңг оғзаки ва ёзма нутқ саводхонлигини ўстириш ҳамда ўзбек адабий тили меъёрлари бўйича зарурий малака ҳосил қилишдир.

Қўлланмада ҳозирги ўзбек адабий тили тизимишинг барча қисмларини амалий жиҳатдан ўргатиш асосий мақсад қилиб олинган бўлса-да, унда маданият ва санъат ўқув юртларида тил ўргатишнинг ўзига хос усуллари ва маданий-маърифий мутахассисликларнинг хусусиятлари ҳам ҳисобга олинди. Мазкур соҳанинг кўпгина ихтисослик фанлари, хусусан, китобхонлар билан ишлаш, китоб фондлари ва каталогларини тузиш ҳамда системалаштириш, библиографик тасниф, оғзаки ташвиқот санъати, саҳна нутқи, нотиқлик санъати, кўргазмали ташвиқот воситаларини яратиш кабилар бевосита тилнинг норматив қоидаларини билишга асосланган. Шунга кўра, қўлланмада талабаларнинг ўзбек адабий тилидан зарур назарий билимларни эгаллашларига ва бу билимларнинг амалий машғулотлар орқали мустаҳкамланишига, айниқса, талаффуз ва имло, ифодали ва бадий ўқиш, сўз қўллаш, нутқ қурилиши қондалари ва меъёрларини чуқур ўзлаштиришларига кўпроқ эътибор берилди.

Қўлланманинг ушбу иккинчи нашри мутахассисларнинг таклиф ва истаклари асосида қайта ишланди, янги мавзулар билан тўлдирилди. Чунончи, товуш ва фонетик ҳодисалар, сўз маъносининг тараққиёти, сўз туркумларининг қўлланиши ва ёзилиши, қўшма гаплар кабиларнинг мазмун мундарижасига муайян ўзгаришлар киритилди. Китоб фонетик ўзгаришлар, нутқнинг фонетик бўлиниши, сўзларнинг услубий бўёғи, лексиканинг қўлланиши доираси, эмоционал-экспрессив бўёқдорлик ва услубий жиҳатдан фарқланиши, нутқнинг

тасвирий ва ифодавий воситалари каби бир қанча янги мавзулар билан тўлдирилди.

Мазкур нашрда тил ҳодисаларини баён этиш ва амалий машғулотларни тузишда мутахассислик фанлари билан боғланиш бўлишига, ифода услубининг содда ва аниқлигига, машқ, топшириқ ҳамда матнларнинг маданият ва санъат соҳасидан танланишига ва ёритилаётган лисоний ҳодисаларга мос келишига алоҳида эътибор берилди. Талабаларнинг тил мутолаасини осон ва пухта эгаллашларини таъминлаш мақсадида грамматик қоидаларнинг турли нутқ услубларida қўлланишига доир машқ, топшириқ ва боғланувчи матнлар кўпайтирилди, орфоэпия, орфография, пунктуация асослари лексикология, морфология ва синтаксис ҳодисалари билан узвий боғлиқликда ёритилди.

Қўлланманинг «Фонетика» бўлимига кирувчи «Орфоэпия ва имло», «Унли товушлар талаффузи ва имлоси», «Айриш ва юмшатиш белгиларининг ишлатилиши ва имлоси» қисмлари, «Синтаксис» бўлимини *Х. Абдураҳмонов*, «Морфология ва имло» бўлимини *Д. Шодмонқурова* ёзган, «Фонетика»нинг «Ундошлар тавсифи, талаффузи ва имлоси», «Фонетик ўзгаришлар», «Нутқнинг фонетик бўлиниши», «Бадиий нутқнинг фонетик ифодалилиги» қисмлари, «Лексикология» бўлими *A. Рафиев* томонидан қайта кўриб чиқилган ва тўлдирилган.

Д. Шодмонқурова, А. Рафиев

ФОНЕТИКА

1- §. **Фонетика** (грекча *фоне — товуш* сўзидан олинганд) тилшуносликнинг нутқ товушларини ўрганувчи бўлимидир.

Фонетика товушларнинг ҳосил бўлиши, талаффузи, талаффуз ва ёзувнинг ўзаро муносабати, шунингдек, бўғин ва урғунинг хусусиятлари каби ҳодисаларни ўрганади.

Инсон тили товуш тилидир. Тилдаги сўзлар, сўз биримлари, гаплар нутқ товушлари ёрдамида ҳосил бўлади. Нутқ товушлари нутқ аъзоларининг фаолияти туфайли ҳосил бўлиб, ижтимоий алоқа воситаси бўлган нутқни шакллантирувчи сўзларнинг асосий бирлиги ҳисобланади. Нутқ бирлиги саналган ҳар қандай сўз ички ва ташқи томони билан ажралиб туради. Сўз англатадиган маъно сўзнинг ички томони, сўзни шакллантирадиган товушлар эса унинг ташқи, яъни фонетик томонидир. Нутқ товушлари фақат сўзнинг ташқи томонини шакллантириб қолмасдан, сўзларнинг маъноларини фарқлашда, сўзларнинг ўзаро биркувини таъминловчи грамматик шакллар ҳамда сўз, сўз биримаси ва гапларнинг вужудга келишида моддий асос, ашё сифатида ҳам хизмат қиласди.

Сўздаги товушлар тасодифан йиғилган товушлар бўлмай, инсон нутқ товушлари йиғиндисидан иборатдир. Ўзига хос физик ва физиологик жараёнлар маҳсулни бўлган инсоннинг нутқ товушларини бошқа ҳар қандай товушдан фарқ қилмоқ лозим. Товуш физик ҳодиса сифатида бирор жисмнинг бошқа бир жисм ёки куч таъсирида тебраниши ва бу тебранишнинг қулоққа эшитилишидир. Масалан, доири пардасининг бармоқлар таъсирида тебраниши, бармоқлар ёхуд қўл панжасининг пардага зарб билан урилиши натижасида доири садолари таралади. Бу овоз, товуш нутқ товушларидан фарқ қиласди. Чунки, нутқ товушлари биринчидан, инсоннинг нутқ аъзоларида ва улар иштироқида, иккинчидан, мураккаб артикуляция асосида ҳосил бўлади.

2-§. Нутқ товушларининг пайдо бўлишида иштирок этувчи аъзолар нутқ аъзолари деб, шу аъзолар йиғиндиси эса нутқ аппарати деб аталади. Нутқ аппарати тўртга бўлинади: 1) нафас аппарати; 2) бўғиз (ҳиқилдоқ) бўшлиғи; 3) оғиз бўшлиғи (тил, танглай, кичик тил, тиш ва лаблар жойлашган қисм); 4) бурун бўшлиғи (товуш оҳангига алоҳида тус беришда иштирок этувчи қисм).

Нутқ аъзоларидан тил, лаблар, юмшоқ танглай, кичик тил, ун пайчалари фаол аъзолар бўлса, тиш, қаттиқ танглай, бурун бўшлиғи кам фаол аъзолардир.

Нутқ товушларининг вужудга келиши учун зарур бўлган ҳаво оқими билан асосан ўпка таъминлади. Ўпкадан чиқаётган ҳаво оқими нафас йўли орқали бўғизга ўтиб, унда жойлашган ун пайчаларини куч билан тебратиб, овоз ҳосил қиласди.

Бўғиз орқали оғиз бўшлиғидан ўтаётган ҳаво оқими бу ерда бирор тўсиққа учраб, портлаб ёки сирғалиб ўтса, шовқин пайдо бўлади. Шунга кўра, нутқ товушлари бўғиздаги ун пайчаларининг тебранишидан ҳосил бўлувчи овоздан ва оғиз бўшлиғида ҳосил бўлувчи шовқиндан иборат бўлади.

Товушни ҳарфдан фарқ қилмоқ керак. Товушларни айтамиз ва эшитамиз. Ҳарфларни эса ёзамиз, кўрамиз ва ўқимиз. Демак, ҳарф нутқ товушларининг ёзувлари шартли белгиси, рамзиdir.

Ҳарфларнинг қатъий бир тартибда жойлашган йиғиндиси алфавит дейилади.

Ўзбек тилида 33 та ҳарф ва 2 та белги (ъ, ь) бор: а, б, в, г, д, е, ё, ж, з, и, й, к, л, м, н, о, п, р, с, т, у, ф, х, ч, ш, ъ, ь, э, ю, я, ў, қ, ғ, ҳ.

Алфавит тартибини яхши билиш кўп ишларни тўғри бажариш учун муҳим ҳисобланади. Айниқса, киши исми ва фамилияларини, предмет, нарсаларнинг номини, кутубхоналарда муаллифлар номини алфавит тартибда ёзиш ва китобларнинг номини катологлаштиришда; луғатчилик ишларида ва бошқа шунга ўхшаш соҳаларда катта ёрдам беради.

Овоз ва шовқиннинг иштирок этиш даражасига кўра ўзбек тилидаги товушлар иккига бўлинади: **унли товушлар** ва **ундош товушлар**.

3-§. Унли товушлар ун (овоз) пайчаларининг ўпкандан чиқаётган ҳаво оқими таъсирида тебраниб, оғиз бўшлиғида ҳеч қандай тўсиққа учрамай ўтиши нати-

Ҳарфлар	Уларнинг ном- ланиши	Ҳарфлар	Уларнинг ном- ланиши
Аа	а.	Сс	эс
Бб	бе	Тт	те
Вв	ве	Үү	у
Гг	ге	Фф	эф
Дд	де	Хх	ха
Ее	е	Цц	це
Ёё	ё	Чч	че
Жж	же	Шш	ша
Зз	зе	ь	айириш белгиси
Ии	и	ъ	юмшатиш белгиси
Йй	йэ	Ээ	э
Ққ	ка	Юю	ю
Лл	эл	Яя	я
Мм	эм	Үү	ў
Нн	эн	Ққ	ке
Оо	о	Ғғ	ге
Пп	пе	Ҳҳ	ҳе
Рр	эр		

жасида пайдо бўлади. Ун пайчаларининг титрашидан бўғиз бўшлиғида соғ овоз юзага келади. Уларни талаффуз этганда оғиз бўшлиғи очиқ бўлади, асосий вазифани эса ун пайчалари, тил ва лаблар бажарадилар. Ун пайчаларининг ҳаракати мусиқий оҳангни вужудга келтиради. Шунинг учун унлиларда мусиқийлик, оҳангдорлик кучли бўлади. Уларни нутқ талабига қараб истаганча чўзиб талаффуз этиш мумкин.

Ҳозирги ўзбек адабий тилида олтита унли товуш бор: и, э (е), а, у, ў, о. Унли товушлар ёзувда ўнта ҳарф билан ифода этилади: а, я, э, е, и, о, ё, у, ў, ю.

1- машқ. Матида қайси унлилар кўпроқ иштирок этганини изоҳланг.

Қадимги Шарқ Эллин худоларининг маҳобатли тош сиймоларини, Ҳазрати Одам ва онамиз Момо Ҳавонинг илоҳий қиёфаларини, Биби Марям ва Исо алайҳиссаломнинг болалигидан токи чорчўпга осилгунгача бўлган ғамбода умрини лаҳзама-лаҳза матоҳларга нақш этмаган бўлса-да, башар аҳлини ҳали-ҳануз ҳайратга солаётган улуғвор бир санъатни яратди, бу санъат асрлар оша жаҳон ҳалқларини ўзига жалб этди, уларни, энг аввало, она борлиқни севишга, ардоқлашга, эъзозлашга ўргатди, тарбия қилди. Одамлар бу санъат

қошида Зевс ва Аполлон, Афродита ва Нерон ҳайкалларидан, буюк Микеланжело ва Рафаэль, Гициан ва Боттичелли мўйқалами сеҳридан нечоғли ҳайратланган ва лаззатланган бўлсалар, худди шундай ҳайратландилар.

Бу санъат — халқ амалий санъати Самарқанд, Бухоро ва Хивани барпо этди. Бу муҳим учлик Шарқ маданиятини дунёга танидти. («Саодат» журналидан).

4- §. Ундош товушлар, асосан, ўпкадан келаётган ҳаво оқимининг оғиз бўшлиғида тўсиққа учрашидан юзага келган шовқиндан (баъзан эса шовқин билан овознинг қўшилишидан) пайдо бўлади. Ундошларни ҳосил қилишда ўпкадан чиқаётган ҳаво турли тўсиқларга учрайди, бу тўсиқлар овозни ё борича шовқинга айлантиради ёки оғиз ва бурун бўшлиғидан қисман овоз билан бир оз шовқин аралашиб чиқади. Ундош товушларни талаффуз этганда нутқ аъзолари бир-бира га нисбатан яқинлашади ёки жислашади, шунга кўра ҳаво оқими портлаб ё сирғалиб чиқади. Нутқ аъзоларининг ҳаракатидан пайдо бўладиган тўсиқ туфайли ундош товушларни талаффуз этишда чўзиб бўлмайди.

Ҳозирги ўзбек адабий тилида 25 ундош фонема мавжуд: б, в, г, д, ж, ч, з, й, к, л, м, н, нг, п, р, с, т, ф, х, ц, ҷ, ш, қ, ғ, ҳ.

2- машқ. Матннаги ундош товушларни топиб, унли товушлардан фарқини айтинг.

ЛЕВ ТОЛСТОЙ САНЪАТ ТЎҒРИСИДА

Санъаткор кишиларга таъсир этиши учун унинг ўзи изланувчан бўлиши, асари ҳам изланишдан иборат бўлиши шарт. Агар у ҳамма нарсани топиб-билиб олган бўлса ва панд-насиҳатга берилса ёки атайн майнавозчилик қилса, у ҳеч кимга таъсир этолмайди. Факат изланган тақдирдагина томошабин, тингловчи, ўқувчи у билан бирга изланиб, яқдил бўлиб кетади.

Мен санъаткорман ва менинг бутун ҳаётим гўзалликни излашдан иборат. Агар сиз менга шу гўзалликни кўрсатганингизда эди, сиздан худди мана шу олий баҳтга мени ҳам сазовор қилинг, деб тиз чўкиб ёлворган бўлурдим.

Санъат асари деб аташадиган нарсани яратиш учун, аввало, киши нима яхши, нима ёмонлигини аниқ-равшан, ҳеч шубҳасиз билиши, буларни ажратиб туради-

ган чегарани нозиклик билан кўриб туриши ва шу боисдан ҳам бор нарсани эмас, балки бўлиши мумкин бўлган нарсани ёзиши керак...

...Гўзаллик нима? Гўзаллик биз учун суюкли нарсадир. Гўзал — гўзал эмас, суйган — гўзалдир. Нега суйган гўзал?— Ҳамма гап ана шунда.

3- машқ. *Оперетта, органист, капелла, жаз, дирижёр, чанг, танбур* сўзларидаги унли ва ундош товушларга тавсиф беринг.

ОРФОЭПИЯ ВА ИМЛО

ОРФОЭПИЯ ҲАҚИДА МАЪЛУМОТ

5- §. Товушларни тўғри талаффуз қилиш меъёри ҳақидаги қоидалар тўплами **орфоэпия** дейилади.

Адабий тил қонунияти асосида тўғри ёзиш қанчалик муҳим бўлса, тўғри талаффуз қилиш ҳам шунчалик зарурдир.

Ўзбек тилида сўзлашувчилар ўзбек адабий тилида, шунингдек, ўзбек тилининг маҳаллий шароитга хос шева ва диалектда ҳам сўзлашадилар. Ўзбек адабий тили талаффузи диалект ва шева талаффузидан фарқ қиласди, албатта. Масалан, адабий тилдаги *меҳмон* сўзи шеваларда *миймон*, *михмон*; *туфлим* сўзи *туфлигим*, *бордик* сўзи *бордув* каби талаффуз қилинади, аммо бу сўзлар аслига мувофиқ ёзилади.

Орфоэпия орфография (имло) билан зич боғлиқ. Аммо сўзнинг талаффузи билан ёзилиши доим мос кела-вермайди. Бу ҳол товушларнинг таъсири ва ўрни билан боғлиқ бўлади. Масалан, *мактаб* сўзи охиридаги **б** ундош товуши оғзаки нутқда п тарзида талаффуз қилинади, бироқ имло қоидасига мувофиқ **б** ёзилади.

Демак, орфоэпия адабий тил учун ягона талаффуз меъёри бўлишини талаб қиласди.

УНЛИ ТОВУШЛАРНИНГ ТАЛАФФУЗИ ВА ИМЛОСИ

6- §. и унлиси тилнинг тикка ҳаракатига кўра юқори тор, ётиқ ҳаракатига кўра тил олди, лабларнинг иштирокига кўра лабланмаган товуш ҳисобланади. и товуши *тилак*, *бир*, *тиш*, *дил* каби сўзлардаги қисқа и унлиси ўрнида; *моҳир*, *шоир*, *илмий*, *адабий*, *лирика* каби сўзларнинг ургули бўғинидаги чўзиқ и ўрнида; *қиши*, *қир*, *ғилоф*, *хизматчи*, *хил* каби сўзларда чуқур тил орқа **қ**, **ғ**, **х** товушлари билан ёнма-ён келадиган қисқа ва қаттиқ и унлиси ўрнида ва рус тилидан ўтган *вимпел*, *билина*, *вишка*, *ричаг* каби сўзлардаги русча **ы** унлиси ўрнида ёзилади.

Араб-форс ва рус тилидан ўзлашган бир бўғинли сўзларнинг қўш ундошлари ўртасида қисқа и товуши

талаффуз этилса-да, аммо ёзилмайди. Масалан: *фикр, илм, уфқ, матн*.

1- топшириқ. Қуйидаги сўзларни дафтaringизга кўчиринг ва ёзилишини билиб олинг.

АЗМ, АЙШ, АРЗ, АФТ, АҚЛ, БАДНАФС, БАҲС, БАЗМ, БАЙТ, БРАК, ВАЗН, ВАҲМ, ВАҚФ, ГИПС, ГЛОБУС, ДАФН, ДАҲР, ЖАЗМ, ЖАЛБ, ЖАНР, ЖАҲЛ, ЖАҲД, ЖИПС, ЖУФТ, ИРҚ, ЗЕҲН, ЗИКР, ЗУЛМ, ЗУЛФ, КАРЧ, КАФТ, КАСР, КАСБ, КЕКС, КИБР, МАЙЛ, МЕҲР, МАШҚ, ЛИТР, ЛИТФ, НАСР, НАҚШ, МЕТР.

4- машқ. Матнни ўқиб, и унлисига тавсиф беринг. Қисқа ва чўзиқ талаффуз қилинган унлиларни изоҳланг.

ОЛТИН ЗАНГЛАМАС

Театримизда «Бой ила хизматчи»нинг қўйилиши Ҳамза асари ва уларнинг талқини борасида катта шовшувларга сабаб бўлди. Бу спектакль театр тарихи саҳифаларига олтин ҳарфлар билан ёзилди. Ўзбек театрига шон-шуҳрат ва катта обрў келтирди.

Ҳ. Ҳ. Ниёзийнинг бу шоҳ асари 1939 йилда шундай зўр муваффақият қозонишининг асосий сабабларидан бири — драматург К. Яшин ва режиссёр Етим Бобожоновларнинг самарали ижодий ҳамкорлиги бўлди. Бу ҳол ўзбек театри мухлисларининг сонини ҳам, кишиларнинг санъатга бўлган ихлосини ҳам ошириди. Тарихий инқилобий мавзуда ёзилган бу асар омманинг сиёсий-ижтимоий ва нафис дидини тарбиялашда муҳим аҳамиятга эга.

Халқимизда «олтин зангламас» деган нақл бор. Бу бежиз айтилмаган. Ҳамза асарлари йиллар ўтган сари ўзбек санъати мухлисларининг диққатини ўзига жалб этиб, унга бўлган қизиқиши ошириб келди. Буюк истеъодод эгаси Ҳамзанинг «Холисхон» фожиали драмаси ҳам ана шундай номи ўчмас ва зангламас олтинлардан бири эди. Шу туфайли бу асарлар ўз қимматини йўқотмайди.

*Ш. Маъзумова,
Ўзбекистон ҳалқ артисти.*

5- машқ. Ажратилган сўзлардаги қаттиқ ва юмшоқ и товушини алоҳида-алоҳида тавсифланг.

Низомжон!

У Икромжонга ўғил бўлди. Унинг қўш қаноти бўлди. Икромжон бу бақувват қанотларда бургут парвози билан олис, нурдек тиниқ, беғубор уфқларга уча олади.

Бу қанотлар уни ҳаётнинг янги манзиллариға олиб боради...

Бугун ҳам ҳаво очиқ.

Низомжон билан Зебихон Дилдорни кузатиб, арава изи тушган чўл бўйлаб кетишяпти.

Икромжон йўл бошида қўлтиқ таёғига суюниб уларнинг орқасидан қараб қолди.

Уфқда уч нуқта қолди. Бу — Низомжон, бу — Дилдор, бу — Зебихон.

Пардек енгил оппоқ булутлар чети ботаётган офтоб тифида худди кимхоб парчасидек лов-лов ёнади. Кўзларни қамаштиради. Ёнади, ёлқинланади.

(С. Аҳм. «Уфқ»)

6- машқ. Каталог, архив, абонент, адабий, саҳифа, изоҳ, шрифт, терминал, репродукция, нашр, фонд, индекслаш, обзор, бўбло-эрсия, микрокопия сўзларидағи товушларни тавсифланг, и товушининг айтилишига алоҳида аҳамият беринг.

7- §. у унлиси тилнинг тикка ҳаракатига кўра юқоритор, ётиқ ҳаракатига кўра тил орқа ва лабланган товуш ҳисобланади. у товуши тил олди ва тил орқа ундошлари билан ёнма-ён келганда олд қаторга мойилроқ талаффуз қилинади: гулхан, гул, кул, кунжут каби. Ёндош келган чўқур тил орқа ундошлари ёнида соғ орқа қатор унли сифатида қаттиқ айтилади: қудуқ, қур, буғдой, хушину́д, тухум каби.

Қўйидаги ҳолатларда у унлиси и товушига мойилроқ айтилса ҳам, у ёзилади:

а) олдинги бўғинларида а, о, у унлилардан бирин бўлган ва шундан сўнгги ёпиқ бўғин бошидаги в товушидан кейин: қовун, овул, товуқ, совуқ, тарвуз, қувур, чувар-чувар каби;

б) биринчи бўғинида у ёки ю бўлган сўзларнинг иккинчи бўғинида: узун, узум, чуҷук, тушунча, юлдуз, ютуқ, юмуш каби;

Аммо иккинчи бўғинда и ясовчи ёки тусловчи қўшимча бўлса, и олдинги бўғиндаги у га мослашмайди ва ўз ҳолича ёзилади. Қиёсланг: туширди — тушунди, узил-кесил — узун-қисқа;

в) биринчи бўғинида у ёки ё бўлган сўзларнинг кейинги очиқ бўғини қ ёки f билан бошланса: буғу, ургу, уйқу, туйғу, ёғду каби.

2- топшириқ. Қийидаги сўзларни дафтариңизга кўчиринг ва ёзилишини билиб олинг.

Бурун, бутун, бужур, бузрук, бузувчи, гуруч, гуруҳ, дуруст, жужун, зуҳур, кунжут, кукун, кундуз, нуфуз, сурув, тутун, тутуруқ, тушунча, тумшук, узум, умум, учун, тузум, чучук, чумчук, шукур, қудуқ, қуруқ, ғурур ғулу, ҳузур, ҳукумат, хушнуд.

7- машқ. Матнни ўқининг и ва у унли товушларининг очиқ ва ёпиқ бўғинда келишини изоҳланг.

Эндиғина қор кетган пайтлар. Яланғоч ер янги чўмилтирилган чақалоқдай буғланади, шаҳар ҳовлилари сув очиб ётади, асфальт кўчаларда эса енгил чанг кўтарилади. Кўп қаватли бинолар сояси гоҳ булутлар соясига қўшилиб, йўқ бўлиб кетади, гоҳ яна қуёш чиқиб оламга иссиқ-иссиқ нур сочганда, қайтадан пайдо бўлади.

Баҳор нафаси ҳамма ёқни юмшатиб, алланечук бўшаштириб қўйган. Ҳаво майнин ва тотли туюлади. Ҳали ҳеч нарса гуллаган бўлмаса ҳам, гўё узоқдан гул ҳиди келади. Овозлар ҳам одатдагидан кўра жаранглироқ ва аниқроқ эшитилади, бутун туйғулар эриб кетаётганига, кишининг аъзойи баданидан ёқимли ва мадорсизлантирувчи бир ҳовур ўтаётганга ўхшайди.

Илк кўклам ёғдулари ўқув биносининг узун йўлакларини равшанлаштириб юборган, қишида кундузи ҳам ёқиб қўйиладиган чироқлар энди ўчирилган эди. Бу йўлакларда танаффус вақтида одам қайнайди. Лекин Маҳкам бир гуруҳ фаоллар билан йиғилишдан чиққандан йўлак бўшаб қолган ва у бошидан бу бошигача кўриниб турар эди. Қатор кетган хоналар ёпиқ, ичкаридан босинқи ғовур эшитиларди. (П. Қ.)

8- машқ. Ўзингиз мустақил равишда биринчи бўғинда ҳам, иккинчи бўғинда ҳам у товуши иштирок этган сўзлар топиб, улар иштирокида гаплар тузинг.

8- §. ў унлиси. Бу унли лабланган, ўрта-кенг унли товуш бўлиб, тилнинг ётиқ ҳолатига кўра фарқланадиган олд қатор ў (о) ва орқа қатор ў (о) кўринишлирага эга. Ёзма адабий тилда расмий равишда тил орқа товуши деб қабул қилинган. Сўзнинг очиқ бўғинларida нисбатан кенроқ, ёпиқ бўғинларда эса анча торроқ

талаффуз қилинади: сўлим, ўрик, пўчоқ, тўплам, кўкрак каби.

Бу унли, асосан, сўзниг биринчи бўғинида учрайди: *қўл, кўл, кўза, ғўза, кўклам, тўлқин* каби. Лекин ўзлаштирилган сўзларда охирги бўғинларда ҳам қўлланади: *рўбарў, хушрўй, гулрў* каби. Рус тили орқали кирган сўзларда **о** белгиси ҳамма бўғинларда кела олади ва шундай ёзилади: *ток, кубок, роль, нота* каби.

Кўпгина сўзларнинг биринчи бўғинида ўнлиси келганди, иккинчи бўғинида одатда и ёзилади: *бўлинши, дўппи, кўприк, сўзлик, тўқимоқ, хўрсинмоқ* каби.

3- топшириқ. Қўйидаги сўзларни дафтарингизга кўчиринг ва ёзилишни ёдда тутинг.

Бўйин, бўлим, бўлиқ, бўлинма, бўри, бўғиз, бўғин, дўндиқ, дўмбира, дўхтири, кўмир, кўнгил, кўникма, кўпик, кўрик, кўринмоқ, кўчирма, мўмин, сўлим, сўлиқ, сўри, сўфи, тўзим, тўлдирмоқ, тўқим, тўқиш, тўққиз, чўқир, чўзиқ, чўмич, чўри, чўчимоқ, ўтиromoқ, ўзишмоқ, ўттиз, ўйин, ўксик, ўнинчи, ўрим, хўтиқ, ҳўкиз.

4- топшириқ. Биринчи бўғинда ў, иккинчи бўғинда и иштирок этган сўзлар топиб, улар ёрдамида бир нечта гап тузинг.

9- машқ. Гапларни ўқинг. у ва ў унлиларига тавсиф беринг. Талаффузини тушунтиринг.

Кеч куз фасли. Эринчиоқ қиши ҳали ўзини сездирган эмас. Ўқтин-ўқтин ёмғир қуийиб, шариллаган сувлар тарновларни қўпориб туширади. «Рубъи маскун»да ягона бўлган пойтахт кўчаларида пиёдалар учун балчиқда юриш анча қийинлашади. Бироқ осмон яна тезда фирузаланиб, қуёш ҳатто баҳордагидек қиздира бошлийди. Боғчада дараҳтлар олтин ранг билан товланар эди, барглар бирин-сирин жимгина, ялқовгина тўкилар, намерни ўпар эди.

Навоий кузнинг сўлғин нафосати билан нафас олган хиёбонларни оралаб, табиат ва ҳаётдаги ўзгаришлар устида фикр қилиб, кечинмалар, ҳисларга тўлиб юраркан, навкар келиб, сафар учун отни тайёрлаб қўйганини билдириди. Шоир гўё Маврга — подшоҳ қошига жўнаш кераклигини энди эшитгандай иккиланиб: «Хозир борурман»,— деди-да, яна аввалгича секин кетди. Боғонлар ва бошқа хизматчилар билан сўзлашди, улар-

нинг умалоқ-думалоқ болаларининг бошларини силади, кейин киссасидан олтин ва кумуш чиқариб, ҳаммага «йўл оёқ» улашди. Болаларнинг шодлиги айниқса бениҳоят бўлди. Улар сакрашиб,чувиллашиб, тангаларни дам кафтларига қисиб, дам бир-бирларига кўз-кўз қилишарди. Катталар ўз хўжаларига «оқ йўл» тилаб, кўзларida ёнган самимий чуқур меҳр билан видолашдилар. (*Ойбек.*)

10- машқ. Матнлардаги сўзларга эътибор бериб, ў ва и унли товушларининг талаффузи ва ёзилнишини тушунтиринг.

АДИБЛАР САНЪАТКОР ҲАҚИДА

Ярим аср истеъоддли Юнус оғамиз ўзининг ҳассос, гўзал, инсоний кенг қалбининг бутун қувватини халқ хизматига, озод халқнинг шодликларини тараннум этишга бағишлади.

Ойбек.

Юнус Ражабий, сиз ўзбек музикасининг неча юз ийллик юкини машаққатли довонларидан ўз елкангизда азот кўтариб олиб ўтган Рустами достонимизсиз... сизни музикасиз, ўзбек куйларимизни сизсиз тасаввур қилолмаймиз.

Уйгун.

Юнусвой ака умр бўйи зарралаб, Хоразму Бухоро, Фарфона-ю Сурхонда йиққан дунёга бергусиз гавҳар тўла хазинасини ўз халқига, ўз даврига, ўз фарзандларига қўш қўллаб тутиб турибди.

Миртемир.

9- §. а унлиси: лабланмаган, олдинги қатор (тил олди) кенг унли товушдир. Бу товуш, одатда, юмшоқ ўзакдаги тил орқа **к**, **г** ва бошқа тил олди ундошлари билан ёнма-ён келганда олд қатор, очиқ э товуши сифатида юмшоқ айтилади: *ака, мана, олам, катта, калла, салла, гала* каби. Лекин чуқур тил орқа **к**, **ғ**, **х** ундошлари билан бирга келганда орқа қатор унлидек қаттиқроқ талаффуз қилинади: *қанд, қарз, ғализ, ғараз, ҳат, ҳамир* каби. Бошқа тиллардан қабул қилинган сўзларда ҳам шу хилда айтилади. Масалан, *Анна, Тельман,*

халқ, парта, қалам, маъқул, гаш, март, машина, альманах сўзларидаги **а** унли товушининг талаффузини қиёс қилиб кўринг. Аслида бу мисоллардаги, хусусан, рус тилидан кирган сўзларда қатнашган **а** фонемаси ҳолатига кўра қаттиқ ва тил орқа фонема ҳисобланади. Икки ҳолда ҳам **а** ҳарфи орқали ифодаланади.

11- машқ. Матнни ўқинг ва сўзлардаги **а** унлисини тавсифланг.

УЛҚАН САНЪАТҚОР

Таниқли педагог ва жамоат арбоби Рассоқ ака Хамроев 75 та кинофильмда, 104 спектаклда турли туман характердаги бадиий ва публицистик ҳамда ҳужжатли образлар яратди. 74 та асарни саҳналаштириди. У 700 та кинофильм дубляжида овоз берниб, ажойиб дикцияга эга бўлган фонолог эканлигини ҳам кўрсатди.

Рассоқ ака ёш талантларга ўта ғамхўр ва талабчан педагог эди. У 26 йил А. Н. Островский номидаги Тошкент театр санъати ва рассомлик институтида актёрлик маҳорати ва режиссурадан дарс берди. Шу боис таниқли педагогга 1978 йили «профессор» унвони берилди.

Давримизнинг етук санъаткори яратган эсда қоларли бадиий образлардан Нозим («Тоҳир ва Зухра»), Хисрав («Фарҳод ва Ширин»), Фердинанд («Макр ва муҳаббат»), Пантолоне («Маликан Турандот»), Арслон («Тор-мор»), Муқими («Муқими»), Ҳамза («Ҳамза»), Мальволио («Ўн иккинчи кечा»), Ҳўжа Насриддин («Насриддиннинг саргузаштлари»), Беруний («Беруний»), Ҳазрат («Оловли йўллар») кабилар ўзбек театр ва кино санъатида салмоқли ўрин тутади.

10- §. о унлиси. Бу унли лабланмаган, орқа қатор (тил орқа) кенг унли товушдир. Ёндош товушлардан қатъи назар сўзларнинг барча бўғинларида келиб, чўзиқ унли сифатида талаффуз этилади: *она, ов, ош, нон, бола, бодом, саноат, қорамол* каби. Үзлашма сўзларда бу унли ўзбекча у ёки ў билан **о** ўртасидаги (**о**) товуш каби айтилади: *опера (opera), болт (bolt), нота (nota), роль (роль), ток (ток)* каби. Аммо бундай сўзларнинг урғусиз бўғинларида **о** унлиси **а**, и товушларидек талаффуз қилинади: *трактор (трактир), директор (директор)* каби. Бироқ аслига мувофиқ ҳамиша **о** ёзилади.

5- топшириқ. Қуйидаги сұздарда о ва а ҳарфларининг ёзилишини ва уларнинг құшалоқ келишини, шу ҳарфлар воситасыда ифодаланған товушларнинг ҳар бир сұздаги аниқ талаффузини тушунтириңг. Ёзилишини эсда сақланг.

I. Осмон, төғ, сой, офтоб, ҳаво, наво, бронза, ботаника, фонетика, вокзал, футбол, глобус, ўрізор, ревизор, телевизор, агрессор, инкубатор, экватор, новатор, стабилизатор, аттор, гавда, гавжум, давлат, давр, жавлон, жавоб, кавуш, камол, муюмала, муаллақ.

II Манфаат, матбаа, мутолаа, мудофаа, мурожаат, мутаассиб, таажжуб, тааллуқ, таассуб, таассурот, таас-суф.

III. Фаолият, фаол, маориф, жамоа, зироат, соат, какао, итоат, қироат, бадий, шоир, шуаро, баобрү, иншоот, мажмуа, мемуар, наинки, вакуум, воқеа, доимо, доимий, диалог, воқеий, мушоира.

12- машқ. Гапларни күчиринг. а ва о унлиларининг талаффузи ва ёзилишини тушунтириңг.

Иккинчи чорак тугаб, болалар қишки таътилга чиққандан бери Содиқнинг күнгли жуда ғаш, иши ҳеч ривож топмайди, ривож топса ҳам, қадр топмайди. Бўлмаса, озмунча ишлар қилиб қўйдими? Унинг ўрнида бошқа одам бўлса, районга байроқ бўларди: мактабни таъмирашни муддатидан аввал сифатли қилиб тугатди. Тежаб қолган пулига спорт майдончаси қурди, минг ёққа елиб-югуриб тарих кабинети билан физика кабинетини кўнгилдагидек қилиб жиҳозлади. Ҳўжалик мудирининг қақир-қуқури банд бўлиб ётган катта подвалнинг ярмини таъмирлаб, буфетга берди-да, буфет ўрнини кутубхонага қўшди, унинг ёнида қироатхона қилди. Юқори синф болаларининг қучи билан ғишт қўйиб, турли тўғаракларнинг ишлаши учун ҳовлининг бир четига алоҳида икки-уч хона қурди. Ўзи лой кечиб ишлади. Ёшроқ ўқитувчиларни ҳам сафарбар қилди. Бу ишларни самарали тугатгани ҳақида район раҳбарлариға ўз вақтида ахборот берди. Қелиб кўришиб, маъқуллаб кетишиди, район маорифи бўлимининг мудири: «Қани энди сизга ўшшаган ташаббускор директордан кўпроқ бўлса!»— деб қўлини сиқди. (*Шұҳрат*.)

11- §. ә (e) унлиси. Бу унли лабланмаган, олдинги қатор (тил олди), ўрта кенг унли товуш ҳисобланади. Сўз таркибидаги ўрнига қараб турлича айтилади ва ёзилади:

а) сўз бошида ва очиқ бўғинда келса, очиқроқ талаффуз қилинади: *эрта, экмоқ, мева, текин* каби;

б) икки ундош орасида ва ёпиқ бўғинда келса, нисбатан ёпиқроқ талаффуз этилади: *кетмон, мерган, тепки, сезгир* каби;

в) ўзбекча сўзларнинг бошида фақат э ҳарфи билан ёзилади: *экин, эшик, эртак, эл* каби. Сўз бошида е ҳарфи келгандга эса ёлашган (й+э) товушни билдиради: *елкан, емоқ, етуқ, етим* каби;

г) сўз ўртасида, ундошлар орасида ва улардан кейин доим е ҳарфи билан берилади: *кел, сен, демоқ, беzaқ, терак, чечан* каби.

6- топшириқ. Луғатдан таркибида э (е) унлиси бўлган 10 та мадданий-маърифий атама топинг ва бу товушнинг талаффузи ҳамда ёзилишини тушунтиринг.

13- машқ. о ва э унлиларига алоҳида тавсиф бериб, ёзилишига аҳамият беринг. Ҳар бирининг талаффузидаги фарқларни тушунтиринг.

Бир йилдан сўнг Отабек уста Олим билан бирга Тошкентга келди. Ҳожи ва Ўзбек ойим оғиз очиб, ундан ранжий олмадилар. У меҳмонлар каби эди. Отаси ва онаси билан очилиб сўзлашмади. Уста Олим билан бир ҳафта чамаси Тошкентда туриб, энг сўнгги кеч ёлғиз кўйи Кумуш қабри ёнида бўлди. Отабек ҳолсизланниб, оёқ узра турди ва орқасидаги ярим яланғоч кўланкани кўриб, бир неча қадам қабр томонга тисланди... Кўланка ялингансимон унга яқин юриб келди.

— Ким бу?

— Мен Кумуш!..

Отабек товуш эгасини таниди. Бу мажнуна Зайнаб эди.

— Кет мундан!

— Мен Кумуш!..— деди яна Зайнаб, аммо кетмай иложи қолмади. Зероки, дунёдаги энг яқин кишиси унга «кет!» амрини берган эди.

Зайнаб орқасига қарай-қарай Отабекдан узоқлашди. Отабек қайтиб унга қарамади, қабр ёнига тиз чўкли.

Эртаси куни Ўзбек ойим йиғлай-йиғлай Ёдгорбек учун тикирган кийимларини ўғлига топширди. Отабек уста Олим билан бирга Марғилонга жўнади. Бундан сўнг Отабек Тошкентга қайтиб келмади, бир неча қайта Ўзбек ойимнинг ўзи Марғилонга бориб келди. (A. Қодирий.)

УНЛИ ТОВУШЛАР ТАВСИФИ

Тилнинг тик ҳаракатига кўра	Тилнинг ётиқ ҳаракати ва лабларнинг иштирокига кўра	
	олд қатор, лабланмаган	орқа қатор, лабланган
юқори (тор) унлилар ўрта (ўрта кенг) унлилар қўйи (кенг) унлилар	и э а	ӯ ӯ о

Е, Ё, Ю, Я (ЁЛАШГАН) УНЛИЛАРИНИНГ ТАЛАФФУЗИ ВА ИМЛОСИ

12-§. Бу ҳарфлар сўз бошида, айриш ва юмшатиш белгиларидан кейин ҳамда унлидан сўнг келганда икки товуш (е-йэ, ё-йо, ю-йу, я-йа)ни билдиради ва шунга кўра (йо) ёлашган дейилади.

е унлиси:

а) енг, ёллиғич, елдирмоқ, подъезд, съезд каби сўзларда бўғин бошида ёки айриш белгисидан сўнг, емиси, едирмоқ, етук каби сўзларда айрим бўғинни ташкил этганда ва самодержавие, телевидение каби сўзларнинг охирида йэ (й+э) товуш бирикмаси ўрнида ёзилади;

б) икки ундош орасида ёки очиқ бўғинда э (е) тарзida талаффуз қилинадиган товуш ўрнида ёзилади: мен, сен, тез, ҳеч, кеча, декабрь, перо, печак каби.

ё унлиси:

а) сўз ё бўғин бошида келган ёки ўзи айрим бўғинни ташкил қиласган йо (й+о) товуш бирикмаси ўрнида ёзилади: ёд, ёз, ёстиқ, диёр, саёҳат, зиёфат, биёбон каби;

б) баъзи русча-ўзлашма сўзларда юмшоқроқ талаффуз этиладиган ундошдан сўнг келадиган о ўрнида ёзилади: зачёт (зачъот), режиссёр (режиссъор), самолёт (самольот), пулемёт (пулемъот).

Аммо район, майор, Нью-Йорк каби сўзларда бўғин бошида ё эмас, йо ҳарфий бирикмаси ёзилади.

ю унлиси:

а) сўз ё бўғин бошида келган ёки ўзи айрим бўғинни ташкил қиласган йу (й+у) товуш бирикмаси ўрнида ёзилади: юпқа, юрт, юксак, буюк, туюлмоқ, юган, юзаки, юмор, юмуш, муюлиш каби;

б) баъзи русча-ўзлашма сўзларда юмшоқроқ та-
лаффуз этиладиган ундошдан сўнг келадиган у ўр-
нида ёзилади: *парашют* (парашъут), *бюджет* (бъуд-
жет).

я унлиси:

а) сўз ё бўғин бошида келган ёки ўзи айрим бўғин-
ни ташкил этган йа (й+а) товуш биримаси ўрнида
ёзилади: *яйлов*, *ялпи*, *якшанба*, *суяк*, *ноябрь*, *мия*, *қия*;

б) баъзи русча-ўзлашма сўзларда юмшоқроқ та-
лаффуз этиладиган ундошдан кейин келадиган а ўр-
нида ёзилади: *сентябрь* (сентъабрь), *октябрь* (октъа-
брь), *отряд* (отръяд) каби.

**7- топшириқ. е, ё, ю, я ҳарфлари иштирокида сўзлар топиб, шу
ҳарфларнинг қайси товушлар ифодаси эканини айтинг. Улар ишти-
рокида бир нечта гап тузинг.**

**14- машқ. Гапларни ўқинг. о, ё, е ҳарфларини топиб, алоҳида-
алоҳида изоҳланг. Талаффузи ва ёзилишини тушунтириңг.**

Тошкентнинг мўътадил иқлими қор тингандан кейин
билинади. Офтоб ҳали қор ташлаган суюқ, оқиш бу-
лутлар ортидан чиқмаган бўлса ҳам, тушга бориб ҳам-
маёқ илиб кетади. Тарновлардан тушган томчилар оп-
поқ қорга хол қўяди. Еру кўк илк кўкламдагидай
юмшаб қолади.

Лекин кечаси осмон чарақлаб очилади-ю, аёз ўн-ўн
беш даражага чиқиб кетади. Томлардан оқиб тушишга
улгурмаган қор суви узун сумалакларга айланади.

Қирчиллама қиши.

Бироқ тонг отиб, офтоб чиқади-ю, кўлмаклар музи
тешила бошлайди, тарновлар яна тилга киради, тун
совуғида юпқа туюлган пальтолар кундуз зилдай оғир-
лашиб кетади.

Айни навбаҳор.

Офтоб ботиб, юлдузлар чиққач, тарновлар яна су-
кутга кира бошлайди, бўғотлар соқоли узая кетади, оёқ
тагида қатқалоқ тақиллашга тушади.

Шунақа, ҳар куни тушда навбаҳор-у, тунда қирчил-
лама қиши, тонг отгандан кейин эса яна аста-секин кўк-
лам кираётгандек бўлади.

Зуфар Ҳакимовичнинг кайфияти ҳам бир қанча вақт
шундай кескин тебраниб юрди. Кўнгли зимистон бўла
бошлаганда бирдан ё проректор Назаров ёрдам қилиб
қолар ёки Зокирнинг мақоласига ўхшаган бирор нар-
са пайдо бўлар ва кўнглини яна кўклам қилиб юборар

әди. Лекин сўнгги вақтларда унинг кўнглидан аччиқ қиши совуғи ҳеч аримай қолди. (П. К.)

8- топшириқ. у ва ю товушлари иштирок этган сўзлар топинг. у товуши сўзининг бошида, ўртасида ва охирида келган ҳолатларга гап тузинг.

Н а м у н а: *узум, буви, чолғу* каби. Талаффузидаги фарқларни тушунтириңг.

9- топшириқ. Х. Абдураҳмонов, Н. Маҳмудовларининг «Маданий-оқартив ишлари терминларининг қисқача изоҳли лугати»дан ёлашган унлиларнинг ҳар бирига 4 тадан сўз топинг ва бу унлиларни тавсифланг.

УНДОШ ТОВУШЛАР ТАВСИФИ

13- §. Ундош товушларнинг турлари шовқин ва овознинг иштирокига кўра белгиланади. Ундош товушлар таркибида шовқин миқдори овозга нисбатан кўп бўлса ёки овоз мутлақо қатнашмаса, бундай товушлар шовқинлилар деб номланади. Агар овоз миқдори устунлик қиласа, бундай товушлар сонор (овоздор) саналади.

Шовқинли ундошлар овознинг иштирокига кўра жарангли ва жарангсизларга бўлинади.

Жарангли ундошлар таркибида шовқин билан бирга маълум даражада овоз ҳам иштирок этади: **б, в, г, д, ж, дж, з, й, ғ.**

Жарангсиз ундошлар овоз мутлақо қатнашмайдиган, фақат шовқиндангина иборат бўлган товушлардир: **к, п, с, т, ф, х, ц, ч, ш, қ, ҳ.** Нутқ пайтида баъзан жарангли товушлар жарангсизлар билан ўрин алмашади: **сабаб — сабап, мақсад — маҳсат, митинг — митинк** каби. Шунга мувофиқ, жарангли товушларнинг бир нечтаси ўзининг жарангсиз жуфтларига эгаки, тўғри талаффузда бу ҳолатни эътиборга олиш лозим. Товушлар талаффузини ўзлаштириш ва тўғри ёзиши ўрганиш жараёнида жуфти бор товушларни биргаликда тавсифлаш, машқ қилиш мақсаддага мувофиқдир.

Жарангли ундошлар	б	в	д	ж	з	к	дж	ғ	й	—	—	—
Жарангсиз ундошлар	п	ф	т	ш	с	г	ч	қ	—	ҳ	ҳ	ц

10- топшириқ. Үндош товушларни жарангли-жарангсизлик хусусиятини сақлаган ҳолда бир неча марта талаффуз машқларникиң бажаринг. Масалан, *б-п*, *б-п*, *б-п*; *д-т*, *д-т*, *д-т*; *к-г*, *к-г* каби.

15- машқ. Ҳар бир сўздаги үндошларни жарангли ёки жарангсиз тарзда талаффуз қилинг.

Савоб — савобли, жавоб — жавобсиз, талаб — талаба — талабчан, баргли — баргсиз — баргак, ижрочи — ижодкор — ижтимоий, мажлис — жазо — ажаб, саёз — саёзланмоқ — сас, мадад — мандат — маддоҳ, уруғ — уруғчилик — улуғвор, даво — вафо — сафо, тус — куз — суз, сотовлди — босволди.

16- машқ. Шеърни ифодали ўқинг. Жарангли ва жарангсиз үндошлар талаффузини тушунтиринг.

ОНА ДЕГАН НОМ..

Дейдилар, қаҳрли баҳодирлар ҳам
Жангларда жон берар чоғи мардона,
Беҳад азобларга чидаб сўнгги дам,
Битта сўз дермишлар шивирлаб: Она.
Улуғ бир донишманд оламни шарҳлаб,
Ахийри танибди туққан элини.
Забон баҳш этганга эҳтиром сақлаб,
Она, деб атабди илик бор тилини.
Дунё шоирлари Ватан шаънига
Сифат ахтармишлар қатор ва қатор
Ниҳоят, келмишлар битта маънига:
Она-Ватан дея битмишлар ашъор,
Бисёр бўлса агар бол ҳам бекадр,
Такрор айтилганда рангсиздир калом.
Бу ёруғ оламда Ватан биттадир,
Биттадир дунёда Она деган ном!

(Абдулла Орипов.)

14- §. Үндош товушлар нутқ аъзоларининг бирор ерида тўсиққа учраб, шу тўсиқдан портлаб ёки сирғалиб ўтиб кетишига кўра ҳам тавсифланадилар.

Икки нутқ аъзосининг жипслашуви натижасида ўпкадан чиқаётган ҳаво оқимининг зарб билан портлаб ўтишидан портловчи үндошлар ҳосил бўлади. Булар **б**, **г**, **д**, **ж**, **к**, **п**, **т**, **ц**, **ч**, **қ** товушлари дир. Портловчилар портлашнинг хусусиятига қараб соф ва қоришиқ портловчиларга ажралади. Соф портловчилар бир усул — портлаш усули пайдо бўлади: **б**, **г**, **д**, **к**, **т**, **п**, **ц**. Қоришиқ портловчилар икки усул асосида — тўла бўлмаган портлаш ва ундан кейинги сирғалиш натижасида вужудга келади: **д + ж = дж**, **т + с = ц**, **т + ш = ч**.

Икки нутқ аъзосининг ўзаро жипслашмасдан, бир-

бирига яқинлашиши натижасида ҳаво оқимининг улар орасидан ишқаланиб-сирғалиб чиқишидан **сирғалувчи** ундошлар ҳосил бўлади. Булар **в, ф, ж, ш, з, с, й, х, ҳ, ғ** товушларидир.

11- топшириқ. Портловчи ундошлар қайси нутқ аъзоларининг жипслашувига кўра фақат портлаш ва портлаш-сирғалиш билан ҳосил қилинишини тушунтиришинг ва уларни тўғри талафуз қилинг.

12- топшириқ. Сирғалувчи ундошлар қайси нутқ аъзоларининг яқинлашуви билан қандай оралиқдан сирғалиб ўтишини тушунтиришинг, уларни тўғри талафуз қилинг.

17- машқ. Сўзларни тўғри ўқинг. Ундош товушларининг портловчи ёки сирғалувчи сифатида талафуз қилиниш сабабини изоҳланг.

Арфа, бас, чилдирма, жумла, дубляж, овоз, қайтаргич, саҳна, каталог, фонд, ижро, безак, сарлавҳа, лирик, санъат, адаб, актёр, ноғора, ғижжак, кафт, чечан, сюжет, диалог, адабий, ҳаракат.

ЖАРАНГЛИ ВА ЖАРАНГСИЗ УНДОШ ТОВУШЛАР ТАЛАФУЗИ ВА ИМЛОСИ

15- §. 6-п ундошлари:

а) **б** — лаб-лаб, портловчи, жарангли ундош товуш. Сўзнинг бошида, ўртасида ва охирида учрайди. Сўз охирида келган **б** доим жарангсизланиб талафуз қилинади: *мактаб* — *мактап*, *сароб* — *сароп*. Айрим ҳолларда сўз ўртасида ҳам жарангсизлашади: *мубтало* — *мултало*, *ибтидо* — *иптидо*.

Б ундоши баъзан оғзаки нутқда сўз бошида **м** каби талафуз қилинади: *бурун* — *мурун*, *бунча* — *мунча*. Лекин бундай ўзгаришлар ҳозирги орфографияда акс эттирилмайди. Баъзи топонимларда орфографиянинг анъанавий услубига кўра ўз ҳолича, яъни айтилишига кўра ёзилади: *Туямўйин гидроузели* ёки *Мурунтов кони* каби.

Баъзан унлилар орасида, қўшма феъл таркибидаги *бермоқ* феълининг бошида **б** портловчиси сирғалувчи **в** каби айтилади: *кабоб* — *кавоб*, *ароба* — *арава*, *кела берди* — *келаверди*.

б) **п** — лаб-лаб, портловчи, жарангсиз ундош. Сўз бошида, ўртасида ва охирида келади. Сўзнинг бошида ва охирида келганда, кўп вақт **б** ва **ф** ундош товушлари ўрнида талафуз қилинади. Лекин аслига мувофиқ **б** ва **ф** ёзилаверади: *фабрика* — *пабрика*, *келиб* — *келип* каби.

13- топшириқ, б-п товушларини аввал бир неча марта жаранг-ли-жарангсиз ҳолда, кейин уларга унли товушларни қўшган ҳолда тўғри талафуз қилинг.

18- машқ. Матнини ифодали ўқинг, б-п товушларини топиб, талафузи ва ёзилишини изоҳланг.

Бир куни Сора опа илтимосимга биноан, монолог айтиб бердилар. Биргина томошабин қаршисида ҳам у киши образга кириб, жозибали бўлиб кетар, юракдан астойдил сўзларди. Бир марта Сора опа Аброр аканинг «Лайли ва Мажнун» спектаклида Мажнун ролини қандай ижро этганини сўзлаётиб, унинг қўшигини эслаб қолди.

— Айтиб беринг, майли, икки қатор бўлса ҳам,— деб туриб олдим.

Сора опа менга эмас, стол устидаги гулдонда турган қип-қизил лолаларга қараб қўйди-да, майин овозда аста қўшиқ бошлиди. Икки қаторгина айтди. Лекин унинг юзи худди гулдондаги баҳор лолаларидек қип-қизариб кетди. Ҳа, худди лолалардек. Худди бирорвнинг олдига ҳеч қачон қўшиқ айтмаган қиз боладек қизариб кетди.

— Вуй, Сора опа, худди анув лолага ўхшаб кетдингиз,— дедим.

— Ана шунақа-да, қўшиқни яхши айттолмайман, қизариб қоламан, овозим йўқ!— деди Сора опа алланечук ўзини ноқулай сезиб. Аслида эса Сора опа гарчи қўшиқни паст, майин овозда айтган бўлса-да, ўша қўшиқдаги сўз таъсирига берилган, бир дақиқа бўлса-да, образга кирган эди. Ҳар бир сўз маъносини чуқур тушуна билиш, вазиятга, воқеа ривожига қараб айта билиш ҳам санъат.

— Масалан,— дейди Сора опа,—«Кеч кирди» деган гапни қирқ хилда айтиш мумкин. «Кеч кирди» беписандлик билан, гўё шошадиган жойим йўқ, деган маънода айтиш мумкин. «Кеч кирди»— ҳайрат билан вақт тез ўтиб кетганини билдириш мумкин ва ҳоказо. Ҳар бир сўз томошабиннинг юрагига бориб етсин, ҳар бир ифода, ҳаракат сўз маъносини англатсин!

«Сўзни ўйнамагин,— дерди Аброр акам,— унинг мазмунини, моҳиятини ўйнагин. Агар сўзни ўйнайдиган бўлсанг, гапларингнинг асл моҳияти очилмаса, унда партнёрга ёрдам беролмайсан». Ҳа, сўз, ҳатто товуш устида қаттиқ ишлашни ҳам Аброр акамдан ўрганганман, Аброр акам овознинг тўлқинланиб узоққа кетишига айниқса аҳамият берардилар.

Овознинг тўлқинланиб узоққа кетиши... Масалан,
«Навоий»даги Гулида:

Жаҳон ғийбат ила бўҳтонга кондир
Қиличдин, найзадин бўҳтон ёмондир,—

деганда кондир, ёмондир сўзларидаги «о» товуши Со-
рахоним талаффузида, худди каттакон чинни пиёлага
кумуш қошиқ билан бонг урилгандек узоқ жаранглай-
ди, юракларни зир-зир титратади.

(С. Маҳмудова. «Бир юракнинг юз
жасорати»дан)

16- §. в-ф ундошлари:

1. в — лаб-лаб, сирғалувчи жарангли ундош товуш.
Сўзнинг бошида, ўртасида ва охирида кела олади:
вақт, совун, палов каби. Лекин соф ўзбекча сўзларда в
сўз бошида асосан қўлланмайди.

Хозирги пайтда талаффузда в товушининг лаб-тиш
кўриниши тобора кенгроқ қўлланмоқда. Шунинг учун
сўз охирида келувчи в товуши кўпинча п га, баъзан ф
га ўтади: *Норқулоп, Ерқулоп, Петроп, Аҳмедоф* каби-
лар. Лекин қоидага мувофиқ в ёзилаверади.

2. ф — лаб-тиш, сирғалувчи, жарангсиз ундош то-
вуш. Сўзнинг бошида, ўртасида ва охирида келади:
фойда, афзал, муфассал, латиф каби. Талаффузда
баъзан п ўтиши мумкин: *фабрика — пабрика, дафтар — дантар, саф — сап* каби. Бироқ аслига мувофиқ
ф ёзилаверади.

14- топшириқ. в-ф ундошларини жарангли-жарангсиз ҳолда тўғ-
ри талаффуз қилинг. Бу товушларнинг аниқ талаффузини қўйидаги
байт мисолида мустаҳкамланг.

Не бўлди дардима, эй бевафо, даво қилсанг,
Вафога ваъда қилиб, ваъдага вафо қилсанг.

(А. Навоий.)

19- машқ. Матн сўзларидаги п, в, ф товушлари талаффузини
қиёсланинг.

УМРНИНГ ЭНГ СЕҲРЛИ ФАСЛИ..

Ўзбек тўйи деганда дафъатан карнай садоси, сур-
най ноласи, ноғоранинг кўнгилларни ҳаяжонга чулгай-
диган шўх оҳангини эшитгандек бўламиз. «Шу кунлар-
га етказсин-а», деб ният қиласиз беихтиёр. Ахир, хо-
надонингизга келин келади. Ёки қизингиз келин бўлиб
бошқа бир оилани обод қиласиз.

Келин-куёвлик уйларнинг файзи, меҳригиёси ўзгача. Гўё бу уйлардан нур тараалаётгандек, анбар иси димоққа урилаётгандек. Ҳар бир ташланган қадамдан андишаю ҳурматни, эъзозни кўраётгандек бўласиз.

Онахонларимиз бўлажак күёвлари эсли-ҳушли, ба-маъни бўлишини тилайдилар. Келинининг эса иболи, назокатли, ақлли-ҳушли ва яна... соchlари тақимини ўпib туришини орзу қиладилар... («Саодат» журналидан.).

17- §. г-к ундошлари:

а) г — тил орқа, портловчи, жарангли ундош товуш. Сўзнинг бошида, ўртасида ва охирида келади: *гўзал, гул, эгар, барг, педагог*. Баъзан сўз охирида жарангсиз каби эшитилади: *туг — тук, барг — барк, диалог —диалок* каби.

Охири г, к билан тугаган сўзларга г ундоши билан бошланувчи қўшимча қўшилганда г товуши ҳам жарангсиз талаффуз қилинади ва шундай ёзилади: *тег+ган — теккан, ичак+га — ичакка, нок+га — нокка*. Лекин рус тили орқали ўзлашган сўзларни ёзишда бу қоида ҳисобга олинмайди: *педагогга, филологга*;

б) к — тил орқа, портловчи, жарангсиз ундош товуш. Сўзнинг бошида, ўртасида ва охприда келади: *кўз, тулки, тилак, билак* каби.

Сўзнинг охири к билан тугаганда, эгалик аффикси қўшилганда к жарангли г га айланади ва шундай ёзилади: *билик-им — билагим, тилак-им — тилагим* каби.

15- топшириқ. г-к товушларини олдин бир неча марта жарангли-жарангсиз тарзда, кейин уларга уни товушлар қўшиб, бўғин тарзida талаффуз қилинг.

20- машқ. г-к товушларини тўғри талаффуз қилган ҳолда тез айтишларни машқ қилинг.

1. Гулнор гузардаги гулзордан гул узди.
2. Кафтдек тепа, кафтдек тепа устида кемадек капа.
3. Оқ кўйлакка кўк тугма, кўк кўйлакка оқ тугма.

21- машқ. Қуйидаги сўзлардаги г, к товушларини тавсифланг.

Гармон, грим, акапелла, тинган, тилак, гардиш, контрабас, гипербола, квартет, тиккан, тикан, камертон, дугоҳ, карнавал, арк, дарсга, педагогга, композиция, кўпик, иштироки.

22- машқ. Шеърни ифодали ўқинг. г ва к ундошларининг талаффузига эътибор беринг.

Китобларда гуллаб ётар севинчлар,
Китобларда чўллаб ётар орзулар,
Китобларда занглаб ётар қиличлар,
Китобларда кўллаб ётар қайғулар.

Китобларда Фиркўк отлар кишинагай,
Эртак айтур китобларда чинорлар.
Китобларда тоғлар қадам ташлагай,
Китобларда — ишқ битилган туморлар.

Игна билан қудук қазган донолар,
Иўқ нарсани бордай ёзган донолар,
Фикрларнинг уммонида тап тортмай,
Сўз дурларин излаб сузган донолар...

Яхши ҳамки, китоблар бор оламда,
Кўкка учсанг — оёғингдан тортади.
Таркидуни ёилиб гоҳи аламдан,
Ерга кирсанг — қулогингдан тортади.

Китобларга берсанг инон-ихтиёр,
Тоғлар ошиб, боғлар бунёд этасан.
Идрокингдан жонланади йўғу бор,
Қўл узатсанг, орзу қушин тутасан!..

Оддий қогоз эмас, асли китоблар —
Тафаккурдан туғилган ҳур офтоблар!

Ойдин Ҳожиева

18-§. д-т ундошлари:

а) д — тил олди, портловчи, жарангли товуш. Сўзниг бошида (*девор, довон*), ўртасида (*шудгор, буғдой*), охирида (*озод, обод*). Сўз охиридаги д доимо жарангсиз талаффуз қилинади. Бироқ аслига мувофиқ д ёзилаверади: *банд* — *бант*, *хурсанд* — *хурсант*, *авлод* — *авлот* каби. Сўзниг охирида д товушидан олдин и келса ва бундай сўзларга қўшимчалар қўшилса ҳам д талаффуз этилмайди, аммо ёзилади: *пайванчи* — *пайвандчи*, *баланроқ* — *баландроқ*, *хурсанчилик* — *хурсандчилик* каби;

б) т — тил олди, портловчи, жарангсиз товуш. Сўзниг бошида (*том, тоғ*), ўртасида (*четан, ватан*), сўз охирида (*ҳаракат, йигит*) кела олади.

Сўз охиридаги т талаффузда кўпинча тушиб қолади. Бироқ аслига мувофиқ ёзилаверади: *дўст* — *дўс*, *дараҳт* — *дараҳ* каби. Бундай сўзларга қўшимчалар қўшилганда ҳам талаффузда т ундоши эшитилмай қолади, аммо бу ҳол ҳам имлода акс этмайди: *дўслик* — *дўстлик*, *дасрўмол* — *дастрўмол*, *машинисга* — *машинистга* каби.

Жонли нутқда т билан тугаган сўзларга ч ундоши

билин бошланувчи қўшимчалар қўшилганда т нинг ҳам ҹ га айланиш ҳодисаси юз беради: *сутчи — суччи, йигитча — йигичча, уятчан — уяччан* каби.

16- топшириқ. д-т ундошларини жарангли-жарангиз тарзда талаффуз қилишни машқ қилгач, *др, тр* товуш бирималарига унли товуш қўшиб, қиёслаган ҳолда талаффуз машқларини бажаринг.

23- машқ. Матндан д, т товушли сўзларни топиб, талаффузи ва ёзилишини изоҳланг.

ТУРКИСТОНДА ТЕНГИ ЙҮҚ АРТИСТ

Ўзбек театри асосчиларидан бири, Ҳамза номидаги Узбек Давлат академик драма театрининг ташкилотчиси Маннон Уйғур саҳна фаолиятини 19 ёшида «Турон» труппасида бошлаган. Дунёқарашининг шаклланишида Ҳамза билан танишиши ва ижодий ҳамкорлиги муҳим роль ўйнади. 1919 йилда ўзи ташкил қилган труппага раҳбарлик қилиб, Туркфронт сиёсий бошқармасига қарашли тарифбот поездлари составида Оқтуба ва Фарғона фронтларида қизил аскарларга маданий хизмат қилди.

Маннон Уйғур 1924—1927 йилда Москвадаги ўзбек драма студиясида ўқиб, Е. Вахтангов режиссураси билан назарий ва амалий танишди. Аксарият комик ролларни ва драматик, трагик образларни ҳам маҳорат билан яратганлиги учун 20-йилларнинг бошида Туркистонда тенги йўқ актёр ҳисобланган.

Уйғур постановкачи режиссёр сифатида ўзбек ва қардож халқлар тилларида ёзилган юздан ортиқ комедия, сатирик, драма, музикали драма, трагедия асарларини саҳналаштириб, ўзбек театри ривожига катта ҳисса қўшган.

Н. Гоголнинг «Ревизор», В. Шекспирнинг «Ҳамлет», «Отелло» асарларини саҳналаштириши Уйғур режиссёрлик санъатининг энг баланд чўққилари ҳисобланади ва бу билан жаҳон санъати тарихида ўчмас из қолдирди.

19- §. ж-ш ундошлари:

а) ж — тил олди, сирғалувчи, жарангли товуш. Бу товуш, асосан, форсча-тоҷикча ва русча-ўзлашма сўзларда қўлланади: *аждар, мужда, гижда, жанр, гараж* каби. Жонли сўзлашувда сирғалувчи ж товуши юмшоқроқ, қоришиқ ж (дж) ёки ш, ч тарзида айтила-

ди: *жюри* — *джеюри*, *массаж* — *массаши*, *сажда* — *саҷда* каби;

б) *ш* — тил олди, сирғалувчи, жарангсиз ундош. Сўзнинг бошида (шоҳ, шовқин), ўртасида (тумшук, юмшоқ) ва охирида (бош, тош, қуёш) кела олади. Тил олди ундошлари билан келганда юмшоқ (*шаҳар*, *ширин*, *ишқал* каби), орқа қатор унлилар ва чуқур тил орқа ундошлари билан ёнма-ён қелганда эса қаттиқ (*шоҳ*, *шўх*, *қишлоқ* *қашқир* каби) талаффуз қилинади.

17- топшириқ. ж товушига ундошлар, кейин унли (*эждр-а*, *жэздр-у* тарзида), ш товушига эса унли, кейин ундошлар (*шиш*, *шашт* каби) қўшган ҳолда бир неча марта талаффуз машқларини бажаринг.

18- топшириқ. ш товушини қўйидаги тез айтишларда тўғри талаффуз қилинг.

1. Шокир шамолда шолини шариллатиб шопиряпти.
2. Қишида кишимиш пишмасмиш, кишимиш еган кишининг тиши қамашмасмиш.
3. Хасқаш хашакни ҳаш-паш дегунча хаскашлайди.

24- машқ. Матнни оҳанг билан ўқинг. ш ва ж сирғалувчи ундошларининг талаффузини тушунтиринг.

ЗАБАРДАСТ САНЪАТКОР

Халқимизнинг суюкли санъаткори Шукур Бурҳонов бутун табиати ва эътиқоди билан саҳна учун туғилган, фидойи санъаткор, эзгу ниятларига эриша олган баҳтиёр актёр. Унинг баҳти шундаки, табиат актёрга саҳна талқинларининг барча гулшанларидан чечак тера билиш имкониятини берган. Драма, трагедия, комедия — буларнинг ҳаммаси Шукур Бурҳоновнинг ижодига хос. Фоғир, Мирзо Улуғбек, Брут, Эдип, Войницкий, Сквозник-Дмухановский, Сулаймон ота — шу жанрлардан намуна ва обидадир.

Шукур Бурҳонов — халқ санъаткори. Унинг ижоди ўзбек миллий театрининг овози, ўзига хослигидир. Бу ўзига хослик, бу халқчиллик, аввало, Шукур Бурҳонов ижодининг инсоний мундарижаси, тиниқ ва теран бадииятида намоён бўлди.

Истеъодод билан меҳнатнинг бир-бирига эгизак тушунча эканини Шукур Бурҳонов ижоди мисолида айниқса чуқур ҳис этиш мумкин. У ўта заҳматкаш санъаткор эди. Лекин унинг риёзати саҳнада, томошабин ҳузурида сезилмайди. Акс ҳолда, ижодкор меҳнати

ўзининг санъатлик аломатини йўқотиб қўйган бўлур эди.

Шукур Бурҳонов ўзбек театр саҳнаси ютуқларидан беҳад қувонадиган, камчилигидан беҳад ҳижолат тортадиган, қобил, зийрак, ўзига талабчан санъаткор бўлган. Унинг идрокида устозлари Маннон Уйғур, Етим Бобоҷонов ва Аброр Ҳидоятовнинг анъаналари доим барқарор ва барҳаёт эди.

Шукур ака очиқ кўнгил, самимий суҳбатдош бўлса-да, у билан суҳбат қилиш осон ҳам эмас эди. Дилда дарди, кузатувларида зукколик бўлмаган кимса билан улфатчиликни ёқтирамасди. Такаббур, қуруқ савлатларни хуш кўрмасди. У ўзига ҳар нарсани эп кўрмагандек, касбдошлари фаолиятида номуносиб ҳол ёки бирор етишмовчиликни кўрса ранжир, буни дангал юзига айтарди. Ҳар қаерда, ҳар қайси ҳолда ҳам унинг хаёlinи саҳна ва ижод забт этган бўларди. У устози Маннон Уйғурнинг ҳаёт тарзига содик. Зотан, устози: «Шу йўлга кирибман, шу йўлдан кетай», деган аҳдига қилча хиёнат қилмаган эди.

Шукур Бурҳоновнинг жўшқинлиги, эҳтироси, майин ва ҳиссий лиризми қон томирлари каби ягона юрак — актёрнинг реалистик ижодий методига келиб тушади. Унинг шоҳ образлари фикримизнинг далили: Соғир, Улуғбек, Брут, Эдип, Войницкий, Ялангтўш, Сулаймон ота, Незнамов, Шаҳар ҳокими, Сотилмиш, Дундич, Жалолиддин... («Ўзбекистон санъати» журналидан).

20- §. ж (дж)-ч ундошлари:

а) ж (дж) — тил олди, қоришиқ портловчи, жарангли товуш. Бу товуш ўзбек тилининг ўзига хос товушларидан бири бўлиб, сўзнинг ҳар хил бўғинида кела олади: жон, жумла, ажойиб, жажжи, фалаж каби. ж ундоши портловчи д, т товушлари билан ёнма-ён келгандан, сирғалувчи ш ёки соғ ж тарзида айтилади: адждод — аждод, иджтимоий — ижтимоий каби. Жонли тилда сўзнинг охирида жарангсизланади ва ч тарзида талаффуз қилинади: тож, хирож, бож каби;

б) ч — тил олди, қоришиқ портловчи, жарангсиз ундош. Сўзнинг бошида (чўл, чақалоқ), ўртасида (кеча, пичоқ) ва охирида (қилич, ич) кела олади. ч билан тугалланувчи ўзакка қўшимчалар қўшилганда ҳамда айрим сўзларда ч ундоши ш каби талаффуз қилинади, бироқ аслига мувофиқ ёзилаверади: уча — ушта, учди

— уиди, ичдим — иштим, кичкина — кишикина, қарич — қарии каби.

19- топшириқ. ж-ч ундошларини унлилар қўшган ҳолда бўғин-лаб, тўғри талаффуз қилишни машқ қўллинг ва қўйидаги сўзларнинг айтилишига эътибор беринг:

Чанг, чаман, чақир, чашма, чопон, чойнак, чой, чевар, челак, чегара, чилдирма, чинқириқ, чиройли, чуст, чучук, чумчук, чўпон, чўққи, чўнтақ, жаҳон, жанжал, жамол, жом, жой, жосус, жез, жеркиш, жигар, жилва, жилд, жума, жувон, жумбоқ, жўра, жўяқ, жўна.

20- топшириқ. Қўйидаги тез айтишлардаги ж-г товушларини тўғри талаффуз қилинг.

1. Сижжакдаги ғижжакчи жийдадан ғижжак ясармиш.
2. Жажжи жиблажибон жажжи Жўра билан жўра, жажжи Жўра жажжи жиблажибон билан жўра.
3. Бир чала чайла, бир чала чайла ёнида неча-нечачала чайла.
4. Бир токчада уч токча, бир токчада уч токча.

25- машқ. ч ва ж товушларини тавсифланг, талаффузи ва ёзилишини изоҳланг.

КИТОБХОНЛИК

— Юр, сени китобхонликка олиб борай,— дедилар бир куни раҳматли отам Мақсад Собир ўғли.— Китобни ёлғиз ўқишига ўрганиб қолган камина раъйларини қайтармай эргашдим.

Исајон тоғамнинг меҳмонхонасига мулла Муҳаммад Зоҳид домла, Неъматхон бобо, яна бир қанча кексалар йиғилишган эди. Узимча ҳайронман: нега бу кишилар китоб ўқиймиз, деб шунча тараддуздланиб ўтиришибди? Ҳаммаси ўз уйда ўқийвермайдими?

Ниҳоят мутолаа бошланди: мулла Муҳаммад Зоҳид домла йўл-йўл бекасам жилдли китобни қўлга олиб дедилар:

- «Жавомеъ-ул калима»ни давом эттирамизми?
— Шундай бўлсин, тақсир...

Мулла Муҳаммад Зоҳид домла босиқ бир ширадор овоз билан доно-доно ўқир, баъзан тўхтаб ўқиганининг мазмунини тушунтирас, атрофдагиларнинг фикрини сўрарди, сўнг эса йиғилганлар қизғин баҳсга киришишар, ҳар бир сўзнинг мағзи чақиларди. Камина лол бўлиб ўтирадим. Мана, китобнинг мағзини қандай чақиш керак экан!

(Туроб Мақсад)

21- §. 3-с ундошлари:

а) з — тил олди, сирғалувчи, жарангли ундош. Сўз-нинг бошида, ўртасида ва охирида келади: *зарур, зар, қизил, чизиқ, ғоз, қиз* каби. Жонли нутқда сўз охирида келган з товуши жарангизланиб, с товушига мойил талаффуз қилинади, бироқ аслига мувофиқ з ёзилаверади: *борамиз — борамис, оғиз — оғис* каби. Бу ҳолатни з билан тугалланган ўзакка жарангиз ундошлар қўшилганда ҳам кузатиш мумкин: *юз сўм — юс-сўм, сўзсиз — сўссиз, изчил — исчил* каби;

б) с — тил олди, сирғалувчи, жарангиз ундош товуш. Сўзнинг бошида, ўртасида ва охирида келади: *соз, сўз, кескин, масал, либос, олис* каби. э (е), и унлиларидан олдин келганда юмшоқ талаффуз этилади: *сезги, секин, силамоқ, сим* каби.

21-топшириқ. з ундошига д ни, с ундошига т ни қўшиб ургу тушадиган унлилар билан бирга талаффуз қилишини машқ қилинг (зди, зда, сти, ста тарзида).

26- машқ. Қўйидаги мақоллар ва тўртликдаги з, с ундошларини қиёслаб тавсифланг.

1. Кўп сўзнинг ози яхши, оз сўзнинг ўзи яхши.
2. Оз сўз — соз сўз.
3. Ер ҳайдасанг, куз ҳайда
Куз ҳайдамасанг, юз ҳайда.
4. Дўстлар, яхшиларни авайлаб асранг!
«Салом» деган сўзнинг салмоғин оқланг!
Улганда юз соат йиғлаб тургандан
Уни тиригида бир соат йўқланг.

(Мақсад Шайхзода)

27- машқ. Матнни ўқинг. з ва с ундошларини аниқлаб, талаффузи ва ёзилишини тушунтиринг.

БАЛАЛАЙКА

Уч торли, ҳамма торлари баравар чертиб чалинадиган рус халқ музика асбоби. XVIII аср бошида пайдо бўлиб, рус деҳқонлари орасида кенг ёйилган. Балалайкадан яккахонликда ва ансамблда, қўшиқ, лапар, рақсларга жўрнавозликда фойдаланилади. Рус музикачиси, моҳир балалайкачи В. В. Андреев XIX аср охирида балалайкани мукаммаллаштириб, рус халқ чолгу асбоблари оркестрига қўшган.

БАРАБАН

Усул — зарб берадиган урма соз. Товуш баландлиги ноаниқ. Гардиши металл ёки ёғочдан ясалган. Ҳар икки томонига тери қопланган. Барабан 2 хил бўлади:

1. Кичик барабан. Тириллама-рез товуш ҳосил қилиш учун бир томонидаги тери устидан 2—3 тор тортилади. Юмaloқ учли 2 та «чўп» билан чалинади.

2. Катта барабан. Товуши гумбурлайди, йўғон ва паст бўлади. Учига кигиз қопланган чўп — таёқча билан чалинади. Барабанлардан кўпроқ симфоник ва дувховой оркестрларда фойдаланилади.

22-§. F-қ ундошлари:

а) f — чуқур тил орқа, сирғалувчи, жарангли ундош товуш. Сўзнинг бошида, ўртасида ва охирида келади: *fоз, тоға, ўғри, тұғри, туғ, бүғ* каби.

Охири f билан тугаган сўзларга жўналиш келишиги -га, чегара маъносини билдирувчи -гача ва сифатдош ясовчи -ган қўшимча қўшилганда, f жарангсизлашиб, қ га айланади: *боғ-га* — боққа, *тоғ-га* — тоққа, *тоғгача* — тоққача, *туғ-ган* — туққан каби. Бундай сўзларга -ча қўшимчаси қўшилганда эса f товуши x тарзида айтилади: *боғча* — боҳча, *зоғча* — зоҳча, *белбоғча* — белбоҳча каби;

б) қ — чуқур тил орқа, портловчи, жарангсиз ундош товуш. Сўзнинг бошида, ўртасида ва охирида келади: *қуши, қора, ёқа, мақсад, қулоқ, таёқ* каби.

Жонли нутқда сўзнинг ўртаси ва охирида баъзан f тарзида (*шу ёқда* — *шу ёғда*, *ботқоқлик* — *ботқоғлик*, *балиқ* — *балиғ*, *иссиқ* — *иссиғ* каби), баъзан эса x тарзида (*вақт* — *ваҳт*, *нуқта* — *нұхта*, *тўқсон* — *тұхсон*, *оқ* — *оҳ* каби) талаффуз қилинади.

қ ундоши билан тугаган сўзларга эгалик қўшимчалари қўшилганда қ жаранглилашиб f га ўтади ва бу ҳодиса имлода акс этади: *тароқ* — *тароғи*, *қўшиқ* — *қўшиғим*, *ўртоқ* — *ўртоғинг* каби. Аммо бир бўғинли сўзларда, четдан ўзлашган сўзларда бундай пайтда қ ундоши аслича айтилади ва ёзилади: *ҳақ* — *ҳақи*, *тўқ* — *тўқин*, *ишиёқ* — *ишиғиқи*, *ҳуқуқ* — *ҳуқуқим* каби.

22-топшириқ. F-қ ундошлари унлилар қўшган ҳолда бўғин тарзида тўғри талаффуз қилиш машқдарини бажаринг.

23-топшириқ. Қуйидаги тез айтишлардаги F-қ товушларини аниқ ва тўғри айтининг.

1. Фозғоннинг мармари жаҳонга машҳур, бизнинг фозғончилар шунинг учун мағрур.
2. Қўнғироқ қўғирчоқникими, қўнғироқ қўзичоқникими?
3. Симёғочдаги қалдирғоч қайрағочдаги қора қарғага қайрилиб қараганда, қайрағочдаги қора қарға қарагайга қайрилди.

28- машқ. Матнни ифодали ўқинг. F-қ ундошларининг айтилиши ва ёзилишини изоҳланг. Жарангли товушларининг талаффузинга эътибор беринг.

ҚУШИҚЧИГА ОҚ СУТ БЕРГАН ОНА СУЗЛАРИ

«Ботиржоним Москвада туғилган. Биз ўша йиллари Карим акангиз билан актёрлик маҳоратини ошириш учун ўқирдик. «Бўладиган бола бошидан маълум», дейди халқимиз. У чақалоқлигида ҳам ювошгина эди. Қора соchlари жингалак — бир Карим акангизга ўхшаса, бир менга ўхшарди. Бир ёшга тўлиб Москва кўчаларига олиб чиққанимизда, одамлар «ҳинд боласими» деб қизиқиб сўрашарди. У итоатгўй бўлиб ўси. Орли эди. Ортиқча нарса талаб қилмасди. Ортиқча эътибор талаб қилмасди. Қўшиқ айтишини ҳам кеч билдик. Билиб қолиб, мен ўзим қўшиқ ёзиб бердим, аммо артист бўлмайсан, дердим. У ҳўп дерди. Санъат билим даргоҳига ҳам мендан яширинча ўқишга кирган. Эшитиб ноилож рози бўлгандек.

У ўз устида ўзи ишлади. Ўзи турли танловларда ғолиб чиқди. Унинг фалон танловда ғолиб бўлганини матбуотдан ёки радио, телевидениедан эшитардик. Ҳеч қачон ўзи келиб айтмас эди. У эстрада жанрини Ўзбекистонга олиб келибди, ривожлантириби ҳамки, ҳеч иш қилмагандек юрарди. Оддий эди. Мени «Қалонпойим» дерди. Мени бир кун ҳам назаридан четда қолдирмасди. У укаларига одобу ахлоқда ўрнак бўлди. Қечалари билан ухламай ишларди: ёзарди, чизарди, куйларди. Ўз-ўзидан уйимиздагиларда меҳнатга ҳалол муносабат ўйғотарди. Мен ҳали-ҳали кечалари уйғониб Ботиржоним ишляяпти, деб ўйлайман. Унинг қўллари теккан чолғу асбобларини силиб ўпаман. Чизган суратларини кўзларимга суртаман. Бу дунё шу экан, қилган ишларинг қоларкану ўзинг ўтиб кетавераркансан...».

«Ботиржонни чақалоқлигига биринчи бўлиб чўмилтириш учун машҳур халқ артистлари Мукаррама Турғунбоева ва Тамарахонимлар келишган эди. Улар чақалоқни чўмилтириб кўп яхши гаплар айтишган, кулишган, тилаклар тилашган эди. Толега минг шукур, болам яхши одам бўлиб ўсди. Халқ учун хизматдан чарчамади. Уни фақат дард қийнагани йўқ. Уни ўзбек эстрадасини тушунмаганлар ҳам қийнарди. У пайтлар баъзи раҳбарлар хаёлида, ўзбекларга эстрада керак эмас, деган ўй ҳам бор эди. Кўпчилик «бу жанр бизда узоқ умр кўрмайди» деб ўйларди. Ботиржон эса миллий қўшиқларни шу жанрда куйлашимиз керак, деган фикрда эди.

(«Саодат» журналидан)

23- §. x-ҳ ундошлари:

а) **х** — чуқур тил орқа, сирғалувчи, жарангсиз ундош товуш. Сўзнинг бошида (*хат, хабар*), ўртасида (*тахта, сохта*) ва охирида (*сих, шіх*) кела олади. Жонли нутқда сўз ўртаси ва охирида баъзан қ товушига мойилроқ айтилади: *ахлоқ* — *ақлоқ*, *сохта* — *соқта*, *міх* — *миқ* каби. Ўзбек тилидаги сўзларда **ә** (е) дан бошқа унлилар билан ёнма-ён келиб, уларнинг қаттиқ талаффуз қилинишига сабаб бўлади: *халқ*, *хон*, *тўхта*, *хил*, *хушхабар* каби;

б) **ҳ** — сирғалувчи, жарангсиз, бўғиз ундоши. Сўз бошида (*ҳаёт, ҳикоя*), ўртасида (*баҳор, шаҳар*) ва охирида (*гиёҳ, сиёҳ*) кела олади. Ўзбек тилида бу товуш **өҳ**, **э**, **ҳа** каби ундош сўзларда ва асосан, араб-форс тилларидан ўзлаштирилган сўзларда учрайди.

Ҳ ҳарфи ифодалаган товуш **ҳ** ундошига нисбатан юмшоқроқ, нафисроқ талаффуз этилади ва қўйидаги каби сўзларда ёзилади: *ҳимоя*, *ҳосил*, *ҳоким*, *Шоҳиста*, *оҳанг*, *саҳна*, *туҳфа* каби.

Жонли нутқда **ҳ** товуши баъзан ўзидан кейинги ундош каби айтилади ёки бутунлай талаффуз этилмайди: *маҳкам* — *маккам*, *маҳси* — *масси*, *даҳлсиз* — *дализ*, *шаҳодатнома* — *шоодатнома* каби. Кундалик сўзлашувда юмшоқ бўғиз товуши **ҳ** ундошининг кўпинча қаттиқ, чуқур тил орқа товуши **ҳ** тарзида айтилиши адабий талаффуз меъёрига хос эмас. Чунки бу товушларнинг бир хилда талаффуз этилиши сўз маъносини бутунлай ўзгартириши мумкин: *шоҳи* — *шохи*, *ҳол* — *хол*, *ҳил-ҳил* — *хил-хил* каби.

24- топшириқ. ҳ-ҳ ундошларига унлилар қўшиб, бўғин тарзида тўғри талаффуз қилишини машқ қилинг.

29- машқ. Қўйидаги сўзларда ҳ ундошини тўғри талаффуз қилинг ва ёзилишини эсда тутинг.

Сулҳ, баҳор, субҳ, саҳв, саҳифа, сахро, сайёҳ, руҳоний, руҳан, руҳий, роҳат, раҳм, раҳмат, меҳмон, пинҳон, оҳиста, оҳ-зор, оҳу, муҳтарам, маҳалла, маҳкам, лаҳза, иштаҳа, зоҳид, аҳвол, аҳд, аҳамият, муҳаррир, муҳташам, муҳтоҷ, муҳаббат, муҳайё, муҳрдор, муҳим, муҳлат, муҳожир, муҳокама, муҳр, меҳр, меҳнат, маҳсулот, моҳтоб, маҳкум, заҳмат, ҳиммат.

30- машқ. Нуқталар ўрнига ҳ ёки ҳ ҳарфларидан мосини қўйиб, сўзларни кўчиринг. ҳ ёки ҳ билан ёзилиш сабабини тушунтиринг.

Ишта...а, жи...оз, жо...ил, за...ар, за...маткаш, зе...и, ба...одир, био...имия, мар...амат, масла...ат, э...сон, э...ти-ёткорлик, са...ий, со...ил, гиё..., сайдро..., ...ориш, ...ориж, ...азил, ...аракат, гурӯ..., ...аттот.

31- машқ. Духовой (оркестр), механик (фортечно), хор, халқ (қўшиғи), халқ чолғу асбоблари, ҳаваскорлик, саҳна, муҳаррир, ҳатти-ҳаракат сўзлари иштирокида гаплар тузинг ва ҳ ва ҳ товушларига изоҳ беринг.

32- машқ. Матнни ўқинг. ҳ ва ҳ товушларини қиёслаб тавсифланг.

... 1934 йилнинг баҳори. «Ҳамза» театрининг 15 йиллик юбилейига атаб Вильям Шекспирнинг «Ҳамлет» асарини саҳналаштиришга қарор қилинди. Маннон Уйғур билан Бобо Хўжаев икковлари Москвага йўл олишади. Икки ой давомида Москвада бўлиб, Шекспир асарларини саҳнага қўйган театрларнинг, режиссёр ва актёрларнинг ижодий тажрибалари билан танишадилар. Шекспиршунос олимлар билан мулоқотда бўладилар. Матн ва унинг таржимаси устида Чўлпон билан роса бир ҳафта шуғулланадилар.

Кейин уларнинг илтимосига биноан постановкачи рассом И. Ю. Шлепанов Тошкентга келади.

«Келган куниёқ Ҳамлетни ким ўйнайди,— деб сўраб қолди,— деб ёzáди Бобо Хўжаев,— Биз Аброр Ҳидоятовни хонага таклиф қилдик. Шунда устида чарм куртка, бошида шапка, оёғида этик, чапанича юриш қилиб Аброр Ҳидоятов кириб келди. Оға: «Қаҳрамонимиз шу» дедилар.

— Мана шу киши Ҳамлетни ўйнайдими? Мен ҳеч нарса тушумаяпман,— деди Шлепанов ҳайрон бўлиб.

Оға билан ёрдамчи режиссёр Бобо Хўжаев бир-бира га қараб, жим қолишиади. Шунда оға« Бобо, икки кун Аброр билан битта монолог устида ишласин, бу киши эшитсин»,— дейди. Дарҳақиқат, икки кундан кейин А. Ҳидоятов саҳнада «Ё ўлиш, ё қолиш» монологини ўқииди. Бош яланг, ўз кийимида, фақатгина плаш кийган, холос. А. Ҳидоятовнинг айни соғлом, норғул, етилган пайти эди, жингалак қора соchlари унга алоҳида файз бағишиларди. Бўш саҳнада, гоҳ қўлини кўксига қўйиб, гоҳ плаш тугмасини ўйнаб, жарангдор, қуюқ овози билан монологни чунонам берилиб ўқилики, унинг ҳолатга кириш қобилияти, Шекспир фикрларини чуқур тушуниб, қалбига сингдира олгани ҳаммамизни қойил қолдирди. Хусусан, кечагина бунга шубҳа билан қараган Шлепанов лол қолган эди. Шундан кейин постановка устида ишимиз юришиб кетди»,— деб эслайди Бобо Хўжаев.

(С. Маҳмудова. «Бир юракнинг юз жасорати»дан)

24- §. й ундоши.

й — тил ўрта, сирғалувчи, жарангли ундош товуш. Сўзнинг бошида, ўртасида ва охирида келади: *йўл, кийим, уй, тўй, жой, сой* каби.

Баъзи сўзларда т, д, з га ўхшаб талаффуз қилинади. Лекин аслида бу сўзлар ҳар хил маъноли бўлганидан, аслига мувофиқ ёзилади ва тушунилади: *кейин — кетин, ёймоқ — ёзмоқ* каби.

й ундоши а, о, е, у унлиларидан олдин келганда ўзувда я, ё, е, ю графемалари билан ифодаланади: *янгроқ, ёд, ёзмоқ, елим, юқори* каби.

33- машқ. Матнни ифодали ўқинг. й ундоши иштирок этган сўзларни топиб, бу товушга тўлиқ тавсиф беринг.

У Воҳидни ҳам гапга солишига уриниб кўрди, лекин Воҳид суҳбатга тоби йўқ, чарчаган эди. Зотан, Воҳид бундай олис йўлга чиққанида, айниқса, машинада сафар қилганида, жим ўтириб хаёл сурини яхши кўрарди. Узоқ йўл, бир-бирини тез алмаштириб турадиган янги манзаралар ҳамиша унинг руҳини эркалар, хаёлида ғамгинлик аралаш ёруғ ўйлар, ширин орзулар уйғотарди.

Чорак соат ўтар-ўтмас, шаҳарча орқада қолди. Олдинда, то олисдаги тоғларга қадар, ям-яшил барра майса билан тўшалган текис дашт чексиз-чегарасиз ястаниб ётарди. Йўлнинг ўнг томони узоқдаги тепаликларгача бўймабўш, на уй, на дараҳт кўринар, чап томонда эса, хийла олдинда, таниш қишлоқлар кўзга чалинар, кўм-кўк толзорлар, оппоқ гуллаган боғлар бир-бирига тутишиб кетарди.

Ҳар сафар ёзги дам олиш пайтларида қишлоққа келәётиб болалигидан таниш бу даштни, йўл бўйидаги тўп-тўп боғларни кўрганида, Воҳиднинг кўнгли ажойиб бир нурга, бошқача бир шодликка тўлиб, яйраб- ёзилиб кетарди.

Машина боя хийла узоқ кўринган боғларга етиб, гўё оппоқ гулдаста орасига шўнгиди. Ўрик шоҳлари силкиниб бир зум уйлар, кўчалар, узоқдаги тоғлар — ҳаммаси гўё кўркам оқ ва пушти ранг ёғдуга чўмилгандай туюлди Воҳидга. (*O. Еқубов*)

25-§. ц ундоши.

ц — тил олди, қоришиқ, портловчи, жарангсиз ундош товуш. ц товуши т + с товушлари қоришигидан иборат бўлиб, фақат рус тилидан қабул қилинган сўзларда учрайди: *цирк, цемент, центнер* каби. Бу товуш кўпинча с товушига мойил талаффуз қилинади: *процент — прасент, цилиндр — силиндр* каби. Лекин бу ҳодиса имлода акс этмайди.

34- машқ. Қуйидаги сўзларни тўғри ўқинг ва ёзилишини ёдда сақланг.

Концертмейстер, концерт, пациент, цирк, центнер, процент, цемент, циркуль, циферблад, Баренц (денгизи), сланец, цинга, коэффициент, цилиндр, биомицин, пенициллин, импровизация, концентрат каби.

Бу сўзларнинг баъзилари иштирокида гап тузинг.

СОНОР ТОВУШЛАР ТАЛАФФУЗИ ВА ИМЛОСИ

26- §. Сонорлар таркибida овоз миқдори шовқинга нисбатан кўпроқ бўлган ундош товушлардир. Буларга м, н, нг(нг), л, р ундошлари киради. Сонор ундошлар талаффузида ҳаво оқими қисман бурун бўшлигидан, қисман оғиздан ва кўпроқ тилнинг ёнидан ўтади. Бу ҳол овоз миқдорининг ортишига сабаб бўлади. Сонор-

лар овоз миқдорига кўра, жарангли ундошлар билан унли товушлар ўртасида туради ва нутқа безак берувчи, тил оҳангдорлигини таъминловчи товуш бўлиб хизмат қиласди.

27-§. м-н ундошлари:

а) м — лаб-лаб, жарангли, портловчи, бурун ундош товуши. Сўзнинг ҳар қандай бўғинида кела олади: *мана, майса, ёмон, осмон, тамом, бўлим* каби.

э (е), и олд қатор унлиларидан олдин келганда юмшоқ (*мева, меҳмон, миқёс* каби), орқа қатор унлилар, чуқур тил орқа ундошлари билан ёнма-ён келганда эса қаттиқ (*сомон, мол, муборак, мўмин* каби) талаффуз қилинади;

б) н — тил олди, жарангли, портловчи, бурун ундош товуши. Сўзнинг бошида, ўртасида ва охирида келади: *най, ном, сурнай, унум, бутун, талқин* каби.

Бу товуш б, м ундошлари олдида келганда м тарзида айтилади, аммо аслига мувофиқ ёзилаверади: *танбурчи — тамбурчи, минбар — мимбар, ёнбош — ёмбош, манманлик — мамманлик* каби.

Жонли нутқда н товушининг баъзан ўзидан олдинги ундош таъсирига учраб, ўша товуш тарзида қўшалоқ айтилиши адабий талаффуз меъёрига зиддир: *гапни — гапни, йўлни — йўлни, кўзни — кўззи* каби.

25-топшириқ. м-н сонор ундошларига унлилар қўйган ҳолда бир неча марта қиёслаб, тўғри талаффуз қилинг.

35-машқ. Қўйидаги мақол ва ҳикматли сўзларда м ва н товушларини тўғри талаффуз қилинг.

1. Меҳнат мамнуният ва маданият манбаидир.

2. Она юртинг омон бўлса,

Рангу рўйинг сомон бўлмас.

3. Яхши бўлгин, ҳатто душманинг осон —
Сени дёёлмасин ярамас-ёмон.

Танбурнинг овози соз чиқиб турса,

Қулогин бурамас созчи ҳеч қачон.

(Саъдий Шерозий.)

36-машқ. Матнни ифодали ўқинг. м, и ундошларини жарангдор талаффуз қилинг ва бу товушларни қиёслаб тавсифланг.

Тошкентга келиб, Янги Дўрмон — «Ўзбекистон» колхозини кўролмай қайтган киши армонда кетади. Ҳеч бўлмаса, нарироққа бориб Оржоникидзе район марказининг чиқаверишидаги тепаликдан ёки колхоз раис-

лари тайёрлайдиган мактабнинг катта йўл бўйидаги шийпонидан Дўрмонга бир қарабалса, кўнгилдаги ҳар бир губор бир зумда тарқайди-кетади.

Этагини кўз илғамайдиган ранг-баранг, йирик-йирик ер бўлаклари, боғлар ва чорбоғлардаги хиёбон, кўча ва йўллардаги садарайҳондай қулф уриб, намозшомгулдай тарвақайлаб, гулхайридек бўйга зеб бериб ўсган дараҳтлар; булар устида бўй чўзиб турган миrzатераклар; дараҳтлар остидан, орасидан мўралаб турган оқ, пушти, сарғиш, кўқимтири деворлар, қизил ва яшил томлар... Шундай манзарани расмда кўрган киши «рассом жуда ошириб юборибди» дейди.

Дўрмонни боғ десангиз, минг-минг тонна паҳтаси бор, пилласи бор; оқ олтинга кон десангиз, ширишашкар меваси бор, қўй-қўзи, сигир-бузоқ, парранда-ю-йилқиси бор.

Олачипор Қурама ва Чимён тоғлари, оч ўсма ранг паст-баланд адирлари, қирлари Дўрмоннинг тенги йўқ ҳуснига ҳусн қўшгани, уни ясатгани, безатгани атайин яратилгандай туюлади. (A. Қаҳҳор)

28- §. н(нг) товуши.

н(нг) — тил орқа, портловчи, жарангли, бурун ундош товуши. Бу товуш сўз бошида учрамайди. Сўзнинг ўртаси (*манглай*, *ингичка* каби) ва охирида (*тенг*, *онг* каби) кела олади.

а) *жанг*, *занг*, *сўнг*, *кўндаланг*, *дуранг*, *инграмоқ* каби сўзларда учрайдиган тил орқа нг товуши ўрнида ёзилади. Бундай сўзларни бўғинларга ажратганда, нг ҳарфий бирикмаси н ва г ҳарфларига ажратилмайди;

б) *конгресс*, *тангенс*, *бугунги* каби сўзларда нг алоҳида товушлар — н ва г ни ифодалайди, шу сабабли бўғин кўчиришда ажратиб ёзилади.

37- машқ. Қуйидаги тез айтишлардаги нг товушини аниқ ва тўғри талаффуз қилинг.

1. Занг босганга ранг юқмас, ранг юққанни занг босмас.

2. Тубсиз денгиз дедингизми, денгиз тенгсиз дедингизми?

38- машқ. Қуйидаги шеърни ифодали ўқинг. Сўзларда учраган н (нг) ва н+г товуш бирикмаларини фарқланг.

ОЛТИН МЕДАЛЬ

Мармар тусидаги пўлат сандуқда
Балоғат муҳридек ялтираб кутар...

Ҳали қўл тегмаган, жарангли, вазмин,
Зардан янги чиқсан олтин медаллар...

Сизга қарсакларда чиниқди илгим
Истиқбол сизники, барингизники.
Оlamнинг эгаси сиз бўлмайин, ким?
Шундайин оламки, келмаган тенги.

Сизсиз келажак йўқ, сиз ахир халқнинг
Минг йилни кўражак қароғларисиз.
Сизсиз ёримайди осмонда Зуҳра,
Замонлар тонгнининг чароғларисиз.

Кўчкор бўла турган қўзичноқларнинг
Манглай туғилган чогда дўнг бўлур.
Ғалаба асрининг ўсмирларисиз —
Шербачча қилиги шердай чўнг бўлур.

Бебаҳо наслсиз, ҳаёт ва меҳнат
Оlam қалбингизга сут билан кирган.
Сизнинг хамирингиз шу улуғ халқقا,
Ватанга муҳаббат билан йўғрилган.

(Faafur Fулом)

29- §. л ундоши

л — тил олди, сирғалувчи, жарангли ён товуш. Сўз бошида, асосан, бошқа тиллардан ўзлашган сўзларда учрайди: **лаб**, **лекин**, **лексика**, **либретто** каби. Сўз ўртасида келганда кўпинча жонли нутқда талафғузда тушиб қолади, лекин бу ҳодиса имлода акс этмайди: **олса** — **оса**, **келган** — **кеган**, **бўлса** — **бўса** каби.

Олд қатор унлилар билан ёнма-ён келганда юмшоқ (бил, булбул, кел, юл каби), орқа қатор унлилар ва чуқур тил орқа ундошлари билан бирга келганда эса қаттиқ (**қўл**, **ҳўл**, **ғалла**, **қол** каби) талафғуз қилинади.

30- §. р ундоши.

р — тил олди, жарангли, титроқ товуш. Узбекча сўзларда сўз бошида қўлланмайди. Ёндош товушлар таъсирида юмшоқ (**равшан**, **сара**, **расм** каби) ва қаттиқ (**рақс**, **ром**, **қора** каби) айтилади.

Оғзаки нутқда **л**, **и** каби айрим ундошлардан олдин келганда, ўшаларга ўхшаш товуш тарзида талафғуз қилинади: **зўрлик** — **зўллик**, **шивирлади** — **шивиллади**, **карнайчи** — **каннайчи** каби.

26- топшириқ. л, р ундошларига аввал унлилар қўшган ҳолда, кейин лр, рл товуш бирималарини унлилар билан бирга бир неча марта айтинг, л, р товушлари талафғузига эътибор беринг.

39- машқ. Матинни монолог тарзида ўқинг. л ва р товушлари талафғузини тавсифланг.

ҚУШИҚЧИ ҲАҚИДА ОНА СУЗЛАРИ

Ботиржон саҳнани муқаддас деб биларди. У саҳнага ярим яланғоч бўлиб чиқадиган эстрада хонандасини ўзбеклар хушламаслигини айтарди. «Ялла»нинг узун ва шарқона кийимлари нусхасини дастлаб ўзи чизиб берган эди. У эстрада қўшиқчиси ўзи билмайдиган тилда қўшиқ куйлашига доим қарши туради. «Ўзи яхши билмайдиган тилда қўшиқ куйловчи хонанда ўзигэ уч, тўрт баравар катта ёки кичик кўйлакни кийиб, саҳнага чиққан масхарабозга ўхшайди» дерди.

Бир куни телевизордан ёш эстрада хонандалари концерт бериб қолишиди. Бир ёш хонанда «Қора кўз» деган сўзни «қаро-қаро кўз» деб такрор-такрор куйлади. Буни эшигтан Ботиржон хафа бўлиб кетди. У сўздаги хато эстрада обрўсини тушириши мумкин, дерди.

Бизнинг хонадонда ҳамма соф ўзбек тилида сўзлашади. Бунга болаларимнинг отаси қаттиқ риоя қилдирар эди. У, айниқса, «Ассалому алайкум» сўзини ўзбекча энг гўзал сўзлардан деб билиб, болаларга қаерга борманг, ким билан учрашманг, саломингиз ўзбекча бўлсин, ўзбекча салом ҳаммага тушунарли-ку, дерди.

Менинг рўзгоримда дилхираликлар бўлмаган. Қарим акага ҳамма болалар итоат қиласр эди. Карим ака ниҳоятда босиқ, ниҳоятда кўнгли оқ киши эди. Мен эса қаттиққўлроқман. Балки бола тарбияси учун бу ҳам зарурдир. Ҳар қалай, мен оиласизда неки шодлик, баҳт, шон-шуҳрат, ҳурмат, эътибор, санъатга, элу юрга муҳаббат бўлса, буларнинг бари Карим акангиз ташлаган уруғ деб биламан. «Тақдир мени шундай одамга дуч қилганидан минг-минг розиман. Шундай одамнинг болаларига она эканимдан абад баҳтиёрман...»

(«Саодат» журналидан)

31- §. Қўш ундошлар.

Нутқда ҳар хил ундош товушларнинг қатор келиши билан бирга, бир хил ундошларнинг қатор-қўшалоқ ҳолда қўлланиши ҳам учрайди. Қўш ундошлар, одатда, ўзбек тилида сўз ўртасида келади: *малла, шоввоз, тизза, дўппи* каби. Рус тили орқали ўзлашган сўзларда эса сўз охирида ҳам қўлланади: *грамм, металл, киловатт* каби.

Оғзаки нутқда сўз ўртасида қўшалоқ келган ундош-

УЗБЕК АДАБИЙ ТИЛИ УНДОШЛАРИНИНГ ТАСНИФИ

лардан бири баъзан талаффуз қилинмаса-да, ёзувда тўлиқ сақланади: *миллион* — *милион*, *комиссар* — *комисар*, *оддий* — *одий* каби.

Талаффузда қўш ундошлардан бирини айтмаслик адабий талаффуз маромига зиддир, айниқса, ўзбек тилида бу ҳолат маъно фарқлашга ҳам хизмат қиласди: *содда* — *сода*, *модда* — *мода*, *билур* — *бильур* (*билар* маъносида) каби.

Ўзбек тилида қўш ундошлар ўзак охиридаги ундошдан кейин шундай ундош билан бошланувчи қўшимча қўшиш (эшиш+тир, эс+сиз, гул+лар каби), ўзак охири ва қўшимча бошидаги товушларнинг ўзгариши (*бир+та* — *битта*, *бог+га* — *боққа*, *туг+ган* — *туккан* каби), сифатнинг кучайтирма шакли ясалиши (*оппоқ*, *чиппа-соғ*, *чиппа-чин* каби) билан ҳосил бўлади.

40- машқ. Қўйидаги сўзлар таркибидаги қўш ундошларни тўлиқ талаффуз қилинг ва ёзилишини эсда сақланг.

Муқаддам, муқаддас, муддат, модда, мадда, мусаддас, моддий, оддий, шаддот, содда, удда, тарадду, зиддият, жиддий, қадди-қомат, ҳиммат, Фиёсиддин, Захиридин, Камолиддин, Муҳиддин, дажжол, нажжор, ҳужжат, таажжуб, каззоб, лаззат, наззора, жизза, баззоз, Раззоқ; дуккак, икки, зукко, какку, укки, ҳакка, маккор, мукка, малла, металл, муллавачча, мураккаб, мутафаккир, оккупант, пакки, таваққал, саккиз, ташаккур, аччиқ, иссиқ, ҳуррият, билур, валломат, ёлланма, калла, колледж, коллектор, паралел, пенициллин, пилла, тааллуқ, туллак, чиллаки, грамм, гамма, грамматика, граммофон, диаграмма, коммуна, коммутатор, қўмма, мукаммал, мухаммас, Муҳаммадий, омма, симметрия, ҳиммат, ҳамма, ҳаммол, ҳаммом, салла, силиқ, суллоҳ.

41- машқ. Матнни ифодали ўқинг. Қўш ундошлар талаффузига эътибор беринг.

ХАЛҚ САНЪАТИ — ХАЛҚ ЗИЙНАТИ

Инсон ҳаётга келиши билан уни халқ амалий санъати намуналари ўраб олган бўлади. Меҳр или билан тикилган кўрпа, оналарнинг дил қўшифи бўлиб яшнаган палак, она қучоғидай илиқ бешик, қизча дилин яйратган қўғирчоқ, бола бошидаги «ипаклари тиллодан» дўппи, қозиқдаги беқасам тўйн, уй пештоқини бе-

заган гуллар — буларнинг ҳаммаси халқ амалий безак санъати намуналариданdir.

Инсон ақли ва заковати, фантазияси ва эстетик идеали тўла акс этган ҳамда халқ эҳтиёжи кенг кўламда назарда тутилган буюмлар ва нарсалар халқ амалий санъати намуналари ҳисобланиши табиий. Масалан, сопол буюмларнинг турмушда тутган ўрни ва унга бўлган муносабатнинг ўзгаришини олайлик. Агар аввалги асрлар сопол буюмлар фақат моддий эҳтиёж учун яратилган бўлса, ҳозирги давримизда бу буюмларнинг эстетик-бадиий жиҳатлари асосий мезонга айланниб қолди. Сопол лаган, кўза, чойнак-пиёлалар турмушда ишлатилса ҳам, лекин уларнинг бадиий нафислари, инсон бадиий салоҳиятининг нодир намуналари музейларда, хонадонларда авайлаб сақланади. Улар маълум эҳтиёжни қондиргани учунгина эмас, балки бадиий нафосати туфайли ардоқланади.

Асрлар мобайнида халқ билан бирга пайдо бўлиб, халқ билан бирга шаклланган, ривож топадиган амалий санъат — халқ зийнати, унинг ҳаёти, орзузи ва меҳнатининг моддий ифодасидир. («Ўзбекистон санъати» журналидан)

АЙРИШ ВА ЮМШАТИШ БЕЛГИЛАРИНИНГ ИШЛАТИЛИШИ ВА ИМЛОСИ

32- §. Айриш белгиси (ъ):

а) унли товушдан кейин келганда ўша унли чўзиқроқ талаффуз қилинади. Бу вазифани бажарувчи айриш белгиси фақат араб тилидан ўзлашган сўзларда учрайди: *маъно* — *маано*, *тაбсир* — *таасир*, *меъмор* — *меемор*, *эълон* — *эзлон*, *феъл* — *феел* каби;

б) ундош товушдан кейин келганда ўзидан кейинги унлининг ажратиб айтилишини билдиради. Бунда талаффузда ҳам қисқа тутилиш юз беради: *санъат*, *қитъа*, *масъул*, *съезд*, *съемка* каби.

Нутқда айриш белгисининг қайси ўринда келишига риоя қилиш лозим, акс ҳолда адабий талаффуз мароми бузилади, сўз маъноси ҳам ўзгаради: *суръат* — *сурат*, *шебр* — *шер*, *даъво* — *даво*, *затфар* — *зафар* каби.

42- машқ. Айриш белгисининг унли ёки ундошдан кейин келишига қараб сўзларни тўғри талаффуз қилинг ва ёзилишини билиб олинг.

Аэросъёмка, ашъор, аъён, аъзам, аъзо, аъло, аъмол, билъакс, бадфеъл, баъзи, баъзан, ваъда, ваъз, дафъа,

дафъатан, даъват, даъво, жузъий, журъат, заъфар, заъфарон, лаъл, истеъдод, истеъмол, инъикос, инъом, масъул, мўътабар, мўътадил, масъуд, маъюс, маълум, малъун, маъқул, таъна, таъриф, саъва, нашъя, қалъя, қатъий, эътибор, эътиқод, объект, субъект, подъезд, адъютант.

33-§. Юмшатиш белгиси (Ь):

а) Русча тили орқали ўзлашган сўзлар охирида ва сўз ўртасидаги ундошлар орасида келганда ўзидан олдинги ундошнинг юмшоқ талаффуз қилинишини билдиради: *октябрь, мебель, альбом, факультет, вальс* каби;

б) уни товушлардан олдин келганда эса ўзидан кейинги унлиниңг ажратиб талаффуз қилинишини билдиради: *пьеса, фельетон, батальон* каби.

Ўзбек тилида охири юмшатиш белгиси билан тугаган сўзларга қўшимчалар қўшилганда ва бундай сўзлар сифат ўрнида қўлланганда юмшатиш белгиси ёзилмайди: *фестиваль — фестивалда, медаль — медални, социал* (ҳаёт), *вертикал* (чизиқ) каби.

27- топшириқ. Юмшатиш (Ь) белгиси иштирок этган сўзларни топиб, уларга биронта қўшимчани қўшинг. Юз берган ўзгаришни изоҳланг.

Н а м у н а: *вальс — вальсга, гастроль — гастролда.*

43- машқ. Гапларни ўқинг. Айриш ва юмшатиш белгили сўзларни кўчиринг. Айриш белгисининг ёзилиши ва юмшатиш белгисининг тушиб қолниши сабабларини тушунтиринг.

1. Бу алам уни қасос олишга даъват этарди. (Ш.)
2. Рулда ўтирган Ортиқнинг клёнка плаши кечки офтобда ялт-юлт қилиб жилоланади. (П. К.) 3. Аваз ойисининг феъли айнаб турганда ҳеч қандай мантиқни тан олмаслигини билар эди. (П. К.) 4. Кўп колхоз ва совхозларда ашула ва рақс ансамблари ташкил этилган.
5. Бирдан кўзи туйнукдан қарши деворда оби нондек бўлиб тушиб турган шуълага тикилиб қолди. (Ш.)
6. Йиғим-теримнинг энг масъулиятли даври бошланди. Суръатни пасайтириш асло мумкин эмас. (Газетадан.)
7. Ориф ака кўп жойда масъул ишларда ишлади. (Ас. М.) 8. Бугун контрол диктант ўтказилади.

ФОНЕТИҚ ЎЗГАРИШЛАР

Ёзма нутқ билан оғзаки нутқ ўртасида катта фарқ бор. Ёзма нутқ муайян имло қондалари бўйсундирилл

ган, аммо жонли нутқ қандай бўлса, шундайлигича ёзилмайди. Ҳар қандай бадий асарни ижрочилик санъати асари тарзида ифодалаш жараёнда имло қоидалари талаффуз қоидаларига мос келавермайди. Жонли нутқда сўз ва сўз бирнамаларидағи товушлар таркибини соддалаштиришга, қисқароқ талаффуз қилишга интилиш кучли бўлади.

Шунинг учун ёзма нутқни жонли нутққа айлантириб ифодалашда нутқ товушларини тўлиқ шакллантириш эмас, балки айримларини кучсизроқ талаффуз этиш, жарангли ва жарангиз ундош товушлар талаффузидаги ўхшаш ёки ноўхашлик, айрим сўзларда товуш тушиши ёхуд товуш орттирилиши каби фонетик ўзгаришларга эътибор бериш лозим. Қўйидаги ана шундай муҳим фонетик ўзгаришларни билиш тўғри талаффуз қоидаларининг таркибий қисми ҳисобланади.

34- §. Товушларнинг мослашуви.

1. **Аккомодация** унли ва ундош товушларнинг ўзаро таъсирига кўра бир-бирига қисман мослашиш ҳодисасидир. Ҳозирги ўзбек адабий тилида и, у, ў унлилари тил орқа ва чуқур тил орқа ундошлари билан ёнма-ён келганда мослашув ҳодисаси юз беради. и, у, ў унлилари орқа қатор ундошлар — к, г билан қатор келса, олд қатор унли сифатида юмшоқ, чуқур тил орқа ундошлари — қ, ф, х билан ёндош келса, орқа қатор унли тарзида қаттиқ талаффуз этилади: *китоб*, *кайим*, *гилам*, *кулги*, *гўзал*, *қилиқ*, *ғилоф*, *қурбон*, *қўшиқ*, *хитоб* каби.

Ўзбек тилида унли товушларнинг ёндош товушлар таъсирида юмшоқ ёки қаттиқ айтилиши, мослашуви ёзувда акс этмаган. Рус тили имлосида эса и унлисининг мослашуви ы билан, а, о, у товушларининг мослашуви я, ё, ю билан берилниши ҳисобга олинган.

2. **Ассимиляция** сўз таркибидаги ундош товушларнинг бир-бирига таъсири натижасида бир товушнинг иккинчи товушни ўзига ўхшаш товушга айлантириш ҳодисасидир. Бу ўхшашлик ўз хусусиятига кўра иккни хил кўринишда бўлади:

а) агар олдинги товуш кейинги товушни ўзига мослаб, ўхшатиб олса, прогрессив ассимиляция ҳисобланади: *етди* — *етти*, *айтди* — *айтти*, *боқ+га* — *боқقا*, *қочди* — *қочти*, *кетяпман* — *кетяппан* каби.

б) агар кейинги товуш олдинги товушни ўзига ўх-

шатиб олса, регрессив ассимиляция бўлади: *бирла* — *билла*, *тутча* — *тучча*, *йигитча* — *йигичча*, *сўзсиз* — *сўссиз* каби.

Таъсирга учраган товушнинг ўзгариш хусусиятига қараб ассимиляция тўлиқ ва тўлиқсиз бўлади.

Тўлиқ ассимиляцияда бир ундош иккинчисига таъсир этиб, уни ўзига тўлиқ ўхшатиб олади: *кетди* — *кетти*, *туссиз* — *туссиз*, *оқган* — *оқкан* каби.

Тўлиқсиз ассимиляцияда бир товуш ёндош товушга таъсир этиб, уни ўзига тўлиқ ўхшата олмайди фақат жарангизлантиради ёки аксинча, жарангли ундошга айлантиради: *мазкур* — *маскур*, *кетган* — *кеткан*, *оқшом* — *оҳишом* каби.

Ассимиляциянинг айрим кўринишлари имло қоидаларига ҳам, адабий талаффуз маромига ҳам мос кела олади (*эшакка*, *оқкан*, *сариққа* каби), айримлари эса ёзувда ҳам, талаффузда ҳам инобатга олинмайди (*биззи* эмас *бизни*, *китопка* эмас *китобга* каби.) Баъзан адабий талаффузда тўғри ҳисобланган ҳолат имло қоидасига мос келмайди (*кеткан* эмас *кетган*, *тўхсон* эмас *тўқсон*, *айтти* эмас *айтди* каби).

28-топшириқ. Жонги нутқда, шунингдек, маҳаллий шеваларда учрайдиган ассимиляция ҳодисасига мисоллар топинг, товушларнинг қандай ўзгарганлигини тушунтиринг.

44- машқ. Гапларни ўқинг. Аккомодация ва ассимиляция ҳолатидаги сўзларни аниқланг, қайси товушлар мослашганини айтинг.

1. Мен ўзим сиззи дўст тутаман,— деди Анвар.
2. Инсон тафаккурининг юксак ютуқлари, энг чуқур билимлар ва энг оташин туйғулар сўзда очиқ-ойдин ифодаланиши керак. 3. Илгари дарёнинг шу битта ирмофи қишлоқни сув билан таъминларди. 4. Шунча ўқиттим, ақлинг кирмади-я. Нима қулоғингга тамбур чертдимми, ука?! 5. Новвой ака, шамба кунига юзта нон ёлиб бероласизми? 6. Сумбула сочли қиззи кўрувдим. Манови эшнека кирувди-я. 7. Қодир: «Сешамба куни боряппан»— деб қўнғироқ гўшасини қўйди.

3. Сингармонизм товушларнинг мослашуви, оҳангдошлиги, уйғуналигидир. Бу ҳодиса ўзбек тили тараққиётининг қадимги туркий тил ва эски ўзбек тилига хос бўлиб, унинг хусусиятлари айрим шеваларда мавжуд. Эски ўзбек тилида унлилар юмшоқлик ёки қаттиқлик, тил олдилик ёки тил орқалик жиҳатидан, ҳатто ундошлар ҳам жарангилик ва жарангизлик хусусиятига кўра бир-бирига мослашган ва бу танглай

(тил) уйғунлиги ҳисобланган. Танглай уйғунлиги қонуниятiga кўра сўз бошида тил олди унлиси келса, сўз ўртаси ва охирида ҳам тил олди унлиси келиши, яъни барча бўғинлардаги унлилар ўзаро уйғунлашуви, мослашуви шарт бўлган. Бу ҳол талафузда артикуляцион қулайлик туғдирган, товушларнинг оҳангдошлигини таъминлаган: *барамыз, кэтамыз, гуллар, қышлағымыз, қуллик* каби.

Ўтмиш адабиёти намуналарини санъат асари сифатида ижро этганда, ифодали ўқиганда бу қонуниятга риоя қилинади.

45- машқ. Тўртликлардаги сингармонизм ҳодисаларини изоҳланг.

Қилиб ўзни халос ўзлук ғамидин
Не ўзлук, балки йўқлук оламидин.
Боши-чун ул санамни сажда этти,
Бу оламдин яна оламга кәтти.

Ҳар кимки чучук сўз элга изҳор айлар,
Ҳар нечаки ағёр дурур ёр айлар,
Сўз қаттиги эл кўнглига озор айлар,
Юмшоғи кўнгулларни гирифтор айлар.

(A. Навоий.)

35- §. Товуш алмашиниши.

1. **Диссимилияция** икки ўхшаш ундош товушнинг ўзаро таъсири натижасида ноўхашаш товушларга айланиш ҳодисасидир. Бу ўзгариш ассимиляциянинг акси бўлиб, бирор жиҳатдан ўхшаш бўлган товушлардан бири талафузда ноўхашаш товуш билан алмашади: *зарар — зарал, бирорта — биронта, учта — ушта* каби. Товушларнинг ўз ҳолатидан кўчиб, ноўхашашлик ҳосил қилиши адабий талафузга зид ҳисобланади.

2. **Метатеза** сўз таркибидаги ундошларнинг ўзаро ўрин алмашиниши ҳодисасидир. Бу асосан жонли нутқа хос бўлиб, талафуз ва имло қоидаларига мос келмайди: *супра — сурпа, аҳвол — авҳол, дунё — дуйно, лаънат — наълат* каби.

3. **Спирантизация** сўз таркибидаги портловчи товушнинг талафузда сирғалувчи товушга ўтишидир. Бунинг натижасида талафуз билан сўзнинг имлоси ўртасида катта фарқ пайдо бўлади: *кабоб — кавоб, мақтамоқ — маҳтамоқ, мактаб — маҳтаб, юборди — юворди* каби.

29- топшириқ. Бирор воқеани кичик ёшдаги бола нутқига ўхша-

тиб гапириб беринг. Бу нутқдаги товуш алмашиниши ҳодисаларини изоҳланг.

46- машқ. Қўйидаги сўзлар талаффузида учрайдиган товуш алмашиниши ҳодисаларини тавсифланг.

Зарур, дарё, чиқди, коридор, бебош, тўғрамоқ, тупроқ, кейин, тўқсон, зарари йўқ, мана бу, ана бу, доктор, бўйра, тебратмоқ, айланмоқ, ёмғир, девор.

36- §. Товуш тушиши.

1. Апокопа сўз охиридаги қатор келган ундошлардан бирининг талаффузда тушириб қолдирилишидир: *past* — *pas*, *хурсанд* — *хурсан*, *рост* — *рос*, *артист* — *артис* каби.

2. Синкопа сўз ўртасида ургусиз бўғиндаги унли товушнинг тушиб қолиш ҳодисасидир: *билан* — *блан*, *хина* — *хна*, *нима* — *нма* каби. Бу ҳодиса сўзларга унли товуш билан тошланувчи қўшимча қўшилганда кўпроқ юз беради: *офиз* — *офзи*, *икки+ов* — *икков*, *ўғи.и* — *ўғли* каби.

3. Элизия икки сўз қўшилиши натижасида бир ёки бир нечта унли товушнинг тушиб қолиш ҳодисасидир. Оғзаки нутқда ихчамликка интилиш натижасида сўзнинг қисқарган шакли юзага келади: *айта олмади* — *айтолмади*, *ёзган экан* — *ёзганакан*, *ака-ука* — *акука*, *Абдусалом* — *Абсалом* каби.

47- машқ. Сўзлашув нутқига хос қисқарган сўз ва сўз шаклларини адабий талаффуз маромига мувофиқ талаффуз қилинг. Улар иштирокида гап тузинг.

Фарзан, ўтиарканмиш, забардас, кепқолинг, ўзми, боллари, дўс, уляям, броқ, отона, жабр-стам, Холида-па, айтворинг.

48- машқ. Матндан тушиши ҳодисаларини изоҳланг.

Қозонда қайнаган ширбоз гўш эмас,
Тўрда ўтирган қизнинг боши бўш эмас,
Кизим домот бобосининг улига,
Мол бергани Бойсин-Қўнғирот элида.
Хабар борса бес Алломиш келмайми,
Келса Қоражондай ўғлинг ўлмайми,
Қурғур кампир, тек ўтиранг бўлмайми?!
Ҳар ким ўз элида бекми, тўрами,
Карчиғай қарғага емтиқ берами.
Қайсар келса алплар омон қолами?!
Бир куни бу ердан хабар бормайми,
Бўлган гапни Қўнғирот элда билмайми,
Олтойлик йўлдан шунқор келмайми,
Қалмоқнинг элига қирғин солмайми,
Қурғур кампир, тек ўтиранг бўлмайми?!

Хазон бўлиб боғда гулла сўлибди,
Обло сенинг ақли-хүшинг олибди.
Хаёлингга шундай сўзлар келибди,
Қалмоқлардан билсанг Ҳаким голибди,
Ҳакимбек киргандир ўн тўрт ёшига,
Қалмоқ тоб бермайди бул савашига,
Чидолмас Ҳакимбекнинг ишига,
Бир балони сотиб олма бошингга.
Оти Ҳаким, билсанг ўзи зўрабор,
Душман чиқиб бўлолмайди баробар.

(«Алномииш»дан.)

37- §. Товуш орттирилиши.

1. Протеза сўз бошида битта унлиниг орттирилиши ҳодисасидир. Бу асосан ўзлашган сўзлар талаффузида учрайди: *стакан — истакан, русча — ўрисча, штраф — иштароп, рўмол — ўрамол* каби.

2. Эпентеза оғзаки нутқда икки ундош ўртасига айрим унлиларниг қўшилиб айтилишидир: *ақл — ақил, ҳукм — ҳукум, арслон — арислон, кроват — каравот* каби.

3. Эпитеза сўз охирида қатор келган ундошлардан сўнг бир унли қўшиб талаффуз қилинишидир: *диск — диска, пропуск — пропуска, бланк — бланка, киоск — киоска* каби.

30- топшириқ. Оғзаки сўзлашувдан товуш орттирилишига мисоллар топинг ва улар иштироқида гаплар тузинг.

38- §. Товушларниг кучсизланиши.

1. Редукция сўз таркибидаги, одатда, урғусиз бўғиндаги унлиниг кучсизланиб талаффуз қилинишидир: *пшик — пшик, билак — бзлак, қилик — қзлик, саримсоқ — саръмсоқ* каби.

2. Сўз охирида жарангли ундошнинг жарангсизланиши ҳодисаси ҳам жонли нутқда кўп учрайди. Жарангли **б**, **д**, **з**, **г**, **ж**, **(дж)**, в ундошлари сўз охирида тўла ёки қисман жарангсизлашиши оғзаки сўзлашувга хосдир. («Ундошлар тавсифи» мавзусига қаранг): *оозд — озот, мактаб — мактап, барг — барк, бож — боч, пассив — пассив* каби.

3. Сўз охирида портловчи ундошнинг сирғалувчи товушга ўтиши ўзбек тилида қ ундошининг **ғ** тарзида талаффуз қилинишида кўринади: *тоқ — тоғ, қишлоқ — қишилоғ, тароқ — тароғ, тошлиқ — тошлиғ* каби.

49- машқ. Матнни жонли нутқ шаклида ўқинг. Талаффузда кучсизланган товушларни тавсифланг.

Бир қизиқчининг отаси учта қовурилган балиқ олиб келибди. Қизиқчининг ўзи уйда йўқ экан, онаси, келинглар, у келгунча буларни еб қўя қолайлик, дебди. Дастурхон ёзишибди. Бир маҳал қизиқчи келиб эшикни қоқибди. Онаси дарров иккита катта балиқни хонтахта остига беркитиб, кичкинасини дастурхонга қўйибди. Қизиқчи бу воқеани эшикнинг тирқишидан кузатиб турган экан. Ҳамма дастурхон атрофига ўтиргандан кейин, отаси:

— Юнус пайғамбарнинг ҳикоясини эшитганмисан?
— деб қизиқчидан сўрабди.

— Мана бу балиқдан сўраймиз-да,— дебди қизиқчи ва балиқни олиб оғзига қулоғини тутибди.— Бу балиқ у вақтда мен кичик эдим, бу нарсани хонтахта тагида турган иккита балиқдан сўра, ўшалар билишади, деялти,— дебди.

(«Ривоят ва асотирлар»дан.)

НУТҚНИНГ ФОНЕТИК БУЛИНИШИ

Нутқ ўзаро фикр алмашув жараёнида кишиларнинг тил воситаларидан фойдаланиш фаолиятидан иборат. Инсон нутқини шакллантирувчи фонетик воситалар қаторида товушдан ташқари, бўғин, урғу, интонация ҳам мұхим ўрин тутади.

Товушлар ўзаро бирикиб бўғинларни ҳосил қиласа, бўғинлар қўшилиб, сўзларни вужудга келтиради. Бир неча сўзлар интонацион жиҳатдан бирлашиб тект (синтагма)ни, мазмунан ва интонацион тугалликни ифодаловчи фонетик бўлаклар эса фраза (гап)ларни ҳосил қиласи. Кўринадики, нутқ оҳанг ва интонация жиҳатидан ўзига хос нутқ оқимидан, яъни турли оҳанглар занжираidan таркиб топади.

Нутқ оқими кичик ва катта фонетик бўлакларга бўлинади. Энг кичик фонетик бўлак товуш, ундан каттароғи бўғин ва яна каттароқлари сўз, синтагма, гапдир. Ана шу қисмлар нутқни икки оғзаки ва ёзма кўринишда намоён қиласи. Оғзаки ва ёзма нутқ, ўз навбатида, диалогик ва монологик шаклларга эга. Нутқнинг шакл ва кўринишлари ўзаро алоқада бўлиб, ҳамиша бир-бирини бойитиб келади.

39- §. Бўғин

Бир нафас чиқариш билан талаффуз қилинадиган товуш ёки товушлар бирикмаси бўғин ҳисобланади.

Сўзларни талаффуз қилганда ўпкадан чиқаётган ҳаво оқими бир товуш ёки бир неча товушдан кейин бўлиниб, гоҳ кучли, гоҳ кучсиз ҳаво зарби билан айтилишидан бўғин ҳосил бўлади. Бўғинларнинг ҳосил бўлишида унли товушлар муҳим роль ўйнайди, унли товушлар сиз бўғин тузилмайди. Шунинг учун ҳам сўздаги бўғинлар сони унлилар сонига тенг бўлади. Масалан, *нахтакорларимиз* сўзида б 6 та унли, б 6 та бўғин бор: *нах-та-кор-ла-ри-миз*. Ёки ў-қув-чи сўзидағи биринчи бўғин (*ў-*) бир товушдан, иккинчи бўғин (*-қув*) уч товушдан, учинчи бўғин (*-чи*) эса икки товушдан таркиб топган.

Бўғинлар икки хил бўлади: очиқ бўғин ва ёпиқ бўғин. Унли товуш билан битган бўғин очиқ саналади: *ма-са-ла, о-та, бо-ла, му-ҳо-ка-ма* каби. Ундош товуш билан битган бўғин ёпиқ саналади: *ол-моқ, қииш-лоқ, ток-зор, ший-поҳ* каби.

Ўзбек тилидаги сўзларнинг бўғин тузилишида, одатда, унли ва ундошларнинг ёнма-ён келиши ўзига хос жарангдорликни вужудга келтиради. Ўзбекча сўзларда бўғин қатор келган ундошлар билан бошланмайди, бўғин охирида эса иккитадан ортиқ ундош келмайди: *ло-ла, си-ра, ақл, ост* каби.

Бўғиннинг савод чиқаришда (биринчи синфда сўзлар бўғинлаб ўқилади), шеърията (бармоқ вазнида), мусиқа асарларида, ашула матнларини тўғри текстовка қилишда аҳамияти катта. Бундан ташқари, ёзувда бир йўлга сифмай қолган сўзнинг қисмлари иккинчи йўлга бўғин асосида қўчирилади.

Шеърий асарларни, айниқса, бармоқ вазнидаги шеърларни ифодали ўқишида мисраларда бўғин (ҳижо)ларнинг бир хил миқдорда, текис такрорланиши натижасида муайян ритм ҳосил қилишига асосланилади. Масалан, F. Ғуломнинг «Вақт» номли шеъри 11 бўғин (ҳижо)лидир:

Ғунча очилгунча ўтган фурсатни
Капалак умрига қиёс этгулик,
Баъзida бир нафас олгулик муддат
Минг юлдуз сўниши учун етгулик.

Аруз вазнидаги шеърларда эса ҳижо (бўғин)ларнинг миқдоридан ташқари, талаффуздаги узун-қисқалигига ҳам асосланилади. Кўпинча о дан бошқа унлилар билан тугалланувчи очиқ бўғинлар қисқа ҳижо, ёпиқ бўғинлар ва о билан тугалланувчи очиқ бўғин-

лар чўзиқ ҳижо саналади. Мисраларда қисқа ва чўзиқ ҳижоларнинг ритмик бўлак сифатида тақорорланиши ўзига хос мусиқийликни яратади. Бунда фақат ҳижоларни эмас, балки руҳи (1—5 тагача ҳижодан иборат бўлак) ларни ҳам тўғри ажратса билиш муҳимдир. Масалан:

Кел-ди/о-чи-лур/чо-ғи/ўз-ли-гинг/на-мо-ён қил

Пар-ча-лаб / ки-шан-лар-ни / ҳар-то-мон / па-ри-шон
қил.

(Х. Х. Ниёзий.)

50- машқ. Қўйидаги шеърий парчаларни бўғинларга ажратинг. Очиқ ва ёпиқ бўғин ёки қисқа ва чўзиқ ҳижоларга эътибор бериб, ифодали ўқинг.

1. Оҳимнинг ўтидан чиққан шуълалар
Шарқнинг кўкрагида бир жой топмасми?
Кўксимдан қисилиб чиққан наъралар
Ухлаган дилларга силжиб оқмасми?

(Чўлпон.)

2. Ҳақ йўлида ким сенга бир ҳарф
ўқитмиш ранж ила,
Айламак бўлмас адо онинг
ҳақин юз ганж ила.

(А. Навоий.)

3. Бу олам ичинда манга ул ёр топулмас,
Ғам бирла ўладурману ғамхор топулмас.
Нақт-и кўнгулу жонни назарға кетурубман,
Лекин бу матоимға харидор топулмас.

(Хофиз Хоразмий.)

51- машқ. Қўйидаги қўшиқни нота варағига текстовка қилиб ёзинг. Текстовкада бўғиннинг ўринини тушунтиринг.

САРБАДОРЛАР ҚУШИГИ

Сарбадормиз, бизлар —
сарбадор!
Қонимизда ёнадир олов.
Жонимизда ёнадир олов,
Сарбадормиз, бизлар сарбадор!
Ишқ оташи — муқаддас оташ,
Ёнмоқ бизнинг эзгу эътиқод.
Имонсизлик бизларга иснод,
Ишқ оташи — муқаддас оташ.
Биз қуёшнинг жондош
фарзанди,
Дўстга тутган меҳримиз олов,
Евга солган қаҳримиз олов,

Биз қуёшнинг қондош
фарзанди.
Эрк офтоби нур сочгай абад!
Эрк йўлига, ёнар тошларимиз.
Вужуди чўғ олов бошларимиз.
Эрк офтоби нур сочгай абад!
Юрт қуёшин қопласа зулмат,
Қалбдан юлиб биз ишқ зиёсин,
Ёндирамиз зулмат дунёсин.
Нур — оловсиз сўнмасин ҳаёт,
Сарбадормиз — сарбадор.

(Нусрат Карим.)

40- §. Бўғин кўчирилиши. Бир неча бўғинли сўзнинг қатор охирига сиғмай қолган бўғинлари қўйидаги ҳолларда кейинги қаторга кўчирилади:

1. Биринчи қаторда қолган бўғинга мансуб сўнгги товуш кейинги қаторга кўчган бўғинга қўшилиб қолмаслиги ёки, аксинча, кўчаётган бўғинга оид биринчи товуш юқоридаги қаторда қолаётган бўғин таркибида қолмаслиги керак: *тин-чи-моқ* (тинч-имоқ эмас), *теле-ви-зор* (телев-изор эмас), *инс-це-ни-ров-ка* (инсценировка эмас).

2. Сўзнинг бир унли товушдангина иборат биринчи бўғини қатор охирида қолдирилмайди: *o-pаси* эмас, *oна-си*, *у-каси* эмас, *ука-си*, *у-юшқоқ* эмас, *уюш-қоқ*.

3. Сўзнинг бир унлидангина ёки **е**, **ё**, **ю**, **я** ҳарфларидан бири билан ифодаланган сўнгги бўғини ҳам кейинги қаторга кўчирилмайди: *мудофа-а* эмас *мудофаа*, *мудда-о* эмас *муд-дао*, *манбаи* эмас *ман-баи*, *авли-ё* эмас *ав-лиё*.

4. Бир товушнинг ҳарфий белгиси бўлган **нг** ва **шч** бирикмалари алоҳида ҳарфларга (**н** ва **г**, **ш** ва **ч** га) ажратилмайди: *отан-гиз* эмас *ота-нгиз*, *тон-ги* эмас *то-нги*, *помеши-чик* эмас *поме-шчик* каби.

5. Таркибида айириш (**ъ**) ёки юмшатиш (**ъ**) белгиси бўлган сўзлар бўғинларга ажратиб кўчирилганда, бу белгилар биринчи қаторда қолади: *разъезд*, *журъат*, *маъно*, *физкультура*, *факультет*.

6. Сўзларнинг биринчи ҳарфларидан таркиб топган ТДПИ, ЎзХДП каби қисқартма сўзлар, кўп хонали рақамлар (1919, 1986), кишиларнинг исми ва фамилияси (*A. Навоий*, *Ҳ. Ҳ. Ниёзий*) қисмларга ажратилмайди: улар яхлитлигича биринчи қаторда қолдирилади ёки яхлит ҳолда кўчирилади.

52- машқ. Матнни ўқинг. Тагига чизилган сўзларни бўғин кўчириш қондасига мувофиқ бўғинларга ажратинг. Русча-ўзлашма сўзларнинг бўғинларга бўлинishi ва бўғин кўчирилишини алоҳида изоҳланг.

Н а м у н а: Имти-ҳон ёки им-тиҳон.

ШОПЕН ҲАҚИДА

Фридрик ҳали тили чиқмаган вақтлардаёқ музика оҳангларидан чуқур ҳаяжонланар эди.

Ежи Брошкевич, ёзувчи.

Одатда у жуда **хушчақчақ** бўлиб, унинг ҳажвга мояил ақли кулгили нарсаларни жуда тез илғаб олар эди. У юмор **пантомимикасида** ниҳоятда топқир ва **кашфиётчи** эди. У кўпинчча ўзининг кулгили **импровизацияларида** айрим машҳур композиторларнинг ўйин ҳаракатларини, юз ифодаларини жуда боплаб кўрсатиш билан ўзи ҳам завқланиб юради.

Ференц Лист, венгер композитори.

Фридериқ Шопен — мусиқа даҳоси, уни ўз ҳолига қўйинглар. У ғайриоддий йўлдан бормоқда. Чунки унинг **истеъоди** ҳам ғайриоддийdir. У эски усулга бўйсунмайди. Чунки унинг ўз йўли бор. У ўз асарларида ҳали ҳеч қачон ва ҳеч ерда дуч келмаган **оригиналликка** эришади.

Юзеф Эльгенер, поляк композитори.

Мен **буюқ** композиторнинг **таъсирисиз** санъатнинг ҳар қандай соҳасида поляк миллий ижодиётининг **тараққиётини** умуман тасаввур қила олмайман.

Шимановский, поляк композитори.

53- машқ. Қуйидаги сўзларнинг бўғин кўчириш қоидасига мувофиқ бошқа қаторга кўчириладиганларини чизиқча билан ажратиб чап томонга, бўғинлари кўчирилмайдиган сўзларни эса ўнг томонга ёзинг.

Н а м у н а:

<i>ба-ланд</i>	<i>ака</i>
<i>синг-лим</i>	<i>дарс</i>

Айрим, абонент, арфа, альбом, ана, ария, БМТ, бадий, вальс, видеофильм, варақа, ватан, гулли, гуруҳ, гуманизм, грамм, гвардия, дунё, даъват, диёнат, дениз, ечим, етакчи, енгил, итоат, илмий, июль, СамДД, сингари, стаж, сессия, партитура, предметли кўрсаткич, пайров, тақриз, талант, таъкид, таассурот, каталог, конспект, К. С. Станиславский, меъёр, мантиқий, муқова, ЎзТАГ, репертуар, рангли, радиоритм, қиратхона, қилиқ, қитъа, улуғ, урғусиз, унумдорлик, фонд, ғоя, филоф, ҳудуд, ҳукм, ҳаракат, этюд, электр, эҳтимол.

41- §. Урғу

Нутқдаги бирор бўлакнинг бошқаларига нисбатан кучлироқ овоз билан айтилиши урғу ҳодисасидир. Ур-

ғу нутқнинг қайси бўллагига тушишига кўра икки турга бўлинади: сўз урғуси ва мантиқий урғу.

I. СЎЗ УРҒУСИ сўздаги бирор бўғиннинг бошқаларига қараганда кучлироқ, чўзиқроқ талаффуз қилинишидир. Сўз урғуси (ёки лексик урғу) бўғиндаги унли товушга тушади.

Кучлироқ талаффуз қилинган бўғин урғули бўғин, қолгандари урғусиз бўғин деб юритилади: *терувчи* сўзидаги кейинги бўғин урғули, *тер-ув* бўғинлари эса урғусиздир. Урғули бўғинлар шиддатлироқ ва чўзиқроқ талаффуз этилади.

Ўзбек тилида урғу, одатда, сўзнинг охирги бўғинига тушади: *китóб*, *муқовá*, *рассом*. Сўзларга қўшимча қўшила бориши билан урғу ҳам сўзнинг охирги бўғинига кўча боради: *китоб+лár*, *китоб+лар+нý*, *китоб+лари+мýз*, *китоб+лар+имиз+нýнг* каби.

Аммо ўзбек тилида урғу охирги бўғинга тушмайдиган ҳолатлар ҳам мавжуд. Булар қўйидагилардир:

- араб ва тоҷик тилидан ўзлашган айрим равишларда: *áсло*, *дóим*, *яնги*, *ҳамíша*;
- модал сўзларда: *зéро*, *афсуски*, *албáтта*;
- баъзи ёрдамчи сўзларда: *ámмо*, *лéкин*, *чýнки*, *gárchi*;
- олмошларда: *бárча*, *бáъзи*, *ҳámма*, *қáйси*, *қáнча*, *қáндаи* *кýмдир*, *áллаким*, *ҳár қачон*, *ҳéч нима* каби;
- феълнинг буйруқ шаклларида: *кéлсин*, *кўлдир*, *бóшла*, *тéгма* каби.

Сўз охирига қўшиладиган баъзи қўшимчалар ҳам урғу олмайди. Буларга дона ва чама сон ясовчилар (-та, -тача: *бéшта*, *ўнтáча*); биринчи гурӯҳ шахс-сон қўшимчалари (-ман, -сан, -дир, -миз, -сиз: *борáрман*, *ўқувчýмиз*); равиш ясовчилар (-ча, -дек, -дай: *бóлача*, *қýшдек*); бўлишсизлик қўшимчаси (-ма: *кéлма*, *тáши-ма*), юкламалар (-у, -ю, -ку, -ми, -чи, -ёқ, -оқ: *олáмда-ку*, *улár-чи*, *берáсизми?*) киради.

Сўз урғуси сўзларни тўғри талаффуз қилиш меъёрларини белгилабгина қолмай, сўз маъноси ва грамматик шаклларни фарқлашда ҳам хизмат қиласди. Урғу товуш томони бир хил бўлган сўзлар — омонимларни ва сўз шаклларини ажратиш хусусиятига эга: *бос-мá* (босмахона маҳсулоти) — *бóсма* (буйруқ феъли), *ювйнди* (идиш-товоқ ювиндиси) — *ювиндý* (ҳаракат),

керақсиз (керак бўлмайдиган) — *керақсіз* (менга кераксиз манъосида), *йигитчá* (кичрайтириш формаси) — *ййгитча* (равиш), *ўқувчымиз* (биз ўқувчимиз) — *ўқувчимиз* (бизнинг ўқувчимиз) каби.

Ўзбек тилига ўзлашган русча-ўзлашма сўзларда ҳам урғу маънони фарқлашда муҳим аҳамият касб этади. Бундай сўзларда урғу биринчи бўғинга тушса от, иккинчи бўғинга тушса сифатга айланади: *астрономия* (от) — *астрономик* (сифат), *техник* (от) — *техник* (сифат), *грамматика* (от) — *грамматик* (сифат) каби.

53- машқ. Қуйидаги матнни ўқинг. Сўзларга урғу қўйиб, урғу олган бўғиннинг талафузига эътибор қилинг. Урғу олмайдиган сўз ва қўшимчаларни аниқланг.

АШУЛА ТҮҒРИСИДА

Ашула айтиш буткул ихтиёрий нарса. Бирон ашулани ҳозирги кайфиятимга мос келса, таъбимга ўтиrsa айтаман, бўлмаса йўқ. Таъбимга ёқмаган ашулани менга ҳеч ким айттиrolмайди.

Аксинча, бирон ашулани айтаман деган кишига ҳеч ким, ҳеч нарса тўсқинлик қилолмайди...

Ашула жанрининг булғанишига фақат халтурачи шоир, халтурачи композиторгина сабаб эмас, бу ҳақда яхши, ҳатто олдинги сафда турган шоир ва композиторлардан ҳам ўпкалашимиз керак. Булар, афтидан, нафсоният туйғусини йўқотиб қўйишган: ҳар куни, ҳар соатда радио ва телевизорда, саҳнада халтуруни кўриб, эшитиб туриб ориятлари келмайди, норози бўлишмайди, ҳатто бунга эътибор ҳам қилишмайди.

Композиторлардан бир қисми ҳозирги ўзбек поэзиясини тахминан ҳам билишмаса керак, халтурачиларнинг bemаза нарсаларини, поэзияга етти пушти бегона кишиларнинг машқларини шеър, деб музика ёзишади.

Қадим замонда «Табиат бўшлиқдан қўрқади», денишар экан. Ҳақиқатан, яхши нарса бўлмаган жойга ёмон нарса суқилиб кириб олади.

Ўзбекистон Компартияси Марказий Комитетининг ашула жанри тўғрисидаги қарори муносабати билан «Қизил Ўзбекистон» газетасида босилган уч авторнинг мақоласини олайлик. Марказқўмнинг қарори, ашула ижодкорлари олдига жуда жиддий масалаларни қўяди. Мақола авторлари эса жиддий гаплар айтган бўлиб, бачканаликдан нари ўтмайди.

Мақолада баъзи классиклар бизга кўпгина ашула-
лар ёзib берган бир қанча ҳозирги шоирларга кесак
отадилар. Бу авторларга қолса Фирузни кўп хотин
олиша айблаб, совет қонуни билан суд қилиш, сан-
дикқа қамаб, ҳидини ҳам чиқармаслик керак.

Фируз ким ўзи?

Фируз машҳур лирик шоир, мусиқашунос, компози-
тор, яхши таржимон, Умархон сингари ўз замонасиning
шоирларини ўрдасига йиққан, 1873 йилда босмахона
сотиб олиб, Ҳоразмда биринчи китоб бостирган одам.
Шу одамни юз йилдан кейин қора курсига ўтқазиб,
совет қонуни билан суд қилишдан нима мурод ҳосил
бўлади.

Авторлар ҳеч бир далил-исботсиз Камтарнинг
шеърларини ёмонга чиқариб, унинг «Унутма» деган
шеърига сиёсий айб тақмоқчи бўлишади. Бу шеърда
шундай сатрлар бор:

Ёш умринг ўтар, фасли баҳорингни унутма,
Халқингни безар қабру мазорингни унутма.

Бу: «Ёшлигинг ўтиб кетади, қабринг Навоий, Улуг-
бек қабри сингари халқингни безаши кераклигини
унутма», деган сўз.

Оддий камонча — оддий ёғоч қутидан ғижжакчи
аломат садолар чиқаради. Оддий сўз ва товушларнинг
маълум тартибда қўшилиши ашула ижодкорларининг
қўлида қудратли кучга айланиши, қалбимизга йўл топи-
ши, қувонч ва илҳом манбаи бўлиб хизмат қилиши
керак.

(A. K.)

Ёзма ва оғзаки нутқда ургуни тўғри қўллаш муҳим
аҳамиятга эга. Ноўрин қўйилган ургу маънога таъсир
этади, услубий хатоликларга олиб келади.

Бу қўпинча қўйидаги ҳолларда юз беради:

1. Русча-ўзлашма сўзларнинг маъносини билмас-
лик туфайли. Масалан: *физик* (физикларимиз — фи-
зик олимларимиз — шахс оти каби), *физик* (физик қо-
нун, қонуният, белги оти каби).

2. Рус тилидан кирган айрим сўзлар ўзбек тилида
мавжуд бўлган сўз билан омонимик қатор ҳосил қила-
ди. Бунда ургуни тўғри қўйиб талаффуз қилиш лозим.
Масалан: *атлас* (атлас кўйлак), *атлас* — (карта, геогра-
фик термин) каби.

3. От ясовчи қўшимича билан феълнинг бўлишсизлик

қўшимчасини ажратада билмаслик туфайли юз беради.
Масалан: қатлама (от), қатлама (феъл) каби.

4. Русча-ўзлашма сўзларга урғу қўя билмаслик (рус тили дарсларида бунга аҳамият қилиш зарур бўлади) натижасида фализ талаффуз қилиниши билан боғлиқ хатолар. Масалан: *Метафора* деб талаффуз қилиш ўрнига *метонимия — метони (ó) мия* каби.

5. Сўз ўзагига ёки сўз ўзагига қўшиладиган сўз ясовчи, шакл ясовчи қўшимчаларга тушадиган урғуни алмаштириб қўллаш туфайли юз берадиган хатолар. Масалан: *йиши — ииҷи, тойча — той-чá* каби.

II. Мантиқий урғу гапдаги фикрий жиҳатдан аҳамиятли бўлган сўзнинг кучли талаффуз қилинишидир. Бунда сўзловчи гап ичидаги баъзи сўзларнинг маъносини янада таъкидлаб, кучайтириб кўрсатиш учун бошқа сўзларга нисбатан кучлироқ оҳанг билан талаффуз этади. Нутқда мантиқий урғу тушган сўз овозни баландлатиш, пастлатиш, пауза қилиш каби воситалар билан ажратиб айтилгани учун тингловчининг диққатини тез тортади. Мантиқий урғу гапдаги исталган сўзга тушиши мумкин. Масалан: *Биз эртага музейга борамиз. Биз эртага музейга борамиз. Биз эртага музейга борамиз.*

Санъат асари ижросида ундаги мазмунни белгиловчи, асосий фикрни ифодаловчи сўзни топа олиш, кейин шу маънони очишга хизмат қилувчи бошқа сўзларни мантиқий урғу олган сўз атрофида бирлаштириш муҳим аҳамиятга эга.

55- машқ. Қуйидаги гапнинг ҳар бир сўзига алоҳида-алоҳида мантиқий урғу бериб ўқинг.

Тиришқоқлик меҳнатни енгиллаштиради.

56- машқ. А. Қодирийнинг «Ўтган кунлар» романидаги Юсуфбек Ҳожи монологини ўқинг. Мантиқий урғу олган сўзларнинг талаффузига эътибор беринг.

— Мақсадлари жуда очиқ! Биттаси мингбоши бўлмоқчи, иккинчиси Нормуҳаммаднинг ўрнига минмоқчи, учинчиси яна бир шаҳарни ўзига қарам қилмоқчи. Ҳон эрса Мусулмонқулга бўлган адватини кипчоқни қириб аламдан чиқмоқчи! Менга қолса ўртада шундан бошқа ҳеч гап йўқ, ўғлим! Мен кўп умримни шу юртнинг тинчлиги ва фуқаронинг осойиши учун сарф қилиб, ўзимга азобдан бошқа ҳеч бир қаноат ҳосил қилолмадим. Ит-

тифоқни нима эканини билмаган, ёлғиз ўз манфаати, шахсияти йўлида, бир-бирини еб-ичган мансабпарат, дунёпарат, шуҳратпарат муттаҳамлар Туркистон тупроғидан йўқолмай туриб, бизнинг одам бўлишимизга ақлим етмай қолди... Биз шу ҳолда кетадиган, бир-биримизнинг тегимизга сув қуядиган бўлсак, яқиндирки, чор истибоди Туркистонимизни эгаллар ва биз бўлсак ўз қўлимиз билан келгусимизни ўрис қўлига қолдирган бўлурмиз. Ўз наслини коғир қўлига тутқин қилиб топширувчи — биз кўр ва ақлсиз оталарга худонинг лаънати албатта тушар, ўғлим! Боболарнинг муқаддаси гавдаси мадфун Туркистонимизни коғирхона қилишга ҳозирланган биз итлар, яратувчининг қаҳрига албатта йўлиқармиз! Темир кўрагон каби доҳийларнинг, мирза Бобур каби фотиҳдарнинг, Форобий, Улуғбек ва Али-Сино каби олимларнинг ўсиб-унган ва нашъу намо қилганлари бир ўлкани ҳалокат чуқурига қараб судрагувчи, албатта тангрининг қаҳрига сазовордир, ўғлим! Гуноҳсиз бечораларни бўғизлаб, болаларини етим, хоналарини вайрон қилувчи золимлар-қуртлар ва қушлар, ердан ўсиб чиққан гиёҳлар қарғишига нишонадир, ўғлим!..

42- §. Пауза

Нутқ жараёнида бирор мантиқий эҳтиёж ёки мақсад туфайли тўхташ, кичик танаффус қилиш пауза ҳисобланади. Пауза сўзларни бир-бирига алмаштириб юбормаслик ва нафас олиш учун табиий эҳтиёж бўлибгина қолмай, баён қилинаётган фикрни ойдинлаштириш мақсадида онгли равишда фикр йўналишини белгиловчи нутқ воситаси ҳамdir.

Бадний асарни ифодали ўқиши, уни жанр хусусияти, мазмунига мос тарзда ижро этишда паузанинг ўрни катта.

Паузанинг грамматик, мантиқий ва психологик турлари ўзаро фарқланади.

1. **Грамматик пауза** тиниш белгиларнига боғлиқ бўлиб, улар қўлланган ўринларда қисқа пауза қилинади. Ҳар бир тиниш белги ўзига хос пауза билан ажралиб туради. Масалан, вергулда кичикроқ пауза, тиреда катта, кўп нуқтада нисбатан каттароқ пауза қилинади. Қиёсланг:

1. Гап сўзда эмас, уни айта билишда.
2. Билим — барча кулфатларга қалқон.
3. Ахир, мен бурчлиман,
Ватаним, элим олдида...

Ҳақ сўзни айтмаслик — қабиҳ жиноят!
(*Нусрат Карим.*)

2. Мантиқий пауза сўз ёки сўз бирималарини мантиқ, мазмун талабига кўра бир-биридан ажратиб, фикрни аниқ ифодалашга хизмат қиласди. Фикр мақсадига қараб мантиқий пауза у ёки бу нутқ бўлгидан кейин қўйилиши мумкин. Чунки бундай пауза гап мазмунини бутунлай ўзгартира олиши мумкин. Мантиқий пауза матнда тўғри чизиқча (/) билан белгиланади. Мисоллар:

1. Шаҳримизда кўп / қаватли бинолар қурилди.
Шаҳримизда кўп қаватли / бинолар қурилди.
2. Турфа туйғуларни хуш кўрдим ғоят,
Дунёнинг ўзи ҳам / рангин ниҳоят!
Боқма ажабланиб сатрларимга
Бахтим ривоятдир, / ғамим ҳикоят.

(*Абдулла Орипов.*)

3. Психологик пауза ўқилаётган ёки ижро этилаётган асарда ифодаланиши лозим бўлган кучли ҳис-ҳаяжонни юзага чиқаришга хизмат қилувчи пауза туридир. Психологик пауза орқали табиий руҳий кечинмалар асосий фикр — маънони очиш билан узвий боғланиб, нутқни жонлантиради, сўз билан ифодалаш қийин бўлган ҳолатларни ўқувчи ёки тингловчига аниқ ва тўлиқ етказади. Матнда психологик паузанинг ўрни икки тўғри чизиқча (//) билан кўрсатилади. Масалан:

Ҳамробуви: *Ахир, жон қуда, нега ундоқ дейсиз!*
Нега тушунмас эканман! Тушунаман, // тушуниб турибман. Лекин биттаю битта қизим... // *Орзу-ҳавас кўраман деганимда ташлаб кетса... //.*

(*A. K. «Шоҳи сўзана»*)

31- топшириқ. Паузанинг юқорида кўрсатилган турларига биттадан гап тузинг ва уларнинг вазифасини изоҳланг.

57- машқ. Қуйидаги матнни ифодали ўқинг. Мантиқий ва психологик ургуни матнга белгилар билан қўйиб чиқинг. Паузаларнинг қўйилиши сабабларини изоҳланг.

БАХТ ЛИБОСИГА СИФИШ

Тўй... Ҳамманинг вазифаси аниқ. Сиз — куёв. Ёнин-

гизда — келин. Атрофда ҳамма баҳт либосини кийишга тиришаяпти.

Кимдир ҳавас билан, кимдир ҳасад билан, кимдир қувонч билан, кимдир андуҳ билан сизга боқади. Яна анчайин турфа «гулдастали» нигоҳлар... Тўйга тўйиши учун келганлар дастурхон текширади. Тўйга меҳрни тушиш учун келганлар аллакимларнинг нигоҳини қидиради. Ҳаёлпарастлар семиз-ориқ жуссаларини ўзгаларнинг кийимига тиқиб кўргандан хурсанд...

Бенбо ёғду... Шаддод мусиқанинг чираниши бесас...
Менгина ундовлар ичидаги ёлғиз сўроқман...

(Ёқутхон Акрамова.)

43. §. Интонация.

Оғзаки нутқининг ўзига хос ифодали воситаларидан бири интонациядир. Интонация сўзловчининг ҳиссият ва руҳий кечинмалари натижасида пайдо бўлувчи, ўқилаётган ёки ижро этилаётган асарнинг ифодалилигини таъминловчи овоз оҳангдорлигидир. У нутқ бўлакларини бир бутун ҳолда кўрсатади, гапнинг грамматик-мазмуний тугаллигини, сўзлар ўртасидаги турли синтактик муносабатларни ифодалайди, нутқдаги айрим бўлакларнинг ажратилишини билдиради. Интонация орқали асар қаҳрамонларининг турли кайфиятлари, ички кечинмалари, фикр-интилишлари ифодаланади. Бадиий ўқишида ҳам, ижро санъатида ҳам бир хил оҳангга йўл қўймасликда интонациянинг аҳамияти катта. Шу жиҳатдан интонация ўзгарувчандир, чунки у асар мазмуни, қаҳрамон ёки муаллифнинг фикр-туйғуси ва ҳиссиятидан, қолаверса, тингловчининг муносабатидан табиий равишда келиб чиқади. Интонацион ранг-баранглик бадиий асарнинг эстетик таъсиричанигини оширади, оғзаки нутқининг табиийлиги ва самимийлигини таъминлади.

Интонация нутқининг ифодалилигини таъминловчи кўлгина фонетик омилларга боғлиқ. Буларга ургу, пауза билан бир қаторда темпи, ритм, тембр каби ифода воситалари ҳам киради.

1. Темп нутқ оқимининг маълум вақтдаги ҳаракат суръати бўлиб, нутқининг артикуляцион таранглиги ва эшиятилиш аниқлиги даражасини изоҳловчи тезлашувни ёки секинлашувидир.

Нутқининг темпи сўзловчининг ички кечинмалари, воқеа-ҳаракат ривожига қараб ўзгариб туради. Бадиий

ўқишида ва асар ижросида темп фикрни жонлантиришга, унинг таъсир кучини кўтаришга, асарнинг ғоявий эстетик моҳиятини очишга хизмат қиласди. Масалан: Одил Ёқубовнинг «Улуғбек ҳазинаси» романидан олинган қўйидаги парчада Мирзо Улуғбекнинг сўзлари ҳиссий ҳолатига боғлиқ ҳолда тезроқ ва баландроқ, Шаҳзоданини эса секинроқ ва пастроқ темпда ўқилали: Мирзо Улуғбек жисмини қақшатган аламли туғенни аранг босиб:

— Куч-қудратингга инониб,— деди.— Мовароуннаҳр сарҳадига қадам қўймай қиёмат қойим қиласенму?

Шаҳзоданинг ранги ўчиб, бежо кўзлари тунгги алангадай ялтиллаб кетди.

— Нечун қадам қўймаганмен? Мовароуннаҳр улуси оёғим остидадур!

— Эсингда бўлғай, бу тупроқни оёқ ости қилдим, деган не-не фотиҳлар, не-не жаҳонгирлар ўтгандур. Уларнинг хоки қайди — тирик бир банда билмайди ва лекин бу эл, бу тупроқ абадул-абад туражакдур!

2. Ритм нутқ оқимидағи урғули ва урғусиз ёки узун ва қисқа бўғинларнинг, тезлашиш ва секинлашишнинг бир текисда такрорланишидир. Айниқса, шеърий асарда ритмнинг муҳим ўрни бор, уни ўқиганда ёки куйлаганда жанр ва мазмун хусусиятига қараб ўзига хос ритм сақланиши керак. Масалан:

Азалий ҳақ гапни яшиromoқ нечун,
Завол йўқ энг асл истеъдол учун.
Агарда коинот тегирмон бўлиб,
Оlamни янчса ҳам, қолгай у бутун.

(Абдулла Орипов.)

3. Тембр нутқа эмоционал-экспрессив жило берувчи товуш бўёқдорлигидир. Ҳар бир кишининг ўзига хос овози ва гапириш оҳанги бор. Шунга кўра кишиларнинг товуш оҳанги (бўёғи) турлича: қувноқ, босик, ғамгин, ноаниқ ва ҳоказо бўлади.

Агар тембр эстетик истакдан, ижрочилик талабидан келиб чиқса, унда нутқнинг ифодали воситасига айланади. Масалан, Шукур Бурҳонов яратган образларнинг тембри бир-бирига ўхшамайди. Ялангтўш, Эдип, Сулаймон ота каби у яратган образлар шунинг учун бетакордир.

32- топшириқ. Темп, ритм ва тембрга биттадан мисол топинг ва уларнинг нутқ интонациясини шакллантиришини изоҳланг.

58- машқ. Қуйидаги шеърнинг интонацион хусусиятларини аниқланг ва ифодали ўқинг.

ХАЛҚ

Халқ деңгиздир, халқ тұлқиндир, халқ күчдир,
Халқ исендиr, халқ оловдир, халқ үчdir.
Халқ құзғалса, күч йүқдиrким, тұқтотсун,
Құваттап йүқким, халқ истагин йүқ этсун.
Халқ исені салтанатни йүқ қилди,
Халқ истади тоғи таxтлар йиқилди.
Халқ истаса, озод бұлсун бу ўлка,
Кетсун унинг бошидоғи күланка.
Бир құзғалар, бир күпіраr, бир қайнар,
Бир интилар, бир ҳовлиқар, бир ўйнаr.
Йүқликин-да, очликни-да йүқ этар,
Ұз юртни ҳар нарсага түқ этар.
Бутун күчни — халқ ичидан олайлик,
Құчоқ очиб халқ ичига борайлик.

(Чүлпон)

44- §. Бадий нутқнинг фонетик ифодалилиги

Бадий асарларда шоир ва ёзувлайлар оқанғдорлик қонуниятларини эстетик мақсадларга бүйсундирадилар, нутқнинг товуш қурилишини ифода мазмуні билан узвий бөглаб, товушлар бирикмасини фикрни ифодалашнинг товуш воситасига айлантирадилар. Айниқса, шеъриятда нутқнинг фонетик ифодалилигини оширувчи турли усуллардан фойдаланилади. Ассонанс ва аллитерация шундай усулларнинг асосийлариidir.

Юқорида ўрганилган пауза, интонация, темп, ритм, тембр, товуш чўзиқлиги каби ҳодисалар ҳам фонетик ифодалиликни шакллантиришда муҳим ўрин тутади.

1. Ассонанс бир хил унли товушларнинг такрорланишидир. Ассонанс натижасида мисралар алоҳида оқанғдорлик касб этади, ўқувчидан алоҳида эстетик завқ уйғотади. Масалан, қуйидаги түртликда ў товушининг такрорланишига эътибор беринг:

Дунё гўзал кўринур сенга
Узи қанча эски бўлса ҳам.
Яшараркан бутун табнат
Ўз эгаси қўйганда қадам.

(Х. О.)

2. Аллитерация бир хил ундош товушларнинг нисбатан бир маромда такрорланишидир. Бу ҳодиса ўзбек шеъриятида ҳам сезиларли ўрин эгаллаган. Топишмоқ, тез айтишларда ҳам ундошларнинг такрорланиши ўзига хос оқанғдорликни таъминлайди.

Масалан, қуйидаги мисраларда қ ундошининг тақорланиши нутқнинг ифодавийлигини вужудга келтирган:

Қора қошинг, қийиқ қошинг, қуюқ қайрилма
қошинг, қиз
Қилиб қатлимға қасд, қилич қайраб қотил
қарошинг, қиз.
Қафасда қалб қушин қийнаб, қанот қоқмоққа
қўймайсан,
Қараб қўйгин қиёким, қалбни қиздирсин
қуёшинг, қиз.

(Э. Водидов.)

33- топшириқ. Узингиз ёдлаган шеърлардан ассонанс ва аллитерацияга мисоллар келтирилган.

59- машқ. Қуйидаги шеърий парчалардаги фонетик ифодавийлик воситаларни изоҳланг.

1. Сени қуёш кўтаргай бошга
Сен ҳам ошиқмисан ёки оҳужон.

(Абдулла Орипов.)

2. Азиз асримизнинг азиз онлари
Азиз одамлардан сўрайди қадрин.

(Ф. Ф.)

3. Розимасман бир ёш томса кўзимдан,
Розимасман сал ранг кетса юзимдан,
Иўл ошсам-у, сал яшашдан адашсам,
Розимасман унда тамом ўзимдан.

(Х. О.)

4. Мен то жондан севдимки, сени жон элим,
Бу жаҳон эли бўлмиш жонажон элим.

(Нусрат Карим.)

ЛЕКСИКОЛОГИЯ

45-§. Тилшунослик фанининг барча бўлимлари бирбири билан чамбарчас боғлиқ. Фонетикада тилнинг товуш томони, морфологияда сўз тузилиши, синтаксисда сўз бирикмалари, гап, гап тузилиши ва турлари ўрганилса, лексикологияда сўз бойлиги, сўзниң маъно хусусиятлари, қўлланиш жараёнида касб этадиган турли маъно нозикликлари ўрганилади. Масалан, *Қўклам келди* гапи синтактик жиҳатдан: гап, содда гап, йиғиқ содда гап; лексик жиҳатдан: бирни фаслнинг номини, иккинчиси ҳаракатни англатган икки сўздан иборат; морфологик хусусиятига кўра *қўклам* сўзи уч қисмдан иборат: *қўк-ла-м*: кўк рангни билдиряпти, *қўкла* сўзида *-ла* сифатдан феъл ясаяпти, *қўклам* сўзида *-м* феълдан фасл номи — от ясаяпти. Ўз навбатида, бу сўз яна майда бўлакларга бўлинади, яъни икки унли ва тўрт ундош товушдан иборат.

Демак, тилнинг юқоридаги барча соҳалари бирбири билан чамбарчас боғлиқ. Шу туфайли улар бизнинг нутқимизга маъноли тус беради ва фикр ифода қилишимизга имкон яратади.

Лексикология тилнинг сўз бойлиги, сўзларнинг пайдо бўлиши (этимологияси), маъноси ва маъно тараққиёти (асосий ва кўчма маънолари), шакл ва маъно муносабатига кўра турлари, эскирган ва янги сўзлар каби масалаларни ўрганади. Шунинг учун сўзлар шу тилда гаплашувчи ҳалқнинг тарихи, маданияти, турмуш тарзи билан чамбарчас боғлиқ.

СЎЗЛАРНИНГ АСОСИЙ ВА ҚУЧМА МАЪНОЛАРИ

46-§. Сўз баъзан матнда бир маънони, алоҳида олинганда бошқа маънони англатиши мумкин. Масалан, қулоқ ёки *кўз* дейилганда, инсоннинг икки аъзоси англашилади. Бу сўзларнинг бошқа маънолари (*ариқнинг қулоғи, булоқнинг кўзи, деразанинг кўзи* ва ҳоказо) ана шу асосий маъно негизида юзага келган бўлиб, сўз маъносининг тараққиётини билдиради. Сўзлар-

нинг бир неча маъно англатиб келиши кўп маънолилик (полисемантизм) саналади.

Сўзнинг бундай кўп маъноли бўлиши тил тараққиётининг натижасидир. Тилда ҳар қандай сўз, аввало, бирор нарса ёки ҳодисанинг аташ туфайли пайдо бўлади, яъни бир маънонигина ифодалайди. Қейинчалик эса шу сўз маъно тараққиёти натижасида бошқа нарса, ҳодисаларни ҳам ифодалашда қўллана бошлайди ва шу туфайли кўп маъноли сўзга айланади. Баъзи сўзларнинг бадий асарда қўлланишидан англашиладиган айрим маъноси кўп маънолиликдан фарқ қиласди. Чунки бу айрим маъно фақат ўша асардагина мавжуд бўлиб, асар матнидан ташқарида, адабий тилда қўлланмаслиги мумкин. Шунга кўра, айрим маъно замирида маълум эмоционалликни, таъсирчанликни юзага келтиради. Масалан:

Ақлу балогатнинг шотиларидан
Юксала берингиз секундлар сайин.

(Faafur Fy.ном.)

Шоти сўзи аслида «юқорига, тепага чиқишига мўлжалланган ёғоч (ёки темир) асбоб» маъносида қўлланади. Бу мисраларда эса «давр, босқич» маъносида ишлатилган. Демак, кўп маънолилик сўзларнинг лексик маъноларидир.

Кўп маъноли сўзларда икки маъно тури: бosh (туб) маъно ва ясама маъно мавжуд.

1. **Бош маъно** бошқа лексик маъноларнинг ўсиб чиқишига асос бўлган маънодир. Масалан, *кўз* сўзининг бош маъноси унинг одам аъзоларидан бирини англатишидир.

Сўзнинг бош маъноси нутқий шароит, контекст талабига кўра тўғри маъно, асосий маъно, номинатив (номловчи) маъно деб ҳам юритилади.

2. **Ясама маъно** сўзининг бош маъносидан ўсиб чиқкан маъносидир. Масалан, *ёғочнинг кўзи*, *деразанинг кўзи* каби.

Ясама маъно контекст, нутқий шароит талабига қараб кўчма маъно, мажозий маъно деб ҳам юритилади.

34- топшириқ. Бешта кўп маъноли сўз топиб, улар иштироқида гаплар тузинг ва маъно турларини изоҳланг.

60- машқ. F. Fуломнинг «Сизга» номли шеъридан олинган парчаларни ифодали ўқинг. Сўзларда учраган кўчма маънони унинг асосий маъноси билан қиёслаб изоҳланг.

Одамлик мазмуни тоғлардан буюк,
Айниқса, озодлик нақд хазинангдир.
Сен унинг қадрига етгучи фарзанд,
Асрлар кўзгуси мағрур сийнангдир.

Шудгорнинг четида, тут соясида,
Қўп ширин тотади меҳнат кулчаси.
Ҳар ноннинг катталиги худди офтоб
Меҳнатсиз умрдир миннат кечаси.

Даланг қирғоғидан уқадай ўтар,
Пахталар юкланган чексиз карвон,
Сенинг манглай теринг, меҳнатинг сингган
Ҳар бир дақиқадир пўлат, зўравон.

Музика бешиги, Штраус ватани,
Оҳанглар бозори қадим Венада.
Динора яратди ўзбек юрагин
Рубобий ҳиссини пианинода.

61- машқ. Ўзингиз билган бирон шеърни ёддан айтинг. Үндаги айрим (индивидуал) маъно ифодалаган сўзларни топиб, маъносини тушунтиринг.

СУЗ МАЪНОСИННИГ ТАРАҚҚИЁТИ

Ҳар бир тил фақат янги сўзлар ҳисобига эмас, шунингдек, мавжуд сўзлар маъноларининг ўсиши ҳисобига ҳам бойиб боради. Бир предмет, белги, ҳаракат-ҳолат номининг бошқа бир предмет, белги, ҳаракат-ҳолатга ном бўлиб кўчиши ёки лексик маъно ҳажмининг ўзгариши сўз маъносининг тараққиётига олиб келади.

Сўзларнинг маъно тараққиёти 1) маъно кўчиши; 2) маънонинг кенгайиши; 3) маъно торайиши тарзида рўй беради.

47-§. Сўзларда маъно кўчиши метафора, функция-дошлик, метонимия, синекдоха каби ҳодисаларни ўз ичига олади.

1. **Метафора** (юонча «*metaphoza*»— кўчирма) нисбий ўхашликка эга бўлган икки предметдан бирининг номи билан иккincinnisinи ҳам аташ ҳодисасидир. Масалан: *ёқа:* тўннинг ёқаси — дарёнинг ёқаси; *этак:* кўйлакнинг этаги — тоғнинг этаги.

2. **Метонимия** (юонча «*metonymia*»— қайта номлаш) нарса ва ҳодисаларнинг ўзаро боғлиқлиги асосида бир предмет номи билан иккincinnisinи ифода этишdir. Бунда икки предмет ўртасида ҳеч қандай ўхашлик бўлмайди. Улар орасидаги доимий боғланиш туфайли бирини айтганда иккincinnisi ҳам англашилади. Масалан:

Лермонтовни ташламадим ҳеч,
Сўнгра қўйиб олдим Ҳофизни.
Пушкин менга кўрсатди ҳар кеч
Йинглаб турган бир черкас қизни.

(Ҳ. О.)

Мисолдаги *Лермонтов*, *Ҳофиз*, *Пушкин* сўзлари бу санъаткорларнинг асарларини англатяпти.

3. **Синекдоха** (юонча «*sinekdoche*»— бирга англамоқ, қўшиб фаҳмламоқ) қисмнинг номи билан бутунни ёки бутуннинг номи билан қисмни аташ ҳодисасидир. Масалан, бош ёки туёқ сўзларининг қорамол, қўйи-эчки маъносида, *тирноқ* сўзининг фарзанд маъносида қўлланиши синекдоха ҳодисасига киради.

4. **Маънонинг функциядошлиқ жиҳатидан кўчиши** маълум бир предметнинг вазифасини иккинчи бир предмет бажариши натижасида аввалгисининг номи кейингисини ифодалаш учун қўлланишидир. Масалан, ўқ сўзи камон (ёй) билан отиладиган қуролни ифодалаган. Милтиқ, замбарак ихтиро этилгач, улардан отиладиган қурол ҳам ўқ номини олди. Бу вазифаси жиҳатдан ўзаро ўхшашлик туфайли юз берди.

Шуни қайд этиш керакки, сўз манъосининг кўчишидаги кейинги икки усул—синекдоха ва маънонинг функциядошлиқ жиҳатидан кўчиши у қадар типик эмас. Биринчи икки усул анча кенг тарқалгандир.

62- машқ. Кўчма маънода қўлланган сўзларни топинг. Қайси йўл билан кўчганилигини айтинг.

1. Ҳақиқатан ҳам у булоқнинг кўзини эслатаркан. (*Ч. Айт.*) 2. ... Латофат ариқ лабидаги чойдишни олиб, ойисига қараб чопди. (*О. Е.*) 3. Йўлдошбой сой ёқасидан пастга томон қиялаб юради. (*Ҳ. Нуъмон, А. Шораҳмедов.*) 4. Икки кўзи ҳар наф моллар билан тўла хуржунни елкага ташлаб, ... инқиллаб кирди. (*О.*) 5. Зал гуриллаб кулиб юборди. (*А. Қ.*) 6. Бутун вужуди билан берилди у ўқишга. Ҳар кун олиб папкасанн, қатнар у «Навоий»га. (*Мирм.*) 7. Қўлингиздан қоладиган ёлғиз тирноқ бу. Ишқилиб мендан кейин етимлиги билинмасин! (*И. Сураймон.*) 8. Эшитган қулоқ нима дейди? (*Ҳ. Ф.*) 9. Ойга учайтган космонавт агар сўраса не китоб олишини, у дам Навоий-ю, Пушкин, Ғафуру Тагор ва олиб уч дердим Тихоновни ҳам. (*Мирм.*) 10. Чорвам бор десам, дегудай. Туёғимиз кўпайса кўпайдики, камайгани йўқ. (*Ш.*) 11. Қанақа ташвишни айтаяпсиз, оқсоқол? (*Р. Файзий.*) 12.— Алло, ҳозир

Тошкент билан гаплашасиз,— деди телефонистка.
(Р. Файзий.)

48- §. Маънонинг кенгайиши. Сўз жамият билан, шу тилда гаплашувчи халқнинг турмуш тарзи билан чамбарчас боғлиқ. Сўзларда маъно кенгайиши ва торайиши ҳодисасининг рўй беришида ҳам ана шу боғлиқлик кўзга ташланади. Масалан, *ватан* сўзи фақат уй-рўзғор ва туғилиб ўсган қишлоғимизни эмас, эндиликда мамлакатни англатади. Демак, жамият тараққиёти сўз маъноларининг ривожи ва кенгайиши учун имкон беради. Бунда бир маъно асосида янги (ясама) маъно ҳосил бўлмайди, фақат мавжуд лексик маънонинг ҳажми кенгаяди: нотиқ (касб маъносида)— нотиқ (нутқ сўзлаган киши, маърузачи маъносида); *ойлик* (бир ой — 30 кун маъносида) — *ойлик* (бир ойда олинадиган маош, пул маъносида) каби. *Ампер, Маузер, Ризамат* каби атоқли отларнинг турдош от (*ампер* — ток ўлчови бирлиги, *маузер* — пистолет тури, *ризамат* — узум нави) га ўтиши ҳам маъно кенгайиши ҳисобланади.

Маънонинг торайишида кенг доирадаги воқеликни атовчи сўз тор доирадаги воқеликни аташ учун хизмат қиласиди. Масалан, турдош отнинг атоқли отга айланиши (*пўлат* — *Пўлат, ўлмас* — *Ўлмас*) каби. Бунда ҳам янги маъно юзага келмайди, балки сўзнинг илгари англатган маънолари ҳажми нисбатан тораяди: *ўртоқ, дехқон* каби сўзлар дастлаб кенг маънени, эндиликда тор маънени ифодалайдиган бўлиб қолган. Шунга ўхшашиб белги ифодалайдиган сўзлар ҳам отлашганда тор маъно ифодалайди. Масалан: *мард, номард, яхши, таниши, бегона* кабилар.

63- машқ. Ўзингиз мустақил равишда бирорта бадиий асардан лексик маънонинг ҳар бир тараққиёт йўлига биттадан мисол топинг.

64- машқ. Ўқинг. Ажратилган сўзларда маъно кенгайиши ёки торайиши ҳолатларини изоҳланг.

1. Помирга кетиш йўли менга беш қўлдек **равшан** эди. (Ч. Айт.)
2. Ҳаётда ўз **нонингни** ҳалол меҳнат билан топишни ўрган.
3. Рашид Москвага жўнаш учун отланди.
4. Унинг зеҳни жуда **ўткир**, ўзи тиришқоқ эди, мактабда энг кучли ўқувчилардан ҳисобланади. (П. Т.)
5. **Ўқтамнинг** сал сузук кўзлари энди беихтиёр равишида ҳовлида айланиб қолди. (О.)
6. **Лола**, сенга ажойиб совфа олдим.

7. Йигитлар сен учун жангга кирганда,
Ботирлар осмонда берганида жон,
Кўзидан қон оққан ёвни кўрганда,
Сенинг енгишингга келтиридим имон.

(Ҳ. О.)

СУЗЛАРНИНГ УСЛУБИЙ БҮЕФИ

49- §. Тилда сўзнинг бош ва кўчма маънолари лексик маъно сифатида нарса ва ҳодисаларни аташга хизмат қиласди. Сўзнинг лексик маъносини билиш ва уни тўғри қўллаш тил саводхонлигининг асосини ташкил қиласди. Аммо нутқ жараёнида сўзнинг фақат лексик маъносигина назарда тутилмайди: сўзловчи ўзи айтиётган, тилга олаётган нарса-ҳодисаларга ўз муносабатини ҳам билдиради. Демак, сўзлар нутқ жараёнида лексик маънодан ташқари, сўзловчининг аталаётган нарса-ҳодисаларга ижобий ёки салбий муносабатини ифодаловчи қўшимча маънога — услугубий бўёққа ҳам эга бўлади. Услубий бўёқ лексик маънога таянган ҳолда уни янада бойитади, бадиий, образли сўзга айлантиради. Масалан, *гапирмоқ*, *сўзламоқ*, *жаврамоқ*, *вайсамоқ*, *бидирламоқ*, *мингилламоқ*, *тўнгилламоқ* каби сўзларда овоз чиқариб айтиш умумий маъноси бор. Агар бу сўзлар бошқаларга нисбатан киноя, мазах, кесатиш маъносида қўлланса, услугубий бўёқдорлик касб этади.

Лексик қўллаш сўзнинг алоҳида шахс ёки муаллиф нутқида маълум даражада ўз лексик маъносига зид ҳолда янгича маънода қўлланишидир. Лексик қўллаш натижасида сўз нарса ёки воқеликни атамайди, балки олдин номланган нарса ёки воқеликнинг образли ифодасига айланади. Масалан: *Ҳамма кўриб-билиб турибди, мана шу соддагина одам бир ишида айтийлик ўнта отни еб юбормаган. Бу отлар қачонлардир ўз «эга»сини топиб кетганини отбоқардан бошқа ҳамма билади.*

(Е. Хўжамбердиев, «Ўзбеклар иши».)

35- топшириқ. Услубий бўёқнинг ифодаланиш усулларига биттадан мисол топинг ва ифодаланиш усулини изоҳланг.

65- машқ. Матнни ўқинг. Услубий бўёқли сўзларни топиб қўшимча маъносини аниқланг.

— Бир илтимос,— дея Баширжон шоирга илтижо қила бошлади,— йўқ деманг энди, домлажон!

— Бу қандоқ бўлди, шоир?— деди Каримий.— Кат-

тароқ бир нарса бошлаб қўйган эдим-ку? Достон ёзяпман, ҳа...

— Бир илтимос, ака... э, домлажон, сангтарош уста қараб турибди, шу бугундан кечикма, деган...

Каримий, осонликча қутулмаслигига ақли етди шекилли, яна Баширжоннинг қўлтиғидан олди.

— Гап бундоқ, шоир...— Ў сўзини давом эттиromoқчи эди, Баширжон тўсатдан:

— Нега мени «шоир» дейсиз, домла?—деди қизариб. Каримий кулиб юборди. Узун, мошкичири сочини озғин бармоқлари билан орқага тараб:

— Биласизми, дўстим,—деди жиддийлашиб,— бу дунёда ҳаммаям ўзича шоир, мен ҳамма нарсада, ҳамма одамда ўзгача бир поэзия кўраман...

Баширжон унинг нега бирдан «поезд»ни тилга олганига тушунмаса-да, шоирнинг жиддий сўзлаётганидан мамнун бўлиб ўтиради.

(*H. Аминов, «Ёлғончи фаршишталар».*)

ФРАЗЕОЛОГИК БИРЛИКЛАР

50-§. Ўзбек тили луғат таркиби жиҳатидан жуда бой ва ранг-барангдир. Тилимизда мустақил лексик маънога эга бўлған алоҳида сўзлардан ташқари, маъно жиҳатидан шундай сўзга тенг, аммо икки ва ундан ортиқ сўзнинг турғун бирикувидан ташкил топган фразеологик бирликлар ҳам мавжуд. Уларнинг маънолари таркибидаги сўзларнинг яхлит маъноси асосида юзага келади ва инсон хотирасида бир бутун ва тайёр ҳолда сақланиб, гандаги бошқа бирликлар билан худди алоҳида сўз каби муносабатда бўлади. Фразеологик бирликлар ибора деб ҳам юритилади. Тилимизда асрлар давомида қўлланиб келаётган, халқимизнинг тафаккур қудратини, турмуш тажрибасини мужассамлаштирган, ҳаёт зиддиятлари жараённида шаклланган, сайқал топган қўйма иборалар ниҳоятда кўп. Масалан: *боши осмонда, оғзи қулогида, кўз остига олмоқ, кўз қирини ташламоқ, қўли узун, қўли қисқа, бели бақувват* кабилалар.

Фразеологик бирлик ифодалайдиган маъно кўп жиҳатдан сўз англатадиган лексик маънодан фарқ қилади. Фразеологик маъно сўзга нисбатан, аввало, маънони ўта кучли даражада ва муҳими, ўткир образли-

лик, таъсирчанлик белгиси билан ифодалайди. Шунга кўра, улар сўзнинг бой образлиликка эга бўлган маънодоши саналади. Қиёсланг: яширин — енг ичида, хурсанд — оғзи қулоғида, олғир — юлдузни ёненарвон урадиган, афсусланмоқ — бармогини тишлаб қолмоқ.

66- машқ. Еқасини ушламоқ, қилдан қийиқ чиқармоқ, кавушини тўғрилаб қўймоқ, бошини емоқ, оғзи қулоғида, арпасини хом ўркоқ, тела сочи тикка бўлмоқ, ҳафсаласи пир бўлмоқ, бармогини тишламоқ, кўзи учмоқ ибораларининг маъносига изоҳ беринг. Улар иштирокида гаплар тузинг.

67- машқ. Гапларни ўқинг. Фразеологик бирликларни топиб, уларни маънодош сўзлар билан қиёслаб, фарқини айтинг.

1. Маҳалла-кўй узоқдан овозини эшитиб: «Жўра полвоннинг ошиғи олчи экан-да?»— деб қўйди. (С. Ан.)
2. Мирзакаримбой илоннинг ёғини ялаган одам. (О.)
3. «Зуваласи пишиқ яратилганлар-чи, ҳозир ҳам пишиқ»,— деган эди. (С. Ан.) 4. Ўзиям тегирмонга тушса, бутун чиқади. (О.) 5. Она кўзи тўрт бўлиб йўлга қарайди. (Ҳ. О.) 6. Ҳамманинг оғзи очилди-қолди. (М. Исм.) 7. Сатторов оёғи куйган товуқдек типирчилаб қолди. (Ю. Шомансур.) 8. Ҳаммамиз бир ёқадан бош чиқарайлик. (М. Исм.) 9. Туробжоннинг тела сочи тикка бўлди. (А. Қ.) 10. Ҳамма иш хамирдан қил суғургандай бўлди. (С. Аҳм.) 11. Энди гидростанция қуриш учун астойдил бел боғлашимиз керак, ўртоқ Сайрамов. (О.) 12. Сехина — қўли эгри хотин. (Р. Турсунов.)

51-§. Иборалар услубий бўёқдорлиги билан ажralиб турувчи тил бирликлариdir.

Кучли экспрессивлик, образлилик ибораларни нутқнинг фаол воситасига айлантиради, унинг оғзаки нутқда, бадиий адабиётда ҳамда публицистикада ўткир ва ихчам тасвирий восита бўлишини таъминлайди. Фразеологик бирликлар қаҳрамон образини таърифлашда, персонажлар нутқини индивидуаллаштиришда, воқеа-ҳодисаларнинг эмоционал-сиқиқ тасвирини яратишда тайёр таъсирчан восита саналади. Баъзан ёзувчилар, сўз усталари ибораларни ғоявий-бадиий мақсадга, контекстга мослаб қисман ўзгартирадилар ва шу орқали якка муаллифга хос фразеологик бирликлар яратилиди. Масалан, А. Қаҳҳор асарларидағи «мия меҳанизмидан бир винти тушиб қолган», «бошини қашлаб туриб қорнига муштламоқ», «бурганинг йўталидан бўй

рон қўйпормоқ», «игна билан битадиган ишга жуволдиз тиқмаслик» каби иборалар шундай яратилган.

36- топшириқ. Бирон бадний асардан таркибидаги сўзлар қисман ўзгартирилган 5 та фразеологик бирлик топинг ва уларни Ш. Раҳматуллаевнинг «Ўзбек тилининг изоҳли фразеологик лугати»-даги тузилиш шакли билан солиштиринг.

68- машқ. Ўкта Усмоновнинг «Гирдоб» романидан олинган қуидаги парчалардан ибораларни топинг, услубий бўёгини, таркиби қандай ижодий ўзгартирилганини изоҳланг.

1. ... Муҳиддин Жабборович хўмрайиб, бирдан журналистлардан хафа бўлиб кетди. «Уларга учини чиқарса бас — қуруқ аравани тоза олиб қочишади. Ўзлари масалани тузукроқ тушуниб етмай туриб, ҳақиқатни арzon шов-шувга қурбон беришларига, илмий фактларни юзаки билган ҳолда яна уялмай умумий хуласалар чиқариб, олимларга ақл ўргатишларига куясанми ё ўласанми?!. «Истеъдодли олим» эмиш! Шундай донгдор пахтакорни ҳам йўлдан уришибди-я! Унинг обрўйи керакда, ахир! Гавҳар узук билан данак чақиш бу!.. Ваҳоланки, партия минбаридан бундай пала-партиш фойдаланиш.. билмадим, нима дейиш мумкин буни?! Тишларининг оқини кўрсатиб, керилиб туришларини қаранг! Гўё тоғни қулатиб бергандай...»

2. ... «Ҳаммасига мана шу калондимоф айбдор!— деган фикр ўтди Салтанатнинг хаёлидан, кўз қири билан эрининг дўрдайган бурнига қарапкан.— Ҳатто муомалани билмайди-ку, тағин димоғларидан қор ёғади... Кўнглига қарайвериб-қарайвериб, туғишганларимдан ҳам бегона бўлдим. Бу авлиёга эса ҳали-ҳали бир гап — оз, икки гап — кўп...» Салтанат қимматбаҳо зираклари электр нурида ялт-юлт чақнаб кўзни олаётган нозанин опа-сингилларга яна бир бор қаради-ю, чуқур хўрсинди; «ўзи шу — ови юрганнинг дови ҳам юраркан!»

СЎЗЛАРНИНГ ШАҚЛ ВА МАЊНО МУНОСАБАТИГА ҚУРА ТУРЛАРИ

Шакл ва мањно муносабатларига кўра сўзлар учурли бўлади: омоним, синоним ва антонимлар.

52- §. Омонимлар талаффузи ва ёзилиши бир хил, аънолари ҳар хил бўлган шаклдош сўзлардир. Масан: 1) *соз* — пухта, маъқул; 2) *соз* — чолғу асбоби; 1 *соз* — иноқ, ўзаро яқин.

Шаклдош сўзларни кўп мањноли сўзлардан фарқ-

лаш лозим. Улар айтилиши ва ёзилиши бир хиллиги жиҳатидан ўхшаш бўлса-да, шаклдош сўзлар маъносида ички боғланиш бўлмайди, уларнинг ҳар бири алоҳида маънога эга бўлган сўзлардир. Юқорида келтирилган соз сўзининг ҳар бири алоҳида сўз ҳисобланади. Кўп маъноли сўз эса, ўз номидан англашилаётганидек, бир неча маъноси бўлган бир сўздир. Кўп маъноли сўзлар англатган маъноларда ички боғланиш бўлади.

69- машқ. Гапларни ўқинг. Омоним сўзларни топиб, маънолари ни тушунтиринг. Метафоралардан фарқини айтинг.

1. От яна пишқириб икки олдинги оёғини осмонга ташлади. (*Туроб Тўла*.) 2. Каталакдек кичик ҳовли ўртасидаги ток остига қўйилган темир чорпояда кечаги уч йигит ўтирас эди. (*Ф. Насриддинов*.) 3. Хазонлар орасида бизнинг олма, дўлана ташийдиган кажавала-римизга ўхшаш кажавалар думалаб ётарди. (*Туроб Тўла*.) 4. Бир неча сувори тапира-тупур қилиб кўприк устидан от чоптириб ўтди. (*И. Содиқов*.) 5. Тушимда алаҳсиганман, шекилли. (*М. Маҳмудов*.) 6. Соч олди-риш навбати Қори Ишкамбага етди. (*С. А.*) 7. Кўпик сочиб боради. (*«Равшан» достонидан*.) 8. Чанг-тўзон машина ойнасига урилиб, йўлни кўрсатмай қўяр эди. 9. Бастакор чангда қандайдир куй чалар эди. 10. Оҳ, бизнинг ёшлигимиз уруш вақтида · фам-ҳасрат билан ўтган. (*Ҳ. Муҳаммад*.) 11. Ана энди кўз ёшингни дарё қиласер. (*Ҳ. Муҳаммад*)

70- машқ. Қўйидаги сўзларни ўқинг. Аввал омоним, кейин кўп маъноли сўзларни кўчиринг, уларнинг фарқини шу сўзлар иштиро-кида гаплар тузиб тушунтиринг.

Боғ, чанг, ёзмоқ, ёз, бош, қулоқ, кўз, томир, от, той, ошиқ, кўк, ойлик, тирноқ, қирқ, сон, қўй, соч, ёз.

Шаклдош сўзлардан услубий мақсадларда кенг фойдаланилади, улар бадиий адабиёт ва сўз санъатида муҳим таъсирчан восита саналади. Шаклдош сўзларни қўллаш билан турли сўз ўйинлари, асқия, пайров, ҳазиллар келиб чиқади, шеъриятда туюқ жанри тузилади. Масалан:

Бу дунёдин фараҳ йўқтур мени маҳсунга жононсиз,
Жаҳондин ким десун биллоҳ керакмас манга жон онсиз.

(Бобур.)

Келур сел, кўкда гоҳо бўлса чақмоқ,

Зарар қилғай данакни тишда чақмоқ.
Емондир никки ўртоқ ўртасида
Урнштирмоқ учун бир-бирига чақмоқ.

(Ҳабибий)

Матн мазмунини очувчи шаклдош сўзларнинг маъносини тўғри фарқлай билиш муҳимдир. Маънони тўғри англай олмаслик оқибатида нутқда ноаниқликка, баъзан қўпол хатога йўл қўйиш ҳоллари учрайди. Бу ҳолат омонимларнинг бошқа кўриниши — паронимлар (товуш жиҳатдан фарқли, аммо айтилиши ўхшаш сўзлар)да, айниқса яққол кўринади:

Асил ғоминг нима?, Кўйлак асл шоҳидан тикилган гапларида *асил* ва *асл* сўзлари нотўғри қўлланган.

37- топшириқ. Узингиз билган пайров, қочириқ ёки туюқлардаги шаклдош сўзлар маъноларини тушунтиринг.

71- машқ. Қуйидаги бадиий парчалардаги таъсирchan воситаларни топинг ва уларнинг қайси жанрда ва қандай маънода қўлланганини айтинг.

1. И ўл дошхон: Ширин гапирасиз-да, Айниiddин ака! Бу сафар ўзимиз билан «Очил дастурхон» ҳам олиб келганимиз. Қандолатчиликнинг энг ноёб мевала-ридан топилади. Ҳатто қуш сути ҳам бор.

Зайнобиддин ака: Ҳамма чучуклик муҳайё экан-ку, манави шогирдим Шираев бўлса, келишда бир дўконда савдо қилаётган ёш жувондан ирис борми деб сўраяпти.

Ғуломжон ака: Жувон ҳам бўш келмай, «Ака Қорақумдан келганимисиз, бироннинг ирисини сўраб ниша қиласиз? Ана сизбоп кис-кис, тузиклар бор» деганимish.

Шираев: Мен қувониб, «Оҳ» ўшалардан тортинг дедим-да, магизли ҳолвасидан ҳам олдим.

(«Т. оқшоми» газ.)

2. Дейдиларки, кунгабоқар
Умр бўйи кунга боқар.

(«Еши ленинчи» газ.)

3. Ул ёр агар ёшурса юз оҳ,
Ағёрға гар кўрунса юз оҳ.

(Бобур.)

4. Қўлингдан келганча чиқар яхши от,
Яхшилик қил болам, ёмонликни от.

Насиҳатим ёд қилиб ол, фарзандим,
Ёлғиз юрса чанг чиқармас яхши от.

(Фольклордан)

Шаклан тенг қелувчи фразеологик бирликлар ҳам нутқда мавжуд. Масалан, *қўл кўтармоқ* (урмоқчи бўлмоқ) — *қўл кўтармоқ* (тарафдорликни билдиришмоқ); *жони чиқмоқ* (ўлмоқ) — *жони чиқмоқ* (қаттиқ ғазабланмоқ); *бошига кўтармоқ* (қаттиқ шовқин солмоқ) — *бошига кўтармоқ* (қаттиқ хурмат қилмоқ) каби.

Шаклдош фразеологик бирликларнинг асл кўчма маъноси контекстда намоён бўлади. Иборанинг қандай маъно ифодалаётганини тўғри англаш учун унга контекстдан ажралмаган ҳолда ёndoшиш лозим, акс ҳолда ибора маъноси нотўғри тушунилади.

72- машқ. Ўзаро шаклдош фразеологик бирликларнинг маъноларини фарқлаб изоҳланг.

1. Отвод бериш қаёқда, ҳеч ким мени оғзига ҳам олмади. (*A. К.*) 2. Асли мени хўжайин ўргатди. Илгарари бир қатра оғзимга олмас эдим. (*O.*) 3. Сал ўтмай пастликда қордан рўмол ўраган гарамлар кўринди. Маъюс келаётган қўйларга жон кирди. (*C. Ан.*) 4. Арава сиғмайдиган ичкарилик кўчага бугун жон кирган. (*O.*) 5. «Мен айта қолай, опа!»— деган эди, ўқитувчи сўз бермади. (*Х. Назир.*) 6. Мен ҳам сиздай ҳаққоний бўлишга сўз бераман. (*П. К.*) 7. Атроф-теваракда кўчани бошига кўтариб юрган болаларнинг шовқини тинган. (*P. Файзий.*) 8. Жамила хола ҳам Ҳамида келгундай бўлса, «қизим-қизим» деб бошига кўтаради. (*C. Ан.*)

53- §. Синонимлар бир умумлаштирувчи, бирлаштирувчи маънога эга, аммо маъно нозикликлари билан фарқланувчи ҳамда талаффузи, ёзилиши ҳар хил бўлган маънодош сўзлардир. Масалан: *юз, бет, афт, башибара, чехра, турқ, дийдор, тус, ранг*. Бу сўзлардаги бир умумлаштирувчи маъно замирида юзага келган маъно нозикликлари уларнинг фарқини ва қўлланишида ўзига хосликни таъминлайди.

Синонимлар одатда бир сўз туркумига мансуб бўлади: *дўст, ўртоқ* (от); *аҳло, яхши* (сифат); *юксалмоқ, ўсмоқ, ривожланмоқ* (феъл); *кўп, мўл* (равиш).

Бир бирлаштирувчи маъно атрофига уюшаётган синонимлар синонимик қатор, шу қаторда нисбатан бетараф маъно ифодаловчи сўз доминанта деб юритила-

ди. Масалан, кишининг қиёфасини англатувчи юқорида келтирилган сўзлар бир синонимик қатор бўлиб, унинг доминантаси юз сўзиdir. Синонимларни тўғри қўллай билиш гап мазмунининг равон, аниқ ифодалинишини, нутқнинг ноўрин такрорлардан холи бўлишини таъминлайди ва сўзловчининг савияси, нутқ маданиятини намоён этади. Синонимларнинг нозик маъно қирраларини ва ранг-баранг услубий бўёғини фарқлай билиш лозим. Масалан, *касал*, *бемор*, *хаста*, *бетоб* сўзларининг ўзаро маъно қирраларини фарқлаб ишлата билмаслик, нутқ эстетикасини бузади, қўпол хатоларга олиб келади.

73- машқ. Гапларни ўқинг, синоним сўзларнинг маъноси ва маъно нозикларини тушунтиринг.

1. Ғазал ҳам бўлурми бунча дилрабо, Бунчалар серишва, бунчалар серноз. (*Э. В.*) 2. Лекин генерал унга парво қилмай очиқ юз, табассум билан капитани чақирди. (*Ш.*) 3. Эндиликда боя ўйламаган ўйларини, инсофу адолат, диёнат, ҳалоллик, ва яхшилик тўғрисидаги ўйларини рўёбга чиқариш лозим эди. (*О. Е.*) 4. Ҳамиша шундай бахтли, фароғатда яашшимга юрагим бовар қилмайди. (*Ш.*) 5. Бечора қизим! Шўрлик қизим. (*Ҳ. Ҳ.*) 6. Бой, қолмади тоқатим! Бир йўла ўлдир, бўғиб ташла мен бахти қарони! Қутулайн шу ортиқча жондан! Халос бўлай шу ит азоби кунлардан! Ўлдир, ноинсоф, бераҳм бой! (*Ҳ. Ҳ.*) 7. Мен ҳали ҳасратимни, дардимни келиб-келиб сизларга айтдими?! (*Ҳ. Ҳ.*) 8. Қокили гул, кўйлаги нур баҳорнинг, Қучоғида яйра, яшна, қанот қоқ. (*Яшин.*) 9. Унганман қип-қизил баҳор қўйнида. Фам-алам, қайғуга улфат эмасман. (*Яшин.*) 10. Ҳамма хурсанд, ўзида йўқ шод, Етганига шундайин дамга. (*Ҳ. Ҳ.*)

74- машқ. *Истак, кўкрак, юз, виждон, дангаса қизиқ, одам, уятсиз, катта, аввал, жуда, севги, от* каби сўзларнинг синонимлар қаторини тузинг. Маъно жилоларидаги фарқларга изоҳ беринг.

Иборалар ҳам синоним бўлиб келади. Нутқнинг мантиқийлигини кучайтириш, мазмунни аниқ ва ихчам ифодалаш учун бундай синоним иборалар муҳим восита ҳисобланади. Шу жиҳатдан синоним иборалар сўз санъаткорларига манзарани аниқ гавдалантириш, ҳолатни муҳим нуқталари билан кўрсатиш, тасвирини жонли, ширали ва табиий қилиб беришда жуда қўл келади. Масалан: *Оғизларингда қатиқ ивитдиларинг*

ми: нега индамайсизлар? Бир гапириб, ўн куларди, ҳаммани оғзига қаратарди... Бугун мум тишилаб қолди. (Ойдин.) Бу мисоллардаги оғизларингга қатиқ ивитдиларингми, мум тишилаб қолди синоним иборалари бир умумий маънони — гапирмасликни, жим туришликни ифодали тасвиirlаяпти.

38- топшириқ. Абдулла Қодирнийнинг «Мехробдан чаён» ва Ойбекнинг «Қутлув қон» романларидан 10 тадан синоним иборалар топинг. Уларнинг бирлаштирувчи маъносини ва маъно нозикликларини изоҳланг.

54- §. Антонимлар бир-бирига зид, қарама-қарши маъно билдирувчи сўзлардир. Масалан: *катта — кичик, иссиқ — совуқ, рост — ёлғон, аччиқ — чучук, вафоли — вафосиз* каби.

Одатда иккита сўзнинг зид лексик маъно муносабати антоним сўзларни ҳосил қиласди, бирини айтиш билан унинг зид маъноси ҳам назарда тутилади. Тилда белги-хусусият англатувчи сўзларда зидлик, қарама-қаршилик муносабати кенгроқ тарқалган: *узоқ — яқин, оқ — қора, оч — тўқ, дўст — душман* каби.

Антоним сўзларнинг нутқда жуфт ҳолда ишлатилиши кўпроқ учрайди, бунда сўзларнинг зид маънолари умумлашади: *яхши — ёмон, оқу қора, ёшу қари* каби.

Фразеологик бирликлар ҳам ўзаро антонимик муносабатда бўлиши мумкин: *ерга урмоқ — кўкка кўтармоқ, кўнгли қора — оқ кўнгил, ҳаш-паш дегунча — түянинг думи ерга текканда* каби.

Нутқда воқеа-ҳодисалардаги, характер-фаолиятдаги қарама-қарши муносабатларни кўрсатиш ва зидлаш усули орқали ифодавийликка, маънони кучайтиришга, белгиларни аниқ ажратишга эришилади. Шунга кўра, фикрни таъсирли, кучли, тасвирий ифодалаш, ажратиб таъкидлаш мақсадида бадиий асарда, халқ оғзаки ижодида антонимлар кенг қўлланади. Халқ мақоллари ва ибораларида ҳам антонимларнинг хусусияти музжассамлашган. Масалан: *Яхши топиб гапирав, ёмон қопиб гапирав. Аччиқ билан чучукни тотган билар, узоқ билан яқинни юрган билар, иссиқ билан совуқни кўрган билар. Ақлли ўзини айблар, ақлсиз — дўстини.* (Мақоллар.)

75- машқ. Гапларни ўқинг, антоним сўзларни топиб, маъносини изоҳланг ва уларни жуфтлаб қўчиринг.

1. Яқин-йироқдаги манзиллардан одамлар ёрдамга

келяпти. (Ж. Абдуллахонов.) 2. Олдинлари Отакўзи иссиқ-совуқни, паст-баландни билмайдиган бир киши эди. (О. Е.) 3. Қачон иқрор бўлишга қарор қилсанг, хабар қил: кечасими-кундузими, барибир. (Ш.) 4. Турмуш аччиқ-чучугини тортавериб кўзи чиниққан мудир ёшгина терговчининг хатти-ҳаракатларидан ажабланар, гоҳ қулгиси қистар эди. (Ш.) 5. Яхши рўзгор — жаннат, ёмон рўзгор — дўзах. (Мақол.) 6. Сабр қил, қизим, сабр. Сабр ожизнинг куч-қуввати, кучлининг зийнати. (Ш.) 7. Давжон паст-баланд қирлар ошиб, тоққа чиқди. (О. Ҳусанов.) 8. Ёш келса — ишга, қари келса — ошга. (Мақол.) 9. Ер очиши. Чигит экишди. Мана энди эртаю кеч юқори ҳосил оламиз деб тиришиб ётишибди. (Ш.) 10. Меҳнатдан дўст ортар, фийбатдан — душман. (Мақол.) 11. Каримова ўзига-ўзи гапирав, гоҳ олдинга юрар, гоҳ орқага юрар эди. (А. Мұхиддин.) 12. Бу хирмонни тиклашда катта-кичик, ёш-қари — ҳаммасининг ҳиссаси бор. (Газ.) 13. Унинг ҳаёти яхшидир-ёмондир, аччиқдир-чучукдир — хотиралардан иборат бўлади. (Э. Аззамов.) 14. Катта-кичик — ҳамма қийқириб юборди. (М. Исл.)

76- машқ. Азоб, хафа, мавҳум, азиз, айёр, анқов, арzon, аччиқ, баланд, бегуноҳ, гўзал, бор сўзларининг антонимларини топиб, гаплар тузинг.

77- машқ. Уқинг. Ажратиб кўрсатилган сўз ва фразеологик ибораларнинг антонимларини топинг.

1. Сўзни тўғри ёзишни ўрган.— У — тўғри одам.
2. Уста ўткир асбоб билан симни қирқди.— Ўткир зехнили бола. 3. Бўш ўринга ўтириング.— Унинг кўнгли бўш.— Бўш идиш борми? 4. Бизга тоза сув керак.— Кўнгли тоза кишининг дўсти кўп бўлади. 5. Эшик очиқ.— Меҳмонни очиқ чеҳра билан кутиб ол.— У очиқ, самимий йигит. 6. Ўғлингиз катта йигит бўлибди.— Бу бола катта кетяпти, машина оламан дейди.— Ташабbus — катта гап. 7. Қопни тескарисига ағдарди. — Бу йўл менга тескари.— Омбор мудири тўнини дарров тескари кийиб олди.

55- §. Нутқда сўзларни, ибораларни тўғри, ўз ўрнида ишлатиш киши фикрининг равонлигидан, унинг маданиятилигидан далолат беради. Кўпинча қуйидаги ҳолларда хатоларга йўл қўйилади:

1. Нутқда сўзнинг аниқ маъносини билмаслик натижасида синонимларни ноўрин қўллаш. Масалан:

ўрин, жой, макон синонимлари бир синонимик қаторни ташкил қиласди. Бироқ уларни ҳамма вақт ҳам бирини иккинчисининг ўрнида қўллаб бўлмайди: *у ўз ўрнида одам, ўз жойига эга; у ўз маконига эга* каби. Яна: *одам, киши, инсон* синонимик қаторидаги сўзларни ҳам бирини иккинчисининг ўрнида ҳамма вақт қўллаб бўлмайди. Қиёсланг: *инсон келди, одам келди, киши келди.*

2. Антоним сўзларни қўллашда ҳам антоним сўзлар қаторидаги зидлик тушунчасини тўғри англамаслик туфайли хатоларга йўл қўйилади. Бунда зид ва қарама-қаршиликдаги ҳар хиллик эътиборга олинмайди. Масалан: *хафа — хурсанд, совуқ — иссиқ* каби қатордаги сўзларнинг синонимик қатори бор. Антоним шу сўзлар қаторидаги ҳамма сўзга антоним бўлавермайди: *хунук, бадбашара, кўримсиз*. Бу синонимик қатор ичидаги *хунук* сўзи нейтрал. Юқоридаги *совуқ* сўзи *иссиқ* сўзига бевосита антоним. *Совуқ* сўзи нутқда *хунук* сўзига, *иссиқ* сўзи нутқда «истараси иссиқ», «чиroyли» маъносидаги сўзга синоним. Лекин *совуқ* сўзи чиройли сўзига антоним бўла олмайди.

3. Омонимлар ва кўп маъноли сўзлар ўртасидаги фарқларни билмаслик туфайли. Масалан: *от* (исм), *от* (ҳайвоннинг бир тури), *от* (ҳаракат маъносида) — сўзлари омонимлардир. *Бош* (одамнинг боши), *бош* (ишининг боши), *бош* (йўлнинг боши), *бош* (сатрнинг боши) кабилар кўп маъноли сўзлардир.

4. Пароним (талаффузи ўхшаш) сўзларни қўлланганда уларнинг маъноси билан талаффузини тушунмаслик туфайли. Масалан: *дипломат* — дипломант, афзал — абзал, қолмоқ — қалмоқ, факт — пакт, амр — амир кабилар.

5. Нутқда кўпинча бир хил сўзларни такрор қўллаш туфайли хатолар юз беради. Масалан: *Мен дарсга доимо тайёрланиб келаман. Мен ўртоқларимга ёрдам беришга ҳаракат қиласман. Бу билан мен ўзимни баҳтили деб ҳисоблайман* каби гапларнинг ҳар бирида *мен сўзининг қайта-қайта қўлланиши* — такрорланиши хато ҳисобланади. Яна: *Мард бир ўлар — номард минг ўлар* типидаги мақолаларни *Мард бир ўлар — номард минг* шаклида, *ўлар* сўзисиз қўллаш маъқул.

6. Нутқ жараёнда сўзларни жуда кўп қисқартириб ишлатиш билан боғлиқ хатолар. Масалан: *студентларимиз ўрнида ст.миз, баҳтилизнинг ўрнида, б.нинг, пио-*

нервожатий ўрнида пион.вож., мактаб-интернат ўрнида мак.-инт., Тошкент давлат маданияти институти ўрнида ТДМИ каби қўллашлар айниқса оғзаки нутқ учун қўпол хато саналади.

7. Бирикма тузишда сўзларни тўғри танлай олмаслик билан боғлиқ бўлган хатолар. Чунончи, ҳамма вақт ҳам бир сўз бирикмаси таркибига кирган сўзни бошқа, маъноси яқинроқ бўлган сўз билан алмаштириб бўлмайди. Чунки бу сўзлар ҳар хил нутққа хос бўлади: Масалан: *Институтда очилган кўргазма болалар дунёқарашини бойитди дейиш ўрнига кенгайтирди* деган маъқул. Еки: *чой қилди ўрнида чой тайёрлади, фойда бермоқ ўрнида фойда келтирмоқ, ёрдам қилмоқ ўрнида ёрдам бермоқ.*

8. Фразеологик бирикмалар нутққа тайёр ҳолда киритилади. Уларни нутқда тўғри қўллай билиш лозим. Маълум мақсадга қаратилган иборани бошқа ибора ўрнида қўллаш мумкин бўлмаганидек, бирикма таркибига бошқа бир сўзни киритиш ҳам мумкин эмас. Масалан, *суяксиз ўрнида суяксиз тил, қўлдан бермоқ ўрнида бой бермоқ, ўрнига қўймоқ ўрнида бажо келтирмоқ* каби. Худди шунингдек, *подадан олдин чанг ҷиқармоқ ўрнида ҳамма вақт ҳам тўйдан илгари нофора қоқмоқ* иборасини қўллаб бўлмайди.

ТАРИХИЙ ЖИҲАТДАН ЎЗБЕҚ ТИЛИ ЛЕКСИКАСИННИГ ТАРКИБИ

56- §. Тарихий жиҳатдан ўзбек тили лексикасининг таркиби қуйидаги қатламларга бўлинади: а) умумтуркий сўзлар; б) ўзбекча сўзлар; в) форсча-тожикча сўзлар; г) арабча сўзлар; д) рус тилидан ва рус тили орқали бошқа тиллардан кирган сўзлар.

Туркий тилларда қадим замонлардан буён ишлатилиб келаётган сўзлар **умумтуркий сўзлар** ҳисобланади. Масалан: *ота, она, киши, бош, қўл, кўз, бир, икки, ер, қуши, бурун, этак, учқун, довюрак* каби ўзбек тили билан бир қаторда, турк, туркман, озарбайжон, қозоқ, уйгар, қирғиз, қорақалпоқ, татар, бошқирд, ёқут, чуваш, болқор ва бошқа туркий тилларда ҳам ишлатилади.

Ҳозирги ўзбек тили лексикасида умумтуркий сўзларга ва бошқа тиллардан ўзлаштирилган сўзларга турли қўшимчалар қўшиш ёрдамида янги сўзлар яса-

лади. Ўзбек тилининг ички имконияти асосида пайдо бўлган сўзлар ўзбекча сўзлар деб юритилади. Масалан: *ундалма*, *ишчан*, *боғдорчилик*, *экскаваторчи*, *пуркагич*, *ёнилғи*, *ёқилғи*, *чўлқувар*.

Ўзбек ва тожик халқлари жуда қадимдан ёндош яшаб, яқин иқтисодий, сиёсий ва маданий муносабатда бўлиб келди. Бунинг таъсири тил тараққиётида ҳам ўз ифодасини топди, яъни тожик тилига ўзбек тилидан, ўзбек тилидан тожик тилига кўплаб сўзлар ўзлашди. Ҳозирги ўзбек тили лексикасига *дастурхон*, *дастрўмол*, *хокандоз*, *пояндоз*, *пойдевор*, *барг*, *дараҳт*, *гул*, *фарзанд*, *ѓутор*, *сетор* каби форсча-тожикча сўзлар ўзлашиб кетган.

Ўзбек тилига араб сўзларининг кириб келиши эса арабларнинг Ўрта Осиёни забт этиши билан боғлиқ. Араблар Ўрта Осиёни эгаллагач, араб тили бу ерда бирмунча вақт давлат ва илм-фан тили сифатида амалда бўлди. Бу жараёнда анчагина арабча сўзлар ўзбек тилига ўзлашди: *мактаб*, *китоб*, *мактуб*, *адабиёт*, *аҳоли*, *оила*, *фан*, *санъат*, *ҳукумат*, *давлат*, *миллат*, *касб*, *косиб*, *қассоб*, *муассаса*, *мутолаа*, *хизмат*, *меҳнат*, *раис*, *идора* каби.

XIX асрнинг иккинчи ярмидан бошлаб ўзбек тилига рус тилидан сўзлар кириб кела бошлади. Айниқса, асримизнинг 20—80-йилларида рус тилидан ва рус тили орқали бошқа Овропа тилларидан ўзбек тилига сўз ўзлаштирилиши кучайди. Эндиликда ўзбек тили лексикаси таркибида *стол*, *стул*, *ручка*, *паровоз*, *тепловоз*, каби русча сўзлар: *студент*, *министр*, *операция*, *республика*, *аудитория* каби латинча сўзлар ва илм-фанинг турли соҳасига оид латинча атамалар; *грамматика*, *комедия*, *театр*, *музей*, *орган* каби юононча сўзлар ва атамалар; *солдат*, *галстук*, *штаб*, *лагерь* каби немисча сўзлар; *костюм*, *пальто*, *кабинет*, *генерал* каби французча сўзлар; *опера*, *ария*, *ложа*, *тенор* каби итальянча сўзлар; *трамвай*, *вокзал*, *митинг*, *футбол*, *баскетбол*, *волейбол*, *бокс* каби инглизча сўзлар қўлланмоқда. Бу сўзлар кенг маънода русча-байналмилад сўзларни ташкил этади.

78-машқ. Ўзингиз мустақил равишда 5 та русча-байналмилад, 5 та форсча-тожикча сўзлар топиб, улар иштирокида гап тузинг.

79-машқ. Эркин Воҳидов ва А. Орипов шеърларидан бир нечтасини ўқиб, ўзбекча, арабча, форсча-тожикча сўзларнинг қўлланниш частотасини аниқланг.

80- машқ. О. Ёкубовнинг «Улугбек хазинаси» романидан олингтан қўйндаги парчани ўқиб, сўзларни тарихий қатламлар бўйича турұхланг.

Али Қушчи ўйлайдики, Мирзо Улугбек салтанат та-лашмасдан тожу таҳтни шаҳзодаларга бериб, илму идрок йўлига ўтса бас, шаҳзодалар уни ўз ҳолига қўядилар, суюкли ишинг билан шуғуллан деб, расадхона ва мадрасаларнинг дарвозаларини очиб берадилар. Ҳайҳот! Агарчи фоний олам юмушлари Али Қушчи ўйлагандай осон бўлганида Мирзо Улугбек бу бевафо ҳокимиятни қачонлар тарк этиб, ўзини суюкли ишига багишламас эрдими? Бошидаги тоҷ, тагидаги таҳт илми фунун учун даркор эканини тушунмаганида, бу со-вуқ кошонани, гуноҳи азимга ботиб қолган бу ҳарам, шон-шуҳрат ва мансаб ишқида ҳеч бир разолатдан той-маган бу амирлар, саркору саройбонлар, хурофот ва таассуб ботқоғига ботган дин пешволаридан юз ўгириб, суюкли талабалари орасига, маърифат даргоҳига кетмас эрдими? Лекин не чора? Бу манҳус тоҷу таҳт, бу салтанат, инсонлар устидан ҳокимлик қилмоқ истаги щундай ширин эканки, унинг нияти поклигига ким инонади? Ким унинг самимийлигига, ўз ихтиёри билан салтанатдан қўл ювганига инониб, тинч қўяди? Агар унга инонсалар, инониб илму идрок билан бамайлихо-тири шуғулланишга қўйиб берсалар, у ҳозир ҳам бу ва-фосиз ҳокимият, бу тоҷу таҳтдан бажону дил воз ке-чар эрди...

ҚҰЛЛАНИШ ДОИРАСИГА ҚУРА ЎЗБЕК ТИЛИ ЛЕКСИКАСИ

57- §. Ўзбек тилининг лугат бойлигидаги барча сўзлар нутқда қўлланиш кўлами доирасига қўра турлича бўлади. Ҳозирги ўзбек тилининг лексик таркибида асосий қисмни ташкил этувчи сўзлар ҳаммага тушунарли бўлгани учун шу тил вакиллари уларни бирдай қўллайдилар. Шу билан бирга тилда щундай сўзлар ҳам мавжудки, уларни маълум ҳудудда, жойда яшовчиларнинг ёки муайян касб-ҳунар эгаларигина ўз нутқларида ишлатадилар. Масалан: *бор, йўқ, бир, ер, сув, ҳаво, олмоқ, бермоқ, кулмоқ* каби сўзларни ўзбек тилида сўзловчиларнинг барчаси ўз нутқида доимо қўлласа, *биринж, сатил, залдору* сўзларини Бухоро ва Самарқанд ҳудудида яшовчилар, *сузак, бодрак, гешир* сўзларини Хоразмда яшовчилар қўллайдилар; *фонд, картотека, алфавитли қўрсаткич*, каталог кабиларни ку-

тубхона ходимларигина фаол ишлатадилар. Шунгә кўра, ҳозирги ўзбек тили лексикаси қўйидаги икки қатламга ажратилади:

1. Қўлланиш доираси чегараланмаган лексика.

2. Қўлланиш доираси чегараланган лексика.

58-§. Қўлланиш доираси чегараланмаган лексикани барча ўзбеклар учун умумий ва бир хилда тушунарли бўлган сўзлар ташкил қиласди. Умумхалқ ишлатадиган бундай сўзлар кундалик турмушда зарур бўлган нарса белги, ҳодиса, жараёнларни англатади. Тарихий жиҳатдан ўзбек тили лексик таркибидаги сўзлар, барча сўз туркumlарига оид сўзлар умумистеъмолдаги лексикани ташкил этади. Бошқа тиллардан ўзлашиб, эндиликда барча халққа тушунарли бўлган фан-техника, маданият, сиёсатга оид атамалар ҳам, адабий тилга ўзлашган айрим шеваларга оид сўзлар ҳам қўлланиш доираси чегараланмаган лексика таркибиға ўтиши мумкин. Шу тарзда бойиб, кенгайиб бораётган умумхалқ сўзлари адабий тил лексикаси ривожига смарали таъсир этади.

Оммавий тадбирларда, нотиқлик фаолиятида, барча маданий-маърифий ишларда умумистеъмолда бўлган, барча халққа тушунарли сўзлар ва иборалардан фойдаланиш нутқ таъсирчанлигини оширади, унинг оммабоплигини таъминлайди, нутқнинг тушунарсиз ва зерикали бўлишига йўл қўймайди.

39-топшириқ. Кутубхонашунослик ва маданий-маърифий соҳага онд атамалар ичida қўпчилик истеъмолига ўтган, умумхалқ ишлатдиган сўзларга айланган лексикага доир мисоллар топинг ва улар иштироқида 10 та гап тузинг.

ҚЎЛЛАНИШ ДОИРАСИ ЧЕГАРАЛАНГАН ЛЕКСИКА

Тил луғат бойлигининг нутқда ишлатилиш доираси жиҳатдан чегараланиши турли хил бўлади. Қўлланиш доираси чегараланган лексика ишлатилиши ҳудудга кўра чекланган сўзларга, ишлатилиши касб-ҳунарга қараб чегараланган сўзларга, ишлатилишида эскилик ёки янгилик бўёғи борлигига кўра фарқланадиган сўзларга, бирор ижтимоий гуруҳ нутқидагина ишлатила-диган сўзларга ва экспрессив-услубий бўёқдорлигига кўра қўлланилиши чекланган сўзларга ажратилади.

59-§. Ишлатилиши ҳудудга кўра чекланган тил

бирликлари шевага хос сўзлар саналади. Булар муайян ҳудудда яшовчи кишилар қўллайдиган, ўша ерлик аҳолининг оғзаки нутқига хос бўлган сўзлардир. Бундай лексика сўз ва фразеологик ибора кўринишида учраши, фонетик ва грамматик хусусиятларига кўра ўзига хосликка эгалиги билан фарқланиши мумкин. Масалан, шевага оид сўзлар унлиларнинг чўзиқ ёки юмшоқ талаффузига кўра, товуш ўзгаришига нисбатан бир-биридан фарқланиши, грамматик шаклларнинг қўлланиш маъноси ва шаклига кўра ажralиб туриши табий ҳолдир.

Бадий асарларда ҳаётнинг реалистик тасвирини чизиш, маҳаллий белги-хусусиятни бериш, персонажлар нутқини индивидуаллаштиришда шевага хос сўзлардан кенг фойдаланилади.

40- топшириқ. Ўз шевангизга хос 5 та сўз топинг ва уларни адабий тилдаги муқобиллари билан солиштиринг.

81- машқ. Матиларни ўқинг. Шевага хос сўзларни топиб, уларнинг ўрнига адабий тилдаги муқобилини қўйинг. Шевага хос сўзларнинг қайси жиҳатдан фарқланишини изоҳланг.

«Нилу!» дейишим билан ярқ этиб қаради-ю, арқоннинг бандидан судраганча мен томонга югурди.

— Сенга миннама обкелдим!— дедим бир қўлимда лимон ўралган газетани қучоқлаганча, иккинчи қўлимни чўнтағимга тиқиб.

— Нима, катта ада, нима?— деди Нилуфар ҳаллослаб.

— Аввал битта ўпай, кейин бераман.

— Ҳо!— Нилуфар ўзини орқага ташлади.— Олдин беринг-да!

— Майли, яримта ўпаман.

Нилуфарнинг терлаб, кир бўлиб кетган юзидан ўпиб, сақични узатдим.

— Мана! Уртоғинггаям бер...

— Урре! Катта адам жевачка обкелдила!— Нилуфар қўлимдан сақични юлқиб олди-ю, кутиб турган ўртоғи томонга югурди.

(Ў.Х.)

— Модарни кўрдиларму?— сўради Вафо аттор кемшик тишлигини кўрсатиб.— Хўш, қалайлар, кампир тузукларму?

— Раҳмат!— Баширжон гапни қисқа қилиб, ўтиб кетмоқчи эди, лекин Вафо аттор:

— Бир дақиқа!— деда унинг енгидан тортди.

— Хўш!

— Инди, ука ўртоқ Зайниншув!— деди у митти кўзларини йилтиратиб.— Биз ўзимиз бетобдурмиз, ҳовлида ногирон куррачанинг ҳоли не кечди? Кеча ўғул келиб эрди, эшшак боласига ем ва беда керак дейдур...

Баширжоннинг жаҳли чиқиб кетди, атторнинг қўлини қаҳр билан силтаб ташлади.

— Бас-да энди!— деди у қип-қизариб.— Ҳозирга қадар ўттиз сўм олдийиз... Ўша куррайиз икки пулга қиммат!..

— Мани, беморни силтаманг, ука ўртоқ Зайниншув!— деди Вафо аттор йиғламсираб.— Бобонгиз тенгиман, силтаманг мани!

(Невмат Аминов.)

60- §. Ишлатилиш доираси маълум касб-ҳунарга кўра чегараланган сўзлар касб-ҳунарга оид сўзлар (профессионализмлар) ҳисобланади. Бу сўзлар қайси ҳудудда яشاшидан қатъи назар, бир хил касб эгаларига тушунарли бўлади. Масалан: *клуб, тўгарак, ҳаваскор, саҳна, режиссёр, роль, услугбиётчи, микрофон* каби сўзлар барча клуб ходимлари нутқида фаол қўлланади.

Касб-ҳунарга хос сўзларнинг асосий қисмини шу соҳага хос атама (термин)лар ташкил этади.

Атамалар (терминлар) фан, техника, маданият каби соҳалардаги аниқ чегараланган тушунчаларни ифодалайдиган бир маъноли сўз ва сўз бирикмаларидир.

Атамалар қўшимча маъно жилоларига эга эмас. Маълум диалект ва шевага алоқадор бўлмасдан, умуммиллий тил учун хос ҳодисадир.

Атамаларнинг кўпчилик қисмини русча-байналмилал сўзлар ташкил қиласиди: *абзац, абонент, абонемент, ария, баян, дефис, диалог, дисгармония, дирижёр, пауза, партия, оратория, дуэт, генерал-бас, генерал пауз* кабилар.

41- топшириқ. Ўзингиз эгаллаётган ихтиосликка оид 10 та атама топинг ва уларнинг маъносини изоҳлаб, кўп маъноли сўзлардан фарқини айтинг.

82- машқ. Қўйидаги матнни ўқинг, ундаги атамаларнинг маъносини изоҳланг.

ТРАГЕДИЯНИНГ КАМОЛОТИ

Илк пайтларда бадиҳагўйлик (импровизация) йўли билан — дифирамбни бошлаб бериш ва ҳозир ҳам кўп шаҳарларда яна қўлланилаётган фалл қўшиқларни бошлаб беришдан келиб чиқсан трагедия ва комедияга хос хусусиятларини аста-секин ривожлантириш йўли билан бироз ўди. Хуллас трагедия кўп ўзгаришларни кечиргач, ўзига хос табиий хусусиятларини кашф этган ҳолда тўхтаб қолди. Актёрлар иштироки масаласига келганда, Эсхил битта актёр ўрнига иккита киритди, хор қисмини озайтирди ва диалогни биринчи ўрининга қўйди, Софокл эса актёрларни учтага етказди ва декорациялар киритди. Камолот масаласига келганда шуни айтиш керакки, кичик афсоналар ва кулгили ифода усулидан бошланиб, сатирик томошалар йўлини босиб ўтган трагедия аллақачон ўзининг улуғворли босқичига эриши; унинг вазни ҳам (трохаик) тетраметрдан ямбга айланди (дастлаб тетраметрдан фойдаланилган вақтларда, поэзия асарлари сатирик руҳда ва кўпроқ рақсга мойил эди, диалог тез ривожлангандан сўнг эса, бу хусусият унга мувофиқ келувчи вазнни кашф этди, чунки ямб ҳамма вазнлар ичida жонли сўзлашув тилига энг яқин бўлиб қолди. Биз бир-бири миз билан қилган суҳбатда жуда кўп вақт ямб билан сўзлашибимиз бунинг исботидир, гекзаметр эса баъзан нутқ уйғулиги бузилгандагина жуда сийрак учрайдиган ҳодисадир).

(Аристотель. «Поэтика»)

61-§. Эскирган сўзлар ҳозирги ўзбек адабий тили учун одатий бўлмай, балки ўтмиш давр тушунча ва тасаввурларига оид номлардир. Бундай сўзлар замонавий лексикадан эскилик бўёғига эгалиги билан фарқланади: *амир, девонбеги, миришаб, ёноқ, зарб* (кўпайтирув), *йўқсил* (пролетариат) каби. Эскирган сўзлар икки гуруҳга: тарихий сўзлар (историзмлар) ва архиазмларга ажralади.

Сўзниңг ўзи ҳам, маъноси ҳам эскириб, тарихий номга айланниб қолган бўлса, тарихий сўз ҳисобланади: *султон, қул, жарчи, ясовул, чориқ, кулоҳ, шайх, арк* каби.

Сўзниңг ўзи эскириб, маъноси сақланган ва ҳозирги тилда бошқа сўзлар (ўша сўзниңг синонимлари)

билан ифодаланса архаизм саналади: *тарх* (эски номи) — *айирав* (ҳозирги номи), *сарф* (эски номи) — *морфология* (ҳозирги номи), *мужаррад* (эски номи) — *мавхум* (ҳозирги номи).

Эскирган сўзлардан тарихий воқеа ва ҳодисаларни ҳаққоний тасвирлаш, бадиий асарга тарихий руҳ бериш, тингловчини ўтмиш давр тасавурлари билан таништириш эҳтиёжи туфайли фойдаланилади.

42-топшириқ. *Арбоб, абушқа, хаттот, қироатхона, мударрис, домла, сабоқ, расадхона, фүқаро, фалакиёт, суворий, ваъзхонлик, шамс, қамар, амри вожиб, фармони олий* каби эскирган сўзларнинг маъносини изоҳланг.

83- машқ. Қуйидаги матнларни ўқинг. Эскирган сўзларнинг маъносини изоҳланг. Историзм ва архаизмларни ажратиб кўчиринг.

I. Қироатхона — иборатдир тиловати қуръон қилотурғон жойдан; Мулло Маҳкам қори — иборатдир ҳофиз қуръон бўлғон зотданки, ўшал қироатхонада доимил вақот, тиловати қуръон қилсун. Бу даюсни қарангки, ўзининг оғзидан чиққан иборатга тушунмайдир. Ваҳоланки, айтган иборати каминанинг саволимга жавоби босавобдир.

Бас бадурустки фақирга зиёрат муюссар бўлди. Абдулвоҳид қори домлонинг имонларини худо саломат қилсунки, бунчалик дин йўлида хизмат кўрсатиб, большавойдан қуръонни сўроб ва яна қелтуриб ва яна қироатхона очуб ва бир қориий мураттабни бунга мутасадди айлабдир. Бинобарин ул зоти шарифга барча мўъминлар изҳори миннатдорчилик қилсолор керак.

(А. Қод.)

II. Навоий Балх девонхонасига келиб, бундаги ёш ва қари, содда ва «хирфа» амалдорлар билан сўзлашди, вилоят ишлари билан танишди. Кечани шу ердаги хоналардан бирида, мутолиа ва ёзиш билан ёлғиз кечирди. Эртаси пешиндан сўнг, ўзи виждонли деб тахмин қилган бир неча мулозимларни йигиб, ҳалқ орасида зулми, пораҳўрлиги ва ҳоказо ёмон сифатлари билан танилган баъзи амалдорлар тўғрисида сўзлашаркан, навкар югуриб кирди.

— Жаноб Мир, Дарвешалибек жанобларини келтирдилар! — қичқирди ҳовлиқиб навкар.

(Ойбек.)

62- §. Неологизмлар турмуш тараққиёти натижасида туғилган эҳтиёж туфайли янги пайдо бўлган ва янгилик хусусиятини йўқотмаган сўзлардир: *фаҳрий, ҳафтапнома, тамаддиҳона, илмгоҳ, телетасвирчи, раёсат, мусиқа, ашула дастаси, ижара пудрати* каби. Янги сўз тезда умумтил меъёрига айланиши ёки кўп вақт қўлланмасдан истеъмолдан чиқиб эскириши мумкин. Ўзбек тилига давлат тили мақоми берилиши муносабати билан эскириб, истеъмолдан чиқиб кетган *ширкат, чипта, тайёра, жумҳурият, муҳандис* каби атамалар қайтадан янги сўзлар қаторига қўшилмоқда. Неологизмлар илмий ва расмий адабиётларда асосан номлаш вазифасини бажарса, бадиий адабиётда маълум услубий мақсадда қўлланади. Ёзувчилар ижод қилган янги сўзлар катта таъсир ва тасвир кучига эга бўлади.

43- топшириқ. Маданият ва санъат соҳасидаги янги атамаларга 10 та мисол топинг ва маъносини изоҳланг.

84- машқ. Гапларни ўқинг, янгилик бўёғи бор бўлган сўзларни аниқлаб, маъносини тушунтиринг.

1. Қайта қуриш демократияга ва ошкораликка кенг йўл очди. 2. Йишибилармон кишилар телефони хизматидан бош тортишмайди. 3. «Машъал» ижара корхонасида саноат ускуналарини таъминловчи чилангарлар ишлайди. 4. Экология сўзи грек тилидан таржима қилингандан, барча тирик жонзот озиқланадиган уй тўғрисидаги фан тушунчасини беради. 5. Тошкент давлат муаллимлар олий билимгоҳининг докторанти Амриқо ҳақидаги таассуротларини ўртоқлашди. 6. Самарқанд вилояти Ургут ноҳиясининг «Бешқарсак» рақс дастасининг чиқишлиари кооператорларни хушнуд этди. 7. Телетасвирчи шоу-дастур билан кик-боксинг бўйича ўтказилган Бутуниттифоқ турнирини тўлиқ тасвирга туширди.

85- машқ. М. Шайхзоданинг қўйида келтирилган мисраларидан индивидуал неологизмларнинг маъносини изоҳланг ва уларнинг қандай мақсадда қўлланганини айтинг.

1. Кечадан бугун яқин, бугундан эрта яқин,
Меҳнатдошлар устида балқииди қуёш ёрқин.
2. «Раҳмат» де, фазода йўлдошлар учун,
Ойга иноқ бўлган ойдошлар учун.
3. Ҳаракатда баракат, кўп қадим ҳикмат,
Советистон юртида бу — темир низом...
4. Билар эдик қайтиш муқаррар,
Йиғлар эдик ... аммо кўз ёшин —

Калидламоқ мумкинми магар?..

Дард бор эди дилда оташин...

5. Ҳар юмушнинг фасли бор, ишнинг асли бор,
Кечикканга қишибойнинг ёмон ҳазили бор.
6. Қитъалар ўртасида қисқариб масофалар,
Рўзномага қўйилар фазошуумул вазифалар.
7. Кўп жумбоқлар ечилар,
Сен бўларсан у замон
Башарият масканинг еттинчи қитъаси,
Жустрофия бобларининг биттаси.
У чоқда ўқийимиз биз лирик дафтариңг,
Кундалик эмас,
Тундалик дафтариң...

ЭМОЦИОНАЛ-ЭКСПРЕССИВ БҮЁҚДОРЛИҚ ЖИҲАТДАН УЗБЕК ТИЛИ ЛЕКСИКАСИ

63- §. Узбек тили лугат бойлигидаги сўзлар сўзловчининг турли эмоционал-экспрессив (экспрессив — латинча маънодор, таъсири, ифодали, эмоция — кишининг ҳис-туйғуси, кечинмаси маъноларини англатади) муносабатини ифодалаш хусусиятига кўра икки турга ажратилади. Булар эмоционал-экспрессив бўёқсиз (нейтрал) сўзлар ва эмоционал-экспрессив бўёқдор сўзлардир.

Маълум тушунчанинига ифодалаб, сўзловчининг турли муносабатини билдирувчи қўшимча маъно жилоси бўлмаган сўзлар эмоционал-экспрессив бўёқсиз ёки нейтрал лексика ҳисобланади: *кун, ҳафта, йил, китоб, саҳна, мақом, сўз, жой, қўшиқ, қизил, оқ, ҳамма, олмоқ, кутмоқ, танишмоқ* каби.

Лексик маъно билан бирга, сўзловчининг маъноси англашилаётган нарса, белги, ҳаракат-ҳолатга турлича муносабатини ҳам ифодаловчи сўзлар эмоционал-экспрессив бўёқдор лексика саналади: *қувонч, табассум, даҳшат, чеҳра, жамол, башара, бўшанг, ношуд, алп, дўмбоқ, зумраша, газанда, хомкалла* каби. Бундай сўзлар ҳурмат, эркалаш, кўтаринкилик, менсимаслик, нафрат, жирканиш, киноя сингари маъно муносабатларини ифодалайди. Шунга кўра, икки гуруҳга: **ижобий эмоционал-экспрессив бўёқдор сўзлар ва салбий эмоционал-экспрессив бўёқдор сўзларга** ажралади.

Ижобий эмоционал-экспрессив муносабатни англатувчи сўзлар қаторига эркалаш, хушмуомалаликни билдирувчи *опажон, кенжатой, дўндиқ, дилбар, айланай, ўргилай, жилмаймоқ* каби сўзлар; тантанали ва

поэтик руҳдаги *абадул-абад*, *зукко*, *даҳо*, *оламишумул*, *фусункор*, *ҳассос*, *ажиб* каби сўзлар киради.

Салбий эмоционал-экспрессив муносабат эса нафрлатаниш ва менсимаслиқ маъносига эга бўлган *анди*, *беномус*, *балохўр*, *сатанг*, *сурбет*, *сўтак*, *пашиахўрда*, *нонкўр*, *шарманда* каби сўзлар; қарғиш, ҳақорат англатувчи *зумраша*, *даюс*, *ярамас*, *баччағар*, *аблаҳ*, *кўрнамак*, *оқпадар*, *имонсиз*, *ғаламис*, *уйинг куйгур* каби сўзлар; шахс ва ҳаракат-ҳолатни салбий баҳоловчи *иржаймоқ*, *вайсамоқ*, *санқимоқ*, *мижғов*, *довдир*, *ўлимтиқ*, *без*, *безраймоқ*, *чақчаймоқ* каби сўзлар орқали ифодаланади.

86- машқ. Гапларни ўқинг, эмоционал-экспрессив бўёқсиз ва бўёқдор сўзларни топиб, фарқини айтинг.

1. Сўйла гулим. Яширгагил недирса дардинг,
Яраланиши юрак, нечун қизардинг? (*Фитрат*.)

2. Уч қадамча нарида Умар aka жийронни жиловидан тутиб турарди. (*Ў. Ҳ.*) 3. Баширжонинг хумкалласи қўксинга солинган, кичик, энсиз бағбақаси икки букланиб, осилиб турарди. (*Н. А.*) 4. Э, акилтайберасан-да, Сафар!— деди бўқоқ.— Биз нима деяпмиз-у, сен нима деяпсан! (*А. Қод.*) 5. Расадхон зимиштон бўлса ҳам, Али Қушчининг ўткир кўзлари дарров кўрди: пойгакда бир кимса гавдаси билан эшикни тўсиб, қаққайиб турарди. (*О. Е.*) 6. Кўшиқнинг охири олқишиларга кўмилиб кетди. (*Н. А.*) 7. Устанинг чеҳрасидаги маҳзунлик, овозидаги дард Қаландарнинг юрагига наштардек санчилди. (*О. Е.*)

87- машқ. Матнни ўқинг. Эмоционал-экспрессив бўёқдор сўзларни топиб, ижобий ва салбий маъно жилоларини изоҳланг.

... Болам... Музafferим йигит бўп қопти. Мўйлови сабза урибди. Овози дўриллаб қолибди... Виждонсиз чўлоқ! Ақалли шу куни ясантириб қўйса ўладими! Анави шаллақи Робия жиллақурса туғилган кунида болага йиритиқ шим кийгизишга уялмайдими? Золимми, аглаҳми, отаси Насибага ҳар йили туғилган куни бошоёқ сарпо қиласди-ку! Ўғлим бўлса почаси илма-тешик шим кийиб юрибди. Туғилган кунни қаёқдан билади қишлоқи Робия! Боланинг кўнглини олиш хаёлига келадими тўпори чўлоқнинг! Яхшиям чўнтағига пул солиб қўйганим. Билиб қўйларинг! Боланинг кўнглини сенлар ололмасанг, хурсанд қиласдиган онаси бор!

Қаерга келиб қолдим? Ажаб, ўзимизнинг кўча-ку!..
Қизиқ, инсон умри шунаقا тез ўтарканми? Қечагина эмасмиди, шу кўчада қўшни қизалоқлар билан со-палақ ўйнаганимиз!

(Ў. X.)

НУТҚ УСЛУБЛАРИ ВА УСЛУБИЙ ЖИҲАТДАН УЗБЕК ТИЛИ ЛЕКСИКАСИ

64-§. Тил бирликлари ва материалларидан фикрни ифодалаш мақсадида фойдаланиш жараёни нутқ саналади. Қишилар ана шу жараёнда тилдаги лексик, фразеологик, фонетик ва грамматик воситаларни танлаш ва ишлатишларига кўра бир-бирларидан фарқ қиласидилар. Шунга кўра нутқнинг хилма-хил қўринишлари пайдо бўлади. Нутқ дастлаб икки турга: адабий нутқ ва сўзлашув нутқига бўлинади.

Адабий тил материалларига асосланган ва адабий тил меъёрларига бўйсундирилган нутқ **адабий нутқ** ҳисобланади.

Тилнинг жонли сўзлашув материали (салбий услубий бўёғи бўлган сўзлар, шевага оид сўзлар, дағал ва қўпол сўзлар, жаргонлар каби)га асосланган ва шу белгиларига кўра адабий тил меъёрига номувофиқ бўлган нутқ сўзлашув **нутқидир**. Тилдаги мавжуд луғавий бирликлар яна шу икки нутқ турига хосланибгина қолмасдан, ҳар иккала турда ҳам қўлланиши, яъни умумнутқ қатламига хос бўлиши мумкин. Масалан: *китоб, катта, олтмиш, олмоқ, келмоқ, иши, тинчлик, яхши, эсда тутмоқ* кабилар умумнутқ лексикасига кирса, *шубҳасиз, зеро, ташкил этмоқ, табассум, курашchan, шахсан, қатъиян, режа, товар, масъулият, дудоқ, дақиқа* кабилар адабий нутқ лексикасига, *алдоқчи, тузук, жинданай, кетворган, токай, шунақанги, аттанг, жувонмарг, гумроҳ* кабилар эса сўзлашув нутқига хос ҳисобланади.

Адабий нутқ икки шаклда: ёзма ва оғзаки нутқ шаклида ифодаланади. Нутқ турлари ўзларига хос ҳусусиятларидан қатъи назар, адабий тил меъёрлари асосида умумийликка эга бўласидилар. Адабий меъёрлар ёзма нутқ учун ҳам, оғзаки нутқ учун ҳам зарурдир.

Нутқ қўринишлари тилнинг вазифаси — функцияси билан бевосита боғлиқ бўлади. Алоқа-аралашув жараёнида нутқнинг ҳар бир қўриниши учун мос келадиган, шунга танлаб олинган воситалар бор. Шунга кўра,

нутқнинг қўйидаги функционал услублари фарқланади: сўзлашув услуби, расмий услуб, илмий услуб, публицистик услуг ва бадиий услуб.

Ҳар бир услуг тил тизимининг тарихан ташкил топган бир кўриниши бўлиб, уларнинг ўз қўлланиш соҳаси ва хусусиятларини билиш нутқ саводхонлиги учун зарурдир.

65-§. Сўзлашув услуби тил бирликларини танлаш ва уларни қўллашнинг җисбатан эркин услубидир. Бу услуг ўз хусусиятларига кўра икки турга: **адабий сўзлашув услуби** ва **оддий сўзлашув услубига** ажратилади.

Адабий сўзлашув услуби умумхалқ адабий тилининг кенг тарқалган ва барча соҳалар учун боп тури бўлиб, у адабий меъёрларга мос, ишланган ва тартиб солинган бўлади.

Адабий сўзлашув услуби кундалик мулоқот учун хизмат қилади, ўқитиш ишлари, тарбия ва ташвиқот шу услубда олиб борилади, бадиий адабиёт шу услубда яратилади.

Оддий сўзлашув услуби нутқ муомаласи жараёнида (эркинлик билан) адабий тил ҳамда шева элементлари иштирок этиши, фикрий идрокни кенг қамровли баён этиши билан таърифланади. Бу услубда сўз тартиби қоидага номувофиқ бўлиши (*Кечаконцерт бўлди, клубда*); кўчма, образли эмоционал воситалар кўпроқ (*Ғайрат қил, шалварама; Алини қаранг, оғзи қулоғида* каби), диалогик шаклда бўлиб, тўлиқсиз гаплар ва имо-ишоранинг кўп ишлатилиши (*Келяпти (домла), Кетдими?—Ҳа* каби), такрорлар (*Келиб-келиб шу гапни топдингми?*), талаффузда эркинлик (*налат (лаънат), янгитдан* (янгидан), *опти* (олибди) каби) яққол намоён бўлади. Оддий сўзлашув услуби бадиий асарда персонажлар нутқини индивидуаллаштиришда кенг қўлланади.

44-топшириқ. Ўз шевангизга хос сўзлашув ўслубининг белгиларини адабий тил меъёрлари билан қиёсланг ва фарқларини тушунтиринг.

88- машқ. Матнни ўқинг. Сўзлашув услубига хос тил бирликлари ва грамматик воситаларнинг хусусиятларини изоҳланг.

Ташқарида от кишинади. Дарвозадан Умар закунчи кириб келди. Бошида чақмоқ телпак, эгнида ихчам поча-пўстин, қўлида қамчи.

— Ҳорманглар-ов!— деди тетик оҳангда.—Настраена зўр-ку! Демак иш беш!

Раиснинг ҳурмати учун ўрнимиздан турдик. Парча, Башор опанинг бояги нияти эсидан чиқмаган экан шекилли, қайлиғидан уялган келинчакдек омбор бурчагига лапанглаб қочди. Башор опа ўрнидан турмаса ҳам бир қўзғалиб қўйди.

— Ие, сиз ҳам ҳашарга келдингизми?— деди Закунчи унга қараб,— МТС нима қиласи сизсиз?

— Мен-ку, ҳашарга доим келаман!— Башор опа унинг кўзига тик қараб таъкидлади.— Сизлар ҳам ҳашар қилмасанглар бўлмайди. Менга иккита ёрдамчи керак.

— Билмадим!— Умэр закунчи юзини ўғирди.— Закун бўйича МТС мустақил ташкилот.

— Мустақил бўлгани билан трактор колхознинг ерини ҳайдайдими?— деди Башор опа кескинлик билан.

— Билмадим!— Закунчи тез-тез юриб нари кетди.

— Тезроқ қимирланглар!— деди дарвоза олдида тўхтаб.— Эртага фронтга бир вагон пиёс жўнатамиз.

Ташқарида от туёқларининг қорга бўғиқ урилиб дукиллаши эшитилди.

— Э, ўл, закун-лакунинг билан!— деди Башор опа энсаси қотиб.— Тракторни томорқамга обориб ишляпманми, олифта-қуруқ!

(Ў. X.)

66-§. Расмий услугуб жамиятдаги ижтимоий, ҳуқуқий муносабатлар, давлат ва давлатлараро расмий сиёсий-иқтисодий, маданий алоқалар учун хизмат қилувчи нутқ услугубидир. Бу услугуб ҳужжатчилик характеристери билан ажralиб туради. Шунга кўра ёзма нутқнинг хизматга доир бу тури давлат қонунлари, актлар, фармонлар, баёнотлар, шартномалар, идора ҳужжатлари, эълонлар ва бошқа расмий ёзишмалар услуги ҳисобланади. Расмий услугуб тилининг асосий хусусияти аниқлик ва ихчамликдир, унда муайян нутқий штамплар, профессионал сўзлар, терминлар, тайёр синтактик қурилмалар кенг қўлланиб, нутқнинг аниқ ва равшан ифодаланишини таъминлайди. Тайёр нутқ формулалари (*шу асосда; шунга кўра; маълум қиламизки; ...ни эттиборга олиб; ...га кўра; ... биз, қуйида имзо чекувчилар, ...га асосан (мувофиқ); ... учун, ...дан келиб чи-*

қиб; ... шарти билан; ... берилсин, ... тақдирлансан

каби) ҳужжат матнининг дарак-ҳикоя характеристида бўлишини, сўзларнинг бир манода ишлатилишини, бадиний-тасвирий воситаларнинг бўлмаслигини, феълнинг мажхуллик ва буйруқ-истак формаларининг, қўшма гап турларининг кенг қўлланилишини талаб қиласди. Тил материали ҳужжатнинг тури ва характеристига қараб танланади. Масалан, ариза, билдирги, тавсиянома, ишончнома қабиларнинг тили аниқ ва ишонарли жумлалардан иборат бўлиши; талаб, ахборот, таклиф билдирилиши, рақам ва саналар кўрсатилиши керак. Ёки тилхат, тушунтириш хати, далолатномаларда содда гаплар кўпроқ ишлатилади, сонлар аввал рақам билан, сўнг қавс ичидаги сўзлар билан берилади. Намуна:

ТИЛХАТ

Мен, Тошкент давлат маданият институтининг хўжалик ишлари бўлимининг мудири Баҳодир Олимов Тошкент музика ассоблари корхонаси нинг тайёр буюмлар омбори мудири Эркин Каримовдан институт буюртмаси асосида тайёрланган, умумий баҳоси 1800 (бир минг сakkiz юз) сўм бўлган 100 (юз) дона рубобни қабул қилиб олдим.

1990.12.08.

(иимзо)

Б. Н. Олимов

Эълонлар эса билдиришлардан фарқли равишда баъзан расмий тусга эга бўлмаслиги; ўқувчи қизиқишини кучайтириш учун ҳазил характеристида, чақириқ ёки реклама кўринишида ёзилиши мумкин. Намуна:

ДИҚҚАТ, ДИҚҚАТ, ДИҚҚАТ!

Ҳазил-мутойиба, кулги, шўх қўшиқ ва рақс мухлисларини янги йил кечасига таклиф этамиш. Учрашув жоини — мажлислар зали, вақти — 28 декабрь соат 17.00 да. Самимий табассумсиз залга кириш мумкин эмас.

«Мулоқот» клуби.

Концерт, кинофильм ва спектакллар намойиши ҳа-

қидаги эълонлар — афишалар эса безакдор бўлиб, фильм ёки спектакль номи билан бирга ундаги айrim саҳнавий кўринишлар ҳам акс эттирилади.

45- топшириқ. Ўқув юртингизда ўтказиладиган бирон анжуман (мажлис, адабий кеча, учрашув, ҳисобот концерти, спектакль премьераси) тўғрисида эълон ёки афиша ёзинг.

89- машқ. Матнни ўқинг. Расмий услугуга хос нутқий штамплар, синтактик қурилишлар ва феъл шаклларининг хусусиятини изоҳланг.

АТОҚЛИ САНЪАТКОР

Тошкентдаги илм маскани — педагогика билим юртини тугатган Амин Турдиев 1929 йилда ҳозирги Ҳамза номидаги Ўзбек Давлат академик драма театри қошида ташкил этилган Ишчи-ёшлар сайёр труппасида актёр бўлиб ишга таклиф этилди. У А. Ҳидоятов, М. Уйғур каби атоқли санъаткорлардан актёрлик сирларини ўрганди.

Амин Турдиев Самарқанд театрида, Наманган обласъ театрида, Андижон театрида, Тошкентдаги Охунбобоев номли ёш томошибинлар театрида бош режиссёр ва бадиий раҳбар вазифаларида ишлади. 1968 йилдан то умрининг охиригача Ҳамза номидаги драма театрида фаолият кўрсатди.

А. Турдиев театр саҳнасида юзга яқин тўла қонли образлар яратган бўлса, кейинчалик у Ҳ. Ҳ. Ниёзийнинг «Бой ила хизматчи» асарида Қодирқул, Н. Погодиннинг «Милтиқли киши» асаридаги Иван Шадрин, А. Корнейчукнинг «Макар Дубрава» асаридаги Макар, А. Қаҳҳорнинг «Оғриқ тишлар»идаги Заргаров каби ўнлаб образларни яратди.

(Ҳ. Узоқов)

46- топшириқ. «Ўзбек тилида иш юртиши» («Қомус», 1990 йил) китобидаги намуналардан фойдаланиб ўзингиз қатнашган мажлис баёнини ёзинг.

67- §. Илмий услугуб табнат ва ижтимоий ҳаётдаги барча нарса ҳамда ҳодисалар тўғрисида аниқ, асосланган, изчил маълумот беришда қўлланади. Унда нарса-ҳодиса моҳиятини таърифлаш, таҳлил қилиш, сабабини аниқлаб дадиллар билан исботлаш ва асосли натижаларни баён этиш муҳим ҳисобланади. Махсус терминлар, атамалар бу услугубнинг лексикасини ташкил қиласи, унда адабий нормага қатъий риоя этилгани

ҳолда мажхул ва мураккаб қурилиши гаплар кенг ишлатилади.

Илмий услуб билимнинг турли соҳаларига қараб, шунингдек, кимга мўлжалланганлигига нисбатан ўзаро фарқланади. Масалан, фан соҳалари муайян шартли белгилар, формуласлар, баён қилиш материали билан ажралиб туради.

Илмий услубдаги китоблар илм-фанга оид маълумотлар бериш билан мутахассисларгагина мўлжалланиши ёки бундай илмий маълумотлар кенг оммага қаратилган бўлиши мумкин. Кенг жамоатчиликка тушунарли бўлган, тасвир баёнида эмоционаллик, образлилик мавжуд бўлган услуб илмий-оммабоп услуб саналади. Кўпчиликка мўлжалланган лекциялар, илмий маърузалар, рисола ва дарсликлар шу услубнинг кўринишларидир.

Илмий-оммабоп услубда маҳсус атамалар кам ишлатилади (ишлатилганда эса изоҳи берилади), фикрлар қизиқарли тилда тушунтирилади, баёnda образлиникни таъминловчи бадиий нутқ усулларидан фойдаланилади.

Китоблар тўғрисидаги аннотациялар, уларга бериладиган тақризлар, турли саҳна тадбирларининг сценарийлари илмий-оммабоп услубда ёзилади.

Масалан, аннотацияда китобнинг кимга мўлжалланганлиги, мазмун мундарижаси, формалари ва бошқа хусусиятлари қисқача таърифланади. Каталог карточкасига ёзиладиган тавсифнинг ўзига хос тиниш белгилари мавжуд.

Намуна:

Абдуллаева К. ва бошқ.

Савод ўргатиш дарслари — Уроки обучения грамоте: Үқитувчилар учун методик қўлл. (К. Абдуллаева, М. Юсупов, Х. Русланова.— Т.: Үқитувчи, 1986.—248 б.

(Муқовада): 45 т., 2500 нусха.

М. Юсупов М. П., Русланова Х. Ш. Сарл.

Сценарий режаси турли тадбир, томошаларнинг, драматик ҳолатларнинг сўзлар, деталлар орқали қисқача илмий-оммабоп услубда баён этилишидир. Бунга

расмий-хужжат ва бадиий нутқ кўринишлари ҳам сингдирилиши мумкин. Муаллиф сценарий устида ишлаш жараёнида зарур ҳужжатли ва адабий-бадиий материалларни танлайди, таҳлил қилиб, ижодий фойдаланиди: маълумотнома, шеър, қўшиқ, бадиий ва публицистик материалларни ижодий монтаж қилади, спектакль ва кинофильмлардан парчалар олади ва бу материалларнинг ҳаммасини муайян мавзу, композиция ва ғоя атрофида бирлаштиради.

Сценарий тузиш ва ёзишда ана шу хусусиятлар билан бирга ўтказиладиган тадбирнинг тури ва мақсадига, жанр хусусиятларига эътибор бериш лозим.

47- топшириқ. F. Faurovning «Клуб сценарийси асослари» («Ўқитувчи», 1983) қўлланмасидаги сценарий намуналаридан фойдаланиб, мустақил равишда бирон мавзуда сценарий тузинг.

99- машқ. Қўйидаги парчани ўқинг ва қайси услугга хослигини айтинг. Бу услугнинг лексик-синтактик хусусиятларини изоҳланг.

Халқимиз орасида етти мўъжиза, етти хазина, етти иқлим, етти хил ранг, етти фалак, етти қават ер, етти дарё, етти гўзал, етти донишманд каби тушунчалар ҳам учрайдники, улар ҳам ана шу «сеҳрли» рақамилизнинг гаройиб саргузаштлари билан боғлиқdir. Бу тушунчаларнинг айримлари жуда қадим замонлардан бери инсониятни лол қолдириб келмоқда. Шулардан бири оламнинг етти мўъжизаси ҳақидаги афсонавий тасаввурлардир.

Етти мўъжиза... Нега энди улар фақат еттитагина деган савол туғилиши табиий. Ахир, мўъжиза деса арзигулик санъат ва архитектура ёдгорликлари камми? Йўқ, албатта, улар талайгина. Лекин 7 рақамига алоҳида аҳамият берилгани туфайли мўъжизалар сонини еттида дейиш анъанаси пайдо бўлган ва одамлар ўзларига маъқул бўлган обидаларни танлаб олиб, етти мўъжиза дейишаверган. Антик давр тарихчилари асарларида етти мўъжиза тушунчаси ва унинг таркибига кирувчи ёдгорликлар турлича талқин қилинишининг бонси ҳам ана шунда. Хусусан, Катта Плинний етти мўъжиза рўйхатига ўзгартиш киритиб, Вавилон ёки Бобил осма боғларини Фарос оролидаги маёқ билан алмаштиради. Бу ҳолатни бошқа олимларнинг асарларида ҳам кузатиш мумкин. Шунинг учун тарихий-бадиий асарларда жаҳоннинг етти мўъжизаси сифатида

тақдим этилган маданият ва архитектура обидалари рўйхати сира бир-бирига мос келмайди.

(*M. Жўраев, K. Холмуҳамедов.
«Етти иқлимдаги еттилар»*)

91- машқ. Қўйида берилган илмий услубдаги матн парчасининг ўзига хос хусусиятларини тушунтиринг. Уни илмий-оммабоп услубга айлантиринг.

Қайта қуриш даври жамиятимиз олдига бир неча муҳим вазифаларни қўйган. Шулардан бири ёш авлодни, болаларни ахлоқий тарбиялаш, маънавий бойликларга ошно қилишдир.

Маълумки, санъат шахснинг камол топишига таъсир этувчи муҳим факторлардан биридир. Санъатнинг асосий вазифаси фикр уйғотиш, туйғуларни тарбиялаш, инсониятни гуманизм ва тараққиёт идеалларига чорлашдан иборатдир. Хор санъати бу вазифаларни маълум даражада ҳал этишга қодир.

Хор санъати ашула айтиш билан чегараланмай, болаларга музикавий таълим бериш ва тарбиялашнинг оммавий тури эканлиги маълум.

Улар орасида шуларни таъкидлаб ўтамиз:

1. Хорда ашула айтиш музика ижрочилигининг бирмунча қулай тури. Бу қулайлик инсонга табиат томонидан инъом этилган ва доим ривожланишда бўлган овоз «чолғу» билан боғлиқ.

2. Қўшиқчилик кўникмасини тарбиялашнинг ўзи айни пайтда, инсон туйғусини ва ҳис-ҳаяжонни тарбиялашдир.

3. Хор музикаси сўз билан боғлиқ, бу ўз навбатида хор асарларини бирмунча аниқ тушуниш учун асос яратади. Унинг мазмуни поэтик матн ва музикавий ифода воситасида очиб берилади. Музикавий ифода унинг ғоявий-эмоционал аҳамиятини оширишда муҳим омилга айланади.

Шундай қилиб, хорда ашула айтиш болаларга оммавий музика таълими бериш учун жиддий асос бўла олади.

(«*Кичик ёшдаги болалар хори билан машгулот ўтказиш усувлари*», Т., 1990)

48- топшириқ. Яқинлашиб келаётган бирон байрам сценарийсини тузинг.

68-§. Публицистик услуг сиёсий-ижтимоий доира-даги муносабатлар учун хизмат қиласи. Бу услугда ижтимоий ҳаётнинг турли масалалари вақтли матбуот ва нашрлар орқали оммавий акс эттирилади. Публицистик услуг ёзма ва оғзаки кўринишларга эга. Бу услугнинг ёзма турига публицистик мақолалар, фельетонлар, мурожаатнома ва хатлар, чақириқлар кирса, оғзаки турига нотиқлик киради. Бу услуг, аввало, ташвиқот ва тарғибот услуги бўлганлиги учун ҳам унда сиёсий фаоллик, ҳозиржавоблик, ўткир ва таъсирчан нотиқлик, мантиқий мулоҳаза ва далиллар билан тушунишиш ва исботлаш каби белгилар устунлик қиласи. Шунга кўра публицистик услугда ёзма нутққа хос хусусиятлар (ижтимоий-сиёсий, иқтисодий ва бошқа турли соҳаларга оид лексиканинг; параллелизм, анафора, эпифора каби интонацион синтактик воситаларнинг ишлатилиши) ҳам, бадиий услугга хос хусусиятлар (образли ифодалар, эмоционал бўёқдор лексикани қўллаш каби) ҳам ўзаро уйғунлашиб кетади. Бу услугда ҳаётий факт ва ҳодисалар оддийгина қайд қилинмай, жўшқин ва ҳароратли мисраларда ифодаланади, улардан умумий хуносалар чиқарилади ҳамда муҳими — халққа мурожаат, ундаш, қизиқтириш орқали ўқувчига таъсир кўрсатилади. Масалан:

Халқимизда шундай урф-одатлар, удумлар борки, уларга амал қилишининг ўзи кишини тарбиялаб қўйганини билмай қоласиз. Биз, болаларимизни ҳар қандай тарбиявий даргоҳларга жалб этмайлик, лекин тарбиянинг боши ҳам, яхши тарбиячи ҳам кенг жамоатчилик, оила ва маҳалла аҳлидир. Боланинг атрофидаги муҳит ҳар қандай тарбиячидан улуғдир. Халқимизда «Бир болага етти қўшини ота-она», деган ажойиб нақл бор.

(«Т. оқиши», газ. 1991, 24 январь.)

Кўриниб турибдики, публицистик услуг ўзига хос синтактик қурилишга эга: ундаги -ки, лекин, ҳам боғловчили қўшма гаплар, кўчирма гаплар, синтактик тақрорлар таъсирчанликни оширишга хизмат қилган.

Кишилар ўртасидаги мулоқотнинг ёзма шакли бўлган мактуб-хат ҳам, репортаж, очерк, ҳисобот, лавҳа ҳам публицистик услугнинг оммалашган жанрларига киради.

49- топшириқ. Бирон рўзномадан сиёсий-ижтимоий мавзудаги ахборотни ўқинг, унинг тили ва услубий хусусиятларини изоҳланг.

92- машқ. Матнни ифодали ўқинг. Унинг публицистик услубини шакллантирувчи нутқ воситаларини аниқланг.

Дарвоқе биз, кўпларимиз ҳаётлик чоғларида ота-онамизнинг қадрига етамизми, ҳурматини ўрнига қўя-мизми, ахир улар бизни деб соғлиқларидан кечишган, тунларни бедор ўтказишган. Кўп машаққатлар чекиши-ган. Не-не тўсиқларни енгишган ва охир оқибатда куч-қувватдан қолишган. Асаблари ишдан чиқсан. Кўнгил-лари яримта бўлиб қолган. Табиийки, бундай ҳолатда улар ўғил-қизга муносабатда, муомалада, гап-сўзда эҳ-тимолки, хатога йўл қўйишлари мумкин, ана шундай пайтда биз уларни тўғри тушунамизми, кечира оламизми, ошиқмай, асабийлашмай хушмуомалалик билан фикримизни тушунтира оламизми?

Мен дунёдан, ҳаётдан, келажакдан, пуф-пуфлаб, авайлаб — оқ ювиб, оқ тараф ўстираётган фарзандла-рининг орзу-ҳавасини кўришдан, уларнинг келажакда баҳтли бўлишидан умидвор бўлган одамлардан, йигит ва қизлардан бу ҳақда чуқур ўйлаб, мушоҳада қилиб кўришларини истар эдим.

(«Т. оқиши», газ. 1991, 2 август.)

50- топшириқ. Билимгоҳингизда ўтказилган йирик анжуман тўғ-рисида газетага хабар ёки мақола ёзинг.

93- машқ. А. Қодирийнинг «Ўтган кунлар» романидаги Кумуш-биби ва Отабекнинг бир-бирларига битган биринчи мактубларини ўқинг. Хат-мактуб жанрининг ўзига хос хусусиятларини шу хатлар мисолида изоҳланг.

69- §. Бадий услуг киши ҳаётининг ҳамма томон-ларини қамраб олиши, умуминсониятга хослиги, барча-га баробарлиги билан, ўқувчи ёки тингловчига эмоцио-нал-эстетик таъсир этишга йўналтирилганлиги билан бошқа услублардан ажralиб туради. Бадий услугда муаллиф асарнинг эстетик таъсирини кучайтириш мақ-садида тилнинг лексик ва грамматик воситаларидан усталик билан ва ижодий фойдаланиши, турли ифодавий воситаларни қўллаши ёки ўзи янгиларини яратиши мумкин бўлади. Шунинг учун ҳам бу услубда ёзувчилар мавжуд сўзларни образли ишлатишдан ташқари индивидуал сўз ва иборалар ҳам ижод этадилар. Бадий нутқда тил образ, характер, манзара яратишга, юксак образлиликни намоён қилишга хизмат қиласди.

Бошқа барча услубларнинг материали ҳам бадиий нутқ мақсадига бўйсундирилиши мумкин. Бадиий образликсиз бадиий нутқни тасаввур этиб бўлмайди. Бу услубда ҳар бир ёзувчининг воқееликни бадиий идрок этиш кўлами, ижод усули, поэтик маҳорати бадиий нутқнинг жанр хусусиятига мувофиқ тарзда бирбиридан фарқланади. Шунга кўра, бадиий нутқ услуби нисбатан кенг имкониятларга эга ўта қамровли ва бой нутқ кўринишидир. Барча турдаги санъат ва адабиёт асарлари шу услубда яратилади.

94- машқ. Қуйидаги матнни ифодали ўқинг. Бадиий нутқни шакллантирувчи лексик-грамматик воситаларни топинг.

САНЪАТКОР

Концерт одатдагича «навбатдаги номеримизда... Келганларингга раҳмат, ўртоқлар» билан тамом бўлди. Номи чиққан ашулачи — санъаткордан бошқа ҳамма хурсанд бўлиб тарқалди. Санъаткор тажанг эди: танаффус вақтида залга чиққан эди, бир тракторист уни саводсизликда айблади. Тракторист танқид қилганига санъаткор асти чидай олмас эди: трактор қаёқда-ю, масалан «чорзарб» қаёқда, тракторист қаёқда-ю, ашулачи қаёқда!

Санъаткор уйига кетгани извошга ўтирганида яна тутикаиб кетди: «ҳеч бўлмаса айтадиган ашулангни ўрган, сўзларини тўғри айт» эмиш! Нимасини билмайман, нимаси тўғри эмас? Мени шу вақтгача мухбирлар, ёзувчилар ҳам танқид қилган эмас, формализм, натурализмлардан ўтдим — ҳеч ким отвод бергани йўқ. Отвод бериш қаёқда ҳеч ким мени оғзига ҳам олмади. Энди бир тракторист танқид қилар эмиш!..

Санъаткор извошчини ҳайрон қолдириб, ўзидан-ўзи ғулдираб борар эди. Уйда хизматчи овқат қилиб қўйган экан, санъаткорнинг томоғидан ҳеч нарса ўтмади — икки пиёла чой ичди, холос...

(A. K.)

51- топшириқ. «Ўзбекистон адабиёти ва санъати» газетасидан ижтимоий мавзудаги бирон мақола билан унда босилган бадиий ижод намунасини ўзаро солиштиринг ва услубий фарқларнин турушунтиринг.

95- машқ. Кўчиринг. Гапларнинг қайси услугга хослигини ва қўлланиш мақсадини айтинг.

1. Тўхтавойим тұхматга учради, ўргилай. Болагининг хусуматга йўлиққанига қандоқ чидайман. (Ў. Ҳ.) 2. Аёл! Биргина шу сўзда ҳаёт ўз ифодасини топган. Аёл — она, аёл — заҳматкаш, аёл — меҳр-муҳаббат тимсоли, унинг қалби қуёш мисоли башариятга нур сочиб туради. 3. Библиографик тавсифлаш — ҳужжат, унинг таркибий қисми ёки ҳужжатлар туркуми тўғрисидаги библиографик маълумотлар тўпламидан иборат бўлиб, бу маълумотлар муайян қоидаларга мос бўлиши ҳамда ҳужжатнинг умумий тавсифи ва уни бирдай қилиш (идентификациялаш) учун зарур ва етарли бўлиши шарт. 4. Ҳийлагар ой, сеҳргар дилбар, Солиб қўйдинг ёдимга кимни? (Ҳ. О.) 5.— Эргашов, ука, менинг бир саволим бор шу одамга... Айта берайми? Айта берсам шуки, бу ўртоқ 26-числода, қайси ой экани эсимда ийқ, қовунга пиёз қўшиб еганлар ўртоқ Нурматовни кулдириш учун... 26-числода. Айвондаги устунга ёзиб қўйганман... (А. Қ.) 6. Стенография маҳсус белгилар системасини, қисқартма сўз ҳамда сўз бирикмаларини қўллашга асосланган тез ёзиш усулидир. Стенография оғзаки нутқни синхрон равишда ёзиш ва ёзув техникасини ихчамлаштиришга имкон беради. («Фан ва турмуш» ж.) 7. Ҳа, биз ўрта ва кекса авлод фарзандларимизга яхши ўрнак кўрсатишмиз, ҳалқ анъаналарига бўлган ҳурматни мужассам этиб, уларга ўзимиз ҳам риоя қилишимиз даркор. Авлодларимизнинг яхши удумларини улар ўтиб кетмасдан олиб қолайлик. («Т. оқиши», газ. 1991, 25 январь.)

НУТҚНИНГ ТАСВИРИЙ ВА ИФОДАВИЙ ВОСИТАЛАРИ

70-§. Нутқнинг барча услублари ўзига хос ифода усулига эга. Айниқса, бадий нутқ лексик жиҳатдан кенг қамровлилиги, бойлиги ва образлилиги билан ўзига хос ифода усули сифатида ажralиб туради. Бадий асар тилида лексик воситалар эстетик таъсир этиш вазифасини бажарадилар. Шунга кўра бу услубда ҳар бир сўз фикрни образли ифодалашга хизмат қиласди. Бадий нутқнинг образлилиги сўзларнинг, грамматик шаклларнинг ўз ва кўчма маъноларидан эстетик-фоявий мақсаддага мос равишда фойдаланиш ҳамда тасвирий-ифодавий воситаларни, услубий усусларни ўринли қўллаш орқали янада кучайтирилади. Шунга мувофиқ нутқда образлиликни таъминловчи ҳам лисоний, ҳам услубий омиллар амал қиласди. Нутқнинг ифодавийли-

гини таъминловчи лисоний омил сўз қўллаш билан боғлиқ бўлиб, бу ҳолат тилнинг сўз бойлигидан (омоним, синоним, антоним, пароним, эскирган сўзлар, диалектизмлар, неологизмлар, фразеологик бирликлар, ҳикматли сўзлар, мақоллар, цитаталардан) ўринли фойдаланиш натижасида вужудга келади. Услубий омил эса образли воситалардан, услугубий усуслардан мақсадта мос фойдаланиш орқали юзага келади.

Бадий нутқда кўп учрайдиган услугубий воситалардан бири **троплардир**. Троплар маъно кўчиши орқали фикрни ифодаловчи воситалар бўлиб, нутқда ифодалилик, экспрессивликни кучайтириш учун қўлланади.

Тропларнинг метафора, метонимия, синекдоха, сифатлаш, ўхшатиш, оксиоморонирония, антифраза, сарказм, перифраза, муболаға, тафрит (литота), аллегория, символ, жонлантириш, апострофа каби турлари кенг кўламда ишлатилувчи тасвирий-ифодавий воситалардан саналади.

71- §. Нарса ва ҳодисалар ўртасидаги ўхшашликка асосланиб сўз ҳамда ибораларнинг кўчма маънода ишлатилиши **метафорадир**. Бадий метафорада қўчма маъно ҳосил қилувчи сўз лингвистик метафорага ўхшаб фақат предметнинг номини олибгина қолмайди, балки предметнинг образли атамасига ҳам айланади. Масалан, *гумбаз* (осмон), *ниҳол* (кишининг ёшлиги), *оқ олтин* (пахта), *қора олтин* (нефть), *темир одам* (робот), *оҳу кўз* (чиройли), *қора куч* (душман, ёмонлик белгиси), *тузини емоқ* (нон-туз, овқатини емоқ) каби.

Бадий нутқда образлилик ва таъсирчанликни таъминлашда метафоранинг ҳиссаси катта. **Мисоллар:**

Бу Фарҳод тоғидан чўзилган симдир,
Ҳар битта томирда ўн минг киловатт. (*F. F.*)
Беш асрким, назмий саройни
Титратади занжирбанд бир шер. (*A. O.*)

Метонимия, синекдоха («Сўз маъносининг кўчиши» параграфига қаранг) ҳодисалари ҳам нутқнинг ихчамилиги ва таъсирчанлигини оширишга хизмат қилади.

96- машқ. Гапларни ифодали ўқинг. Сўз маъносининг кўчиши билан боғлиқ ҳодисаларнинг турини айтинг ва эстетик вазифасини тушунтиринг.

1. Оғир, ҳазин оҳанглар —
Юракларни эзарди.
Турмушда ҳар севинчда
Ургимчаклар кезарди. (*X. O.*)

2. Мен шоирми,
Уз давримнинг чайкасини билмай нега? (F. F.)
3. Ҳамдам бўлиб сен билан
«Хамса»дан сабоқ олдим,
Йироқ-йироқ юлдузлар
Сеҳрини дилга солдим. (A. O.)
4. Кўкда қуёш ва бир лочин қиз
Чаппор уриб этмоқда парвоз.
Пўлат қушлар ўраб атрофин
Учмоқдадир булутдан баланд. (X. O.)
5. Уни қадамингга ташлама бойлаб,
Кўйвор набирангни, отажоним, Шарқ... (A. O.)
6. Тонготар ҷоғида жуда соғиниб,
Бедил ўқир эдим, чиқди офтоб.
Лойқа хаёлотлар چашмадай тинди,
Пок-покиза юрак бир қатра симоб... (F. F.)

52- топшириқ. Бирон бадий асардан метафора, метонимия, синекдохага мисоллар толинг, уларнинг нутқдаги вазифасини изоҳланг.

72- §. Нарса ёки ҳодисанинг белгисини иккинчи нарса ёки предметнинг худди шу белгисига кўра қиёслаш натижасида ўхшатиш вужудга келади. Тасвирий воситанинг бу тури ифодавийлик, тасвирийликни кучайтириши, поэтик образлилиги билан ажralиб туради. Ўхшатиш нутқий ҳодиса сифатида турли лексик воситалар: *ўхшаши, тенг, каби, сингари, гўё, худди, мисоли, бамисоли, айнан* каби сўзлар, -дай (-дек), -симон, -она, -омуз, -ларча каби қўшимчалар, шунингдек бошқа қиёслаш формалари орқали ҳосил қилинади.

Масалан:

1. Бизга қалин дўст китоб,
У гўё нурли офтоб. (Илёс Муслим.)
2. Само артилган чиннидай тиник, юлдузлар чараклаб турар эди. (O. E.)

Сифатлаш нутқда предмет, нарса-ҳодисанинг белгисини алоҳида ажратиб, бўргтириб кўрсатиш ва шу орқали нутқнинг эмоционал-эстетик таъсиранлигини ошириш учун қўлланади.

Агар умумнутқа хос сифатлашлар нутқнинг аниқлигини кўрсатишга хизмат қилса, бадий нутқ сифатлашлари улардан эмоционал образлиликни таъминлаш кўлами билан ажralиб туради. Қиёсланг: *кўк денгиз — ложувард денгиз, қора тун — зим-зиё тун, оппоқ юз — ширмой юз, тоза чашма — зилол чашма, ёқимли ашула — майин дилгир ашула* каби.

Юқори даражада сифатлаш натижасида бирикманинг экспрессивлиги оширилиб кўчма маънода ишлатилса сифатлашнинг бошқа тури — эпитет ҳосил бўлади. Бадиий нутқда баъзан эпитетлар рамзий маънони ҳам ифодалайди: *оппоқ тонг* («Сен етим эмассан» шеърида галаба тонги маъносида), *қора күч* (душман маъносида), *қизил аскар* (халоскор маъносида), *оқ кабутар* (тинчлик рамзи маъносида).

Баъзан эса маънолари бир-бирига зид бўлган сўзларнинг бирикиши орқали аниқланмишга қарама-қарши белгини кўрсатувчи ғайриодатий бирикма ҳосил бўлади. Поэтик нутқда, кучли оҳангда айтилиб бундай бирикма юқори экспрессивлик ва эмоционаллик касб этади. Бу тасвирий восита **оксиюморон** дейилади. Масалан, *ширин оғриқ, сассиз овоз, аччиқ қувонч, ақлли аҳмоқ, қари ўсмир* каби.

Мисоллар: 1.— *Оббо соқолли чақалоғ-еӣ,— деди Шамси Тўраевич Ушаровнинг елкасига қўл ташлаб.* (Н. Аминов, «Елвизак».)

2. Шундай юрагимда товушсиз фарёд,
Мен сенга инонмоқ истайман, эвоҳ...

(Р. Нарфи, «Мұхаббат» шеъри.)

97- машқ. Гапларни ўқинг. Тасвирий-ифодавий воситаларни аниқлаб, турини айтинг ва вазифасини тушунтиринг.

1. Достонларда битган гулистон —
Ўзбекистон дея аталур,
Уни севиб эл тилга олур.
Чиройлидир гўё ёш келин,
Икки дарё ювар кокилин. (Ҳ. О.)

2. Бу уй ичида Отабекнинг саодатли кунларининг ширин хотиралари сақланар. (А. Қод.) 3. Мен бора қолай, кеч бўлди... деди тиниқ сузук кўзлари жавдираб. (Ҳ. Ф.) 4. Сиддиқжон, худди аллақачон уйғонгану, шунга маҳтал бўлиб ётгандай, дарров ўрнидан турди. (А. Қ.) 5. Тариқдай заминнинг устида беун, Яшаб ўтди шундоқ буюқ бир юрак. (А. О.) 6.— Қим билсин. Тўғриси, ичи қора одам, ўзи сариқ бўлса ҳамки, ичиқора. (Н. А.) 7. Охири қўлларим куя-куя тирик гулханни қорга босиб ўчирдим. (Ў. Ҳ.) 8. Узоқларга боқар сузук кўзингиз, Нуқтадай тор қорачиқдан оқар нур... (Ғ. Ғ.)

9. Ҳушёр боқ, то фоний умр кечади,
Тегрангда турфа хил тошлар учади.

Бири қора ҳасад ё ғараз тоши,
Бири ёвуз туҳмат ё мараз тоши. (A. O.)

53-топшириқ. Ўзингиз танлаган бадий асардан ўхшатиш ва сифатлашларга мисоллар топинг ва уларнинг нутқдаги вазифасини изоҳланг.

73-§. Нутқда сўз ва ибораларнинг кесатиқ, масхара, пичинг билан ўз маъносига зид ҳолда қўлланиши киноя (ирония) саналади. Бу тасвирий воситанинг антифраза, сарказм каби кўринишлари бадий нутқда кенг қўлланади. Антифразада муаллиф ёки персонаж нутқидаги ҳар қандай сўз ёки иборанинг маълум муҳитда интонация билан боғлиқ равишда киноя-пичинг маъносига қўлланиши назарда тутилади.

Масалан: *Баширжон зўрға тонг оттирди.* Эрталаб уни олиб кетишга келган Илҳомжонга ҳам: «*Бор, ўша Хўжақуловага айт, касал де, яйраб ишлийверар экансиз де!*»—деди. (Н. Аминов, «Елевизак».) Бу гапда аламзада Баширжоннинг уни партия мажлисида муҳокама қилмоқчи бўлган Хўжақуловага пичинг ифодаланган.

Сарказм муаллифнинг тасвирланаётган воқеа-ҳодисага салбий муносабатини аччиқ кулги, таъна асосида ифодалашга хизмат қиласди.

Масалан: Уткир Ҳошимовнинг «Икки эшик ораси» романида раисликка тайинланаётган Хўжаевнинг дўқпўписасига мажлис аҳлининг аччиқ заҳархандаси, пичинги қўйидагича берилган:

«...Пастдагилар анча тинчиб қолган, лекин чекка-чеккадан ҳамон норози хитоблар эшишиларди:

— Кеча келди югуриб, бугун олар сүфуриб...

— Туппа-тузук мол эканмизу билмай юрганимизни қара...»

Шахс ёки нарса номининг унга мазмун жиҳатдан боғлиқ бошқа сўз, тасвирий ибора билан алмаштирилиб ифодаланиши перифраза саналади. Масалан: А. Ориповнинг «Баҳор» шеъридаFaфур Fулом номи қўйидаги бирималар билан аталган:

Ун ойким сўнмишдир у таниш наъра,
Ҳамон фироғида фиғон чекар Шош.
Баҳор келаётир, бош кўтар, қара,
О,сурур куйчиси, донгдош замондош.

Бадий нутқда, айниқса, шеърий асарларда, масалларда сўзнинг кўчма маъносига асосланган муболага (бўрттириш, кучайтириш), тафрит (ҳаддан ташқари

кичрайтириш), мажоз (аллегория), жонлантириш, апострофа каби тасвирий-ифодавий воситалар ҳам кенг қўлланади. Апострофадан бошқа бу тасвирий воситаларга адабиётшуносликда кенг ўрин берилган. Апострофада жонсиз нарсалар жонлантириш усулида бўлганидек, инсонларга ўхшаб ҳаракат қилмайди, бунда фақат жонсиз нарсага жонли нарса каби мурожаат ифодаланади:

Сиёҳдон, азизим, қора кўзлигим,
Қора тунлар аро ёриган кўзгу.
Сенлаги у сиёҳ — йўқ, сиёҳ эмас,
Қалбимни қийнаган қип-қизил қоним. (F. F.)

Нутқ жараёнида қатнашмаётган шахсга мурожаат ҳам апострофанинг бир кўриниши ҳисобланади:

Ўқиётиб сиз ҳақдаги
китобларни
Ўқиётиб сўроқларни,
хитобларни
Бошим говлар, бошим тошдай
котар гоҳо,
Не жаҳолат, маломат бу
Темур бобо!

(A. Кўчимов)

98- машқ. Қўйидаги бадинӣ парчалардаги тасвирий воситаларни топинг ва уларнинг қандай мақсадда қўлланганини тушунтиринг.

1. Заргаров билан Зуҳра чиқиб кетади. Машина гудок бериб жўнайди. Насиба уйдан югуриб чиқади.

Насиба. Кетишдими?

Марасул. Ҳа.

Насиба. Юринг, Хуморхон опа, бирга борамиз.

Хуморхон. О, опаси ўргилсин, Аҳаджон акангиzinинг гапини уйда эшитганим ҳам етар, энди клубга бориб ҳам эшитайми?

Марасул (болани бериб). Ушланг! Сиз ҳам бормай қўя қолинг!

Насиба. Ўзингиз айтдингиз-ку!

Марасул. (аччиғи келиб). Қачондан бери мен нима десам шуни қиласиган бўлиб қолдингиз?

Насиба. Бир йилда бир марта борсам нима қипти?

(A. K. «Оғриқ тишилар»)

II. Баширжон «Дайди» фильмидаги машҳур қўшиқ-

дан шу икки қаторини завқ билан куйлади. Унинг хаёлчан, ўйчан кайфияти ўрнини бир муддатнинг ичидаги қувноқлик эгаллаган эди.

— Яна индийский фильмлардан «Ганга билан Жамна», «Байжу Бавра»... Хўш, «Тошдаги гул».

— «Гулдаги тош»,— деб юборди Қурбонов.

— Ҳа-ҳа!— деди Баширжон ўз сўзини тузатган бўлиб.—«Гулдаги тош»...

Қурбонов қаҳ-қаҳ уриб кулди.

— Нимага куласиз?

— Гулдаги эмас, «Тошдаги гул»,— деди у қорнини ушлаб куларкан.

Баширжон ҳам бўш келмади.

— «Гул» билан «тош» сўзлари борми ахир?— сўради у қип-қизариб!— Гулда тош бўлди нима-ю, тошда гул бўлди нима, бари бир-да!

(Н. А., «Елвизак».)

III. Эй Фарфона!

Мушкул кунлар боласини
тишида тишлаб,

Ювиб,
тараб,
севиб,
ўпиб,
қучиб,
опичлаб.

Эй, баҳтларни балофатга етказган она!

(Ҳ. О.)

IV. Тиллашибдир бўри бирла тозилар,
Бирлашибдир ўғри бирла қозилар.
Не деб айтар ул баобрў анжуман,
Кўл кўтарсан ушбу ҳолга розилар.
Зўр баҳодирмиз, жасорат биздадир,
Пашша қонин тўккан, эй, мард ғозилар.

(Э. Воҳидов)

54- топшириқ. Бирон бадиний асадардан сўзнинг кўчма маъносига асосланган тасвирий воситаларга мисоллар топинг, унинг турини айтинг ва бадиний нутқдаги ўрнини, вазифасини изоҳланг.

МОРФОЛОГИЯ ВА ИМЛО КИРИШ

74- §. Грамматика ўзаро боғланган икки қисмдан — морфология ва синтаксисдан иборат.

Морфологияда сўзларнинг тузилиши ва ўзгариши, ясалиши ва сўз туркумлари ўрганилади.

Синтаксисда гапда сўзларнинг ўзаро боғланиши, гап қурилиши ва турлари ўрганилади.

Морфология ўрганилаётган тилнинг имло қонунияти билан, синтаксис шу тилнинг пунктуацион (тиниш белгилари) қонунияти билан узвий боғлиқдир.

СУЗНИНГ МОРФОЛОГИК ТАРКИБИ

75- §. Сўзлар морфологик таркибига кўра туб ва ясама бўлади. Сўзларнинг туб ва ясама деб икки турга ажратилиши уларнинг маъноли қисмларига, грамматик таркибига боғлиқ.

Бу қисмлар вазифаси ва сўздаги ҳолатига қараб икки хил бўлади: 1. **Ўзак қисм** (асосий қисм); 2. **Қўшимча (кўмакчи қисм) — аффикс.**

Ўзак мустақил ҳолда ҳам маъно билдиради. Ўзак маъноли бўлакларга бўлинмайди. Қўшимча эса ўзакнинг маъносига турли маънолар қўшадиган кўмакчи қисм саналади. Масалан: *кул-ги, бош-лиқ-нинг, ток-зорлар-ни, из-чил-лик-дан, учра-иши-ган-лар-имиз* сўзларидағи: *кул, бош, ток, из, учра — ўзак; -ги, -лиқ, -нинг, -зор, -лар, -ни, -чил, -лик, -дам, -иши, -ган, -имиз* кабилар қўшимча (аффикс)лардир.

99- машқ. Матнни кўчиринг. Сўз ўзакларини ва қўшимчаларини иниqlanг. Қўшимчаларнинг англатган маъносига аҳамият беринг.

Қаландаровни соя тортган асосий сабабларидан ёри, унинг чаласаводлиги ва «ўқимаган бўлсан ҳам یланни ўқиганлардан яхшироқ бажараман», деган қаюати; иккинчиси, маълум шарт-шаронт натижасида анқид, меҳнат интизоми доирасидан ташқарига чиқиб олганлиги экан. Бунинг оқибатида Қаландаров шухматпараст, ҳеч кимни ўзига тенг кўрмайдиган, демак, еч кимнинг сўзига қулоқ солмайдиган, иззат-обрў кел-

тирадиган план-процент ва даромаддан бошқа ҳамма нарсага панжа орасидан қарайдиган бўлиб қолибди.

...Саида Қаландаровнинг соя тортган сабабларининг натижаларини қидириб, яна бирмунча кўнгилсиз ҳодисаларга дуч келди. Қаландаров чаласавод эканини билдириласлик учун буюриш мумкин бўлган ёзув-чизувни Умидага ҳавола қилса, ўзи қўли билан ёзиши зарур бўлган нарсаларни уйида Эшонга ёздириб остига қўл қўяр экан. Бу ҳол уни маълум даражада Эшондан тилини қисиқ қилиб қўйибди. Мактабда интизом бўш, ўқитувчиларнинг обрўйи йўқ, давомат жуда паст, ҳар йили мактабга тортиладиган қизларнинг фақат икки-уч процентигина ўнинчи классни битирар, бу ҳол кўп даражада Қаландаровга боғлиқ экан. Болалар боғчаси гирт оми, боғчага даромад манбай ва Ҳуринисонинг хизмати деб қарайдиган Кифоятхон қўлида. (A. Қ.)

ҚЎШИМЧАЛАРНИНГ ТУРЛАРИ

76- §. Қўшимчалар маъно ва вазифаларига кўра сўз ясовчилар ва шакл ясовчиларга бўлинади.

1. Сўз ясовчи қўшимча янги маъноли сўз ясаш учун хизмат қиласди. Масалан, *пахта* сўзи техника ўсимлиги номини билдирувчи сўздир. Бу сўзга -кор ясовчи қўшимчасини қўшиш билан пахта етиштирувчи шахсни ифодаловчи, бинобарин янги маъно билдирувчи сўз ясалади. Тер сўзи феъл бўлиб, ҳаракат маъносини билдиради. Унга -им қўшимчасини қўшиш билан иш-ҳаракатни бажариш жараёнини билдирувчи *терим* сўзи ясалади, *терим* сўзига -чи қўшимчасини қўшиш билан эса терувчи шахс номи (*теримчи сўзи*) ҳосил бўлади. Демак, бу хилдаги қўшимчалар ўзакка қўшилиб, янги маъноли сўз ясаш вазифасини бажаради, шу сабабли улар сўз ясовчи қўшимчалар дейилади.

Сўзларга ясовчи қўшимчалар қўшилганда, баъзан ўзак қисем фонетик жиҳатдан ўзгариши мумкин. Бунда ўзакнинг ясовчи қўшимчаларсиз қўлланиш ҳолатини — ўзакнинг асл ҳолатини унутмаслик керак. Масалан, ёш, сон, тара, тирна каби сўзларга -а, -ә ясовчилари қўшилганда, ўзакда қуйидагича ўзгаришлар содир бўлади: ёш — яша, сон — сана, тара — тароқ, тирна — тирноқ. Мисоллардан кўринадики, олдинги икки сўзда ўзакдаги о товуши а га, кейинги икки сўзда эса ўзакдаги а товуши о га айланган. *Тани, таши, ўқи, тўқи* каби сўзларга

в қўшилганда, охирги и товуши у га айланади: *ўқи* — *ўқув, таши* — *ташув, тўқи* — *тўқув* каби.

2. Шакл ясовчи қўшимчалар сўзнинг маъносини ўзгартирмай, унга ҳар хил қўшимча маънолар қўшади. Масалан: *кул-иб, юр-ган, катта-роқ, қуши-ча, уй-лар, беш-инчи, кўр-газ*.

Шакл ясовчиларга феълнинг равишдош, сифатдош шаклини ясовчи қўшимчалар; феъл нисбатларини ҳосил қилувчи -л, (-ил), -н (-ин), -тир (-дир), -ш (-иш) каби қўшимчалар; отлардаги кўплик, кичрайтиш ва эркалаш маъносини ифодаловчи -ча (-чак), -лок (-алоқ), -гина (-кина, -қина, -фина) каби қўшимчалар; сонларнинг маъно турларини кўрсатувчи қўшимчалар, шунингдек, сўзларнинг синтактик муносабатини ифодаловчи эгалик, келишик ҳамда тусловчи қўшимчалар (*ватан-им, ватан-инг, ватан-имиз, машқ+дан; айт+ди, бора+ман*) киради.

100- машқ. Матнни ўқинг, ажратилган сўзларнинг маъноли қисмларини изоҳланг. Сўзларда учраган қўшимчаларни тавсифланг.

ТАРИХ — МАДАНИЯТ ИЛДИЗИ

Ўзбекистон Фанлар академиясининг мухбир аъзоси, санъатшунослик доктори, профессор, Ҳамза номидаги жумҳурият Давлат мукофоти лауреати Галина Анатольевна Пугаченкова... Ўзбекистонда бу ном кўпларга таниш. Дини, қони, миллати бошқа, лекин дарди-дунёси, тақдири еrimiz ва ҳалқимиз-ла чамбарчас боғланган куттуғ сиймолар, кам дейсизми? Улар яратган илмий асарлар жаҳоншумул аҳамиятга эга. Бартольд, Вяткин, Морозов, Массон, Рампель... Галина Анатольевна ўзи ҳақида шундай дейди: Мен асли зиёли онласида туғилиб ўғсанман. Китоблар дунёси билан нафас олганман. Ўрта Осиё индустря институти (ҳозирги ТошПИ)нинг архитектура бўлимини 1937 йилда аъло тутгатдим. 1941 йили номзодлик диссертациясини ёқладим. 1959 йилда эса санъатшунослик доктори унвонига сазовор бўлдим. Сиз балки нега энди архитектор бўла туриб, санъатшунослик соҳасида иш олиб борганимга ҳайрон бўлаётгандирсиз. Фаолиятимнинг илк давриданоқ тарихий обидалар, масжиду қасрлар, жойларда топилган тарихий қазилмаларнинг ҳайратланарли гўзаллиги доимо лол қолдиради. Мен уларда аждодларимизнинг буюк қалб ҳароратини туйғандек бўлардим. «Навоий даври Ўрта Осиё ёдгорликлари тарихи», «Ўзбекистоннинг буюк архитектура-

си», «Анау масжиди», «Араб ота мақбараси» каби бир қатор китобларим ана шу ҳайратим, кузатиш ва изланишларим маҳсули бўлган. Нимаики ёзмай ўзбек халқига буюк ҳурматни дилимга тугиб қўлимга қалам олдим. Унинг дунёга кўз-кўз қилгулик тарихий санъатини, қадим санъаткорларини, меҳнаткашу меҳроқибатли одамларини қаерда бўлмай унутганим йўқ.

Г. А. Пугаченкова ўзбек маданиятини қатор мамлакатларда тарғиб қилди. Англия ва Франция дорилфунунларида маърузалар ўқигани учун 1976 йилда унга «Страсбург дорилфунунининг доктори» увонини беришиди.

Галина Анатольевна жумҳуриятимиздаги тарихий обидаларнинг аҳволини яхшилаш ва уларни келажак авлодларга тўла-тўқис сақлаш учун курашда сира тоймади. Зоро, Шарқ, Ўрта Осиё ва шу жумладан, Ўзбекистон ўзининг қадим ўтмишидан сўйлагувчи бинолари, наққошлиқ ва заргарлик намуналари, ҳунармандчилиги ва чеварлик санъати билан асосли равишда дунё маданиятининг бир бўлгадидир.

«Ўзбекистондаги архитектура ёдгорликларининг бу гунги аҳволи кишида жуда катта ташвиш уйғотади»,— дейди Галина Анатольевна. Мана биргина Шаҳрисабзаги Амир Темур 1404 йилда қурдирган Жаҳонгир мақбарасини олиб кўрайлилк. Биз бир гурӯҳ архитекторлар билан 30- йилларда у ерда бўлганимизда Темурлангдек хоннинг кўнглида гўзалликка қанчалар ошуфталиқ бўлганлигидан ҳайратланган эдик. Ер остида оқ мармардан қурилиб нақшлар солинган хоналарнинг (бу ердаги сағаналарнинг бирига Жаҳонгир, иккинчисига Мироншоҳ қўйилган бўлиб, учинчисига Темур ўлганимдан кейин ўзимни қўясизлар, деб васият қилган) ҳар бирининг пештоқига Қуръондан суралар битилган эди. Лекин яқинда бориб кўриб, унинг қанчалар ҳароб аҳволга келиб қолганлигидан нечоғли қийналганимни билсангиз эди. Бу ҳақда мен ёзмаган мутасадди ташкилот қолмади. Энг асосийин, бу мақбара тўрт томонидан водопровод қурувчиларнинг ташаббуси билан қурилган қувурлардан оқаётган сувдан зарар кўрмоқда. Чунки, бинонинг тепасига заҳ сувлар йиғилиб, шифт ва деворлар нураб тушаяпти... Наҳотки, кечаги халқимиз босиб ўтган йўл буюк бир тарихга бугунги кун одамларининг муносабатлари шу бўлса. Ахир маданиятининг илдизи тарихда-ку. Ўзлигини англаб яшамоғи учун инсон бутун умр ўтми-

шига, тарихига мурожаат қилади-ку. Наҳот энди биз ўзлигимиздан, аждодларимиз асрлар оша бизга қолдирган улуғ ўтмишдан шу тариқа юз ўгирсак. Ахир бу вахшийлик-ку!.. Шаҳрисабздагига ўхшаш аянчли аҳволни Бухоро, Самарқанд, Урганч, Хива ва Тошкентдаги кўпладб архитектура ёдгорликлари мисолида ҳам кўриш мумкин. Бу аҳволга тез суръатларда барҳам бериш, таъмиrlаш ва қайта тиклаш ишларини янада мукаммаллаштириш керак. Модомики, биз бугун маданий ва тарихий бойликларимизга нисбатан ўз муносабатимизни тубдан ўзгартирмас эканмиз, эртага кеч бўлади. Бунинг учун эса бизни ҳеч ким, ҳеч қачон кечирмайди.

(«Саодат» ж. дан.)

СЎЗЛАРНИНГ ТУЗИЛИШИГА КЎРА ТУРЛАРИ

77- §. Сўзлар тузилиш жиҳатидан уч турга бўлинади: **садда сўз, қўшма сўз ва жуфт сўз.**

Биргина ўзакдан ташкил топган сўзлар **садда сўзлар** саналади: *ота, опа, нон, сув, яхии, чиройли, ўқимоқ* каби.

Содда сўзларнинг ўзи **туб** ва **ясама** бўлади.

Таркибида ясовчи қўшимчалар бўлмаган сўзлар **туб сўзлар** ҳисобланади: *мактаб, бола, китоб, иссиқ, тез* каби.

Ясама сўзлар, одатда, ўзакка сўз ясовчи қўшимчаларнинг қўшилишидан ҳосил бўлади: *гул-чи, сев-ги, терим-чи,*

Икки ва ундан ортиқ ўзакнинг қўшилувидан ҳам янги сўз — **қўшма** ва **қисқартма (от)** сўзлар ҳосил бўлади: *қўлқон, бешиктерватар, ўқиб бермоқ, йигирғма олти, темир йўл, ижроқўм, телеминора* каби.

Икки ҳил маъноли ўзакнинг маъно ва грамматик жиҳатдан тенг боғланишидан ҳам янги сўз — **жуфт сўз** ҳосил бўлади: *кatta-кичик, она-бола, ота-бола, у-бу, учтўрт, ўнқиур-чўнқиур, дала-дашт, борди-келди* каби.

101- машқ. Матнни ўқинг. Сўзларнинг тузилишига кўра турини аниқланг.

I. Қуёш чақнаб турган қиши ҳавоси. Мезбонлар меҳмонларни кузатиб ташқарига чиқишиди, ўзининг кенг хонасида Абай ёлғиз қолди. У суюклар билан нақшбанд қилинган баланд каравот ёнида, одатдаги ўрнида ўтиради. Каттакон, оппоқ пар ёстифи — унинг уйидаги дои-

мий ҳамдами — ўнг тирсагида. Гоҳ юмалоқ хонтахтага суюниб, гоҳ кенг кафтлари билан тиззасига тириниб, шу ҳолатда узоқ-узоқ қолади, чукур хаёлларга чўмади, кўзларида фикр қандиллари йилтираб ёнади. Субҳидам қуёшнинг ўткир нурларига ва қаҳратон қишининг қалин қорларига бурканган Оқ-Шўқи қирлари деразадан оқаришиб кўринади. Нақадар осойишта, нақадар саришта дамлар анқийди улардан!..

II. Бу қиши шоир учун энг самарали қишлоардан бири бўлди. Қозоқлар қозихоналарда негадир сур-сурга камроқ учрадилар.

Абайдан ҳимоя тилаб, уни дашт-саҳроларда кезишига мажбур қилмадилар. Шоир овулда қолиб севикили ишига берилди. У кўркам қирлардан кун бўйи кўз узмас, қўнглиниг қаериладир уйғонган ёқимли ҳаяжон билан ўтган баҳтли дамларга сира тўймас эди. (*Мухтор Авезов.*)

78-§. Баъзи сўзларга сўз ясовчи ва шакл ясовчи қўшимчалар қўшилганда, ўзакда қуйидаги каби товуш ўзгаришлари юз беради:

1. и билан тугаган отларга фамилия ясовчи -ев, -ева қўшилганда, ўзакдаги -й товуши тусиб қолади: *Ўринбой* — *Уринбоева*, *Дадабой* — *Дадабеева*.

2. От ясовчи -к, -қ қўшимчаси, а, я билан тугаган сўзга қўшилганда, ўзакдаги а товуши о га, я товуши ё га айланади: *тара* — *тароқ*, *тая* — *таёқ*.

3. От ясовчи -ум қўшимчаси й билан тугаган сўзга қўшилганда ўзакдаги й қўшимчадаги у товуши билан биргаликда ю га айланади: *қуй* — *қуюм*, *уй* — *уюм*.

4. -(у) в от ёки ҳаракат номи ясовчи қўшимча ўзакдаги а товушини о га, и товушини у га айлантиради: *сайла* — *сайлөв*, *ўқи* — *ўқув*:

5. қ ёки қ билан тугаган бирдан ортиқ бўғинли ўзакка -им (-имиз), и каби эгалик қўшимчалари қўшилганда, ўзакдаги қ товуши ғ га, қ товуши ғ га айланади: *ўртоқ* — *ўртоғим* (*ўртоғи*), *билақ* — *билағим* (*билағи*), бундан *нок*, *фарқ*, *ўқ*, *иштирок*, *иттифоқ*, *ташибик* каби сўзлар мустаснодир.

6. Ўзаги и ёки у билан тугаган сўзларга эгалик қўшимчаси қўшилганда, ўзакдаги и ёки у товуши қолади: *ўрин* — *ўрним*, *оғиз* — *оғзим*, *бурун* — *бурнинг* каби.

7. Сифат ясовчи -қ ўзакдаги а товушини о га айлантиради: *айғла* — *айғлоқ*, *ялтира* — *ялтироқ* каби.

8. Сифатдош ясовчи -ган (-кан, -қан) қўшимчаси

ўзакдаги **г** товушини **к** га, **ғ** товушини **қ** га айлангиради: *түг—түккан*, *соғ—соқкан*. Равишдош ясовчи -гач қўшимчаси қўшилганда ҳам шу ҳолат юз беради: *түг—түккач*.

102- машқ. Ўзак қисмига қўшимча қўшилганда товуш ўзгариши юз берган сўзларга мисол келтиринг. Ҳар бир товуш ўзгаришини изоҳланг.

Н а м у н а: *бурун-им — бурним*, *фироқ-и — фироги*, *нок-га — нокка* каби.

103- машқ. Қўйидаги сўзларга -им, -и, -си эгалик қўшимчаларининг мосини қўйиб тусланг ва сўздаги товуш ўзгаришларини изоҳланг.

Баҳо, қўшиқ, идрок, мавзу, ғоя, кўрк, ғижжак; саҳифа, хулқ, иштирок, татбиқ, илиқ, мисра, топишмоқ, ток, доира, таёқ.

104- машқ. Берилган сўзларга -в, -қ қўшимчаларини мосини қўшиб, янги сўзлар ҳосил қилинг, сўз ўзагидаги ўзгаришларни тушунтиринг.

Сайра, сана, сийла, сайла, сўра, ўқи, тўқи, қатна, қайра, бағиша, тара, қурша, бўя, суя, йиғла, чимчилла, танла.

СУЗ ТУРКУМЛАРИ

79- §. Сўз туркуми сўзларнинг бир умумий маънога, ўзига хос сўз ясовчи, шакл ясовчи ва гапда бир хил синтактик вазифани бажаришга мослашган алоҳида бир туридир.

Предмет ва нарса, белги ва ҳаракат, миқдор каби маъноларни англатадиган, маълум бир таркибга ва ясалиш шаклига эга бўлган, гапда мустақил синтактик вазифа бажара оладиган сўзлар **мустақил сўзлар** саналади. Улар ўзбек тилида олтита: от, сифат, сон, олмош, феъл, равиш.

Мустақил маъно билдиrmай, гапда бошқа мустақил сўзлар билан бирга қўлланиб, уларга қўшимча маъно қўшадиган, уларнинг ўзаро боғланишига хизмат қиласидиган сўзлар ёрдамчи сўзлар саналади. Ёрдамчи сўзлар ўзбек тилида учта: кўмакчи, боғловчи, юклама.

Шундай сўзлар борки, улар на мустақил, на ёрдамчи сўзларга хос хусусиятларга эга. Бундай сўзларга модал сўзлар, ундов сўзлар, тақлидий сўзлар киради.

105- машқ. Матини ўқинг. Мустақил ва ёрдамчи сўзларга алоҳида-алоҳида изоҳ беринг. Маъно ва грамматик фарқларини тушунтиринг.

Мен қулогимни динг қилиб, тошдай қотиб турардим. Аслида исмим Қамол, бу ерда Академик деб лақаб қўйишган эди. Ҳа, ўйлаганимдай бўлиб чиқди. Нариги томондан тракторнинг тирр этган овози эши-тилмасди. Жағимга туширмоқчи бўлган ўша одам — Абубакир экан. У яна дағдаға солиб роса сўқадиган бўлди-да, ҳа, мушт кўтаришдан ҳам қайтмайди. Сув ташиб етказиб беришга улгура олмаяпман, тракторлар иккита, мен бўлсан якка ўзим. Шунга қарамай, манови якка от-аравада уларга сув ҳам, ёнилғи ҳам, мой ҳам, яна бошқа бало-баттарларни етказиб беришм керак Тракторлар бўлса бу атрофда яккаю ягона ҳисобланган булоқдан тобора узоқлашиб борарди. Улар ёнилғи цистерналари сақланадиган бирдан-бир шийпонимиздан ҳам борган сайин олислашиб кетишаётганди. Шийпонни ҳам яқинроққа кўчиришга уриниб кўрдик, аммо қаёқда дейсиз, у ҳам сув билан боғлиқ-да. Абубакирга ўхшаганлар бўлса буни тушунишни ҳам истамайди: «Жағингга соламан!» деб бақиргани-бақирган. Мен бу ерга оғзидан сўлаги оқиб юрган ландавур студентни деб бекорга вақт ўтказишига тоқатим йўқ,— дейди (Ч. Айт.)

106- машқ. Ўқинг. Ҳар бир сўзнинг сўз туркумига кўра турини айтинг. Қўшимчаларини ажратиб, вазифаларини тушунтиринг.

ШУКУР БУРҲОНОВ ҲАҚИДА

Улкан санъаткор Шукур Бурҳонов яратган Брут образи фақат мени эмас, балки залдаги барча томошабинларни беҳад қувонтириди. Унинг кучи томошабин қалбига етказа оладиган ҳаяжонли нутқида, қаҳрамон айтмоқчи бўлган ички түфённи тикилиб ёки хаёл суриб беришида, ички эҳтиросдадир. Унинг талқинида шекспирона сўзлар баралла етиб келади.

*Г. М. Батукаев, Россия халқ
артисти, режиссёр.*

Ўзбек санъаткорлари мени мафтун қилиб қўйди. Шонр ва драматург Мақсуд Шайхзоданинг «Мирзо Улуғбек» тарихий трагедиясини ҳаяжон билан томоша қилдим. Шукур Бурҳонов бу спектаклда ҳам му-

раккаб ролни — ҳукмдор ва мунахжим олим образини монолит ярата олган. Ўнинг ҳар бир ҳаракати, боқиши, фикр юритиши, талаффузи, оғир соатларда ўзини тута билишида сунъийлик йўқ. Томошабин артистни эмас, чинакам XV аср намояндасини кўради.

*М. С. Григорьев, профессор,
санъатшинос.*

от

80-§. Отнинг маъно ва грамматик хусусиятлари.
Шахс, предмет нарса, воқеа-ҳодисаларнинг номини билдирадиган мустақил сўзлар туркуми отdir. Улар ким?, нима?, кимлар?, нималар? каби сўроқлардан бирига жавоб бўлади: *хонанда, қизиқчи, кутубхона, баян, кларнет, клуб, пианино, тановар, дугоҳ*.

Отлар кўплик, эгалик ва келишик қўшимчалари билан ўзгариш ҳамда ўзига хос ясалиш шаклларига эга. Масалан: *билимгоҳимизнинг талабалари: -имиз* (эгалик), *-нинг* (келишик), *-лар* (кўплик), *-и* (эгалик).

107- машқ. Матнларни ўқинг. Отларни топиб, қандай сўроқка жавоб бўлишини айтинг.

I. Анорхой — ўтмишнинг тилсиз гувоҳи, даҳшатли жанглар майдони, кўчманчи саҳройи қабилаларнинг макони. Бизнинг замонамиизда эса Анорхой даштлари бой ва сахий чорвадорлик ўлкасига айлантирилиши керак!..» ва ҳоказо, ва ҳоказо, шунга ўхшаш сўзлар. (Ч. Айт.)

II. Залда босинқи ғовур кўтарилиди. Олдинги қаторда ўтирган тўдадан келган бир кампир ўрнидан турди, бир нима демоқчи бўлиб тишсиз, балиқнинг оғизига ўхшаган оғзини бир-икки ростлаганидан кейин баланд товуш билан деди:

— Саидахон, қизим, менда ҳам битта сағол бор: ранснинг хатоси топилган эмиш, масаласи қачон кўрилади? (А. К.)

III. Буларни яхши танийман, буларни мен билан бирга қамоқча олишган. Лекин Марекка зиёлилар ўртасида ишлашда ёрдам бериб юрган санъат тарихчиси Кропачек нима қилиб бу ерга келиб қолди? (Ю. Фуцик.)

81-§. От ясовчи қўшимчалар. От ясовчи қўшимчалар турли сўзларга қўшилиб от ясайди. Бундай қў-

шимчалар қайси сўз туркумидан от ясашига кўра, асосан, икки катта гуруҳга бўлинади:

1. Отдан от ясовчи қўшимчалар:
-чи: *муқовачи, қўшиқчи, ижрочи;*
-дош: *тилакдош, курсдош, маслакдош;*
-каш: *меҳнаткаш, сураткаш;*
-бон: *боғбон, қўйичибон, дарвозабон* (**вон-** каби талафуз қилинса ҳам, **-бон** ёзилади);
-боз: *дорбоз, ишқибоз, кантарбоз* (-**воз** каби талафуз қилинса ҳам, **-боз** ёзилади);
-паз: *оипаз, сомсаназ, кабобпаз;*
-дор: *боғдор, чорвадор, байроқдор, айбдор;*
-шунос: *тилишунос, адабиётшунос, санъатшунос;*
-хон: *китобхон, ғазалхон, навоийхон;*
-соз: *кемасоз, соатсоз, машинасоз;*
-дўз: *этикдўз, маҳсидўз, дўјппидўз;*
-нома: *ёднома, ийлнома, таклифнома;*
-хона: *қабулхона, чойхона, нурхона;*
-чилик, -гарчилик, -зор, -лоқ, -истон каби қўшимчалар ҳам, асосан, отдан от ясайди: *қўшиқчилик, одамгарчилик, гулзор, тошлиқ, Гулистон, Ўзбекистон.*

II. Феълдан от ясовчи қўшимчалар:
-ма: *қатлама, сузма, қовурма, қайнатма;*
-к (-ик, -ук), -қ (иқ, -уқ): *элак, курак, кўрик, чақириқ, учқуқ;*
-оқ: *тузоқ, қочоқ, қучоқ;*
-ки, -ги, -қи, -ғи (-ғу): *түртки, тепки, ёқилғи, туйғу, ачитқи, сезги, кулғи;*
-кич, -қич, -ғич, ғич: *кўрсаткич, совутгич, қисқиҷ, қашлағич;*
-м, -им, -ум: *чиdam, унум, ютум, кирим, чиқим;*
-инди: *ювинди, чўқинди, чиқинди, қиринди;*
-ч, -инч: *ишонч, қўрқинч, таянч, ўтинч;*
-лик қўшимчаси тозалик, софлик (сифатдан); тезлик, созлик (равишдан); ўзлик (олмошдан); учлик, бешлик (сондан) от ясайди.

108- машқ. Гапларни кўчиринг. Отларни топиб, от ясовчи қўшимчаларнинг қайси сўз туркумларидан от ясаётганлигини айтинг.

1. Овчилар буғу отиб, шохини танасидан жудо қилдилар. (Ч. Айт.) 2. Ертўла унча катта эмас, нари борса ўқувчи болаларнинг дарсхонасича келади, холос. (Х. Т.) 3. Обид ака пахтазорнинг этак томонига ишора қилди. (Ў. Ум.) 4. Қайтиб келгач, қоровулхонада ёғоч уй қурди,

ўрмончилик билан машгул бўлди. (Ч. Айт.) 5. Ортиқча ютуқ Каримовни шуҳратпараст қилиб қўйганди. (А. X.) 6. Чеҳрасида ҳам хавотир, ҳам севинч бор эди. (А. Ў.) 7. Элмурод Муҳаррам билан китобхонлар анжуманида иштирок этишганди. (Ш.)

109- машқ. -м, -ки, -к, -лик, -ч, -ма, -оқ от ясовчи қўшимчалари ёрдамида сифат ва феълдан от ясанг ва улар иштирокида гап тузинг.

82- §. Фамилия ясовчи қўшимчалар киши отларига қўйидаги тарзда қўшилади ва ёзилади:

1. Ундош билан тугаган киши отларига -ов, -ова шаклида: *Самадов, Қосимов, Собирова, Қурбонова*.

Эслатма. ш ундош товуши билан тугаган киши отларига -ев, -ева шаклида қўшилади: *Эргаш — Эргашев, Иўлдош — Иўлдошева*.

2. Унли билан тугаган киши отларига -ев, -ева шаклида: *Абдуллаев, Тўраева, Боқиев, Тиллаева*.

3. й билан тугаган киши отларига -ев, -ева шаклида қўшилади, бунда от охиридаги й ундоши тушиб қолади: *Дадабой — Дадабоева, Турғунбой — Турғунбоева — Турғунбоев, Ўринбой — Ўринбоева*.

110- машқ. Қўйидаги исмларга фамилия ясовчи қўшимчалар қўшинг. Қўшимча қўшилганда ўзакда юз берган ўзгаришларни изоҳланг.

Ўринбой, Йўлчи, Зокир, Ўрин, Сафар, Ихтиёр, Қўлдош, Зариф, Нўъмон, Карим, Муса, Қўзибой, Исройл, Солиҳ, Соли, Йўлдош.

83- §. Қўшма отлар ва уларнинг ёзилиши. Икки ва ундан ортиқ ҳар хил маъноли ўзакнинг бирикувидан ташкил топган отлар қўшма отлар саналади. Қўшма отнинг таркибий қисмлари аслида ўзаро қўйидагича синтактик муносабатда бўлади:

1. Аниқловчи + аниқланмиш: қўлнинг қони — қўлқон, томнинг орқаси — томорқа, шолининг пояси — шолипоя.

2. Тўлдирувчи + кесим: молни боқар — молбоқар, музни ёрар — музёрар, китобни севар — китобсевар.

3. Ҳол + кесим: босиб олди — босволди (қовуннинг тури), беш отар — бешотар.

Қўшма отларнинг қўйидаги турлари қўшиб ёзилади:

1) бир тушунчани билдирадиган ва бир бош урғу билан айтиладиган қўшма отлар: *гултоҗихўroz, шолипоя, қовоғари, белбоғ*;

2) иккинчи қисми -ар билан ясалган сифатдош бўлган қўшма отлар: *молбоқар, отбоқар, бешиктерватар*;

3) кейинги қисми турдош от бўлган географик номлар: *Оқдарё, Ўртасарой, Кўкбулоқ, Янгибозор, Олтиариқ*;

4) таркибида аро, умум, бутун сўзлари бўлган турдош қўшма отлар; *халқаро, умумхалиқ, Бутуниттифоқ*.

Кўшма отларнинг қўйидаги турлари ажратиб ёзилади:

1) иккичи қисми атоқли от бўлган қўшма отлар: *Бутун Россия, Умум Оврупо*;

2) биринчи қисми сифат, иккинчи қисми атоқли от бўлган қўшма отлар: *Ўрта Чирчиқ, Кичик Осиё, Шарқий Сибирь, Кўҳна Ўрганич*.

3) шажара ва жинсни билдирувчи киши номлари: *Муҳаммад Ризо, Оғаҳий, Муҳаммад Содиқ, Муҳаммад-Юсуф, Мунаввара Мурод* қизи.

Эслатма. Таржимаи ҳол, ойнаи жаҳон, шаҳри азим, нуқтаи назар каби изофали бирикмалар: қишлоқ хўжалик, темир йўл, сўз боши, иш ҳақи, сиёсий иқтисод каби сўз бирикмаси шаклидаги отлар ҳам ажратиб ёзилади.

111-машқ. Гапларни кўчиринг. Отларни аниқлаб содда отларга алоҳида, қўшма отларга алоҳида изоҳ беринг. Қўшма отларнинг ёзилишини тушуниринг.

1. Отакўзи тол шохидан хипчин синдириб, этигини чарс-чарс урди. (*O. E.*) 2. Азиз лип этиб меҳмонхонага урди ўзини. (*K. И.*) 3. Чопонберган горнинг олдидан ўтиб, қирга кўтарила бошладик. (*O. X.*) 4. Эшикдан кўзойнак таққан Хайри хола кўринди. (*Ў. X.*) 5. Ўрмонжонга, Бўтабойга, Канизакка кўпдан-кўп салом айтди ва «Қўшчинор»га шу ҳафта ичи, яъни ваъдасидан бурунроқ боришини айтди. (*A. К.*) 6. У идора ишларини ўзидаи ишёқмас, бекорчи Шамсиевга топшириб қўйган. (*Ac. M.*) Она-бала туни билан ҳасратлашиб охир маслаҳатни бир ерга қўядилар. Эрталаб Қутбинисо ўғлига оқ йўл тилаб, дуо ўқииди. (*P. T.*) 8. Фўзапояси йиғиб олинган далаларда тракторлар ҳайқириб шудгор қилишга тушди. (*K. X.*)

84- §. Қисқартма отлар. Қисқартма отлар нутқда ихчамликка эришиш зарурати билан ҳосил қилинадиган ҳодисадир. Улар турғун сўз бирикмаларининг маълум грамматик қонуният асосида қисқартирилишидан юзага келади. Қисқартма сўзлар, асосан, от туркумига хос ҳодиса бўлиб, бошқа сўз туркумларида учрамайди. Қис-

қартма отлар оғзаки ва ёзма нутқда хилма-хил турда бўлади. Бир хил қисқартма отлар сиёсий партиялар, қасаба уюшмалари, жамиятлар, ҳарбий ташкилотлар, хўжалик ва маданий-оқартув ташкилотлари номларини билдиради. Бошқалари эса давлат оғланлари, маъмурӣ-ҳудудий жойлар, илмий-текшириш институтлари, олий ўқув юртлари ва бошқа шу каби муассасалар ноҳми сифатида таркиб топади. Масалан: *ТошДУ, XXЮК, агитбригада*.

Қисқартма отлар қўйидагича тузилади ва ёзилади:

1. Турғун бирикма таркибидаги сўзларнинг биринчи ҳарфлари олинади ва ҳар бири бош ҳарф билан ёзилади: *Бухоро давлат университети — БДУ, Бирлашган Миллатлар Ташкилот — БМТ*.

2. Турғун бирикма таркибидаги сўзларнинг биринчи бўғинлари олинади: *ижроқўм, филфак*.

3. Турғун бирикма таркибидаги биринчи сўзнинг биринчи бўғини, кейинги сўзларнинг бош ҳарфлари олинади: *ТошДУ, ТошТИ*.

4. Турғун бирикма таркибидаги биринчи сўзнинг олдинги бўғини, кейинги сўзнинг яхлит ўзи олинади: *Ўзикитоб, ижроқўм, ўзгазлойиҳа*.

Қисқартма отларни шартли қисқартмалардан фарқлай билиш зарур. Масалан. *A. Навоий, X. X. Ниёзий, X. Олимжон, M. Шайхзода* каби.

Киши исмларини қисқарттириб айтиш ва нутқда қўллаш қисқартма от ясалиши ҳисобланмайди. Бу усул билан эркалаш, ўзига яқин олиш ёки кучли эҳтирос каби қўшимча маънолар ифодаланади. Масалан, *Дилор, Гули, Муқад, Баҳо* каби.

112- машқ. Қўйидаги қисқартма отларнинг тўлиқ шаклини ёзинг.

Н а м у н а: *МҚ — Марказий Кўмита*.

ЎзТАГ, АҚШ, музфак, физмат, БМТ, филфак, ГЭС, телекўрсатув, БУМ, ДАН.

113- машқ. Ўзингиз мустақил равишда қисқартма отлар топиб, тўлиқ шаклини ёзинг, улар иштирокида гап тузинг.

Н а м у н а: *БАР — Бирлашган Араб Республикаси* каби.

85- §. **Жуфт отлар.** Икки ҳар хил маъноли сўзнинг маъно ва грамматик жиҳатдан тенг боғланишидан ташкил топган от жуфт от ҳисобланади. Жуфт отлар орасига дефис (-) қўйилади: *она-бола, ака-ука, бола-чақа, кўрик-танлов, ҳисобот-сайлов, чора-тадбир*.

Эслатма. Жуфт отларнинг қисмлари -у (-ю) юкламаси билан қўлланганда, дефис қўйилмайди нону чой, боғу бўстон каби.

Жуфт отларнинг қисмлари тубандагicha бўлади.

1. Таркибий қисмлари мустақил қўлланадиган сўзлар: *нон-чой, кирим-чиқим, ишчи-хизматчи, ўғил-қиз, меҳрмуҳаббат, тоға-жиян.*

2. Биринчи қисми мустақил, иккинчи қисми мустақил қўлланмайдиган сўзлар: *чой-пой, дон-дун, бола-чақа, темир-терсак, нон-пон.*

3. Ҳар иккала қисми мустақил қўлланана олмайдиган сўзлар: *ғала-ғовур, извир-шивир, алғов-далғов.*

Эслатма. 1. Амал, унвон билдирадиган вице-, эксп-, унтер-белгилари билан келган русча-ўзлашма сўзлар (отлар) ҳам дефис билан ёзилади: *вице-адмирал, вице-президент, эксп-чемпион, унтер-офицер.*

4. *Киловатт-соат, грамм-молекула, чанглагич-пурка-гич, мактаб-интернат* каби отлар ҳам дефис билан ёзилади.

114- машқ. Жуфт, қўшма ва қисқартма отларни топиб, қисмларнинг маъносини, ёзилишини изоҳланг, дефис билан ёзилмайдиган жуфт отларнинг сабабини тушунтиринг.

1. Бир ҳафтадан сўнг мамлакатдан нефть қувури ўтказиш масаласи юзасидан бўлган фикрлашув мажлисида Саидакбар ҳожи шундай ҳимоя қилдики, ҳатто Американинг расмий вакили ёқа ушлаб қолди. (*Ш.*)

2. Ўзи ҳам кўз-қулоқ бўлиб турди. (*Ш.*) 3. Ота-бала Гулсум опанинг уйида учрашдилар. (*О. Е.*) 4. Бизни табриклиб қўйинг, опажон, раҳбар бўлдик. (*О. Е.*) 5. Ёлғиз Кўчқор, кўйлаги ёқавайрон, яланг бош, олдинда зиннлаб кетяпти. (*О. Е.*) 6. «Болалар дунёси» деган магазинга бордик. Қават-қават кийим-кечаклар, шақилдоқ ўйинчоқлар олдик. (*Сайёр*). 7. Арава-арава кийим-кечак келтирилиб, ҳамма болаларга бир сидра ички ва устки кийимбош берилди. (*П. Т.*) 8. Қуёш кўринар-кўринмас тош-тупроқ чўғ бўлиб олади. (*И. Р.*) 9. Писта-бодомни кузатишга чиққан ошна-офайнилар олиб чиққан эдилар. (*С. Абдулла.*) 10. У вақтда радио йўқ, телевизор йўқ, ишчи-ёшлар томошага интиқ пайт.

86- §. Турдош отлар. Турдош отлар бир хилдаги нарса ва нарса-буюмларнинг умумлаштирувчи номидир. Турдош отлар атоқли отларга қараганда кўпчиликни ташкил этади. Турдош отлар кичик ҳарф билан ёзилади: *китоб, папка, кутубхона, танбур, рубоб, такт, драма, баҳт, сурнай, музей, баҳши, кулги, анжуман.*

87- §. Атоқли отлар. Атоқли отлар айрим шахс ёки предметга атаб қўйилган номларни ифодалайди. Атоқли отлар бош ҳарф билан ёзилиб, одатда, кўпликда қўлланмайди. Масалан: *Аброр, Фарғона, Самарқанд, Амударё, Орол, «Саодат» ойномаси*.

115- машқ. Гапларни кўчиринг. Атоқли ва турдош отларни топиб, таркибига кўра таҳлил қилинг. Уларнинг ёзилишидаги фарқларини тушунтиринг.

1. ТошТИдан Қомилжонларникуга келгунча қанча йўл босишмади. (*С. Н.*)
2. Гап шундаки, ... Жаббор акам ҳам ... бу орада таътилга келиб қолади. (*О. Е.*)
3. Воҳид Миробидов билан Назокатбиби ман, уч-тўрт кундурки, «Бўстон» санаторийисида дам олишмоқда. (*О. Е.*)
4. Маҳсим ака норози бўлиб бош чайқади. (*М. Исм.*)
5. Шундан кейин Қиртепа ўртасига ҳовуз қазилиб, шийпон қурилди. (*С. Н.*)

88- §. Қўйидаги атоқли отлар бош ҳарф билан ёзилади:

1. Кишиларнинг исми ва фамилиялари: *Мурод, Рустам, Ўқтам, Ўткир, Маҳмудов, Аҳмедов.*

2. Ёзувчи ва шоирларнинг тахаллуслари: *Ойбек, Ўйғун, Мұқимий, Фурқат.*

3. Рус тилидан ўзбек тилига кириб, қўшалоқ сўздан ташкил топган фамилияларнинг иккала қисми чизиқча билан ажратилиб, бош ҳарф билан ёзилади: *Салтиков—Шчедрин, Николаева—Терешкова.*

Эслатма: Атоқли отлардан ясалган илмий тушунча ва сиёсий оқимни ифода этган сўзлар, турдош отга айланган ёки аниқлович вазифасида келган атоқли отлар кичик ҳарф билан ёзилади: *ампер, маузер, фарҳодлар, ширинлар, наполеон* (қандолат) каби.

Аммо, *Менделеев даврий системаси, Улугбек расадхонаси* каби турғун бирикмалар таркибидаги атоқли отлар бош ҳарф билан ёзилади.

4. Уй ҳайвонларига атаб қўйилган номлар: *Олапар, Тўрткўз, Мош.*

5. Икки-уч қисмдан ташкил топган корейсча, вьетнамча исм ва фамилияларнинг ҳар бир қисми: *Ким Ир Сен, Хо Ши Мин, Фон Вонг Донг.*

6. Планета, юлдуз ва сайёralарнинг номлари: *Ер, Зуҳра, Етти қароқчи, Мирриҳ.*

Эслатма: *ер, қуёш, ой* сўзлари астрономик тушунчани ифода этгандагина бош ҳарф билан, оддий қўлланишда эса кичик ҳарф билан ёзилади.

7. Географик номлар (шаҳар, қишлоқ, тоғ, дарё, кўл,

чўл, қитъа номлари): *Тошкент, Марғилон, Чотқол, Помир, Оҳангарон, Чирчиқ, Осиё.*

8. Жумҳуриятлар номларининг ҳар бир қисми: *Ўзбекистон Жумҳурияти, Қозогистон Жумҳурияти, Қорақалпоғистон Жумҳурияти.*

9. Олий Давлат ва юқори ташкилотларнинг номлари таркибидаги ҳар бир сўз: *Ўзбекистон Вазирлар кенгаси, Олий Кенгаси Раёсати, Вазирлар Маҳкамаси.*

10. Илмий муассасалар, олий ўқув юртлари, вазирликлар ва корхоналар номи бўлган бирикмали отларнинг биринчи қисми ва шу ташкилотнинг хусусиятини ифода этувчи биринчи сўз: *Пахтачилик илмий текшириш институти, Ўрга Осиё Йпакчилик илмий текшириш институти, Тошкент давлат педагогика институти, Молия вазирлиги, Давлат банки, «Олимлар уйи».*

11. Юқори мансаб, олий фахрий унвон номлари бўлган бирикмали отларнинг ҳар бир сўзи: *Ўзбекистон Президенти, Вазирлар Маҳкамаси Раиси, Бош Кўмондон.*

12. Турли конференция, ҳужжат ва резолюциялар, тарихий саналар, воқеалар, урушларнинг номлари (бу номлар агар бирикмали бўлса, уларнинг биринчи сўзи): *Улуғ Ватан уруши, Мустақиллик куни, Халқаро хотин-қизлар куни, Тошкент анжумани.*

13. Фабрика, завод, жамоа хўжалиги, спорт жамиятлари, кино, театр, китоб, газета, журнал номлари қўштириноққа олиниб, бош ҳарф билан ёзилади (бу номлар бирикмали бўлса, уларнинг биринчи сўзи бош ҳарф билан ёзилади): *«Шарқ юлдузи» хўжалиги, «Қутлуғ қон» романи, «Маърифат» газетаси, «Ёш куч» спорт жамияти, «Гулистон» журнали.*

14. Байрам ва ҳар хил муҳим воқеалар (ойлар)нинг номини билдирувчи сўзларнинг иккала қисми бош ҳарф билан ёзилади. Биринчи қисми тартиб сон билан ифодаланган бўлса, кейинги сўз бош ҳарф билан ёзилади: *Биринчи Май — 1 Май, Саккизинчи Март — 8 Март.*

15. *Она-Ватан* типидаги отларнинг биринчи қисми кичик, иккинчи қисми бош ҳарф билан ёзилади.

16. *СамПИ, ТошДУ* каби қисқартма отлар бош ҳарф билан ёзилади.

17. *ЎзР, БМТ, ТДПИ* каби қисқартма отларнинг ҳар бир қисми бош ҳарф билан ёзилади.

116- машқ. «Халқ сўзи» газетасининг бирор сонидан олинган парчани ўқиб, бош ҳарф билан ёзилган сўздарни аниқланг. Бош ҳарф билан ёзилиш сабабларини тушунтиринг.

89- §. Отларда сон. Отлар бирлик ва кўплик сонда қўлланади. Отлар бирликда қўлланганда, якка, ажратилмайдиган предметни бевосита, яъни ҳеч қандай грамматик шаклсиз (-лар қўшимчасисиз) ифодалайди: *дараҳт, гул, китоб, бола, одам, бургут*. Кўплика қўлланган отлар эса махсус грамматик кўрсаткич (-лар қўшимчасини) олади: *китоб* (бирлик)—*китоблар* (кўплик), *уй* (бирлик)—*уйлар* (кўплик), *безак* (бирлик)—*безаклар* (кўплик), *доира* (бирлик)—*доиралар* (кўплик).

-лар қўшимчаси кўплик маъносидан ташқари, нутқий эҳтиёжга қараб кучайтириш (*Сизларга қараб завқлатиим тошиб кетади*), ҳурмат (*Ойимлар келдилар, дадамлор келдилар*), кесатиқ ёки пичинг (*Ўзлари хон, кўланкалари майдон*) маъноларни ифодалайди.

90- §. Бирликда қўлланадиган отлар. Ўзбек тилида ҳаракат-ҳолат, белги номини билдирадиган, доналаб санаатмайдиган нарса ва предмет, воқеа-ҳодиса номлари, мавҳум отлар, жуфт предметларни билдирувчи отлар, атоқли отлар фақат бирликда қўлланади: *яхшилик, буғдорӣ, ун, қулоқ, қўл, қўз, Рустам*.

Баъзи отлар фақат бирликда қўлланса ҳам, кўплик маъносини ифодалайди: *халқ, қўшин, гала, тўда, э.з.*

Бирлик сонидаги бундай отлар кўплик қўшимчаси -ларни қабул қиласанда, кучайтириш, муболага маъноларини ифодалайди: *Кўп баҳорлар, қанот ёзиб тилакларга етдилар.* (Ҳ. О.)

117- машқ. Гапларни ўқинг. Аввал бирлик шаклдаги отларни, кейин кўплик шаклдаги отларни, сўнг фақат бирликда қўлланниб, кўплик маъносини ифодалайдиган отларни кўчиринг. -лар қўшимчасининг қандай маънони ифодалаётганини тушунтиринг.

1. Кўзларимга ишонмайман. 2. Яхшилик қил, сувга ташла: сув билар, сув билмаса, балиқ билар, балиқ билмаса, Холиқ билар. (*Мақол.*) 3. Ойимлар шаҳарга, бувимларникига кетдилар. 4. Зулхумор ойимлар қаерда бўлсалар, сўзга ўргатилган майна ҳам шу ерда. (*Ўзбек халқ достонидан.*) 5. Онаизор болаларнга шундай меҳрибон бўлар экан. (*М. Қориев.*) 6. У ўрта бўйли, йигирма уч ёшларда, чаққон, серҳаракат йигит. (*О.*) 7. Бири пахтадан мўл ҳосил олмоқчи, Теран ўйлар билан кузатар чигит. (*Ҳ. Раҳмат.*) 8. Йўлнинг бундан бу ёфи танишувларига сабаб бўлган «Ўтган кунлар»ни бирга ўқиш билан ўтди. (*Ш.*)

118- машқ. Кўплик қўшимчаси -лар шаклидаги сўз билан ўзингиз мустақил равишда бир неча гап тузинг. -лар қўшимчасининг ўз маъносидан ташқари яна қандай маъно ифодалашини айтинг.

119- машқ. Кўплик маъносини ифодаловчи отлардан бир нечаси иштирокида гап тузинг. Маъносини изоҳланг.

91- §. Отларда эгалик қўшимчалари ва уларнинг ёзиши. Отларга қўшилиб, предмет ёки предметлик тушунчасининг уч шахсдан бирига тааллуқлигини, қарашлигини ёки мансублигини кўрсатувчи қўшимчалар эгалик қўшимчалардир.

Эгалик қўшимчалари предметнинг бирор шахса тааллуқлиги жиҳатидан учга, бирлик ва кўплик сонда қўлланишига кўра иккига, унли ёки ундош билан тутаган негизга қўшилиш хусусиятига кўра иккига бўлинади.

Буни қўйидаги жадвалда кўриш мумкин:

Шахс	Бирлик		Кўплик	
	ундидан сўнг	ундошдан сўнг	ундошдан сўнг	ундидан сўнг
I шахс (сўзловчи)	ота-м	қалб-им	ота-миз	қалб-имиз
II шахс (тингловчи)	ота-нг	қалб-инг	ота-нгиз	қалб-ингиз
III шахс (ўзга)	ота-си	қалб-и	ота-лари	қалб-лари

120- машқ. Тушириб қолдирилган ўриниларга эгалик қўшимчаларидан мосини қўйиб, гапларни кўчиринг. Эгалик қўшимчаларининг қўлланишини изоҳланг.

1. Ўшанда юра...га ҳеч нарса сиғмасди. (*Ў. Ум.*) 2. ... «Пахта бизнинг фаҳр...» деган гап шунчаки бир шиор эмас. (*О. Е.*) 3. Курсидан тушиб, ток қайчи...ни белбоғига қистирди. (*Ш.*) 4. Бу музика бир умр эс...дан чиқмайди. 5. Собир дуторни созлаб ашуланинг бир банд...ни айтиши билан, Солижон унга жўр бўлди. (*Р. Ф.*) 6. Сарви хола даладан тўғри болалар боф...га келди. (*Р. Ф.*) 7. Халқ...ни севаман, бу севги менга жондан азиз десам, хато қилмасдим. (*У.*) 8. У амиркон ковуш...ни ечди-ю, пошна... билан ёнғоқни чақиб, битта...ни ўз...еса, иккита...ни менинг оғз...га солди. (*А. Қ.*) 9. Мусулмон меҳнаткашлар... ҳам озодлик йўл...ни танладилар.

(Ҳ. Ғ.) 10. Музиканинг янги парда... бошланиши билан, кутилмагандаги—Гулчехра бош..ни кўтарди. (Ў. Ўм.)

121-машқ. Қуйидаги сўзларни эгалик қўшимчаси билан турланг. Ўзакдаги товуш ўзгаришига изоҳ беринг. Айрим сўзлар иштироқида гаплар тузинг.

Топшириқ, клуб, нок, чок, парк, варақ, тароқ, ҳақ, завқ, ризқ, кўнгил, сингил, ўғил, оғиз, ўқ.

92- §. Отларда келишик. Отлар келишик қўшимчалари билан турланади. Ўзбек тилида олтита келишик бўлиб, улар бирлик ва кўпликдаги отларга қўшила олади. Келишик қўшимчаларининг айримлари отнинг отга ёки отнинг феълга тобелигини ифодалайди.

Шунинг учун ҳам улар бир сўзнинг бошқа сўзга тобелигини кўрсатувчи синтактик восита ҳисобланади. (Бош келишик бундан мустасно.) Масалан: *Чин сўзни ёлғонга чулғама ва чин айта олур тилни ёлғонга булғама.* (*Навоий*.) Бу гапда: 1) сўзни сўзидағи -ни қўшимчаси унинг чулғама сўзига тобелигини; 2) ёлғонга сўзидағи -га қўшимчаси унинг чулғама сўзига тобелигини; 3) тилни сўзидағи -ни унинг булғама сўзига тобелигини; 4) ёлғонга сўзидағи -га қўшимчаси унинг булғама сўзига тобелигини ифодалайди.

Қаратқич келишиги от билан отнинг, тушум, жўналиш, ўрин-пайт ва чиқиши келишиклари, одатда, от билан феълнинг синтактик алоқасини кўрсатади. Келишик қўшимчаларини олган сўз тобе бўлади. Масалан: *гулнинг барги, Ватанни севмоқ, клубга бормоқ, клубда ишламоқ, клубдан қайтмоқ*.

Қаратқич, тушум келишиклари баъзи ўринларда белгили, баъзи ўринларда белгисиз қўлланади. Хусусийлик, аниқлик маъноси ифодаланганда бу келишиклар белгили қўлланади (*китобнинг варағи, Аҳоронинг дўсти каби*), умумийлик, ноаниқлик маъноси эса келишикнинг белгисиз шакли орқали берилади (*клуб боғи, шаҳар кўчаси каби*).

93- §. Келишик қўшимчаларининг ёзилиши. Келишик қўшимчалари эгалик қўшимчасини олган отларга қўшилиб келиши мумкин. Бунда сўз негизида ҳеч қандай ўзгариш юз бермайди. Агар отлар эгалик, келишик ва кўплик қўшимчаларини олганда, уларнинг жойлашиш тартиби қўйидагича бўлади:

Қаратқич келишиги қўшимчаси ҳамма вақт **-нинг шаклида ёзилади: *китобнинг варағи, Республикализнинг***

Келишик	I шакл	II шакл
Б. к.	бала-лар-им	бала-лар-имиз
К. к.	бала-лар-им-нинг	бала-лар-имиз-нинг
Т. к.	бала-лар-им-ни	бала-лар-имиз-ни
Ж. к.	бала-лар-им-га	бала-лар-имиз-га
Ў. -п. к.	бала-лар-им-да	бала-лар-имиз-да
Ч. к.	бала-лар-им-дан	бала-лар-имиз-дан

пойтахти. Бу келишик маъноси жонли нутқда **-ни**, поэтик нутқда **-н**, **-им** шакллари орқали ҳам ифодаланади: **Укамни олдига кирдим. Ўзбекистон Ватаним маним** (А. О.) каби.

Тушум келишиги қўшимчаси ҳозирги ўзбек тилида ҳар вақт **-ни** шаклида ёзилади: *Муродни кўрдим, хатни ёздим* каби. Оғзаки нутқда **-н**, **-и** кўринишларига эга: *унинг шеърин ўқиган, Кўқонди кўрмоқ* каби.

Жўналиш келишиги қўшимчаси **к ёки г** билан тугаган сўзларга **-ка**, **қ ёки ғ** билан тугаган сўзларга **-қа** тарзида қўшилади; **билак** — **билакка**, **кўрғик** — **кўракка**, **барг** — **баргка**, **тоғ** — **тоққа**. Аммо **г** билан тугаган русча-байналмилал сўзларга, атоқли отларга, географик номларга қўшилганда, **г** ўз ҳолича ёзилади: *педагогга, Оренбургга, филологга, Люксембургга*. Бошқа ўринларда эса доимо **-га** шаклида қўшилади ва шундай ёзилади: **мактабга, ишга, ўқишига, уйга, Тошкентга, Самарқандга**.

Ўрин-пайт келишиги **(-да)**, чиқиш келишиги **(-дан)** қўшимчалари сўзларга қўшилганда, **-та**, **-тан** каби талаф-фуз қилинса ҳам, ҳар доим **-да**, **-дан** шаклида ёзилади: **даштда, даштдан, қишлоқда, қишлоқдан, Тошкентда, Тошкентдан**.

122-машқ. Нуқталар ўрнига келишик қўшимчаларидан мосини қўйиб, гапларни кўчиринг. Келишикдаги сўзларни қайси сўз билан алоқага киришганини изоҳланг.

1. Элмурод... ҳамма... олдин... юборилган разведка... ҳадеганда қайтмаётгани ташвишлантирди. (*Ш.*) 2. Бугун эрталаб... бери важ қидиради-ю, тополмайди. (*Ш.*) 3. Укаси... кўз узмай секин гапи... бошлади. (*Ў. Ум.*) 4. Абдулла ҳаяжони... босолмай, жойи... қимиirlамади. (*Ў. Ум.*) 5. Асрорқул... товуши ўзгарди. (*А. К.*) 6. Сафар ака... астойдил аччиқлангани...сезган имом орага тушди. (*А. Қод.*) 7. Йўлчи арава... нимаси шикастланганини... пайкамай, ҳайрон бўлиб турар экан, арева... тагидан

дедқон... аянчли товуши эшитилди. (O.) 8. Ҳоким пича қаҳрланиб турди, кейин қўли... силтаб, ясовул.. қайтарди. (M. Исл.) 9. Сен Пушкин... севган малаги. (A. O.) 10. Ўрмонжон Қурбон ота... бу иш... бемаслаҳат, bemаврид бошланганига хафа бўлди. (A. K.)

123-машқ. *Ватани, халқнинг, даврнинг, баҳорнинг, онанинг сўзлари иштирокида гаплар тузинг. Шу отлар boglaniб келган сўзларни чизма билан кўрсатинг. Бу бирикмаларнинг фарқини изоҳланг*

124-машқ. Нуқталар ўрнига жўналиш, ўрин-пайт, чиқиш келишиклари қўшимчаларидан мосини қўйиб, гапларни кўчиринг. Шу келишик қўшимчаларини кўринишларига, талаффузига ва ёзилишига кўра изоҳланг.

1. У яширин овоз бергани... Ҳайдарни қўллаб-қувватлаш..., лекин гапирмаслик..., оғзи... толқон солиб, тек ўтириш... жазм қилди. (O. E.) 2. Ашула ниҳояси... етди. Лекин бир зум... сўнг яна айни товуш парвоз қилди. Аммо ўзга мақомда. (O.) 3. Кўзлар зим-зиё қоронгилик... беихтиёр бошпана қидиради. (O.) 4. Правление мажлиси... бригаданинг барча аъзолари таклиф қилинди. (P. F.) 5. Паровоз ўнг... бурилганда, шамол унинг ўтхонаси... чиқаётган тутунни дераза...урди. (P. F.) 6. Инсон мамнун бўлар ҳар бир осуда табассум ва шодлик бахш этган кун... (Ў.) 7. Йўловчи, қудуқ... сув олиб ичганингда, шу гул таги... бир пиёла .сув қуй... (С. Аҳм.) 8. Мунгли кўзлари меҳр... тўла бу нозик кампир Шукуров... марҳум бувисини эслатади. (O. E.)

125- машқ. Нуқталар ўрнига -га, -ка, -қа, -ға, -да, -дан қўшимчаларидан мосини қўйиб кўчиринг. Талаффузини изоҳланг.

сувлиқ..., тўриқ..., ўрик..., хирург..., металлург..., келажак..., челяк..., драматург..., таёқ..., оёқ..., ўтлоқ..., ёғ..., тоғ..., Тошкент....

94- §. Кичрайтириш ва эркалаш қўшимчалари. -ча, -чак, -чоқ, -лоқ, -aloқ, -гина (-кина, -қина, -ғина), -жон, -хон, -ої, -пошиша, -биби, -бой (-вой) каби қўшимчалар отга қўшимча маъно қўшувчи қўшимчалардир: *той-ча, бола-гина, келин-чак*. Бу каби отлардаги кичрайтириш, эркалаш, кучайтириш каби маънолар контекстста қараб белгиланади.

127- машқ. Узингиз мустақил равишда кичрайтириш, эркалаш маъноларини ифодаловчи қўшимчалар ёрдамида гап тузинг ва ҳар бирига алоҳида тавсиф беринг.

128- машқ. Бир неча ясама отлар иштирокида гап тузинг. Ясама отларни намунадагидек морфологик таҳлил қилинг.

Н а м у н а: Ўзбекистон — атоқли от, бирликда, бош келишикда, содда от, ўзбек отига -истон от ясовчи қўшимчасини қўшиш билан ясама от ҳосил қилинган.

129- машқ. Матнни ифодали ўқинг ва от мавзусини умумлаштириш мақсадида қўйидаги вазифаларни бажаринг:

- а) атоқли ва қисқартма отларни ажратинг;
- б) қўшма ва жуфт отларни топиб, ёзилишини тушунтиринг;
- в) келишик қўшимчаларининг қўлланиши ва ёзилишини изоҳланг;
- г) эмоционал-экспрессив бўёғи бўлган отларни, публицистик услугга хос сўзларни ажратинг.

САНЪАТ ҚАЛИТИНИ ЭГАЛЛАГАН УСТА

Ўзбек халқ амалий санъати ривожига самарали ҳисса қўшган, дунёга донғи кетган академик Уста Ширин Муродовнинг талантли шогирди, ганч ўймакорлиги бўйича ўзига хос мактаб яратган, кўплаб шогирдлар тайёрлаган халқ усталаридан бири — Маҳмуд Усмоновдир.

Маҳмуд Усмонов Тошкентдаги Кўкча даҳасининг Обиназар маҳалласида 1910 йил 3 январда дунёга келган. Отаси Усмон Икромов — ўз даврининг кўзга кўринган усталаридан бири эди. Ота Маҳмудни ёшлик чоғиданоқ турар-жойларни безаш ишларига бирга олиб борар, ўғлига ганчкорлик сирларини ўргатарди. Унга аввал оддий ўсимликсимон ва геометрик нақшларни чизиши, сўнгра ганч элашдан тортиб пардозлашгача таълим берди.

Ёш Маҳмуд отасидан ганчни элаш, ҳовонда қориб туриш, кейин эса нақшлар заминини тайёрлашни ва сўнг пардоз беришни ўзлаштириди. Уста Усмон Икромов уйнинг бичимини тўғри олар, бунинг сирларини ўғлига ҳам ўргатарди. Ота-бала меҳмонхона, айвон ва оддий хона-донларни ганч ўймакорлиги билан безар, айниқса, Маҳмуд тахмон ва косомонларга зеб беришга қизиқарди. Ўша вақтда у ўн беш ёшларда эди. Аста-секин Маҳмуд Усмонов мустақил ишлайдиган уста бўлиб етишди.

1945—1947 йилларда А. Навоий номидаги опера ва балет театри қад кўтарди. Унинг қурилишига академик, машҳур меъмор А. В. Щчусев бошчилик қилди. Театрнинг безак ишлари учун Ўзбекистоннинг турли вилоятларидан халқ амалий санъати усталари таклиф этилди.

Улар орасида Маҳмуд Усмонов ҳам бор эди. Театр биносини маҳорат билан безаганлари учун усталар Давлат мукофотига сазовор бўлдилар. Шундан сўнг Маҳмуд Усмонов рассомлар уюшмасига қабул қилиниб, унинг ижоди янада равнақ топди. У ўз асарлари билан турли кўргазмаларда қатнашди.

Ўша давр меъморчилигида янгича услугуб таркиб топа бошлади. Ганч ўймакорлиги санъети керак эмас, ҳозирги уйларимиз замонавий бўлиши керак, яъни биноларни тез ва арzon қуриш ҳамда ортиқча ҳашамдорликдан қочайлик, деган фикрлар тарқалди. Бу — баъзи кишиларнинг кўр-кўрона шиори эди. Мазкур шиор халқ амалий санъатининг ганч, ёғоч ва тош ўймакорлиги, наққошлик каби турларининг ривожланишига маълум даражада тўсиқ бўлди. Халқ усталарининг айримлари бошқа ишларга ўтиб кетишиди, лекин ўз ҳунарига содиқ бўлган Маҳмуд Усмонов санъатини давом эттирди. Ёшлар орасида ганч ўймакорлиги ютуқларини кенг тарғиб этди.

Уста шогирдлар тайёрлаш билан бир қаторда, кўпгина биноларни ҳам безади. 1953 йили унинг илтимоси бўйича П. Беньков номидаги жумҳурият бадиий ўқув юрти қошида халқ амалий санъатининг бир неча бўлимлари, жумладан, ганч ўймакорлик бўлими очилди. Бу ўқув юртига Уста Ширин Муродов, Уста Тошпўлат Арслонқулов ва бошқалар таклиф қилинди. Маҳмуд Усмонов бу ерда ёшларга дарс берди, жуда кўп шогирдлар тайёрлади.

Маҳмуд Усмонов 1957 йили ўзининг қирқча яқин шогирди билан Бухородаги машҳур Ситораи Моҳи Хоса саройидаги ганч ўймакорлигини қайта тиклади. Устанинг ганч ўймакорлиги тажрибаларига асосланиб, 1961 йилда Алишер Навоий номидаги театр безаклари қайта тикланди.

1966 йили Тошкент шаҳрида ер қимирилаши натижасида кўпгина уйлар вайрон бўлди, меъморий ёдгорликларга шикаст етди. Шулардан бири Ватан урушида немис-фашистлари устидан қозонилган ғалабага бағишилаб қурилган Курант эди (У 1947 йили уста Ширин Муродов бошчилигида бунёд этилганди). М. Усмонов уни таъмирлаш баробарида ганч ўймакорлигида ажойиб янгилек яратди: ёғоч ўймакорлигида ишлатиладиган сақиҷа заминини қўллаб, ўйма композициясини янада майинлаштиришга мувваффақ бўлди.

Шарққа машҳур буюк нақош Моний айтганидек,

кимки сувратдаги ҳар бир чизиқقا жон бағишлий олар экан, у санъат калитини эгаллаган бўлади.

(«Гулистан» ж. дан.)

СИФАТ

95- §. Предметнинг ранги, ҳажми, шакли, маза-таъмини, хусусиятини, ўрин-вақтга муносабатини билдирувчи мустақил сўз туркуми сифат дейилади: *гўзал, илмли, кичик, қизиқ, ширин, оғир, енгил, кузги, ёзги*. Сифатлар қандай?, қанақа? каби сўроқлардан бирига жавоб бўлади. Сифатлар предмет белгисини даражалаб, баъзан кичрайтириб ёки камайтириб кўрсатиш каби ўзига хос морфологик хусусиятларга эга: *пухта — пухтароқ, энг пухта* (даражада); *сан-сариқ, сарғииш* (белгини кучайтириш, камайтириш). Гапда сифатлар одатда отга боғланниб келади.

129- машқ. Уқинг. Сифатларни ўзи боғланган сўз билан бирга ёкўчиринг. Сўроғини ва маъносини айтинг.

1. Томдан атроф жуда яхши кўринар эди. (*П. К.*) 2. Деярли ҳар бир қиши ўрмонларда оқ буғуларни овлашга тушиб кетди. (*Ч. Айт.*) 3. Пастда, икки ўрик панасидаги сўрида ёш қиз ва оқ соч аёл хаёлга чўмиб ўтиришибди. Қекса она, дилбар қиз. (*М. Пирматов.*) 4. Ражаб ака, сиз ўз вахтангизда тарбиявий иш олиб бормай қўйибсиз. (*П. К.*) 6. Ахир энг жасур, энг тажрибали денгизчилар ҳам Шимолий Қутбгача етаман деб, ... ҳалок бўлганлар. (*Ж. Верн.*) 7. Бу хатларга самимий, инсоний тўйғу битилган эди. (*С. Аҳм.*) 8. Лекин бу иш аввалги ишларидан ҳар жиҳатдан мушкулроқ эди. (*Х. Ф.*) 9. У ўтакетган даражада совуққон, чаққон, шижаотли ва фаросатли одам эди. (*Ж. Верн.*) 10. Ошиқлар суйган қизларини сулувликда гўзал оқ буғуга қиёс қилишади. (*Ч. Айт.*)

96- §. Сифат ясовчи қўшимчалар. Сифат ясовчи қўшимчалар деярли барча сўз туркumlаридан сифат ясайди. Уларнинг баъзилари от ва олмошдан, баъзилари эса феълдан сифат ясайди.

Сифат ясовчи қўшимчаларнинг асосий турлари қуйидагилар:

-сиз: *мевасиз, кучсиз, сабабсиз, тузсиз, виждонсиз, иқлсиз;*

-ли: *илмли, сирли, кучли, қайгули, сабабли;*

-чил: *энчил, дардчил, изчил;*

БАЪЗИ СИФАТ ЯСОВЧИ ҚУШИМЧАЛАР ВА УЛАРНИНГ ЕЗИЛИШИ

Сифат ясовчи қўшимчалар	Езилиши	Mисоллар		
		1	2	3
-ги, -ки, -қи	Унли ва жарангли ундош товуш билан туганган сўзларга -ги, жарангсиз товуш билан тугаган сўзларга -ки, -қи қўшилади.	ёзги, кузги, ташқи, кечки, тонғги, сўнгги, тунғи, хонаки		
-ий, -вий	Унли товуш билан тугаган сўзларга -вий, ундош билан тугаган сўзларга -ий қўшилади.	илмий, расмий, оммавий, партиявиий, замонавий, оила-вий		
-ба- (бо-), бе-, -но-	Бу қўшимчалар сўзларга олд томондан қўшилиб, фақат отдан сифат ясайди (но- бундан мустасно).	бақувват, ноинсоф, боадаб, бесабр, бетамиз, номард		
-қир, -кир, -ғир, -ғир	Жарангсиз товушлар билан тугаган сўзларга -қир, -кир, жарангли товуш билан тугаган сўзларга -ғир, -ғир қўшилади.	кескир, ўткир, чопқир, олғир, топқир, сезигир		
-қ, -к, иқ, -уқ, -ук	Унли товуш билан тугаган феълларга -қ, -к, ундош билан тугаган феълларга -иқ, -ик, -уқ, -ук қўшилади. Бунда феъл охиридаги а о га айланади; таркибида у товуши бўлган сўзларга -уқ, -ук, бошқа ҳолларда -ик, -иқ қўшилади.	ялтира — ялтироқ, қалтира — қалтироқ, тарқа — тарқоқ, йиғла — йиғлоқ, очиқ, бўғиқ, йиртиқ, тешик, ёпик, узуқ, юмуқ		
-аки	Доимо отлардан сифат ясайди. Бунда баъзан ўзакдаги и тушиб қолади.	оғиз — оғзаки, қалбаки, даҳанаки		

-чан: *үятчан, ишчан, күнгилчан, синовчан;*
-аки: *қалбаки, юзаки, даҳанаки, оғзаки;*
-ий, -вий: *деворий (газета), нисбий, оиласвий, оммавий;*
-симон: *тухумсимон, шарсимон, одамсимон;*
-лик: *дўйпилик, тошкентлик, кийимлик;*
-ти (-қи, -ки): *кузги, қишики, ички, ташқи;*
-бе-: *бебаҳо, бетоқат, беминнат, бегуноҳ;*
но-: *ноўрин, номарӣ, нотурғун;*
ба-: *басавлат, бақувват, бадавлат, баҳаво;*
сер-: *сердаромад, серсут, серсув, серўт, сермаҳсул;*
-к, -қ, -ик, -ук, -ак: *кемтик, порлоқ, чанқоқ, йиртиқ, қуруқ, юлуқ, қуюқ, юмуқ;*
-қоқ, -ғоқ: *тиришқоқ, ёпишқоқ, тойғоқ;*
чоқ, -чак, -чиқ: *куюнчак, тортиңчоқ, эринчоқ, мақтанчоқ;*
-ғин, -ғун, -кин, қин: *сўлғин, кескин, сотқин, турғун;*
-ағон: *билағон, чопағон, қонағон, ётағон;*
-мон: *билармон, топармон, устабузармон;*
-қир, -қур, -ғир, -ғур, -кир, -гир: *чопқир, сезгир, ўтқир, бўлмағур, олғир, учқур.*

130- машқ. Гапларни кўчиринг. Сифат ясовчи қўшимчаларнинг тагига чизинг, сифатларнинг қайси сўз туркумидан ясалганини изоҳланг.

1. Мардон Йўлчиевич сертакаллуп йигитнинг бу қишлоқлик йигит эмаслигини сезиб турарди. (*Ж. Абд.*)
2. Қиз нима қилишини билмай, турган жойида қотиб қолди, беихтиёр олдинга талпинди (*С. Н.*)
3. Акаси чиндан чарчаган эди. Буни мен сўниқ товушидан сезиб турардим. (*Сайёр*)
4. Мен жizzали ва пиёзли нонларни жуда ёқтираман, аммо бундай лаззатли нонларни бувим аҳён-аҳёнда ёпади. (*О.*)
5. Яхши қиз, ёқадаги қундуз, яхши ўғил — кўкдаги юлдуз. (*Мақол.*)
6. Илмли минг яшар, илмсиз бир яшар. (*Мақол.*)
7. Шаҳар четидаги сўлим жойларнинг бирида менинг яқин дўстим яшайди. (*И. Р.*)
8. Ҳозирги вақтда жумҳуриятимизда бақувват хўжаликлар, сердаромад колхозлар сони йил сайин кўпаймоқда.
9. Жисмоний тарбия кишини соғлом, эпчил, бақувват қиласди.
10. Исмат бобо, кўзойнаги офтобда йилтиллаб, нотекис жой келганда, коляскада силкиниб борар эди. (*П. К.*)
11. Иссиккўлнинг кўм-кўк саҳнида оппоқ кема пайдо бўлди. (*Ч. Айт.*)

131- машқ. Ўзингиз сифат ясовчи қўшимчалар ёрдамида отдан сифат ясаб, улар иштирокида гап тузинг.

97- §. Содда, қўшма, жуфт сифатлар ва уларнинг ёзилиши. Сифатлар тузилишига кўра содда, қўшма ва жуфт бўлади.

Содда сифатлар бир ўзакдан ташкил топиб, улар туб ва ясама бўлади.

Сифат ясовчи қўшимчалари бўлмаган сифатлар туб сифат саналади: *оқ, қизил, қора, кўк, хира, пушти, хипча*.

Сифат ясовчи қўшимчалар билан ясалган сифатлар ясама сифат саналади: *серсавлат, бақувват, маъноли, тиришқоқ, зарурый, баҳаво, бебаҳо*.

Икки ёки ундан ортиқ ўзакдан ташкил топиб, бир белгини ифодалайдиган сифатлар қўшма сифатларни ҳосил қиласди. *Қўлбола, ўзбилармон, очқўз, соҳибжамол, тинчликсевар, эртапишар, кечпишар* каби қўшма сифатлар бир бутун ҳолда айтилади ва қўшиб ёзилади.

Қисмлари алоҳида-алоҳида олинганда лексик ва грамматик маъно ифодалайдиган қўшма сифатлар ҳам бор. Бундай қўшма сифатларнинг ҳар бир қисми алоҳида урғу билан талаффуз қилинади ва алоҳида ёзилади: *бодом қовоқ, яланг оёқ, жигар ранг, тўқ кўк, чўққи соқол, соғ дил, тим қора, оч-пушти* каби.

Эслатма. 1. Биринчи қисми сон, иккинчи қисми сифат бўлган қўшма сифатлар ҳам ажратиб ёзилади: *беш хонали, бир жинсли, ўн беш қаватли*. 2. **Тил олди, тил ўрта** каби сифатлар ҳам ажратиб ёзилади.

Предметнинг бир умумий белгисини билдириб, икки содда ўзакли сифатнинг teng боғланишидан (ёки такрорланишидан) ташкил топган сифат жуфт сифат саналади: *кatta-кatta, узун-қисқа, яхши-ёмон, оқ-қизил*. Бундай сифатлар ўртасида -у, -ю, юкламалари қўлланганда чизиқча қўйилмайди: *пасту баланд, каттаю кичик*.

Эслатма: *жимжит, оппоқ* сифатлари қўшиб ёзилади.

132- машқ. Гапларни кўчиринг. Содда, қўшма ва жуфт сифатларни аниқлаб, қандай қисмлардан ташкил топганини, талаффузи ва ёзилишини тушунтиринг.

1. Панжара орасида еру деворларга ёзиб ташланган яшил, кўк чўғдек ёниб турган қизил Хуросон гиламлари кўзга ташланарди. (A. O.) 2. Мен сенинг самимийлигингга, нияти пок, яхши йигит эканингга шубҳа қилмайман, болам. (O. E.) 3. Ясси тоғ тепаснига олиб чиқадиган йўл тинкани қуритадиган даражада бўлиб, яйдоқ кул ранг адирларда қишида доим совуқ шамол ер ялаб изғиб

юарар, ёзда эса тандирдек қизиб кетар эди. (Ч. Айт.) 4. Шамол эски қорнинг нимхуш ҳидини учирив келтиради, ер ҳам музлаб ётар, жонсиз эди. (Ч. Айт.) 5. Унинг юзи ориқ, рангсиз, бурни қирра, чуқур ботган катта кўзларининг оқи аллақандай мовий эди. (Ас. М.) 6. Ҳар куни эртапишар ўрикнинг учига чиқиб, фўралигида еб тамомлардим. (Ойдин.) 7. Бола камгап, қиладиган ишини бирорвга айтмасди. (С. Аҳм.) 8. Узоқдан оқ-қора нарсалар кўрина бошлади. (В. Гафуров.) 9. Гуласал кўзлари қийиқ, бодом қовоқ, истараси иссиқ, жимжитгина қиз. (О.) 10. Дилдор очиқ кўнгил, ширин сўз, жонкуяр ва меҳрибон бўлгани учун тез орада кўпчиликнинг ҳурматини қозонди. (Х. Ф.)

98-§. Сифат даражалари. Бир неча предметдаги бир хил белгини миқдор жиҳатдан фарқлаш ҳодисаси сифат даражаси ҳисобланади.

Икки предметдаги бир хил белгининг ўзаро қиёсланимаган шакли оддий даражада саналади. Масалан: *қизғин, катта, ёмон, совуқ, иссиқ*.

Бир хил белгининг қиёс қилинишидан икки хил даражада ясалади:

1) қиёсий даражада; 2) орттирма даражада.

Предметдаги маълум бир белгининг бошқа предметдаги худди шундай белгидан ортиқ ёки камлигини кўрсатувчи даражада қиёсий даражадир. Қиёсий даражада оддий даражага -роқ қўшимчаликни қўшиш билан ясалади. Масалан: *Бизнинг уйимиз сизнинг уйингиздан кичикроқ. Унинг бўйи менинг бўйимдан узунроқ*.

Предметдаги белгининг бошқа предметдаги шундай белгидан миқдор жиҳатдан анча кўп эканлигини кўрсатувчи даражада орттирма даражадир. Орттирма даражада белги ифодаловчи сўздан олдин энг, жуда, ғоят, ниҳоятда каби сўзлардан бирини келтириш билан ифодаланади. Масалан: «*Ёзувчининг энг яхши асарлари кўргазмага қўйилди*».

133- машқ. Сифатларни аниқлаб, қиёсий ва орттирма даражадаги сифатларнинг ясалшини, уларнинг ўзаро маъносига кўра ва ясама сифатлардан фарқини тушунтиринг.

1. У нотаниш кишиларни яхшироқ кўриш учун дераздан қаради. (К. И.) 2. Қиз эшикни каттароқ очиб, унинг киришини кутмай, тўрдаги баланд зинали даҳлиз томон йўл олди. (Ў. Ум.) 3. Қуёнидан нурафшон юртимизнинг энг антиқа водийсига боряпмиз. (М. Муҳаммадов.) 4. Оталар ўз болаларини дунёдаги болаларнинг

зўри, энг хушбичими деб билишади. (*C. Аҳ.м.*) 5. Қўчаларда «Тошкентни энг чиройли шаҳарга айлантирамиз», деган шиорлар пайдо бўлди. (*Ў. Ҳ.*) 6. «Болалар дунёси» деган магазинга бордик... Энг пастки қаватга тушиб, «Коляска» танладик. (*Сайёр.*) 7. Ҳанифа ўпкаси тиқилиб ҳансирар, унинг яримта-яримта гапидан ҳеч нарсани англаб бўлмас эди. (*C. Ан.*) 8. Модомики шундай экан, у бизнинг энг яқин дўстимиздир. (*Туроб Тўлла.*) 9. Одам ёмон кунини кўпроқ эслайди, чунки ёмон кун кам бўлади бизда... (*Сайёр.*) 10. Қишлоқ марказида яқинда бўёқдан чиққан сернақш клуб олдида одам ғуж. (*M. Муҳаммедов.*)

99- §. Озайтирма ва кучайтирма сифатлар, уларнинг ёзилиши. Сифатларнинг озайтирма ва кучайтирма шакллари белгининг кучлилигини, ортиқлигини, камлигини, ноаниқлиги каби маъноларни ифодалайди.

Жуда, ғоят, ниҳоятда каби сўзларни сифатдан олдин келтириш билан унинг кучайтирма шакли ҳосил қилинади: *ғоят нағис, жуда билимли, ниҳоятда ёқимли: қипқизил, кўм-кўк, сарп-сарпқ, кап-кatta* каби сўзлар ҳам сифатнинг кучайтирма шакли ҳисобланади ва улар чизиқча (—) билан ёзилади.

-роқ қўшимчаси қиёсий даражадан ташқари, баъзан белгининг камлиги шаклини ҳам ясади: *қоши қора — қоши қорароқ, қўзи кўй — қўзи кўйкроқ.*

-иш, -итир, (-имтир) қўшимчалари ҳам белгининг камроқ эканлигини билдиради: *сарғииш қоғоз, кўкимтир осмон.*

Чала-чулла, ола-кула (ола-була), майдада-чуйда, гирашира, ували-жували, калта-култа, чатоқ-чутоқ, гадир-будур кабилар белгининг ноаниқлигини ифодалайди; бундай сифатлар одатда жуфт ҳолда қўлланади ва ёзува улар орасига чизиқча қўйилади.

134- машқ. Гапларни ўқинг. Сифатларнинг озайтирма ва кучайтирма шаклларини топиб, уларнинг ясалиши ва маъноларини изоҳланг, сифат даражаларидан фарқини тушунтиринг. Сифатларнинг ёзилишига аҳамият беринг.

1. Кулганда сал юмалоқ оппоқ юзи жуда очилиб кетарди. (*O. Е.*) 2. Ҳозиргина баҳмалдай қорайиб турган соғ кўкимтири рангга кирган қишлоқ ўйғона бошлаган эди. (*O. Е.*) 3. Очиқ деразадан тип-тиниқ осмоннинг бир чеккаси кўриниб туарди. (*Ў. Ҳ.*) 4. Кўкиш ялтироқ галстук тақиб олибди. (*Ў. Ҳ.*) 5. Қулоғига тегай-тегай деб учиб ўтган қалдирғоч, орқасидан сарғимтири уфқа қараб

қолди. (*C. Аҳм.*) 6. Ҳовли ўртасидаги булоқнинг тип-тиниқ суви қүёш нурида мавжланиб ётар экан. (*T. Файзбоз.*) 7. Давлатбеков унча семиз ҳам, озғин ҳам эмас, оқиши юзли, хушмўйлов новча одам эди. (*П. К.*) 8. Кейин қаттиқроқ пайраҳа ёна бошлиди. Бора-бора печка гувиллаб кетди. (*Ў. Ҳ.*) 9. ...Ним қоронғи уйда қандни қисирлатиб тез-тез чайнайман. (*О.*) 10. Офтоб қаршидаги тогларнинг ортига ўтиб, уларни кўкиш нур пардаси билан чулғаб олган эди. 11. Хонага кирдик. Қўримсизгина, мурғаккина хотин экан Қатяниң онаси. (*Сайёр.*) 12. Анову, шундоққина қишлоқ устига соя ташлаб турган баланд тоғ ёнбағридаги ялангликка қип-қизил мато ёзиб қўйилгандай. (*C. Н.*)

СИФАТЛАРНИНГ ҚҮЛЛАНИШ ХУСУСИЯТИ

100- §. Сифатлар предметнинг турли хусусиятларини очиб бериши ва баҳолашинга кўра бадиий тасвирда кенг қўлланади. Предмет белгисини англатиши жиҳатидан гапда кўпинча аниқловчи бўлиб келади. Аниқловчи вазифасидаги сифат маъно кўламига кўра икки хил бўлади:

а) Мантиқий талаб билан қўлланувчи сифат отдан англашилган маънони аниқлаштириш, торайтириш, ажратишга хизмат қилади ва нейтрал услугга хос бўлади: *Тошкент — катта шаҳар; олма* (умуман олма) — қизил олма (олманинг бир тури).

б) Тасвир талаби билан қўлланувчи сифат маъно ҳажмига таъсир этмайди, фақат тасвирлаш, баҳолаш, таъкидлаш каби қўшимча маъноларни ифодалашга хизмат қилади ва бадиий услугга хос бўлади: *Дала оппоқ қорга бурканди* (қорнинг рангига кўра тури йўқ; қор ҳам, оппоқ қор ҳам маъно ҳажмига кўра бир хил). Бу вазифадаги сифатлар поэтик восита сифатида муҳим аҳамиятга эга бўлиб, бадиий тилда сифатлаш ва эпитетларни ҳосил қилишда фаол қўлланади: *тиниқ осмон, ёргу кун, қора кун, қора хат, қизил аскар* каби;

Тонг яқин, тонг яқин, оппоқ тонг яқин,
Бир нафас ором ол, ухла, жигарим. (*F. F.*)

Озайтирма ва кучайтирма сифатлар (оқиши, каттагина, жуда нафис), бош қисми такрорланган сифатлар (кўм-кўйк, қон-қора, кан-катта), кўчма маъноли сифатлар (тулки одам, анор юз, тош юрак) асосан турли услубий мақсадларда қўлланади.

Нутқ жараёнда сифатларнинг от ўрнида қўллани-

ши — отга кўчиши, отлашуви ҳам кенг тарқалган. Бу, айниқса, мақолларда кўп учрайди: *Яхши топиб гапирав, ёмон қониб. Ёши мөхнат, қарини овқат асрайди.*

135- машқ. Ўзингиз сифатлар иштирок этган ўнта мақол топиб ёзинг. Сифатларнинг маъно ва тузилишига кўра таҳлил қилинг.

136- машқ. Гапларни ўқиб, сифатларнинг маъно хусусиятларини аниқланг, кўпроқ қайси вазифада қўлланганини изоҳланг. Сифатларнинг ёзилишига аҳамият беринг.

1. Серзавқ нарсаларни эсалагандан яхши нарса борми? (Ш.) 2. Элмурод ботинкасини ечиб, оёғи остига қарди — қип-қизил, зирқиллайди. (Ш.) 3. Маҳкам ака йигитга аниқ бир гап айтмай, жойига бориб ўтирди. (Р. Ф.) 4. Ботирнинг юраги қафасдан чиқиб кетгудай тез-тез дукилларди. (Р. Ф.) 5. Юқорида ўнг юзида да-нақдай холи бор ўрта яшар бир киши қаҳрабо сопли пичноқ билан қази тўғраяпти. (С. Аҳм.) 6. Аммо ота залварли таёнини қорга ниқтаб босиб бардам қадам ташларди. (С. Аҳ.) 7. Эй, қаҳрамон, довюрак, жасур улуғ халқ, Қудратингдан йўқ бўлди хўрлик, асорат. (Гайратий.) 8. Кийими қўпол, лекин янги ва пухта эди. 9. Кийик энди биринчи марта товуш чиқарди. Паст, нафиес ва умидсиз овоз билан қисқагина маъради. (П. Қ.) 10. Қип-қизил чинни тарвуз булоқ сувидек муздек ва ширин эди. (Ў. Ум.)

137- машқ. Сифатларни аниқлаб, қўлланиш вазифаси ва услубий хусусиятларини изоҳланг.

ЭЗГУЛИК ҚУЙЧИЛАРИ

Баъзан шундай ҳолатлар, дақиқалар бўладики, уларни сўз билан таърифлашга инсон заковати ожизлик қилиб қолади. Ана шундай пайтларда инсонга тасвирий санъат ёрдамга келади. Мусавирининг сеҳрли мўйқалаами ранг-баранг бўёқлар ёрдамида ҳайратомуз мўъжизалар яратади. Муҳими шундаки, бу мўъжизалар ҳеч қандай изоҳга, таржимонга муҳтож бўлмайди. Тасвирий санъат асари қайси даврда, ким томонидан, қай услубда яратилмасин, барибир, у барча миллат ва элат вакиллари учун бирдек тушунарлидир. Бу санъат турининг ҳақиқий мўъжизакор қудрати, сирли таъсир кучи ҳам мана шунда.

Ҳар бир сурат, ҳар бир ҳайкалнинг ўз яратилиш тарихи, қизиқарли тақдирни бор. Тасвир ҳам барча санъат асарлари каби давр элчисидир. У яралган давридан бизга унсиз ҳикоя қилиб беради. Шу маънода бугунги ўзбек

рассомлари чизаётган ҳар бир асар келажак учун ўл-камиз тарихидан, меҳнаткаш, самимий кишиларимиз ҳаётидан ҳаққоний ҳикоя қилса ажаб эмас.

Одатда, шундай бир вақт келадики, инсон қайси соҳада меҳнат қилишидан қатъи назар, босиб ўтган йўлига назар ташлаб, ўз ишларини сарҳисоб қиласди. Шу жумладан, ижодкорлар — тасвирий санъат усталари ҳам вақти-вақти билан ижодий фаолиятларидан ўзларига ва халқимизга сарҳисоб бериб турадилар. Мана бугун шундай вақт келди. Аввало, йилнинг бошида ҳар бир мўй-қалам соҳиби, санъат муҳлисларини қандай ишлари билан хушнуд этдилар-у, қайси муҳим воқеалар, эътиборларидан четда қолганлигини назардан ўтказмоқдалар. Келинг, биз ҳам ана шу ўтилган йўлда мусаввирлар билан биргаликда бир лаҳзагина ҳамроҳ бўлайлик.

Бир оз камтарлик бўлса-да, айтиш керакки, салмоқли муваффақиятлар қўлга киритилди. Узоққа бормай, Баҳодир Жалоловнинг 1984 йил Давлат мукофотига сазовор бўлган «Ҳосил ўрими» ва «Рақснинг туғилиши» композицияларини олайлик. Айниқса, «Баҳор» концерт залига ишланган «Рақснинг туғилиши» асари ажиб нафосати, юксак бадиияти билан ажralиб туради. Халқимизнинг севимли санъаткори, ўзбек рақс санъатида бетакрор мактаб яратишга муваффақ бўлган раққоса Мукаррама Турғунбоева санъатининг туғилиши, шаклланиши, камол топишини ўзида мужассам этган бу полотнони ўзбек рақсига қўйилган ҳайкал дейиш мумкин.

Рассомларимиз аёл назокатини, латофати, меҳнатини шарафловчи кўплаб асарлар яратдилар. Чингиз Аҳмадовнинг озод Шарқ аёлига багишлиланган «Ёруғлик сари», Гули Абдураҳмонованинг «Қорақалпоқ қизи», «Жангчи қизлар ҳақида афсона» каби асарлари шулар жумласидандир. Шунингдек, Нина Ковинанинг «Колхоз бригадири Ўлмас Анорбоева портрети», «Янгийўллик колхозчи аёллар», Носир Қўчқоровнинг «Курувчи Вера портрети», Илья Рубиннинг «Портрет», Роберт Авакяннинг «Камон тортувчи қиз», Валентин Клеванцевнинг «Ойгул портрети», Жўлдособек Қуттимуротовнинг «Келинчак», «Гулойим», Дамир Рўзибоевнинг «Пахта терувчи қиз» ва бошқа кўплаб асарлари ўзбек аёлининг бугунги қиёфасини ўзида ҳаққоний акс эттирганлиги билан муҳлислар диққатини тортади.

(«Саодат» ж. дан.)

СОН

101- §. Бир хилдаги предметларнинг сон-саноғини, тартибини билдириб, неча?, нечанди?, нечта?, қанча? каби сўроқлардан бирига жавоб бўладиган мустақил сўзлар сон туркумини ташкил этади: ўнта китоб, беш баҳо, биринчи курс, олтинчи бригада каби. Сон, одатга, отга боғланганда унинг миқдорини, боғланмаганда, эса уч, тўққиз каби мавҳум тушунчани ифодалайди. Сонларнинг саноқ ва тартиб сон каби турларга бўлиниши уни бошқа сўз туркумларидан ажратиб турувчи морфологик белгисидир.

Сон бошқа сўз туркумлари, хусусан, от, сифат, феълларга қараганда ўзбек тили луғат составида нисбатан озчиликни ташкил этади. Кўп ишлатиладиган туб сонлар 22 та: бир, икки, уч, тўрт, беш, олти, етти, саккиз, ўн, ийгирма, ўттиз, қирқ, эллик, олтмииш, етмииш, саксон, тўқсон, юз, минг, миллион, миллиард.

Сон ҳарф билан (бир, ўн, юз) ҳам, рақам билан (1, 10, 100, V, X, XXIV) ҳам ифодаланади.

Ўзбек тилида араб (5, 30, 47, 90) ва рим рақамлари (V, XI, XII, XX) ишлатилади.

138- машқ. 5, 10, 7 араб рақамлари ва II, V, XX рим рақамлари иштирокида гап тузинг. Уларнинг қайси сўз туркуми билан боғланганлигини айтинг.

102- §. Сонларнинг тузилишига кўра турлари. Сонлар тузилишига кўра содда, қўшма ва жуфт бўлади.

Содда сон бир негиздан тузилиб, туб (беш, ўн, юз) ва ясама (бешта, бешинчи, ўнлаб) бўлади.

Қўшма сон икки ва ундан ортиқ сон ўзагидан тузилади: ўн бир, ўн бир ярим, бир юз ийгирма, бир минг тўққиз юз олтмииш тўққиз каби.

Жуфт сон иккита ҳар хил сон ўзагининг кетма-кет келишидан ёки бир хил сон ўзагининг такрорланишидан тузилади: бешта-ўнта, уч-тўрт, беш-ўн, тўрт-тўртта.

139- машқ. Гапларни кўчиринг. Сонларни топиб, тузилишига кўра таҳлия қилинг.

1. Биз ҳам чамамда ўн беш киши эдик. (Ш.) 2. Кўксуғур ва бир жуфт жайроннинг ўқдай учиб ўтгани кўзга ташланди. (Ж. Абд.) 3. Қампир қуришган бармоқлари билан тиззаларини бир-икки қаттиқ-қаттиқ уқалаб олгач, ... ўрнидан қўзғалди. (О). 4. Миршаблар орасида учта ёш бола ёриб ўтиб, мингбошининг кимхоб тўнига,

оёғига осилди. (*M. Исм.*) 5. Бу воқеа минг тўққиз юз ўн еттинчи йилнинг апрель ойида бўлган эди. (*К. Икромов.*) 6. Қирқ иккинчи йилнинг августи эди ўшанда. (*Ў. У.*) 7. Қўёш энди икки терак бўйи кўтарилиган эди. (*Ў. У.*) 8. Одатда шу куни биз уч киши: дадам, ойим ва мен бўлардик. (*К. Икромов.*) 9. Нотаниш одамлар бирбирига ўхшайди. (*Э. А.*)

103- §. Соннинг турлари. Сонлар маъно ва грамматик хусусиятларига кўра икки катта гуруҳга бўлинади: саноқ сонлар ва тартиб сонлар.

Саноқ сонлар беш турли бўлади: **миқдор сон, дона сон, чама сон, жамловчи сон, тақсим сон.**

Бир, ўн, йигирма, ўттиз, саккиз каби қўшимчалариз қўлланган сонлар миқдор сон ҳисобланади.

Дона сонлар миқдор сонга -та қўшимчасини қўшиш билан ҳосил қилинади; *еттита, юзта, мингта* каби.

Ҳнатача, юзатача, минглаб, мингларча, бир-икки, беш-ўн каби сонлар чама сонлардир. Чама сонлар -тача, -ларча, -лаб қўшимчаси орқали ёки икки соннинг жуфтлашишидан ҳосил қилинади.

Олтов, икков, бешов, учов, иккала, бешовлон каби сонлар **жамловчи сонлар** бўлиб, улар миқдор сонга **-ов, -ала, овлон** қўшимчаларини қўшиш билан ҳосил бўлади.

Тақсим сонлар -тадан, -дан қўшимчалар ёрдамида ёки икки соннинг жуфтлашиши ва тақрорланишидан ясалади. Бунда жуфтлашиб ёки тақрорланиб келаётган сонларнинг иккинчи қисми -дан қўшимчасини олади: *ўнтадан, учтадан, ўнта-ўнтадан, тўртта-тўрттадан*.

104- §. Тартиб сон. Бир хил предметларнинг, нарса-ҳодисаларнинг тартибини билдиради ва **-инчи (-инчи)** қўшимчаси орқали ҳосил қилинади: *учинчи курс, тўртинчи босқич, биринчи қатор, бирғинчи чопиқ.*

140- машқ. Гапларни кўчиринг. Сонларни топиб, уларнинг тузилишига ва маъносига кўра турини айтинг.

1. Куннинг иккинчи ярмида оқ халат кийиб Ширмон-хон кириб келди (*Мирм.*) 2. Тўртовлон жарликка қараб кетдилар. (*Ш.*) 3. Сариқ чигиртка—офатни йўқотиш учун юзларча қишлоқ аҳли оёққа турди. (*Ас. М.*) 4. Уларнинг бирин олтмиш ёшларда, иккинчиси элликларда эди. (*И. Раҳим.*) 5. Ўттизинчи йили Мусоғирободда колхоз тузилди. (*Ҳ. Ф.*) 6. Еттинчи синфни аъло битириб, шаҳодатнома олганда, зиёфат қилиб бердим. (*Ў. У.*) 7. Шаҳар соати янги кун—Мансурнинг ҳисобича олтмиш

иқкінчи күн бошланғаннан дарап беріб, занг чалди. (*Соҳиб Жамол.*) 8. Каттагина тошбақа қандайдыр ўсим-лик шохларига бўй чўзиб, майда баргларни битта-битталаб юлиб ейди. (*Ж. Абд.*)

141- машқ. Гапларни ўқинг. Саноқ сонларни топиб, маъно хусусиятларини изоҳланг. Қўшимчаларини таърифланг.

1. Ёши қирқлардан сал ошган, чанг босган пальто ва катак чоловор кийган барин уйга кириб келди. (*И. С. Тургенев.*) 2. Мен бу улуғ даргоҳга юз мартача келгим бор. (*F. F.*) 3. Бошимни кўтариб қарасам, садақайрағоч атрофида ғуж-ғуж чумчук. Бири учади, бири қўнади. Вой, инларнинг кўплигини! Биттаси жудаям пастда экан. (*Ў. Ҳ.*) 4. 10- синфни 30 ўқувчи битирдик. Шулардан йигирма беш киши колхозда қолиб ишлашга аҳд қилишди. 5. Навоий азамат ҳамлалар билан ҳаммаси бўлиб икки-уч йил ичиди бу беш тоғнинг чўққисига етди. (*O.*) 6. Унақа оғайни мингтадан битта. (*А. Қ.*) 7. Иккави шаҳарга бориб, ҳақиқатан кутубхонадан Зуҳранинг адресини топди. (*А. Қ.*) 8. Иккаласи уй билан ошхонани йиғишилди, тозалади. (*А. Қ.*)

105- §. Сонларнинг ёзилиши. Сонлар рақам ва сўз билан ёзилади. Ҳозирги ўзбек ёзувида икки хил рақамдан — араб ва рим рақамларидан фойдаланилади.

1. Араб рақамлари математик ҳисоблаш учун ва вақт (соат, йилни) ни кўрсатишда ишлатилади: *5—3-2, соат 10, 5 ноябрь, 22 апрель, 1952 йил, 1990 йил.*

2. Рим рақамлари аср ва ойни, мактабда қўлланадиган чораклар сонини ёки тартибини, кенгаш, анжуман, йиғилиш санасини кўрсатишда ишлатилади: *XX аср, X синф, II курс* (булар араб рақамида ҳам ифодаланаверади), *III қурултой*.

Араб рақами билан ифодаланган тартиб сондан сўнг -нчи (-инчи) ёзилмайди, унинг ўрнига чизиқча (-) қўйилади: *10- синф, 2- смена, 5- курс, 14- мактаб.*

Тартиб сон рим рақами билан ифодаланганда, сонлардан сўнг -нчи (-инчи) қўшимчаси ҳам ёзилмайди, чизиқча ҳам қўйилмайди: *X синф, II смена, XIX аср, III чорак.*

Тартиб сон число, ой ва йилларни кўрсатганда (улар қандай рақам билан ифодаланганидан қатъи назар) ҳам дефис қўйилмайди: *21 сентябрь, 1987 или, 5. IX. 1980 йил.*

Ўзбек тилида қўшма сонларнинг, каср сонларнинг

қисмлари ажратиб ёзилади: *ўн етти, йигирма беш минг тўққиз юз етмиш учинчи, ўндан бир, бешдан уч.* Қўшма сон ҳосил қилувчи қўшимчалар, одатда, қўшма сонларнинг охирғи қисмига қўшилади: *йигирма бештacha, йигирма бешинчи.*

Охири и унлиси билан тугаган саноқ сонларга -ов қўшимчаси қўшилганда, и тушиб қолади ва шундай ёзилади: *олти — олтов, етти — еттов.*

Жуфт сонлар чизиқча билан ёзилади: *учта-тўртta, беш-ўнтача, тўрт-беш, йигирма-ўттиз.*

Саноқ сон турларини ҳосил қилувчи қўшимчалар баъзан жуфт соннинг ҳар иккала қисмига, баъзан иккичи қисмигагина қўшилади: *уч-тўртta, бешта-ўнта, бешта-бешталаб* каби. Жуфт сонлар аксарият ўринларда тартиб сон аффикси **-инчини** қабул қилмайди.

Тартиб сон ҳарф билан ифодаланганда, миқдор сонга унлидан сўнг **-нчи**, ундошдан сўнг **-инчи** қўшимчаси қўшилади ва шундай ёзилади: *ўнинчи синф, иккичи смена, еттинчи қават, ўн учинчи хона.*

142- машқ. Қуйидаги сонларни сўз билан ёзинг. Шу сонларга сон ясовчи қўшимчалар қўшиб, саноқ сон турларини ясанг ва турини айтинг.

2, 3, 4, 5, 6, 25, 30, 31, 173, 379, 399, 1973, 119999, 1119305.

143- машқ. Гапларни кўчиринг. Сонларни маъноси, ясалиши, тузилишига кўра таҳлил иилинг.

1. Орадан ўн дақиқа ўтар-ўтмас, икковлон дастурхон устида ўтиради. (*Ж. А.*) 2. Куилардан бир кун Машриқий эшигини икки одам тақиллатди. (*Мирм.*) 3. Қосим, қочишнинг иложи бўлганда албатта иккаламиз қочардик, дегандек хўрсиниб қўйди. (*К. Икромов.*) 4. Энди ўзи тўққизинчни битирди. (*О. Е.*) 5. Қизиқ: қизларнинг тўртлови ҳам эгниларида атлас кўйлак, бошларида чуст дўппи, гўё даштга эмас, тўйга келгандай ясаниб олишган. (*О. Е.*) 6. Икковга бирор ботолмас, отлиққа яёв етолмас. (*Мақол.*) 7. Деворда иккита сурат бор. Иккаласи ҳам сарғайиб кетган. Биттаси Ҳусан бувамники. (*Ў. Ҳ.*) 8. Яккачинор — икки тоғ оралиғида қисилиб ётган кичкина қишлоқ. (*Ў. Ү.*) 9. Үқтин-ўқтин шу маконда дилим сиёҳ бўлиб кетади-ю, битта-яримта чапани улфатларим олдига бориб жиндай кўнгил очаман. (*О.*) 10. Бир марта гапдан гап чиқиб, «Мен ўз қишлоғимизни мингта шаҳарга ҳам алмашмайман, ўқишни битираман-

у, шу ерга — сенинг олдингга келаман», — деганини унутабиди-да энди. (С. Н.)

СОНЛАРНИНГ ҚҮЛЛАНИШ ХУСУСИЯТИ

106- §. Сонлар гапда отга боғланиб, унинг миқдорини аниқлашга хизмат қиласди. Шунга кўра аниқловчи вазифасида кенг қўлланади: *Туманимизда иккита музей бор*. Бунда сон (*иккита*) предмет (*музей*)нинг аниқ миқдорини кўрсатади.

Баъзан эса сонлар ноаниқлик маъносини ҳам билдиради. Масалан, *бир сони, бир-иккита, беш-олти* каби жуфт сонлар ноаниқликни ифодалашга хизмат қиласди: *Бир куни уни саҳнада кўриб қолдим. Ўзинг бир-иккита китоб ўқиганмисан?*

Соннинг турларини ясовчи қўшимчалар нутқ турларида қўлланishiга кўра фарқланади. Масалан, жамлаш маъносини ясовчи **-ов** қўшимчаси оғзаки нутқда, **-овлон, -ала** эса бадий нутқда ишлатилиади. **-ча** ва **-лаб** қўшимчалари ҳам услубий ўзига хослиги билан фарқланади.

Сонлар баъзан отлашиб, эгалик ва келишик қўшимчалари билан қўлланади: *Иккovi йўлга чиқди. «Қаерда кўришамиз»— сўради бири иккинчисидан.*

Нутқ талабига қараб сонлар предметнинг турли хусусиятларига кўра ўлчовини кўрсатувчи ҳисоб сўзлари (нумеративлар) билан бирга қўлланади. Ҳисоб сўзларини ишлатилиш доираси ва услубий хусусиятларига кўра фарқлаб қўллаш лозим: *томчи* — қатра, *бўлак* — бурда, *минут* — дақиқа — сония каби. Масалан: *Бир томчи сув ўйқ — Бир қатра сув ўйқ.*

144- машқ. Ўзингиз мустақил *бешов, етти, XX, ўнта-ўнта, бир* сонлари иштирокида гаплар тузинг. Сонларнинг қайси сўзларга боғланганини, гапдаги вазифасини тушунтиринг.

145- машқ. Гапларни кўчиринг. Сонларнинг қайси сўзга боғланниб келганини ва маъно хусусиятларини изоҳланг.

1. Бирни бирор беради, кўпни меҳнат. (*Мақол.*) 2. Бирининг юзи ярмини сичқон кемирган, бирининг юзи тагчармга ёпишиб кетган. (*O.*) 3. Талabalаримиз шаҳардаги йигирма тўртинчи мактабга педпрактикага чиқишиди. 4. Дунё можаросидан қўл ювмоқчи бўлган бир отага кексайган кунларида фарзанд доғини кўрмасликнинг ўзи ҳам улуғ мукофотдир. (*A. Қод.*) 5. Минг марта узр... зарур иш чиқиб қолди. (*Яшин.*) 6. Уламолар эса, гўё уч

кундан бери туз тотмагандай, лазиз овқатларга чигирткадай ёпирилиб, ура бошладилар. (О.) 7. 1264 ҳижрия январь ойининг ўн еттинчиси, қишки кунларнинг бири, қуёш ботган, теваракдан шом азони эши биладир... (А. Қод.) 8. Буларнинг ҳаммасини анча вақтдан кейин, яна бир бор «Тўрт юзинчи» хонага келганимда тушундим. (Ю. Фучик.) 9. Ҳақиқатан ҳам еттинчи ноябрь куни эрталаб Мухин уларни олиб кетгани келди. Бу дафтарда юз минг камбағални юз минг бойга айлантира олуви хазиналар кўрсатилган (К. Икромов.)

ОЛМОШ

107- §. От, сифат ва сон ўрнида қўлланиладиган сўзлар олмош ҳисобланади. Олмошлар предметни, белги ёки миқдорни билдирамай, фақат уларни кўрсатади, шулар ҳақидаги сўроқни ифодалайди: *Ўкта дўстлари ичидага ажralиб туради*. *Шунинг учун уни ҳамма ҳурмат қиласади*. 2. *Рустамжон II курсда ўқийди*. Солижон ҳам шу курсда ўқийди. 3. *Шаҳарда кейинги йилларда кўп муҳташам бинолар қурилди*. Бу бинолар шаҳримизнинг ҳуснига ҳусн қўшилоқда. Биринчи мисолда от (*Ўкта*) ўрнида уни, иккинчи мисолда сон (*II*) ўрнида шу, учинчи мисолда сифат (*муҳташам*) ўрнида бу олмоши қўлланган.

Олмошларнинг кишилик, кўрсатиш, сўроқ, белгилаш, ўзлик, бўлишсизлик, гумон олмошлари каби турларга бўлинниши унинг ўзига хос морфологик хусусиятидир.

Олмошлар от ўрнида қўлланганда улар каби олтига келишик формасида кела олади. Сўроқ, белгилаш, ўзлик, бўлишсизлик, гумон олмошлари келишиклар билан турланганда, ўзакда ўзариш юз бермайди. Лекин мен, сен кишилик олмошлари қаратқич ва тушум келишик қўшимчаларини қабул қиласади, одатда битта и тушиб қолади: *мен+ни* — *мени*, *мен+нинг* — *менинг* каби; *y*, *бу*, *шу*, ўша каби кўрсатиш олмошлари жўналиш, ўринпайт, чиқиш келишиги қўшимчаларини олганда, аксинча, бир и товуши ортирилади: *y+га* — *унга*, *бу+да* — *бунда*, *шу+дан* — *шундан*, *ӯша+га* — *ӯшанга* каби.

108- §. Олмошларнинг турлари. Олмошлар маъно ва грамматик хусусиятларига кўра етти хил: 1) кишилик олмошлари; 2) кўрсатиш олмоши; 3) сўроқ олмоши; 4) белгилаш олмоши; 5) ўзлик олмоши; 6) бўлишсизлик олмоши; 7) гумон олмоши.

109- §. Кишилик олмошлари нутқдаги уч шахс ёки предметни кўрсатиб, бирлик ва қўплиқда қўлланади:

Шахс	Бирлик	Кўплиқ
I ш.	мен	биз
II и.	сен	сиз
III ш.	у	улар

Кишилик олмошлари доимо эгалик қўшимчаларисиз қўлланади.

Кишилик олмошлари ҳурмат ва камтарлик, манманлик каби маъноларни ҳам ифодалайди. *Биз* олмоши *мен* ўрнида турли услубларда ҳар хил мақсадда ишлатилади. *Биз* олмоши илмий услугуда камтарлик маъносида, сўзлашув услугуда эса фахрланиш, манманлик маъноларни ифодалайди. Масалан, сўзловчи *менинг фикримча* дейиш ўрнига *бизнинг фикримизча*, *бу шини мен бажардим* дейиш ўрнига *биз бажардик* деб мақтаниши ёки камтарлик қилиши мумкин. Оддий сўзлашувда *сен* олмоши ўзидан ёш жиҳатдан катталарга нисбатан ишлатилганда ҳурматсизлик, менсимаслик маъноларини билдиурса, поэтик тилда кўзда тутилган шахсга нисбатан ҳурматни ифодалаш учун қўлланади. Масалан:

Бари, бари сенга бўлсин,
Сенга бўлсин онажон.
Сенга бўлсин бор ҳаётим
Номим, шоним бир йўла.

(А. Орипов.)

146- машқ. Гапларни кўчиринг. Кишилик олмошларини топиб, маъносини тушунтиринг. Олмошларга қўшилган келишик қўшимчаларининг ёзилишини изоҳланг.

1. Сизга хат келганда, болам. (*C. Н.*) 2. Бундан чиқдики, мендан буткул кўнгил узмаган экан-да. (*A. К.*) 3. Ясовул уларни саф билан супа ёнига келтирди. (*M. Исм.*) 4. Унинг кўзларида жиддий ўй, лабларида маъноли ингичка табассум сезилар эди. 5. Давлатбековнинг кўнглидаги доимий бир чанқоқликнинг боиси шуки, у ўз мавқеини мумкин қадар баланд кўтаришни истайди. (*П. Т.*) 6. Шундан кейин Канизак Сиддиқжонни ўзига бир қадар яқин кўриб, унга суюниб қолди. (*A. К.*) 7. У мени кўрмас, айтидан, ўзи билан ўзи гаплашаётган бўл-

са керак. (*Сайёр.*) 8. Бундан кейин мени кўрганда, ўрнингдан турмасанг ҳам бўлаверади. (*О. Е.*) 9. Ахир биз гап буриб ўйнаш учун тўпланганимиз йўқ-ку. Акбаров қизишиди. (*П. Қ.*) 10. Қароматларникига кириб, ундан очиқ-ойдин сўраб билмоқчи бўлди. (*В. Фафуров.*)

147- машқ, Ўқинг. Қишилик олмошлари иштирок этган гапларни кўчиринг. Қишилик олмошлари ўрнида шахс ёки предмет номларини ишлатиб, маъно фарқларини тушунтиринг.

1. У мактабга кириб кетар экан, кечаси чала қолган китобини ўқир эди (*Ш.*) 2. Онам учун бениҳоя оғир бўлган ўша кунларда мен қўлимдан келганча унга ёрдам қилардим. (*Н. С.*) 3. Ҳеч кимга, ҳеч бир зотга қалбида нималар кечётганини билдирамасди. (*Ч. Айт.*) 4. Хўп, дедиг-у, қайтдик, тағин пайсалга солдинг. Мана оқибат. (*Ж. Абд.*) 5. Бизницидир бутун муҳаббат, Биз ўзимиз унинг куйчиси. (*Ҳ. О.*) 6. Ишни ўзимиз бошладикми, энди охирига ҳам ўзимиз етказамиш. (*М. Исм.*) 7. Э-ҳа, қанча-қанча воқеалар бошимиздан ўтди. Сенлар ёлғиз бир учинигина биласанлар. (*О.*) 8. Мен ўзбек шоириман, ўз халқимнинг тилиман. (*F. F.*) 9. Ўзим чақимчиларни, майда гапларни ёмон кўраман. (*Ш.*)

110- §. Кўрсатиш олмошлари предмет ёки шахсни кўрсатиш учун ишлатилади. Буларга *бу, шу, у, ўша, ана у, мана бу* (ул, бул, шул, ўшал) каби олмошлар киради. Кўрсатиш олмошлари маъноси, қўлланиш хусусиятига кўра бир-биридан маълум даражада фарқ қиласди. Чунончи, *бу* олмоши сўзловчига энг яқин предметни кўрсатса, *ўша* олмоши сўзловчига нисбатан узокроқ бўлган предметни кўрсатиш ёки бирор нарса, воқеани эслатиш учун ишлатилади: *Ёдгор Чарос бу гапни унинг ғашига тегиши учун атайлаб айтганини тушунди.* (*У. Ҳ.*) *Ўша гул пайванд қилинган теракни уч марта кинога олишиди.* (*С. Аҳм.*)

У олмоши эса, сўзловчи кўзи олдида бўлмаган предметни эслатиш, унга илова қилиш учун ишлатилади: **У кишидан ажралма; У яхши одам каби.**

Шу, ўша олмошлари *бу, у* олмошларидан нарса ва ҳодисаларни ажратиб, чегаралаб, кучли даражада таъкидлаб кўрсатишига кўра фарқланади: *Менга шу китобни беринг. Фақат ўша ерга борамиз, у жой бўлмайди.*

Ул, бул, шул, ўшал олмошлари эса тарихий асарларда ва поэтик нутқда қўлланади:

Дунёдаги барча илм
Шул бешовда мужассам.

(*A. Орипов*)

Кўрсатиш олмошларига қўшимчалар қўйидаги тартибда қўшилади: олдин кўплик, сўнг эгалик, кейин келишик қўшимчалари: *шуларингни, ўшаларингда*.

148- машқ. Гапларни кўчиринг. Кишилик ва кўрсатиш олмошларини топиб, маъноларини тушунтиринг. Улардаги қўшимчаларнинг қўлланишини изоҳланг.

1. Бизга қалин дўст китоб, У гўё нурли офтоб. (*И. Мұслим.*) 2. Қандайдир устига оч кул ранг паҳталик камзул кийган ўта новча киши танишдек туюлди унга. (*Б. В.*) 3. Уни маҳалланинг биноларидан ажратиб турадиган ери ҳам мана шу. (*Ас. М.*) 4. Ўша оғир йилларда Бўтабек тузган мана шу колхозда звено бошлиғи бўлиб ишлаган. (*М. Мұхаммедов.*) 5. Ҳайдарали бу жойни эшитган-у, бормаган, у ёққа боришнинг ҳожати ҳам йўқ. (*Ў. Ў.*) 6. Шунга кўра Сиддиқжон бу гапларни куйиб-пишиб гапирди. (*А. Қ.*) 7. Бу беозор уй ҳайвони энди ёввойи тоғ эчкисига айланиб кетиши мумкин, бундай ҳодисалар тоғда бўлиб туради. (*П. Қ.*) 8. Сиз ана шу жаннатни дунёга келтирган одамлар соғлигининг посбонисиз. (*М. Мұхаммедов.*) 9. Ўз номига мос келадиган бу баҳайбат дара Холбекка доим сирли ва хатарли кўринарди. (*П. Қ.*) 10. Шунинг учун ҳам у қишлоққа келиб топган омадини мана шу сўқмоқларда қўлга киритдим, деб биларди. (*М. Мұхаммедов.*) 11. Мана, Ризамат боплади: бригадасида шуни жорий қилдй. Ҳамманинг жони кирди. (*М. Мұхаммедов.*) 12. У аллақандай гиламлар ҳақида сўзларди. (*Э. А.*)

149- машқ. Ўзингиз кўрсатиш олмошларини келишиклар билан турлаб, улар иштирокида гап тузинг. Олмошлар негизида юз берган ўзгаришларни тушунтиринг.

111- §. Сўроқ олмошлари предмет, шахс, белги, миқдор ҳақидаги сўроқни билдиради. Бошқача қилиб айтганда, сўроқ олмошлари отларга, сифат ва равишларга, шунингдек миқдор билдирувчи сўзлар — сонларга нисбатан сўроқни ифодалайди: *ким, нима* отга; *қайси, қандай* сифат ва равишга; *қанча, нечанчи* каби сўроқ олмошлари сонга нисбатан қўлланади.

Нутқда сўроқ олмошлари контекст талабига қўра бири иккинчиси ўрнида ишлатилиши мумкин. Масалан, сўзлашув нутқида *ким* олмоши ўрнида *нима* қўлланади. *Бу киши сизга ким бўлади?*—*Бу киши сизга нима бўлади?* Аммо адабий тилда бу ҳолат хато ҳисобланади.

Бадиий асар тилида *німа* олмошининг *не, на, нечун, нечук* формалари кенг қўлланади: *Пайванд билан на дахли бор бу ишининг?* (Ҳ. О.) Қалай, қай олмошлари ҳам сўзлашув ва поэтик нутққа хосдир:

Йироқ авлодларга бизлардан аммо
Қай бир хислатимиз қоларкан, ажаб? (А. О.)

Неча ва қанча олмошлари ҳам ишлатилишига кўра фарқланади. *Неча* олмоши аниқ миқдорни билдириб, нумеративлар билан бирга қўллансанса, қанча умумий миқдорни ифодалаб, нумеративсиз қўлланади: *Неча кило оласиз?— Қанча оласиз?*

150- машқ. Гапларни кўчиринг. Сўроқ, кўрсатиш олмошларини топиб, уларнинг қайси сўз туркуми ўрнида келганлигини, қайси сўз билан боғланганини тушунтиринг.

1. Бир куни кечаси ҳатто шундай ҳодисалар ҳам со-дир бўлди: ҳовлида кимдир юргандек бўлиб туюлаверди. (Ж. Абд.) 2.— Кимнинг юраги билан?— деди ҳалиги товуш кулиб. (Ш.) 3. Ким иккинчи таклифни ёқласа, қўлини кўтарсан (М. Қориев.) 4. Хаёлида ҳамон ўша қўшиқнинг тўлқинлантирувчи оҳанги таралиб, қалби зир титрар, ҳар тарафга талпинар, кимгадир интилар эди. (С. Кароматов.) 5. У терлаб кетган, аммо негадир туришга қўрқар, аъзои бадани караҳт бўлиб қолганга ўхшар эди. (Ў. Ҳ.) 6. У бу иш Олахўжанинг фикри билан бўлганини англайди. Олахўжа унинг эшигига ёрдам сўраб келадиган бир аҳволга солиб қўймоқчи экан. Абдурасул яна қайтиб унинг қўлига тушмайди. (П. Т.) 7. Қаёққа қарасанг камбағал, бекорчи, нонга зор одамларни кўрасан. (О.) 8. Қаердаки, интизом маҳкам, у ерда иш йирик. Қаердаки, интизом бузилди, у ерда иш расво. (У.) 9. Нега бундай хурсандчиликдан воз кечиб ўзимни кўчага, тим қоронғулик оғушига отдим. (Ҳ. Ф.)

151- машқ. Қанча, неча, қанақа, ким, німа сўроқ олмошларини келишик ва эгалик қўшимчалари билан турлаб, бир нечта гап тузинг. Маъносини, гапдаги вазифасини тушунтиринг.

112- §. **Белгилаш олмошлари** предметларни ёки унинг белгисини жамлаб, яккалаб, ажратиб кўрсатиш учун ишлатилади. Маъно хусусиятига кўра икки гуруҳга бўлинади: бир гуруҳи (*ҳар ким, ҳар німа, баъзи, ҳар қандай, ҳар қайси*) шахс, нарса ва белгини ажратиб кўрсатса, иккинчи гуруҳи (*ҳамма, барча, бари, бутун*) эса жамлаш ва умумлаштиришга хизмат қиласади.

Иккинчи гуруҳдаги белгилаш олмошлари нутқ услубларида қўлланиши ва маъно нозикликларига кўра фарқ қиласди. Масалан, *барча* олмоши кўпроқ ёзма нутқда қўлланади. Унда умумлаштириб белгилаш маъноси *ҳамма* олмошига нисбатан кучли: *Ходимларнинг барчаси тўплансин*. Ёки *бари, жами* олмошлари оғзаки нутққа хослиги билан фарқланса бутун олмоши кўпроқ ёзма нутқда қўлланади, унда нарсанинг яхлитлигини белгилаш кучлироқ: *Бутун замин ларзага келди*.

152- машқ. Гапларни кўчириб, белгилаш олмошларининг тагига чизинг, уларнинг маъносини ва турланишини изоҳланг.

Ҳамма ҳам бориши мумкин. (Э. А.) 2. Ҳеч ким атрофга қарамайди. (К. И.) 3. Дил қўшигини ҳамма—шоҳ ҳам, гадо ҳам баробар тинглайди. (М. Қориев.) 4. Ҳа, баъзи бир одамлар Олимжонни мулойим дейишади, аммо ўз ишига пишиқ; қаттиққўл... (М. Мухаммедов.) 5. Ҳар нима бўлганда ҳам, сув даставвал халқа керак. (М. Исм.) 6. Бўзчилик бу ердагиларнинг қариб ҳаммасига ота касб. (Ас. М.) 7. Эшикни очсан ҳамма болалар бир бўлиб чой ичиб ўтиришибди. (Сайёр.) 8. Ҳар ким ҳам ўз томига ёқсан қорни ўзи курайди. (Сайёр.) 9. Гўё унинг бутун юзини оғиз қоплади. (О.) 10. Үлимнинг тўсатдан бўлиши ҳаммага ёмон таъсир қилди. (М. Г.) 11. Мардонқуловнинг ҳар қандай одамни лол қолдирадиган зеҳни бор эди. (Э. А.)

153- машқ. *Жами, барча, бари, баъзи, ҳар ким, ҳар нима* каби белгилаш олмошларига эгалик ва келишик қўшимчаларини қўшиб, улар иштирокида бир неча гап тузинг.

113- §. Шахс ёки предметни аниқлаб, яккалаб кўрсатиш учун ишлатиладиган ўз (*ўзи*) сўзи ўзлик олмоши ҳисобланади.

Ўзлик олмоши кўплика (кўплика, асосан кесатиқ ёки пичинг маъносини ифодалайди) қўлланганда ундан олдин ёки кейин албатта эгалик қўшимчаси қўшилади. Ўзлик олмошига қўшимчалар қуидаги тартибда қўшилади: кўплик + эгалик + келишик қўшимчаси: *ўзингларга, ўзларингни*.

154- машқ. Гапларни кўчиринг. Олмошларни топиб, турини айтинг. Ўзлик олмошларининг турланишини изоҳланг.

1. Палатада танҳо ўзим қолган эдим. (Х. Т.) 2. Ўзи қўйпол бўлгани билан ўғри мушукдай чақон. (Ж. Абд.) 3. Йўлакдан ғўнғир-ғўнғир товуш келди-ю, Ёдгор ўзини

ўнглаб олди. (Ү. X.) 4. У мени кўрмас, афтидан, ўзи билан ўзи гаплашаётган бўлса керак. (Сайёр.) 5. Одам кутилмаганда ўз она тилини эшитса, зориқиб кутган ажиб кўйни тинглаган одамдай яйрар экан-а. (Сайёр.) 6. Ҳожияхон ўз қизимдай бўлиб қолган. (Ас. М.) 7. Ўзга боғнинг олма-анорин тераман. («Сайёд ва Ҳамро».) 8. Мана шу Гаффор кўрбоши тўдасининг ўзи билан уч йил олишдик. (Н. С.) 9. Ўзим кўрган бўлсан кошки эди, таърифини эшитганман, холос. (М. Исм.) 10. Унинг истибоди ўзга шаҳарларда унча сезилмаса ҳам, аммо марказ — Қўқон одамларини жуда тўйдирди. (А. Қод.)

11. Иккови эмакдош қариндош, пайванд,
Бирининг — бириси ўзининг ўзидир.
Бел тутди ўғлонлар ким ўзмоқ учун. (Г. F.)

114- §. Бўлишсизлик олмошлари мавжуд бўлмаган предмет, белги, миқдорни умумлаштириб кўрсатади. Бўлишсизлик олмошларига ҳеч ким, ҳеч нима, ҳеч қандай, ҳеч қанча, ҳеч нарса, ҳеч бир каби олмошлар жиради. Бўлишсизлик олмошларига қўшимчалар қўйидаги тартибда қўшилади: кўплик+эгалик+келишик қўшимчалари: ҳеч нималарингни, ҳеч нарсаларингга.

155- машқ. Гапларни ўқинг. Бўлишсизлик олмошларини толиб, уларнинг маъносини, гапдаги вазифасини изоҳланг.

1. Шоматга эътибор қилишмади, ҳеч ким нега қайтганини ҳам суриштирмади. (Э. А.) 2. Маҳмуджон «ҳеч нарсаға тушунмаяпман, қизим аниқроқ айтсанг-чи», дегандай елкасини қисди. (Х. Т.) 3. Хатда бизлар ҳақимизда ҳеч нарса ёзмаяптими, ўғлим. 4. Палата эшиги аста очилди, лекин ундан ҳеч ким чиқмади. (Ойдин.) 5. Буни маҳаллада Карим отадан бошқа ҳеч ким билмай қолди. (А. Қ.) 6. Табиатнинг ҳеч кимга бўйсунмайдиган, бирордан рухсат ҳам сўраб ўтирамайдиган қонуллари бор. (Ү. X.) 7. Ҳеч қайси мамлакатда қурилиш суръати бизникига етмайди. (Ү. X.) 8. Қанақа ваъдани, мен ҳеч қанақа ваъда қилмадим, шекилли. (Сайёр.)

115- §. Гумон олмошлари нутқ жараённда мавжуд бўлган, аммо сўзловчи учун ноаниқ, номаълум нарса, шахс ёки белгини кўрсатади.

Гумон олмошларига -дир, алла-, -оқ, -он, -ор каби қўшимчалар қўшилиши орқали ясалган кимдир, нимадир, бирор, бирон, бирор, аллаким, алланарса, баъзи бир, қайси бир, бир нима каби олмошлар киради. Гумон олмошларига қўшимчалар қўйидаги тартибда қўшилади:

кўплик+келишиқ (*бировларни*) ёки эгалик+келишиқ (*аллакимингизни*).

Нутқда уларнинг бири ўрнида иккинчисини қўллаш мумкин, чунки бунда сўроқни билдирувчи қисм ўзгаришсиз қолиб, фақат уларга қўшиладиган элементларнинг ўрни алмашади: *аллаким//кимдир, аллақандай//қандайдир, нимадир//бир нима//алланима каби.*

156- машқ. Гапларни кўчиринг. Гумон олмошларини топиб, уларнинг ясалиши, маъноси ва ўзгаришини тушуниринг.

1. Кунлардан бирида Саври холани кимдир дарвоза олдига чақираётганини айтишди. (*И. Р.*) 2. Фарида кўча муёулишига етганда нимадир тарақлаб кетди. (*Рашод Нури.*) 3. Бола қандайдир мудҳиш ҳодиса содир бўлганини пайқади. (*Ч. А.*) 4. Кимдир Сиддиқжоннинг оиласига хабар бериб суюнчи олгани кетди. (*А. К.*) 5. Маҳалламизда бирор бўзчи, бирор маҳсидўз, бирор бақол. (*О.*) 6. Гўзал ўйлабди. Нималарнидир кўнглига тугибди. (*Сайёр.*) Шкафнинг орқасида алланарса шитирлагандай бўлди. Ташқаридан аллакимнинг овози эшитилди. 8. Мен сўзлашга тайёрланиб турдим, лекин нимагадир гапира олмадим. (*Ойдин.*) 9. Қандай билай, бирорнинг юрагини билиб бўладими? (*Ойдин.*) 10. Бу нимаси, чамадон кўтариб юриш шунчалик қийинми? (*Э. А.*)

55- топшириқ. -дир, алла-, -ов, -он, -ор қўшимчалари ёрдамида гумон олмошлари ясаб, улар иштирокида гап тузинг.

56- топшириқ. Олмошларнинг ҳар бир тури иштирокида учтадан гап тузинг.

116- §. Олмошларнинг ёзилиши. Бунда қўйидаги имло қоидаларига амал қилинади:

1) биринчи қисми мустақил маъно билдирамайдиган, алоҳида қўлланмайдиган *аллаким, аллақачон, алланима, аллақандай, аллақайси* каби қўшма олмошлар қўшиб ёзилади;

2) иккала қисми ўзича мустақил маъно англатиб, мустақил қўлланма оладиган *ҳар ким, ҳар нима, ҳар қандай, ҳеч ким, ҳеч нима, ҳеч нарса, ҳеч бир, баъзи бирор, баъзи бир, қайси бир* каби олмошлар ажратиб ёзилади;

3) жуфт ва такрорланган олмошлар чизиқча (—) билан ёзилади: *у-бу, ўша-ўша, шу-шу* каби.

Қўйидаги олмошлар энг кўп қўлланади. Уларнинг ёзилишини билиб олинг: *аллаким, алланима, алланарса,*

ОЛМОШЛАРНИНГ КЕЛИШИКЛАР БИЛАН ТУРЛАНИШИ

Келишикклар	Олмошлар				
	Клиничек олмоши	иғрасатин олмоши	сүрек олмоши	Чарак олмоши	бўлинисиз- лик олмоши
1. Бош к.	мен	шу шунчиг	ким кимини	ўз (ўзи) ўзинини	хар ким хар ким- нинг
2. Карагач к.	менинг				хеч ким хеч ким- нинг
3. Тушум к.	мени	шуни	кимни	ўзини	хар кимни
4. Жўналиш к.	мёнга	шунга	кимга	ўзига	хеч кимга
5. Урин-пайт к.	менда	чўпда	кимда	ўзгда	хар кимда
6. Чиккиш к.	мендан	шундан	кимдан	ўзидан	хар кимдан хеч кимдан

аллақандай, бирор, бирон, бары, мен, сен, у, биз, сиз, улар, бу, шу, ўша, ким, нима, қайси, қандай, неча, қанча, қачон, нега, нимага, ўз(и), ҳамма, барға, жами, бутун, ялпи, ҳар ким, ҳар нима, ҳар қандай, ҳар қачон, ҳар қанақа, ҳар бир, ҳар қанча, ҳар он, ҳеч ким, ҳеч нима, ҳеч бир, ҳеч нарса, ҳеч қачон, кимдир, бир неча, бир қанча, бир нима, бир нарса кабилар.

157- машқ. Гапларни кўчиринг. Олмошларни топиб, уларнинг ёзилишига эътибор қилинг, келишик қўшимчалари қўшилганда, ўзакда юз берган ўзгаришларни тушунтиринг.

1. Олтита болани боқиб катта қилган Маҳкам тақачи — шу. (Р. Ф.) 2. Юлдуз ўша-ўша гўё вақтнинг унга таъсири йўқдек, таҳбатах очилаверади. (М. Муҳаммадов.) 3. У ўз фикрлари, орзулари билан банд, ҳозир ҳеч кимни кўргиси, ҳеч ким билан гаплашгиси келмасди. (Ў. Ўм.) 4. Тўтиқизни ўз отига мингаштириб, уни белидан ўзининг белига маҳкам боғлаб олди. (М. Исм.) 5. Мен ёзган нарсаларимни энг аввал унга ўқиб бераман. (Э. А.) 6. Келса сиз эшитган нақлни унга ҳам ўқиб беришим керак. (Э. А.) 7. Қечаси Икромжоннинг радиосини ўртага қўйиб, алла-паллагача эшитиб ўтиришди. (С. Аҳм.) 8. Ҳаммасининг ўзига хос фазилати, ҳусни бор. (Ў. Ў.) 9. Шу бу йил тўққизинчи числода мана шу Асрорқулдан Ҳайдар отага хат келди. (А. Қ.) 10. Шу лаҳза дарвозада қандайдир шарпа сезилгандек бўлди. (Мирм.)

158- машқ. Гапларни ўқиб, олмошларни топинг, уларнинг гапдаги вазифасини ва қайси турни фаол қўлланганини айтинг.

1. Фақат бир нарсани пайқаб қолди: у йўғида кимдир уйга кириб чиқяпти. (Э. А.) 2. Мен бунақа воқеалар тўғрисида қанча-қанча китоблар ўқиганман. (О. Е.) 3. Сиз менинг кимим бўласиз, амаки. (И. Р.) 4. Ахир менинг нимам Назокатга ўхшайди. (С. Ан.) 5. Мен ўз-ўзимга дейман: Наҳотки оз муддатда шунчалик ўзгарибман. (Мирм.) 6. Улар ўз қўллари билан нималар яратиб, нималар ишлаб чиқаришга қодир эканликларини билиб олишлари керак! (Ж. Абд.) 7. Қудратнинг бирдан-бир маҳсади уларнинг ҳаммасида ҳақиқий фанга қизиқиш уйғотиш эди. (Ж. Абд.) 8. Зуфар Ҳакимович унинг ташвишли юзига қараб бирдан юришини секинлатди. (П. Қ.) 9. Чиқиб мусофирихона хизматкор-

лари билан гаплаш: пул берсанг, ҳар нарса топиб келадилар... (*Мирм.*) 10. Одамларнинг деярли ҳаммаси шу ерлик. (*Ў. Ў.*)

ФЕЪЛ

117- §. Иш-ҳаракат ва ҳолат маъноларини ифодаловчи сўзлар феъл саналади. Феъл предмет — от билан боғланниб, унинг ҳаракатини, фаол ҳолатини англатади. Масалан: *Ўқтам ёэди. Рустам ўқиди. Дилором тинглади. Ўткир ухлади.* (*ёэди, ўқиди* — ҳаракат; *tingлади, ухлади* — ҳолат маъносини ифодалаган).

Феъллар нима қиласди?, нима қилмоқчи?, нима қилди?, нима қилияпти? каби сўроқлардан бирига жавоб бўлади.

118- §. Феълларнинг ясалиши. Феъллар тузилишига кўра туб (*ёз, ол, ўқиди, кўряпти*) ва ясама (*ишла, уйқусиради*) бўлади. Ясама феъллар махсус феъл ясовчи қўшимчалар ёрдамида бошқа сўз туркумларидан ясалади.

I. -ла: *михла, турғиа, бошла, боғла; -а, (-й, -ай): оша, кучай, сана; -ик (-ик), -ир (-ур): йўлиқ, гапир; -и: чанги, бойи, тинчи; -сира: сувсира, хавфсира; -лан, -лаш: гаплаш, кўмаклаш, дардлаш, отлан, жонлан* кабилар отдан феъл ясади.

II. -а, -ла: *оқла, бўша, яхшила, тезла, секинла, қийна, болла, гумбурла; -й (-ай): қорай, кўпай, озай, улғай, сарғай* (бунда баъзан ўзакдаги у ёки и тушиб қолади ва шундай ёзилади: *улғ-ай* — *улғай, сариқ-ай* — *сарғай*); -р (-ар, -ур): *оқар, эскир, тупур, уфур; -ик (-ик): кечик, чиниқ; -сира: ётсира, бегонасира, сизсира* кабилар бошқа сўз туркумларидан феъл ясади.

159- машқ. Гапларни кўчиринг. Феъл ясовчи қўшимчаларни аниқлаб, қайси сўз туркумидан феъл ясаётганини изоҳланг.

1. Бола шунда ҳам гапирмасди. (*Ч. Айт.*) 2. Икки ошиқ ўзакни ёқалаб, сўқмоқ билан йўлга тушишди. (*Т. Қайин.*) 3. Улар бошларини кўтариб, суюкли муаллимни табассум билан қаршиладилар. (*О.*) 4. Бўронбекнинг кесак ранг юзида ясама кулги йилтиради. (*Х. Ф.*) 5. Черницовнинг сўнгги сўзи жангчиларнинг қасамёди бўлиб жаранглади. (*И. Р.*) 6. Оғирини енгил қиласан деб ўйлаган эдим. (*С. Аҳм.*) 7. Сен, Черницов, шуларни айт жангчиларга! Машаққатли, аммо муқаррар ғалабадан гапир! (*И. Р.*) 8. У қишлоқдан қайтиб келгандан

кейин на дадаси, на онаси билан бу ҳақда гаплашган эди. (Ү. Ү.) 9.— Сиз бугун жа... тўғри гапларни гапиряпсиз. (О. Е.) 10. Эшик ғирчиллаб орқасидан ёпилганда, Абдулла оғир хўрсинди. (Ү. Ү.) 11. Отанг бояқиши мардикорликка кетган йигитлар тўғрисида кўп гапиради. (О.) 12. Зуҳра кўп ўйларди. (Р. Ф.) Беҳилардан бирининг чанг босиб ётган тукини у қўли билан ортди... Уни ҳидлади, яна ҳидлади. (М. Исл.)

57- топшириқ. Узингиз -сира, -ик (иқ), -лан, -и, -ла қўшимчалари ёрдамида феъл ясаб, улар иштироқида гап тузинг. Қайси сўз туркумидан феъл ясалганини тушунтиринг.

119- §. Қўшма ва жуфт феъллар, уларнинг ёзилиши. Икки ёки ундан ортиқ ҳар хил маъноли ўзакнинг биринкувидан ташкил топган феъллар қўшма феъллар саналади; қўл қўймоқ, имзо чекмоқ, қарор қилмоқ, кетиб қолди, ўқиб чиқди, етиб борган.

Таркибидаги сўзларнинг ҳар хиллигига кўра қўшма феъллар икки турга бўлинади: 1) от+феъл шаклидаги қўшма феъллар; 2) феъл+феъл шаклдаги қўшма феъллар.

Биринчи шаклдаги қўшма феълларнинг биринчи қисми, асосан, отдан бўлиб; у етакчи қисм, иккинчи қисми феъл бўлиб, у кўмакчи қисм саналади: *назар соммоқ*, ёд олмоқ, жавоб бермоқ каби.

Иккинчи шаклдаги қўшма феълларнинг таркиби қисми феъллардан ташкил топади. Биринчи қисм асосан **-б (-иб)** қўшимчаси билан ясалган равишдошдан иборат бўлади: у етакчи қисм ҳисобланади, чунки қўшма феъл асосида ётган лексик маънони ифодалайди. Иккинчи (кўмакчи) қисм кўмакчи феъл деб юритилади. Кўмакчи феъл қўшма феъл ясаш учун хизмат қилиш билан бирга унга турли-туман қўшимча маънолар ҳам қўша олади. Масалан: *ишлаб тур* (ҳаракатнинг давомийлиги), *ишлаб бўл* (ҳаракатнинг тугалланганлиги), *ишлаб юр* (ҳаракатнинг тақрорланиб туриши) каби. Қўшма феълларнинг қисмлари ажратиб ёзилади.

Айта олди, кўра олмади каби қўшма феъллар *айтолди, кўролди* тарзида қўшиб ёзилади.

Бир хил шаклда шаклланган етакчи ва кўмакчи феъллардан ташкил топган, янги лексик маъно англа-тувчи феъл жуфт феъл ҳисобланади: *айтди-қўйди, ўтди-кетди, ўқиди-чиқди*. Жуфт феъллар доимо чизиқча билан ёзилади.

160- машқ. Гапларни кўчиринг. Содда, қўшма ва жуфт феълларнинг тагига чизинг. Қўшма ва жуфт феълларнинг тузилиши ва ёзилишини изоҳланг.

1. Бўлган воқеанинг ҳаммасини айтиб берди. (*Ш.*)
2. Кўп ўтмай ҳовли қўни-қўшнига тўлиб кетди. (*Ў. У.*)
3. Борди-келди қилмайсиз, Кимдан қолди кўнглингиз. (*Қўшиқдан.*)
4. Баланд, бақувват қаддини тик кўтариб Собир пахта ҳақида жиддий, чуқур, сўзлай бошлади. (*О.*)
5. Собиржон ҳарбий хизматга жўнаётганида, Зухранинг тили чиқиб, бийрон-бийрон гапирадиган бўлиб қолган эди. (*Р. Ф.*)
6. Опа-сингил тенгқур қизлар тўпига қўшилиб кетди. (*Ас. М.*)
7. Ўрмонжон шошиб чиқиб кетди ва бирон соатдан кейин озғин, сочи ўнг томонга жуда ҳафсала билан тараалган оқ шим ва оқ кўйлак кийган ёшгина бир йигит билан кириб келди. (*А. К.*)
8. Гуломжон ўнг қўлини кўксига қўйиб туриб таъзим қилди. (*М. Исм.*)
9. Умаров бошидаги телпагини олди, оппоқ соchlарини силай-силай Инобатнинг рўпарасига бориб ўтиреди. (*О. Е.*)
10. Улар тоғ ён бағридаги чексиз тоқзорга кириб қолишган эди. (*Ас. М.*)

161- машқ. Гапларни ўқиб, қўшма ва жуфт феълларни аниқланг. Уларнинг ясалиши ва ёзилишини изоҳланг, қайси бирин кўпроқ қўлланишини айтинг.

1. Орифжон бешик устига келиб, чақалоқнинг юзини очиб кўрди. (*Ас. М.*)
2. Шу ерда қишлоқ тугаб, кенг экинзор бошланар эди. (*Ў. У.*)
3. Бўлган воқеанинг ҳаммасини айтиб берди. (*Ш.*)
4. Сиз йўл-йўлакай менга қараб-қараб қўймадингиз-да, секингина сўрадингиз. (*Ў. Ҳ.*)
5. Шудрингдан хўл бўлиб кетган жингалак соchlарини ушлаб ўрнидан турар, увишиб қолган қўлларини уқалаб-уқалаб қўярди. (*Ў. Ҳ.*)
6. Шивилғонга борсам, албатта кириб ўтаман. (*Ас. М.*)
7. Юмшоқ гапирсанг, хамирдек бўшашиб кетади. (*А. К.*)
8. Қанотли-қўйруқли маҳлуқ учади-кетади. (*О.*)

120- §. Ўтимли ва ўтимсиз феъллар. Ҳаракатнинг тушум келишигидаги от ёки отлашган сўзга ўтишини билдирувчи феъллар ўтимли феъл ҳисобланади. Масалан: *Ишини бажардим. Китобни ўқидим. Сувни ичдим.*

Таъсири бирор предметга ўтмайдиган ҳаракатни билдирувчи феъллар эса ўтимсиз феъл саналади: Масалан: *келди, кетди, ухлади, борди, юрди. Улар келдилар. Мен кетдим. У ухлади.*

Ўтимсиз феъллар жўналиш, ўрин-пайт, чиқиш келишигидаги сўзлар билан муносабатга киришади. Маса-

лан: *У мактабга кетди. Мен уйдан келдим. Рустам ётоқхонада яшайди.*

162- машқ. Гапларни ўқинг, ўтимли ва ўтимсиз феълларни топиб, айтинг. Уларнинг ўзаро боғланиб келган сўзлар билан муносабатини изоҳланг.

1. Мол-мулки ёш болаларга қолди. Уртада меросхўрлар кўпайди. (О.) 2. Шундай қилиб, сизнинг олдингизга маслаҳатга келувдик. Бошимиз қотиб қолди. (М. Исм.) 3. Мажлис аҳлининг аксарияти хурсанд бўлиб Мустафо Содиқни мақтадилар. (О.) 4. Дехқон осмонга қараб яхши ҳаводан қувонса, ерга қараб мўл маҳсулидан суюнади. (М. Исм.) 5. Лайлонинг уйидан иккита хотин дастурхон кўтариб чиқиб қолди. (М. Кориев.) 6. Анварни кузатгани вокзалга чиқдим. (М. Кориев.) 7. Буларни Абдулла кўрмаган, дадасидан эшитган. (Ў. Ўм.) 8. Сен бу гапларни қаёқдан билиб олдинг десалар, жавоб берма. (Ш.) 9. Содиқ ҳам бу гапни қайтиб оғзига олмади. (К. И.)

163- машқ. *Тингла, эшиш, кўр, бер, мақта, сийла, куйла, ундири, қўндири, келтири, олдим, ўқидим* каби феълларнинг ўтимли ва ўтимсизликка кўра турини айтинг.

121- §. Бўлишли ва бўлишсиз феъллар. Ўзбек тилидаги барча феъллар бўлишли ва бўлишсиз шаклларда қўллана олади.

Ҳаракатнинг бажарилиши, амалга ошишини англатувчи феъллар **бўлишли феъллардир:** *ишлади, кетяпти, ўқийди, ёзадиган* каби.

Феълнинг бўлишли шаклини кўрсатувчи маҳсус қўшимча йўқ.

Бўлишсиз феъллар бажарилмайдиган ҳаракат ёки ҳолатни ифодалайди ва маҳсус қўшимча қўшиш ёки айрим сўзларни келтириш билан ясалади: *-ма:* *бор — борма, кел — келма, тур — турма, кўтар — кўтарма;* *эмас, йўқ* сўзлари ҳам феъллардаги бўлишсизлик маъносини ифодалаш учун хизмат қиласиди: *борган эмас, борадиган эмас, боргани йўқ, келгани йўқ.*

БУЛИШЛИ-БУЛИШСИЗ ФЕЪЛЛАРНИНГ ҚУЛЛАНИШ ХУСУСИЯТИ

122- §. Иш-ҳаракатнинг бажарилганлиги ёки бажарилмаганлигини билдирувчи бўлишли ва бўлишсиз шаклларнинг нутқда қўлланиш усули баъзан уларнинг моҳиятига зид бўлади. Яъни баъзан нутқда инкор маъ-

носи бўлишли феъл билан, тасдиқ эса бўлишсиз феъл орқали ифодаланиши мумкин: *Ахир, шу иморатни деб қанча азоб тортмадик? Бунга мендан бошқа ким ҳам қўл қўя олади?* Бундай ҳолларда интонациянинг муҳим ўғни бор.

-ма қўшимчасининг қўшма феъл тарқибининг қайси қисмларида келиши асосида турли маъно нозикликлари ифодаланиши мумкин. Масалан -ма қўшимчаси қўшма феъл қисмларининг ҳар иккаласига ҳам қўшилса инкор эмас, тасдиқ ифодаланади: *олмай қўймайди — олади; айтилмай қолмади — айтилди* каби.

-ма қўшимчаси инкорни билдирувчи бошқа восита-лар билан бирга қўлланганда ҳам инкорни инкор қилиш орқали тасдиқ ифодаланади: *ўқимаган эмас→ўқиган, кўрмаган йўқ→кўрди* каби. Ёки: *Бу уйда йўқ нарсанинг ўзи йўқ // Бу уйда ҳамма нарса бор.*

164- машқ. Аввал бўлишли феълли, кейин бўлишсиз феълли гапларни кўчиринг. Уларнинг ҳар бирини алоҳида-алоҳида изоҳланг.

1. Кенгашдан кейин Отақўзи боғда зиёфат берди. (*O. E.*) 2. Лоақал энди, бу улуғ инсоннинг қабри тепасида, ўз виждонинг олдида мунофиқлик қилмагин. (*O. E.*) 3. Найманчада етти пушти бўзчи ўтганлардан ҳам ҳали белбоққа ёлчиган косиб чиққан эмас. Одамни очдан ҳам ўлдирмайдиган, қашшоқлиждан ҳам чиқармайдиган бу касб ҳақида халқ аломат гаплар тўқиган. (*Ac. M.*) 4. Ҳурмат хола бу тушни ҳеч кимга, ҳатто чолига ҳам айтмади. (*A. K.*) 5. Қўчқор болаларга қўшилиб пиқ-пиқ кулса ҳам, Машраб кулмайди, кулолмайди. (*O. E.*) 6. Ахир, наҳот унинг салкам чорак асрлик меҳнатини инобатга олишмаса, наҳот қилган шунча хизматлари эвазига уни суяб қолишмаса. (*O. E.*)

ФЕЪЛ ШАХС-СОН ҚЎШИМЧАЛАРИНИНГ ҚЎЛЛАНИШ ХУСУСИЯТИ

123-§. Феълдан англашилган ҳаракат бирор шахс ёки шахслар томонидан бажарилади. У сўзловчининг ўзи (I шахс), нутқ қаратилган шахс — тингловчи (II шахс) ёки нутқ жараёнида қатнашаётган шахс—ўзга (III шахс) бўлиши мумкин. Иш-ҳаракатнинг ким ёки кимлар тонидан бажарилиши шахс-сон қўшимчалари (тусловчилар) орқали ифодаланади.

Нутқда турли хил маъно нозикликларини ифодалаш мақсадида маълум шахснинг кўплик шакли унинг бир-

лиги ўрнида ёки аксинча бир шахс шакли бошқа шахс шакли ўрнида қўлланади. Шахс-сон қўшимчаларининг кўчма ҳолда қўлланилиши қўйидагича:

1. I шахс кўплиги унинг бирлиги сифатида тингловчиға, ҳурмат, камтарлик (илмий услубга хос) ёки мағрурлик, кеккайиш (оддий сўзлашувга хос) маъноларида: *бир келдик, мен айтдим. Сенга бош ролни топширишини маъқул топдик*,— деди бош режиссёр.

2. II шахс бирлиги I шахс сифатида сўзлашув нутқида умумлаштириш маъносида: *Гапиргинг келади, аммо шундай пайтда айттолмай қоласан*.

3. III шахс кўплиги II шахс бирлиги сифатида ҳурмат, кесатиш, ҳазил, мазах маъносида: *Эртага ўша ерга борсалар* (сиз борсангиз, сен борсанг.) *Агар хоҳласалар, олсинлар*.

4. I шахснинг кўплигидан II шахсга мурожаатда: *яхши ухладикми* (сиз яхши ухладингизми ўрнида), *кўриб келамизми* (сиз кўриб келасизми ўрнида).

5. Барча шакллар I шахс ўрнида қўлланганда ўзини бошқа шахс ўрнига қўйиб, ўзига ўзи гапириш англашилади: *Мана, Қўчқорвой* (сўзловчининг ўзи) *ниятингга ҳам етдинг.* (*Ш. Бошбеков.*)

58- топшириқ. Сўзлашув нутқидан шахс-сон қўшимчаларининг кўчма маънода қўлланишига мисоллар келтиринг ва маъносини туруштиринг.

165- машқ. Қўйидаги парчани ўқинг. Тусловчи қўшимчаларининг маъносини изоҳланг.

I. Д еҳ қ о н б о й. Пахтакорман... Кейинги вақтда бригадир эдим.

О д и л о в. Бу ерда нима иш қилмоқчисиз?

Д еҳ қ о н б о й. Катта ниятлар билан келганмиз...

О д и л о в. Эшитсак мумкинми?

Д еҳ қ о н б о й. Мумкин. Урушдан қайтишда Тошкентга тушдим. Навоий театрини кўрдим... Эскижўвага бордик. Бир томон боғ, бир томон стадион, театр, кино... Хайрон бўлдим, бунинг нимаси Эскижўва, нима учун Эскижўва?..

О д и л о в. Эскидан қолган от.

Д еҳ қ о н б о й (*шавқ билан*). Бир вақти келиб Мирзачўл ҳам шунаقا эскидан қолган от бўлиб қолса, келган одам: «Бунинг нимаси Мирзачўл? Нима учун Мирзачўл?» деса...Менинг орзум, бизнинг орзумиз мана шу!

О д и л о в (*Деҳқонбойга бошдан-оёқ рази солиб*). Кўп яхши орзу!..

П. Мавлон. ... Сенга ура-ура, чапак... Мен, бригадам бўйича центнер тушиб, ҳар йилги обрўйимдан маҳрум бўлай... Қизиқ бўлибди-да!

Салтанат. Сиз фақат ўз кўмочингизга кул тортар экансиз-да!

Мавлон. Сен, секретарь бўлсанг, машинкангни чиқиллат, бунақа гапларга аралашма!

Қўзиев. Ие, нега аралашмайди!

Деҳқонбой (мулойимлик билан). Йўқ, Мавлон ака, Салтанатнинг гапига тушунмадингиз. Биз фақат битта бригада, ҳатто колхоз тўғрисида эмас, бутун мамлакат тўғрисида ўйлашимиз керак. (А. Қаҳҳор.)

124-§. Феъл нисбатлари. Иш-ҳаракатнинг бажарувчиши билан предмет ўртасидаги муносабатни билдирадиган феъл шакли **феъл нисбати** саналади. Масалан: *Дилором таранди* гапида *Дилором* — ҳаракатнинг бажарувчиши (эга, яъни субъект). Ҳаракат *Дилоромнинг* ўзига қайтади. Демак, *Дилором* айни пайтда ҳам ҳаракатнинг бажарувчиши, ҳам предмети — объекти) саналади: *Улар сұхбатлашиди* гапида ҳаракат бир неча субъект томонидан бажариляпти.

Феъл нисбатлари тўрт турга бўлинади: 1) аниқ нисбат; 2) ўзлик-мажҳуллик нисбати; 3) орттирма нисбат; 4) биргалик нисбати.

125-§. Аниқ нисбат. Бу нисбатдаги феъл ҳаракатнинг эга (субъект) томонидан бажарилишини билдиради, ҳаракатнинг манбаи (предмети) эса тўлдирувчи (ёки ўрин ҳоли) вазифасида келади. Аниқ нисбатни ясовчи маҳсус қўшимча йўқ: *У китобни ўқиди. Мен институтда ўқийман.*

126-§. Иш-ҳаракатнинг субъекти (эгаси — бажарувчиши) билан объекти бир шахснинг ўзи эканлигини кўрсатувчи ёки ҳақиқий бажарувчиши ноаниқ бўлган феъл шакли **ўзлик-мажҳуллик нисбати** саналади.

Ўзлик-мажҳуллик нисбати феъл ўзакларига -н (-ин), -л (-ил) қўшимчаларининг қўшилиши билан ясалади: *таранди, ювинди, чўмилди, суркалди; пахталар терилди, сув сепилди, китоб олинди.*

127-§. Орттирма нисбат бир субъектнинг ҳаракати бошқа бир субъектнинг таъсири натижасида бажарилишини ифодалайдиган феъл формасидир.

Орттирма нисбат феъл негизига қўйидаги қўшимчаларни қўшиш орқали ясалади. -т: *кўпайт, ухлат; -тири* (дир): *айттир, кийинтир, кулдир, қурдир; -ғиз* (гиз),

-қаз (газ, -каз), -қиз, -қиз: түргиз, ўтқаз, тутқиз, юргиз, борғиз, күргаз; **-из:** оқиз, боқиз (касални боқизмоқ).

Феъллардаги орттирма нисбат ясовчи **-дир** қўшим-часи жарангсиз ундошдан сўнг **-тир**, жарангли ундошда сўнг бир бўғинли сўзларга **-дир** тарзида қўшилади ва шундай ёзилади: **уқтирмоқ, айттирмоқ, эктирмоқ, эшиттирмоқ, ювингтирмоқ, шоширтирмоқ, чақиртирмоқ, чўмилтирмоқ;** **ёздирмоқ, ундиরмоқ, илдирироқ, оғдирироқ.** Бу қондадан кел сўзи мустаснодир, у жарангли билан тугаган бир бўғинли сўз бўлишига қарамай **-тир** қўшим-часини олади: **кељтирмоқ.**

Жарангли г билан бошланган **-гиз, -газ** қўшимчалари жарангсиз товушлар билан тугаган сўзларга қўшилганда **-қиз, -қиз** (**айтқизмоқ, кетқизмоқ, ётқизмоқ**), **-каз, -қаз** (**ўтқазмоқ, ютқазмоқ**) каби шаклларда ёзилади. Жарангли ундош билан тугаган сўзлардан кейин эса **-гиз, -ғиз, -газ, -ғаз** ёзилади: **турғиз, ўргиз, юргизмоқ, күргазмоқ** каби.

166- машқ. Берилган сўзларга қавс ичидаги қўшимчалардан менини қўшиб, феълнинг орттирма нисбатини ясанг ва улар иштиро-кида гаплар тузинг. Бу феълларнинг маъносини изоҳланг.

торт (-тир, -дир) моқ, ўс (-тир, -дир) моқ, кес (-тир, -дир) моқ, туз (-тир, -дир) моқ, ун (-тир, -дир) моқ, илин (-тир, -дир) моқ, ил (-тир, -дир) моқ, тирил (-тир, -дир) моқ, қут (-каз, -қаз) моқ, юр (-гиз, -ғиз) моқ.

128- §. Биргалик нисбати бир неча шахс (субъект) томонидан бажарилган ҳаракат маъносини ифодаловчи феъл формасидир.

Биргалик нисбати қуйидаги қўшимчалар ёрдамида ясалади: **(-ш (-иш))**: ёзишиди, сўзлашиди, гапиришиди, қайтишиди; **(-ла + ш)**: баҳслашиди, гаплашиди, сұхбатлашиди.

Бунда ҳаракатнинг бажарилишида субъектлар баравар иштирок этади ёки бир субъект ҳаракатнинг бажарилишида бошқа субъектга ёрдамлашади, қўмаклашади: **Улар планер ясашиди. Дилором опасига қарашиди.**

167- машқ. Гапларни кўчиринг. Феълларнинг қайси нисбатда эканлигини аниқлаб, устига ёзинг. Ҳар бир нисбатдаги феъл маъносини изоҳланг.

1. Бахилни сахийлигинг билан уялтири. (*Мақол.*)
2. Учовлари олдин-кетин қалъа бошлиғига чопишиди. (*O.*)
3. Бўлинма командирлари буйруқни эшитганларидан

кейин жой-жойларига жўнаб кетишиди. (*Ф. Ниёзий.*)
4. Мардикорликка нуқул камбағал болаларини ғўйкач қилишади. (*О.*) 5. Лекин кўп ўтмасдан кундузнинг кўзи юмилди. Ўрмон ичи бир пасда қоронfilaшди. (*О.*)
6. Алим бува билан Ҳасан сўфи дарров пастга қарашиди. (*М. Исм.*) 7. Табиий, ҳаммадан Нурининг уйи ҳашаматли: қимматли жиҳозлар билан магазиндай ясатилган, кўрган одамнинг кўзи қамашади. (*О.*) 8. Барно ғарам орқасида олисларга тикилиб турар, нафис қайрилма қошлари чимирилган, кўзлари қисилган эди. (*О. Е.*)
9. Ҳамма нарса, эҳтимол, шундан бошланди. (*Ч. Айт.*)

168- машқ. Нуқталар ўрнига феъл нисбатлари қўшимчаларидан мосини қўйинб, гапларни кўчиринг. Феълларнинг нисбатига кўра турини айтинг.

1. Эртага қиём чоғида икки дўст кўчага чиқ...ди. (*О.*)
2. Мирҳайдар ва Комила ўз кишилари билан ёрдамга кел...ди. (*О.*) 3. Шунда чироқ шарақлаганича бориб шипга ур...ди. (*А. Қ.*) 4. Ҳувиллаган стадион шу топда негадир жуда ғариб кўр...арди. (*Ў. Ҳ.*) 5. Шу югуришлардан бирида бехосдан Дишод бағрига келиб ур...ди. (*М. Исм.*) 6. Улар марказий трибуналаги панжара олдиди тўхта...ди. (*Ў. Ҳ.*) 7. У бу ердан, дара ва нишаб йўллар бўйлаб, тоғдаги қатағон ўрмонга кўтар...ди. (*Ч. Айт.*) 8. Тумонат одам ўшанда тараф-тараф бўлиб аскияни тўполонга айлан...ган эканлар. (*Ў. Ум.*)

129- §. Сифатдош. Предметнинг белгиси бўлган ишҳаракатни англатадиган феъл шакли сифатдошdir. Сифатдош феълнинг сифатга яқин шаклиdir. Шунинг учун сифатдош гапда ҳам сифат, ҳам феъл бажарадиган вазифаларда қўллана олади: *Юрган дарё, ўтирган бўйра*. (*Мақол.*) *Ўқиган бола*.

Сифатдошлар феъл негизига тубандаги қўшимчаларни қўшиш орқали ясалади:

-ган (-кан, -қан): *борган, келган, юрган, эккан, чиқкан, йиққан;*

-ётган: *бораётган, келаётган, ухлаётган, ўқиётган;*

-р (-ар): *турап (жой), оқар, (сув);*

-вчи (-увчи): *ишловчи, ясовчи, ёзувчи;*

-жак (-ажак): *ёзажак, боражак, бўлажак* (бу қўшимчалар кўпроқ эски ўзбек тилида сифатдош ясаган). Сифатдош ҳам барча феъллар сингари бўлишили, бўлишсиз (*ўқиган* — бўлишили, *ўқимаган* — бўлишсиз), ўтимли ва ўтимсиз (китобни *ўқиганман* — ўтимли, *китоб ўқилган* — ўтимсиз) бўла олади.

СИФАТДОШ ЯСОВЧИ ҚУШИМЧАЛАР ВА УЛАРНИНГ ЁЗИЛИШИ

Сифатдош ясовчилар	Ёзилиши	Мисоллар
-ган, -кан, -қан	к, г, и, ғ дан бошқа товуш билан ёки унли билан тугаган феълга -ган, охри г, к товушлари билан тугаган феълларга -кан қўшимчаси қўшилади.	ўқиган, ўйнаган, келган, келтирган, севган, ўсган; эк—эккан, туг—туккан, чиқ—чиқкан, соғ — соққан
-диган, -ётган	а, й билан тугаган равишдошларга қўшилади. Эслатма: -ётган қўшимчаси й билан тугаган равишдошларга қўшилганда, й товуши тушиб қолади.	очадиган, ўқийдиган, ўйнайдиган; ёзаётган; сўзлаётган; ишлайётган — ишлаётган, ўқий+ётган — ўқиётган
-р, -ар	Унли товуш билан тугаган феълга -р, ундош товуш билан тугаган феълга -ар қўшимчаси қўшилади.	ўқир, келар
-миш	Ўтган замон сифатдошининг бу шакли эски адабий тилда, айниқса, поэзияда кўп ишлатилган, баъзан ҳозир ҳам қўллзнилади.	ёзилмиш, айтилмиш, қутулмиш
-жак, -ажак (-яжак)	Ундош товуш билан тугаган феълга -ажак, унли товуш билан тугаган феълга -жак тарзида қўшилади.	қурилажак (бино), келажак (кунлар), ўқияжак
-аси	Бу қўшимча асосан келмоқ феълидан сифатдош ясади.	келаси (замон)

169- машқ. Қуйидаги феъллардан -ган, -ётган, -(у)вчи қўшимчалари ёрдамида сифатдош ясаб ёзинг, сўнгра шулар иштироқида оғзаки гаплар тузинг.

Ухла, ўқи, ич, бор, қол, тара, сайра, куйла, ўтири, кел, юр.

130- §. Равишдош. Иш-ҳаракатнинг қай ҳолатда бажарилишини ифодалайдиган феъл шакли **равишдош** саналади. Равишдош феълнинг равишга яқин шаклидир. Шунинг учун равишдош ҳам феълга, ҳам равишга хос хусусиятларга эга: *У ўйламай жавоб қайтарди. У кулиб гапирди. Мотор гуриллаб, машина олдинга силжиди. У қийналиб жавоб берди.*

РАВИШДОШ ЯСОВЧИ ҚҰШИМЧАЛАР ВА УЛАРНИНГ ЕЗИЛИШИ

Равишдош ясовчи құшимчалар	Езилиши	Мисоллар
-а, -й	Үндөш товуш билан тугзап феълларга -а, унли товуш билан тугаган феълларга -й құшимчаси қүшилади. Равишдошнинг бу тури күпинча такрорланып құлланади ва деғис билан ёзилади.	ёза-ёза, бора-бора ўқий-ўқий, ишлай-ишлай
-иб, -б	Үндөш товуш билан тугаган феълларга -иб, унли билан тугаган феълларга -б қүшилади.	ёзиб, келтириб, ўқиб, қатлаб, буклэб, саватлаб, аллалаб
-гач, -кач	к, г товушлари билан тугаган феълларга -кач, қ, ғ товушлари билан тугаган феълларга -қач, бошқа ўринларда -гач құшимчаси қүшилади.	боргач, ёзгач, ўқигач, эккач, боққач, туг — туккак
-гунча, -кунча, -қунча, -гани, -кани, -қани	Бу құшимчалар мақсад билдирувчи равишдошлар ясайди. Езилиши аввалги пунктда берилгани каби. Э с л а т м а. Бу құшимча илгари -гали шаклида ҳам құлланган.	келгунча, эккунча, боққунча, эккани, чиққани, ўқигани, күргани күргали, ўқигали, эккали

Равишдошлар тубандагича ясалади:

-б (иб): *бориб, келиб, ўқиб, юриб;*

-а, -ай: *бора-бора, ишлай-ишлай.*

Бу қўшимчалар билан ясалган равишдошлар шахсонда туслана олади: *борибман, борибсан, борибди, борамиз, борасиз, борадилар.*

-гач (кач, -қач): *боргач, келгач, чиққач, эккач;*

-гани (-қани, -кани): *боргани, ўқигани, эккани, чиққани;*

-гунча (-қунча, -кунча): *боргунча, тушунгунча, чиққунча, эккунча.*

Бу қўшимчалар билан ясалган равишдошлар шахсонда тусланмайди.

170- машқ. Гапларни қўчиринг. Сифатдош ва равишдошларни топинг. Қайси қўшимчалар ёрдамида ясалганини ва имлосини, бирбиридан фарқини тушуниринг.

1. Уни тоғ оралиғидан топиб, ёрдам беришганда ҳеч маҳсисини ечиб олишолмай, кесишган. (Ш.) 2. Қўқон арава тош кўчада қалдираб боряпти. (К. И.) 3. Шу кундан бошлаб деярли ҳар куни мени «Тўрт юзинчи»га олиб борадиган бўлиб қолишиди, ҳар гал дилни пора-пора қилидиган янгидан-янги оғир ва даҳшатли тафсилотларни билиб қайтар эдим. (Ю. Фучик.) 4. Йиғлай-йиғлай марза олсанг, ўйнаб-ўйнаб сугорасан. (Мақол.) 5. Элдан айрилгунча, жондан айрил. (Мақол.) 6. Дўконлар ёпилиб, катта-кичик ҳамма қочиб, чекка-чеккага яширинаётган эмиш. (М. Қ.) Чортеракдан келганлар самоварни тўлдириб, гурунглашиб ўтиришарди. (С. Аҳм.) 8. Акаларимиз, тоғаларимиз урушдан қайтиб келишса-ю, бизни оч қолдириб, ўзлари айш қилаётган бу абллаҳлардан ўч олишса эди, деб орзу қилар эдик. (О. Е.) 9. Сиз нега бу одам менга елимдай ёпишиб олди, нега мени тергагани тергаган деб ранжир эдингиз. (О. Е.) 10. Бир қўлида чамадон, бир қўлида тугун кўтариб Абдулла йўлга чиққанда, қош қорая бошлаган эди. (Ў. Ум.)

59- топшириқ. *Бор, мақта, сила, сийла, тингла* феълларидан сифатдош ва равишдош ясанг. Шулар иштироқида бир неча гап тузиңг.

131- §. **Ҳаракат номи** бевосита шахс, замон маъноси ни билдиримай, гапда отга хос вазифа бажарувчи феъл шаклидир.

Ҳаракат номи отга ўхашалигидан иш-ҳаракатнинг атамаси, номи деб ҳам юритилади: *олмоқ, ишламоқ, бормоқ, кўриш, тузиш, борув, келув* каби.

Ҳаракат номи қўйидаги қўшимчалар орқали ясалади:

-иш (-ш): *бориши, келиши, югурши, ишилаш, яшаши*;

-моқ: *ўқимоқ, ёдламоқ, эсламоқ, курашмоқ*;

-в (-ув): *борув, ўқув* (бу қўшимча ҳозир камдан-кам ҳолларда ҳаракат номи ясайди). Луғатда феъллар ҳаракат номи шаклида берилади.

Ҳаракат номи шаклидаги феъллар мақол, ҳикматли сўз ва шиорлар тилида кенг қўлланади ва кучли оҳангда талаффуз қилинади.

171- машқ. Гапларни кўчириб, ҳаракат номларини топиб, тагига чизинг. Қандай қўшимчалар билан ясалганини тушунтиринг.

1. Елнинг иши совурмоқ, ўтнинг иши қовурмоқ.
2. Гапда қанқув ёмон — дардда санчув ёмон.
3. Тиз чўкиб яшагунча, тик туриб ўлмоқ яхши.
4. Ўқишиш — улфайиш. (*Мақоллар.*)
5. Ўқишининг эрта-кечи бўлмайди.
6. Чопиш-югуриш. Бу кишини соғлом қилади.
7. Меҳнатни қадрламоқ, севмоқ керак.
8. Қатор-қатор тимларни томоша қилишини, биттасини қолдирмасдан кезиб чиқишини яхши кўраман. (*O.*)

60- топшириқ. Ўқи, бор, ёз, ёт, кел, кел феълларидан сифатдош, равишдош ва ҳаракат номи ясаб, гап тузинг. Уларнинг маъносини, галдаги вазифасини тушунтиринг.

132- §. Феъл замонлари. Феъллардаги замон иш-ҳаракатнинг нутқ сўзланиб турган пайтга муносабати билан аниқланади.

Иш-ҳаракат нутқ сўзланиб турган пайтдан олдин, нутқ сўзланаётган пайтда, ундан сўнг бажарилиши мумкин. Шунга кўра, феъл уч замоннинг бирида (ўтган, ҳозирги, келаси) бўлади. Масалан, *бордим* (ўтган замон), *боряпман* (ҳозирги замон), *бормоқчиман* (келаси замон).

133- §. Ўтган замон феъли иш-ҳаракатнинг нутқ сўзланиб турган пайтдан илгари юз берганлиги ёки юз бермаганлигини ифодалайди: *У мажлисга ўз вақтида келди. Мен бу киши билан илгари дам олиш уйида танишган эдим.*

Ўтган замон феъли феъл негизига -ди, -ган (эди), -ётган эди, -моқда эди, -б (-иб) эди, -р (-ар) эди, -моқчи эди, -диган эди қўшимчалари ва ундан сўнг тўсловчи қўшимчаларни биринкириш орқали ясалади.

Бирлик	Кўплик
I ш. ёз+ди+м	ёз+ди+к
II ш. ёз+ди+нг	ёз+ди+нгиз
III ш. ёз+ди	ёз+ди+(лар)
Бирлик	Кўплик
I ш. ёз+ган+ман (ёзган эдим)	ёз+ган+миз (ёзган эдик)
II ш. ёз+ган+сан (ёзган эдинг)	ёз+ган+сиз (ёзган эдингиз)
III ш. ёз+ган (ёзган эди)	ёз+ган+лар (ёзган эди+лар)
Бирлик	Кўплик
I ш. ўқи+б+ман (ўқиб эди+м)	ўқи+б+миз (ўқиб эди+к)
II ш. ўқи+б+сан (ўқиб эди+нг)	ўқи+б+сиз (ўқиб эди+нгиз)
III ш. ўқи+б+ди (ўқиб эди)	ўқи+б+ди (лар) (ўқиб эди+лар)
134- §. Ҳозирги замон феъли. Ҳаракатнинг нутқ сўзланиб турган пайтда бажарилишини ва ундан кейин ҳам давом этишини ифодалайди.	
Ҳозирги замон феъли феъл негизига -а (-й), -яп, -ётуб, -ётири, -моқда қўшимчалари ва ундан сўнг тусловчи қўшимчаларни бириктириш орқали ҳосил бўлади.	
Бирлик	Кўплик
I ш. бор+а+ман	бор+а+миз
II ш. бор+а+сан	бор+а+сиз
III ш. бор+а+ди	бор+а+ди (лар)
Бирлик	Кўплик
I ш. бор+яп+ман	бор+яп+миз
II ш. бор+яп+сан	бор+яп+сиз
III ш. бор+яп+ти	бор+яп+ти (лар)
135- §. Келаси замон феъли ҳаракатнинг нутқ сўзланиб турган пайтдан сўнг (келажакда) бажарилишини гумон, тахмин йўли билан ифодалайди. Келаси замон феъли феъл негизига -р (-ар), -моқчи, -диган қўшимчалари ва ундан сўнг тусловчиларни бириктириш орқали ясалади.	
Бирлик	Кўплик
I ш. бор+ар+ман	бор+ар+миз
II ш. бор+ар+сан	бор+ар+сиз
III ш. бор+ар	бор+ар (лар)
I. ш. бор+моқчи+ман	бор+моқчи+миз
II. ш. бор+моқчи+сан	бор+моқчи+сиз
III. ш. бор+моқчи	бор+моқчи(лар)

Феълнинг замон шакллари контекст ва нутқ вазиятидан келиб чиқиб нутқда турли экспрессив ва кўчма маъноларни ифодалай олади. Масалан:

1. Ўтган замон шакли келаси замон маъносида: *Кўрмаган бўлсак, энди кўрамиз. Нима дединг? (Нима дейсан маъносида.)*

2. Ҳозирги замон шакли ўтган замон маъносида: *Индамай турсам, мен билан кўришишмай кетяпти. Ҳайрон бўлдим.*

3. Ҳозирги замон шакли келаси замон маъносида: *Дарс машғулотлари камайтириляпти.*

Феъл замон шаклларининг қўлланиши бадиий асарнинг жаңр хусусиятлари, нутқ услубларига кўра ҳам фарқланади.

172- машқ. Гапларни кўчиринг. Феълларни топиб, замонини аниқланг. Ҳар бир замондаги феълни алоҳида-алоҳида таърифланг, ясалашини тушунтиринг.

1. Қуёш аста-секин ўз ётоғига ботмоқда. Мавлон билан Наврўз колхознинг пахтасини ғайрат билан тераётган ёшларнинг ишларидан ҳайрон қолмоқда. (С. Аҳм.) 2. Еридан айрилган етти йил йиглар, элидан айрилган ўлгунча йиглар. 3. Иш иштаҳа очар, дангаса ишдан қочар. (Мақоллар.) 4. Аҳмад Ҳусайн бекорчиликдан улар қаторига чордана қурди. (О.) 5. Туркистон Ҳарбий округи ўз ихтиёридаги машиналарни чўлни ўзлаштиришга беряпти. (С. Аҳм.) 6. Шу сайҳонликнинг ҳар ер-ҳар ерида қамишлар ўсиб ётарди. (С. Аҳм.) 7. Беғубор жуда ҳам беғубор шабада эсди. (С. Аҳм.) 8. Фақат агар унасанг, Яна бир шарт қўярдим. (Ҳ. О.) 9. Эрта баҳор, дараҳтлар эндиғина куртак чиқармоқда. (Ж. Шарипов.) 10. Кабинетда ўринбосарнинг ёлғиз ўзи ўтирибди. (Е. Ш.) 11. Мен раисимизга, бутун правление аъзоларига битта савол бермоқчиман. (А. Қ.)

61- топшириқ. -ди, -моқчи, -р (ар) ҳамда тусловчи қўшимчаларни бириттириш йўли билан феълнинг уч замонини ясанг. Улар иштироқида гап тузинг. Маъносидаги фарқни айтинг.

136- §. Феъл майллари. Ҳаракат-ҳолат билан субъект ўртасидаги алоқанинг воқеликка муносабати майл орқали ифодаланади. Бундай алоқа ва муносабат турличадир, шунга кўра феълларда асосан уч хил майл мавжуд: 1) аниқлик майли; 2) буйруқ-истак майли; 3) шарт майли.

Аниқлик майли иш-ҳаракатнинг уч замондан бирида

бажарилиши ёки бажарилмаслигини ифодалайди: кетди (ўтган замон), **кетялти** (ҳозирги замон), **кетмоқчи** (ке-
ласи замон).

Буйруқ-истак майли буюриш, илтимос, маслаҳат,
чақириш каби маъноларни ифодалайди. Масалан:

Бирлик

I ш. бор+ай, ўқи+й
II ш. бор+гин, ўқи+гин
III ш. бор+син, ўқи+син

бор+ай+лик, ўқи+й+лик
бор+ингиз, ўқи+ингиз
бор+син (лар), ўқи+син (лар)

Кўплик

Шарт майли иш-ҳаракатнинг юзага чиқиши шарт
қилиб қўйилганлигини ифодалайди.

У феъл ўзагига **-са**, қўшимчасини қўшиш билан яса-
либ, қўйидагича тусланади:

Бирлик

I ш. бор+са+m
II ш. бор+са+ng
III ш. бор+са

бор+са+k
бор+са+ngиз
бор+са (лар)

Кўплик

(**-лар** бундай вақтда кўпроқ кесатиқ, пичинг маъно-
ларини ифодалайди.)

Бирлик

I ш. бор+са+m эди
II ш. бор+са+ng эди
III ш. бор+са эди

бор+са+k эди
бор+са+ngиз эди
бор+са+ (лар) эди

Кўплик

Феъл майллари ўз хусусиятларига эга бўлиши билан
бирга турли модал маъноларни ҳам ифодалайди. Нутқ
талабига кўра майлларнинг бири ўрнида иккинчисини
қўллаш мумкин. Масалан:

1. Ижро майли буйруқ майли маъносида:— *Борасан. Қани кетдик!*

2. Буйруқ майли шарт майли маъносида: *Жавоб бер-
син, баҳо қўямиз // Жавоб берса, баҳо қўямиз.*

3. Шарт майли буйруқ майли маъносида: *Ишласанг
тишлайсан // Ишла, тишлайсан.*

62-топшириқ. Аниқлик майли, буйруқ-истак майли ва шарт
майлидаги феъл иштирок этган тўқиизта гап тузиб, уларнинг маъ-
носидаги фарқларни айтинг.

173- машқ. Матнни кўчирив, феъл майлларининг турини аниқ-
ланг, фарқларини тушунтиринг.

1. Маҳаллаларда хотин-қизларни йиғиб мажлислар
ўтказамиз. (Ё.Ш.) 2. Орзу қанот бағишлиайди. (Мақол.)

3. Фарзандларимиз мурод-мақсадига етишсин, қўша қаришсин. (Ҳ. F.) 4. Даврон суринг, ҳур меҳнатда, асти толманг. (А. Пўлат.) 5. Кел, ипакдек соchlарингга мен Нурдан лента ясаб тақайин. (Мир.м.) 6. Сиз яратган «Ҳамса» санъат оламида чинакам мўъжиза бўлди. Шу билан қаноатланиб қолманг. (Л. Батъ.) 7. Шамол қофоз бурдаларини ҳовли томонга супуриб кетди. (С. Аҳм.) 8. У кечаси билан тўлғаниб чиқди. Начора, созланган тор фарёдсиз узилмайди. (Ў. Ҳ.) 9. Биз сизларнинг ўқиганингизни кўриб юрсак ҳам кифоя. (П. Т.) 10. Агар кучим, қувватим етса, одамларнинг жон олгувчи татьналирига яна чидаш берар эдим, лекин мажолим қолмади. (М. Исл.) 11. Отингни эгарла, ҳамроҳ бўламиз. 12. Ҳаёт мана шу оқар сувдай оқар экан, умр ҳам ўта берар экан. (С. Ан.)

174- машқ. Матнни ўқинг. Феълнинг равишдош, сифатдош каби шаклларининг ва қўшма феълларнинг маъноларини изоҳланг.

ХАЛҚ САНЪАТИНИНГ ШУҲРАТИ

Буюмлар инсонга хос бўлган ахлоқий, эстетик ва ижтимоний тушунчаларни ҳам ўзига мос ифода воситалари асосида акс эттиради. Инсон ўзига фойдали бўлган нарсани, маълум эҳтиёжни қондирувчи буюмнинг чиройли бўлишига аҳамият беради. Киши мебель танлаганда, чойнак-пиёла олганда, кийим харид қилганда унинг ранги, нақши ва гўзаллигига эътибор қиласди. Бинобарин, дераза пардаларининг гўзаллиги, стол-стулларнинг қулийлиги ва чиройлилиги, эшик ва хонтахталарнинг нақшлари, иморат пештоқлари ва деворларининг чиройли безатилиши, турли-туман буюмлар кишининг ахлоқий тушунчаларига ҳам таъсири этади.

Санъатни яратадиган халқ уни тушунадиган санъат мухлисларини ҳам вояга етказади. Акс ҳолда нафосат уруғлари кўкармай, унмай, ўсмай қолади.

Халқ амалий санъатининг ҳаётга татбиқ этилиши жуда кўп моддий ва маънавий шарт-шароитларнинг ўйғун мавжудлигини тақозо этади. Мисол учун Бухородаги «Интурист» меҳмонхонасининг ичига халқ мотивлари асосида ишланган, мисга ўйиб битилган тасвиirlар, Тошкентдаги «Ўзбекистон» меҳмонхонасининг ичидаги турли амалий безак санъати намуналари бунга мисол бўла олади. Ўзбекистонда қўли гул усталар, дили баҳор нақошлар, меҳри дарё чеварлар кўп. Жумҳуриятимизнинг

ганчкорлик санъати оламга машҳур. Унинг ўзига хос эстетик кўрки ва миллий гўзаллиги А. Навоий номидаги давлат академик опера ва балет катта театри, Тошкентдаги Ўзбекистон халқлари тарихи музейи деворларида яққол намоён бўлади.

Тошпўлат Арслонкулов, Абдулла Болтаев, уста Ширин Муродов, Чингиз Аҳмаров, Қули Жалолов, Шамсиддин Рафуров, Болта Жўраев, Юсуфали Мусаев, Ёқубжон Рауфов, Саидаҳмад Норқўзиевларнинг санъати миллий ифтихоримизга айланиб қолди.

Замонавий биноларнинг ташки ва ички кўринишининг гўзал бўлиши учун уста Маҳмуд Усмонов, Тоҳир Тўхтакўжаев, Жалил Ҳакимовлар астойдил меҳнат қилмоқдалар. Ўз устозлари йўлини ижодий давом эттирган ва ганч ўймакорлиги соҳасида юксак маҳорат кўрсатаётган уста Маҳмуд Усмонов жумҳуриятимизда ўз мактабини яратди. Унинг қатор шогирдлари уста қўлидан ишини олмоқдалар.

Ёғоч ўймокорлиги ҳам жумҳуриятимизда кенг тараққий этган. Имаратларнинг пештоқлари, устунлари, эшик ва дарвозалар нозик ўймакорлик гуллари билан безатилган, киши дилига худди мусиқа оҳангидай илиқ таъсир этади. Арча, чинор, қайраоч, ёнғоқ ва тут дараҳтлари ўз табиий қаттиқлиги ва ранг-баранг туси билан ўймакор усталарнинг доимий ишлов материали бўлган. Усталар қаттиқ дараҳтлардан хонтаҳта, эшик ва устунлар ясад аждодлар санъатини авлодлар умрига улаганлар.

Халқимиз орасида кенг тарқалган амалий санъат турларидан бири сопол буюмларидир. Сопол буюмларининг умри халқимиз умри билан тенг. Инсон пайдо бўлиши билан уй-рўзғори буюмларини биринчи навбатда лойдан ясаган, уни пишириш йўлларини излаган, астасекин буюмларнинг бадий томонларини ўйлаган.

Ўзбекистон сопол буюмлари ниҳоятда хилма-хил ва ранг-баранг. Бир водийнинг сопол буюмлари бошқасини-кига ўхшамайди, бир шаҳар кулоллари бошқа жойнинг усталарига ўхшатмай амалий санъат асарларини яратишга интиладилар. Самарқанд, Хева, Бухоро, Шаҳрисабз, Тошкент, Нурумсой кулоллари ўз услуби, ўз санъати ва маҳорати мактабларига эга.

А. Ҳазратқулов, У. Жўрақулов сингари авлод-аждодлари кулол ўтган усталар халқимиз амалий санъатининг эстетикаси йўлида ажойиб хазина қолдирадилар.

Халқ амалий санъати ниҳоятда сержило ва сертармоқли. Қаштачилар, заргарлар, гиламдўзлар, металлардан чойдиш, мис чойнак, баркаш ва офтоба ишлайдиган кандакорлар, қуёш нурларидан андоза олган зардўзчилар, баҳор нағислигини гулларга жойлаган атлас тўқувчиликлар, дўппидўзлар бор.

Фазилат Сайдалиева томонидан зар билан тикилган А. Навоий ва Бобур портретларини қаштачилик санъатимизнинг юксак намуналари деса бўлади. Бухоронинг Уба қишлоғида яшайдиган Ҳамро опа Раҳимова ясаган ўйинчоқлар жумҳуриятимиздагина эмас, ҳатто чет элларда ҳам машҳур.

(«Фан ва турмуш» ж. дан)

РАВИШ

137- §. Иш-ҳаракат билан боғлиқ бўлган пайт, сабаб, ўрин, даражага миқдор каби маъноларни билдирадиган сўзлар туркуми равиш ҳисобланади. Равишилар ҳаракат билан боғлиқ ҳолатларни ифодалаши, ўзига хос ясовчи қўшимчаларни олиши, гапда кўпинча ҳол вазифасида келиши билан бошқа сўз туркумларидан ажralиб туради. Масалан: *Аброр жўрттага кетиб қолди. Мен кечқурун йўлга тушаман. Биз кўп ўқиймиз.* Равишилар одатда феълга боғланниб келади.

138- §. Равишилар тузилишига кўра содда, қўшма ва жуфт бўлади. Содда равишилар биргина ўзакдан ташкил топади, туб ва ясама бўлади. Ясовчи қўшимчаларсиз қўлланадиган равишилар туб равишилардир: *тез, секин, кейин, оз, пича, бугун, кеча, қасддан, тўсатдан, бирдан.*

Равиш ясовчи қўшимчалар билан ясалган равишилар ясама равишилар ҳисобланади: *ойдай, мардларча, ғолибона, мардона, қаҳрамонларча.*

Равишилар қўйидаги қўшимчалар ёрдамида ясалади:

-ан: *тахминан, қисман, тасодифан, асосан;*

-сиз: *тўхтовсиз, чексиз, сўзсиз;*

-лаб: *граммлаб, тонналаб, килолаб, аравалаб, кўплаб;*

-ча: *ўзбекча, бухороча, чопганича, янгича;*

-ларча: *йилларча, ҳарбийларча, бепарволарча, ўртоқларча;*

-н (ин): *яширин, ёзин-қишин;*

-инча: *яширинча, кўпинча;*

-лигича: *тириклигича, бутунлигича;*

-она: *дўйстона, камтарона, ғойибона, халқона;*

-лай (-лайн): бутунлай, тирикрай, тириклайн;
-дай (-дек): сутдай, метиндай пахтадек, муштдек.

175- машқ. Гапларни кўчиринг, равишларнинг тагига чизинг. Ясама равишларни қайси сўз туркумидан ясалганини тушунтиринг. Равишларга сўз ургусини қўйинг. Ургу олмайдиган равиш ясовчиларга алоҳида изоҳ беринг.

1. Йигитали ноилож ўз ҳисобидан бир йилга таътил олди. (С. Н.) 2. Хотинларнинг баъзилари қизиқсанларидан сочвонларини қия очиб, Йўлчига яширинча мўралайди. (О.) 3. Орёл шаҳри учун сен қилган жангни, Йилларча сўзлашар ёшу қарига. (Х. О.) 4. Ҳайдар ота ундан жавоб олмаслигига кўзи етиб, шошганича ичкарига кирди. (А. К.) 5. Кимни койиди, кимни оталарча мақтади. (О.) 6. Қисқаси, илгаридан оддий бир тенгдошдек бўлиб келган бир қиз энди Элмурод учун сирли бир кимсага айланиб борар эди. (П. Т.) 7. Рашиднинг мардона кураши эди. (Ш.) 8. Улар шаҳарни ишғол қилишда астойдил курашдилар. (Ш.)

139- §. Бири мустақил қўллана олмайдиган, иккинчи чиси мустақил маънога эга бўлган ўзак ёки ҳар иккаласи мустақил ҳолда маъно ифодалайдиган ўзакдан ташкил топган равишлар қўшма равишлар саналади.

Иккала қисми ҳам мустақил маъно ифодалайдиган қўшма равишлар ажратиб ёзилади: *бир оз, бир йўла, ҳамма вақт;*

Ҳар, ҳеч сўзлари иштирокидаги равишлар ҳам ажратиб ёзилади: бир нафас, бир зум, шу вақт, шу ерда, бу ёққа, ҳар кун, ҳеч маҳал;

Бирор қисми мустақил маъно ифодаламайдиган қўшма равишлар эса қўшиб ёзилади: *алламаҳалгача, аллақаерда, аллақачон, озмунча, бирпас* каби (бу равишлар таркибида келган *алла, мунча, пас* сўзлари мустақил ҳолда маъно ифодаламайди).

Баъзи антоним сўзларни жуфтлашдан, от ёки олмошнинг баъзи турларини ўрин-пайт, жўналиш, чиқиш келишикларидан бирида такрорлаш орқали **жуфт** равишлар ҳосил қилинади. Улар орасига ёзувда чизиқча қўйилади: *аста-секин, кеча-кундуз, йилдан-йилга, кўчама-кўча.*

Равишларнинг жуфт шакли умумлаштириш ёки тахмин маъноларини билдиради ва белгини кучли оттенка билан ифодалашда қўлланади. Равишлар такрор қўлланганда ҳам белгини кучайтириб ифодалаш хусусиятига эга бўлади: *Ўша кунлар сира-сира эсимдан чиқмайди.*

140- §. Равишларнинг маъно ва грамматик жиҳатдан

турлари. Равишилар маъно ва грамматик хусусиятларига кўра ҳолат равиши, даражаки миқдор равиши, пайт равиши, ўрин равиши каби турларга бўлинади.

Ҳолат равиши иш-ҳаракатнинг қандай ҳолатда ёки қай тарзда бажарилганлигини кўрсатади: *аста, секин, тез (тез-тез), яёв, пиёда, дарров, дарҳол, бирдан, тўсатдан, қаҳрамонларча, қўйқисдан, бирма-бир, қўлма-қўл, қушидай*.

Даражаки миқдор равишилари одатда иш-ҳаракатнинг миқдорини, даражасини англатади: *кўп, оз, бир оз, кам, сал, пича, хиёл* (миқдор равишилари), *жуда, фоят, обдан, ниҳоятда, асло, сира* (даражаки равишилари).

Пайт равиши иш-ҳаракатнинг бажарилиш пайтини кўрсатади: *эрта, индин* (эрта-индин), *кеча кундуз, (кеча-кундуз)*, *эрталаб, сўнг, илгари, кейин, ҳали, ҳамиша, бултур, аллақачон, яқинда, йилдан-йилга, қишин-ёзин*.

Ўрин равиши иш-ҳаракатнинг бажарилиш ўринини билдиради. Масалан: *нари, бери (нари-бери)*, *унда, бунда (унда-бунда)*, *аллақаерда, аллақаерга, қуийда*.

176- машқ. Равишиларни аниқлаб, турини айтинг, ҳар бирини алоҳида изоҳланг, фарқларини тушунтиринг.

1. Ўз онамни элас-элас хотирлайман. Пастак шифтли уйда, дераза тагида нуқул осмонга қараб ётар эди. (Ў. Ҳ.) 2. Ҳеч қачон хиёнат қилмаганман, энди қилмоқчиманми? (Ш.) 3. Совхоз ерида бир баландгина тепалик бор. (Ш.) 4. Мамаражабов арава кетидан анчагача қараб турди. (Ф. Ниёзий.) 5. Ака-ука бир-бирларига қарамай, жадал юриб юқори қаватга чиқишиди. (С. Аҳм.) 6. Манзуранинг ҳовлиси икки маҳалла нарида эди. (О.) 7. Энди-чи, энди кўчаларимизда автомобиллар тинимсиз қатнайди. (Газ.) 8. Баҳузур ўтириб гаплашаверинглар. (О.) 9. Гулсум опа Чавандозни «юмшатиб» ишни битириш учун жўрттага ҳар сўзида бир «Холмат ака»ни тилга олиб жуда мулојим гапирди. (О. Е.) 10. Гўё бу ерларга қандайdir даҳшатли ёвуз куч бостириб келган-у, бешафқат қўллари билан ҳамма ёқни ғижимлаб ташланган. (Ж. Абд.)

177- машқ. Ўқинг. Равишиларни топиб, маъносини ва тузилишига кўра турини айтинг.

1. Бир оздан кейин ўзинг билан алоҳида эркажасига гаплашамиз. (Д. Нурий). 2. Зумрад оҳиста ёнига чўқ-қайган онасининг тиззаларини қучоқлади. (О.) 3. Озроқ подада юрмаса, биз бунда эплолмайдиганга ўхшаймиз.

(С. Аҳм.) 4. Меҳмонни уйга олиб кир, мен отга пича ем ташлаб қўяй. (С. Аҳм.) 5. Ҳали у ердан, ҳали бу ердан гулдурос чапаклар эшитилди. (Н. Бирюков.) 6. Тоға олдинда, Икромжон кейинда бир-бири билан гаплашмай катта кўчага етишди. (С. Аҳм.) 7. Боя елдай учиб кетаётган одам энди шошилмасди. (С. Аҳм.) 8. Поезд мени сершовқин станцияга ташлаб, яна қичқирганича, олдинга интилди. (С. Аҳм.) 9. Элмурод янгича ҳаёт бошлади. (Ш.) 10.— Тўғри бу ҳодисани дengиз бактериясига алоқаси йўқ,— деди йирик кўзларини хиёл сузиб қолган олим (Ж. Абд.) 11. Шундай қилиб, она шомга яқин ўғлини яна олис қишлоққа кузатди. (С. Н.)

141- §. Равишларнинг қўлланиш хусусияти. Равишлар иш-ҳаракат, ҳолатнинг қай тарзда ва қай даражада бажарилганлиги, бажарилиш ўрни, пайтини ифодалагани учун ҳам гапда ҳол вазифасида қўлланади. Равишлар от ўрнида қўлланганда унга хос белги маъноси кучлироқ ифодаланади: *Кўпдан қуёён қочиб қутулмас.* (*Мақол.*)

Равишларни қўллашда услубий хослигига ҳам эътибор бериш лозим. *Мўл, заррача, пича, обдан, мардона* кабилар бадиий нутқда фаол ишлатилса, *кўп, жиндай, озроқ, тоза, зўр* каби равишлар жонли сўзлашувга хосдир.

178- машқ. Ўзингиз мустақил равишда бирорта бадиий асарнинг биринчи икки саҳифасини ўқинг. Равиш иштирок этган гапларни кўчиринг, уларнинг гапдаги вазифасини айтинг.

179- машқ. Гапларни ўқинг. Равишларнинг услубий қўлланиш хусусиятларини изоҳланг.

1. Горкунов мажбуран бу ишга қўл урган эди. (Ш.)
2. Қадамимни атайлаб дадил-дадил босаман... (П. Қ.)
3. Батальон эрталаб қишлоққа етиб келди. (Ш.) 4. Барча бирдай тинмай ишларди. (У.) 5. Мардона ишладик, силжидик олға! Мардларча золимнинг бўғизидан тутдик. (*«Хат»дан.*) 6. Ёрмат ҳамма нарсани, тартибсиз бўлса ҳам, батафсил айтиб берди. (О.) 7. Обдан чиниқкан йигит, унга берилган овқат беҳуда кетмайди. (О.) 8. Эрталаб етиб бордим. Кечқурун уйга қайтиб келдим. 9. Барча ишлар тезгина ҳал бўлди. Иш қаердан бошланган бўлса, гапни ҳам ўша ердан бошлай беринг.

180- машқ. Гапларни ўқиб, мустақил сўзларнинг маъно ва грамматик хусусиятларини намунадагидек изоҳланг.

Н а м у н а . *Бугун қишлоққа жўнаймиз.* *Бугун* — ра-

виш, содда, пайт равиши, гапда пайт ҳоли вазифасида; қишлоққа — от, т. от, ж. к., содда, гапда ўрин ҳоли вазифасида...

1. Улар тасодифан учрашиб қолган эди. (Ж. Абд.)
2. Айвонда Жаннат хола билан Низомжон гаплашиб ўтиради. (С. Аҳм.) 3. Колхоз идорасининг ёнгинасида янги клуб қад кўтариб турибди. (С. Кароматов.) 4. 20 августда Самарқандга қайтиб кетаман. (М. Қориев.) 5. Темиржон совуқ еб, увшаган бармоқларини ишқалади. (Ж. Абд.) 6. Яқин-йироқдаги манзиллардан одамлар ёрдамга келяпти. (Ж. Абд.) 7. Марғилонга олиб борадиган йўл гавжум эди. (С. Аҳм.) 8. Озода даставвал Мирзачўлга шу машинада келганини эслади.

181- машқ. Матнни ифодали ўқинг. Ясама мустақил сўзларни топиб, ясалишини тушунтириңг. Қўшма ва жуфт сўзларга алоҳида изоҳ беринг.

ДОЛОРЕС ИБАРРУРИ

Уни бир бор кўришга ва овозини эшлишига мусассар бўлган киши, уни сира унотолмайди. У испан тилида жўшиб сўзлайди. Лекин у шундай истеъдодли нотиқки, уни ҳамма тушуна олади. Бу ном барча халқларнинг меҳр ва муҳаббатини қозонди. Бу аёл — Пасионария — Долорес Ибаррури!

Долорес Ибаррури — Пасионария (Оташин) номи билан машҳур, испан халқининг жасур қизи, халқаро ишчилар ҳаракатининг, бутун дунё тинчлик тарафдорлари ҳаракатининг, халқаро хотин-қизлар ҳаракатининг йирик ва донгдор арбобларидан бири 1895 йил 9 декабря Испанияда кон саноати ишчиси оиласида дунёга келган Долорес 22 ёшида социалистлар ташкилотига аъзо бўлиб киради ва ишчилар синфи матбуотида Пасионария тахаллуси билан оташин тарбибот олиб боради. У Халқаро ишчилар ҳаракатининг фаол иштирокчиси сифатида Коминтернинг VII конгрессида (1935 й.) унинг Ижроия Комитети аъзолигига кандидат қилиб сайланди, 1937 йилда кортес (парламент) раиси ўринbosарлигига сайланди.

Испан халқининг фашизмга қарши олиб борган миллий-революцион уруши даврида (1936—1939 йй.) Долорес Ибаррурининг сиёсий арбоб ва жўшқин ташкилотчилик фаолияти айниқса катта куч билан намоён бўлди.

Испания буржуа ҳукумати Ибаррурини коммунистик

ва революцион фаолияти учун олти марта озодликдағ маҳрум этди. Франконинг фашистик ҳукумати келгандан (1939 й.) бўён Долорес Ибаррури ватанидан ташқарида, эмиграцияда яшашга мажбур этилди.

Иккинчи жаҳон уруши йилларида Ибаррури бутун файрати ва ташкилотчилик қобилиятини фашизмга ҳарши курашга қаратди. У фашизмга нисбатан ўзидағи нафратни, озодликка ҳурмат ва садоқатни фарзандига ҳам бера олган эди. Унинг ўғли Рубен Ибаррури Сталинград учун бўлган жангларда 19 ёшида қаҳрамонларча ҳалок бўлди.

Испания Коммунистлар партияси жуда заҳматли курараш йўлини босиб ўтди. Партия билан биргаликда партия Марказий Комитетининг котиби (1932—1942 йй.), партияниң бош котиби (1942—1960 йй.) бўлган Ибаррури ҳам ўсади, чиниқди. 1954 йилда унинг раҳбарлиги остида партияниң V съездиде бўлиб ўтди. У партияниң Устав ва дастурини ишлаб чиқкан эди. Испания коммунистларининг VI съезди Долорес Ибаррурини партияниң раиси этиб сайдади. Д. Ибаррури бир қанча назарий асарлар ва публицистик мақолаларнинг авторидир.

Долорес Ибаррури 1945 йилда Халқаро хотин-қизлар Демократия Федерациясини тузишда фаол қатнашди ва унинг вице-президенти вазифасига сайланди.

Испан халқининг жасур фарзанди, Испания Коммунистлар партиясининг раиси, Халқаро хотин-қизлар Демократик Федерациясининг фахрий вице-президенти, оташин революционер ва тинчлик учун тинимсиз курашчи Долорес Ибаррури 1963 йилда «Халқлар ўртасида тинчликни мустаҳкамлаш учун» Халқаро мукофотга сазовор бўлди.

(«Саодат» ж-дан.)

ЕРДАМЧИ СҮЗЛАР

142- §. Лексик маъно ифодаламай, мустақил сўзлар орасидаги грамматик муносабатни ифодалайдиган, баъзан сўзга қўшимча маъно қўшадиган сўзлар ёрдамчи сўзлар саналади: *дафтар ва қалам; қалам билан ёздим. Яхши куйлар экан-а?*

Ёрдамчи сўзлар гапда, одатда, гап бўлаги вазифасини бажармайди.

Ёрдамчи сўзлар қўйидаги турларга бўлинади: 1) кўмакчилар; 2) боғловчилар; 3) юкламалар; 4) модал сўзлар; 5) ундов ва тақлидий сўзлар.

ҚУМАКЧИЛАР

143- §. От ёки отлашган сўзниңг бошқа бир сўзга (кўпроқ феълга) тобеланишини кўрсатувчи ёрдамчи сўз кўмакчи ҳисобланади.

Кўмакчи от ёки отлашган сўздан кейин келади: *Укам учун китоб олдик. Карим билан кинога бордим.*

Кўмакчилар қайси мустақил сўздан ўсиб чиққанлиги-га қараб, соф кўмакчилар ва кўмакчи вазифасида қўлланувчи сўзларга бўлинади.

Соф кўмакчилар — асл лексик маъносини бутунлай йўқотиб, бутунлай кўмакчига айланиб қолган сўзлардир: *билин, учун, каби, сингари, сайин, сари.*

Кўмакчи вазифасида қўлланувчи сўзлар — от ёки ра-вишдан ўсиб чиққан кўмакчилар: *устидан, юзасидан, орқали, томон, ташқари, ҳақида, хусусида.*

Баъзилари феълнинг равишдош, сифатдош формали-ридан ўсиб чиққан: *бўйлаб, қараб, кўра, яраша, қараганда қаби.* Булардан *бўйлаб, қараб-қараб, кўра, яраша, тортиб* равишдошдан; *қараганда* эса сифатдошдан кўмакчига айланган сўзлардир.

Билин, учун кўмакчилари поэтик нутқда *-ла, -чун* тарзида қисқа шаклда ҳам қўлланади. Бунда улар ўзи-дан олдинги сўз билан чизиқча орқали ажратиб ёзилади.

Сенинг-ла, дўст бўлиб вафо кўрди ким?..
Яхшидир ўлмоқлик сен-ла курашда. (Ҳ. О.)

182- машқ. Ҳқинг. Кўмакчиларни топиб, уларнинг турларини айтинг. Қайси мустақил сўз билан бирга қўллананаётганини аниқланг ва маъноларини тушунтиринг.

1. Кейинги икки ой ичida Манзура опанинг ўртоқла-ридан мутлақо хат-хабар келмай қўйди. (Ў. Усмонов.)
2. Аммо йигитнинг овози ўчмасдан бурун ўзи от-поти билан ағдарилиб тушди. (Ҳ. Т.)
3. Икки ярим йил аввал меҳрибон ота уни шаҳарга узатади. (О.)
4. Сиддиқжон сукут қилганича қимирламай ўтирад экан, қизарган пешанаси билан бурнининг учи тердан ялтиради. (А. К.)
5. Сиддиқжон бу чор қиз боланинг тақдирни тўғрисида ўйлар эди. (А. К.)
6. Арилар тўдаси ўзини қоп ичига урди. (Ҳ. Н.)
7. Қишининг биринчи ярми қуруқ келди.

Икки мартағина қор ёғиб, тезда эриб кетди. (П. Т.)
8. Иўқ, Гулсум опанинг гаплари Машраб учун янгилик
эмас. (П. К.) 9. ...Улар тонг билан йўлга чиққан эдилар.
(Ж. Абд.)

63-топшириқ. Ўзингиз мустақил равишда «Ўзбекистон адабиёти ва санъати» рўзномасидаги бирор мақолани ўқиб, кўмакчиларни топинг. Грамматик хусусиятига тўлиқ тавсиф беринг.

144- §. Кўмакчилар гапдаги вазифаси жиҳатидан келишкларга яқин туради. Баъзан кўмакчилар келишик бажарган вазифани бажаради. Шунинг учун ҳам айрим кўмакчилар, келишик ўрнида қўлланиши мумкин ёки айрим келишикларни кўмакчилар ўрнида ишлатиш гапнинг мазмунига, қурилишига зарар келтирмайди: қаламда ёздим — қалам билан ёздим, қишлоққа шу йўл билан борилади — қишлоққа шу йўлдан борилади каби.

Қуйидаги фаол қўлланадиган кўмакчиларни билиб олинг, ёзилишига аҳамият қилинг: *азбаройи, билан, учун, каби, илгари, бурун, бош, чоғли, қадар, сайин, бўйича, орқа, орқали, ора, сабабли, кўра, ён, ич, қараши, ўрта, томон, қараб, қарамасдан, қарамай, сўнг, бошқа, кейин, ташқари, ост, уст, таг, буён, бери, бўлак, ўзга, нари, сингари, янглиғ, сари, туфайли, оша, бўйлаб, узра, ичра, деган, олд, чамаси, ҳақида, тўғрисида, ҳолда, йўсинда, асосан, қадар, қарагандা, доир, биноан, муовфиқ каби.*

64-топшириқ. билан (-ла), учун (-чун), кўра, қарагандা, сингари кўмакчилари иштироқида бир нечта гап тузинг. Баъзинлари ўрнида келишикларни ишлатиб кўринг. Фарқини тушунтиринг.

БОҒЛОВЧИЛАР

145- §. Гапнинг уюшиқ бўлакларини, қўшма гап таркибидаги содда гапларни бир-бирига боғлаш учун хизмат қиладиган *ва, ҳам, ҳамда, аммо, лекин, бироқ, ёки, ёхуд, чунки, шунинг учун, токи* каби сўзлар боғловчиларни ташкил қиласди. Масалан: *Кўнғироқ чалинди ва дарс бошланди. Ўқитувчи ёки ўқувчилардан бири саҳнага чиқсан.*

Боғловчилар мустақил сўзи каби гапда гап бўлаги вазифасини бажара олмайди.

Боғловчилар маъно ва грамматик хусусиятига кўра икки хил бўлади:

1. Тенг боғловчилар (*ва, ҳам, бироқ, лекин, ёки дам-*

дам, баъзан каби). 2. Эргаштирувчи боғловчилар (чунки, шунинг учун, токи, негаки каби).

Боғловчилар якка ҳолда ҳам, тақрорланган ҳолда ҳам қўлланади: *ва, ҳамда, аммо, лекин, бироқ, балки, агар, башифти, чунки, гўё* каби боғловчилар одатда якка ҳолда ишлатилади, *баъзан, ё, ёки, гоҳ, дам, ҳам, гоҳо, хоҳ* каби боғловчилар кўпинча тақрорланиб қўлланилади: *Китоб ва дафтар. У ёэди, бироқ ўқимади. У ҳам ўқиди, ҳам ёэди. У дам куларди, дам йиғларди, Е сиз келинг, ё мен борай.*

183- машқ. Гапларни кўчириб, кўмакчи ва боғловчиларни топинг. фарқларини тушунтиринг.

Иссиқ кийинган йўловчилар дам-бадам бурун ва қулоқларини ушлаб, ўз ташвишлари билан югуриб-еладилар. (*Ў. Ў.*) 2. Буни Мамлакатининг онаси тезда пайқаб қолди-ю, лекин кимлигини ундан сўрамади. (*Ў. Ў.*) 3. Қамишлар орасида уларнинг боши гоҳ кўринади, гоҳ сувга шўнғигандек йўқ бўлиб кетади. (*С. Аҳм.*) 4. Зумрадни дам овутиб, дам эркалаб айвонга базўр бошлаб чиқди кампир. (*О.*) 5. Қорни фарч-фарч босиб чопқиллаб келган Барно икки қадам нарида тўхтади. (*О. Е.*) 6. Бўронбек қамчининг сопи билан Ибодилланинг кўкрагидан итариб Ойшабонунинг уйига кирди. (*Ҳ. Ф.*) 7. МТС да ҳам, районда ҳам, областда ҳам ундан ҳайиқишар ва унинг гапига қулоқ солишаарди. (*Г. Николаева.*) 8. Қум ва лой билан қўлларини ишқалаб, кенг юzlари ва бошлирини обдан ювдилар. (*О.*)

184- машқ. Үқинг. Боғловчиларни толиб, турини айтинг. Грамматик хусусиятларини изоҳланг.

1. Санобарнинг практикаси тугай деб қолди. Лекин ҳамон гаплашмаймиз. (*Ў. Ў.*) 2. Кеч куз бўлса ҳам ҳали унча совуқ тушмаган, аммо салқин этни жунжиктиради. (*Ў. Ў.*) 3. Назаримда, унинг бўғизига йиги тиқилиб қолган, шунинг учун овози бўғиқ ва ғамгин эди. (*П. Қ.*) 4. Асрлар бўйи сув чиқариш учун курашлар боради-ю, лекин бу кураш охирига етмай қолиб кетаверади. (*Ж. Абд.*) 5. У кетди... кетди-ю, хаёлимда ҳам ширин, ҳам аччиқ, ҳам қувноқ, ҳам аламли узуқ-юлуқ хотиралар қолди. (*Ў. Ҳ.*) 6. Икки дўст қўлларини бошлари остига ёстиқ қилиб қум устида чалқанча ётишар, гўё шу ҳолатлари билан роҳат қилмоқда эдилар. (*Ж. Абд.*) 7. У Икромжоннинг бир оёғи йўқлигини кўриб, юрати жиз этиб кетди. Аммо буни унга сездирмади. (*С. Аҳм.*)

8. Шамол гоҳ оч бўридай увиллар, гоҳ ўлим чангалига тушган мушукдай пихиллар, вифиллар, ҳеч нарса кўринмас эди. (А. К.)

ЮҚЛАМАЛАР

146- §. Сўзларга ёки гаплар мазмунига қўшимча маъно қўшадиган ёрдамчи сўз юклама саналади. Юкламалар тузилишига кўра икки хил бўлади:

1) айрим ёзиладиган ва нутқда алоҳида қўлланадиган сўз ҳолидаги юкламалар: *фақат, ҳолбуки, наҳотки, ҳатто, чунки, ахир* кабилар;

2) сўзларга қўшилиб ишлатиладиган қўшимча шаклидаги юкламалар: -им, -чи, -ку, -да, -у (-ю), -а (-я) каби.

Юкламалар маъно ва қўлланиш мақсадига кўра тўрт хил бўлади:

1. Сўроқ юкламалари: -ми, -чи, -а (-я) каби. Масалан: —*Футболга борасанми?*—*Сен-чи?*—*Бу бинони мен қурганман!*—*Сен-а?*

2. Таъкид юкламалари: -ку, -да, -у (-ю). Масалан: *Ўқтам-ку келди-я.* *Рустам келмади-да* каби, -у (-ю) юкламаси кўпинча тенг боғловчилар (*ва, лекин, бироқ, аммо*) ўрнида ишлатилади.

3. Айирув юкламалари: -гина, (-кина, -қина), фақат. Масалан: *Дарсга фақат Беҳзод келмади.*

4. Кучайтирув юкламалари: ахир, ҳатто (ҳаттоқи), -оқ (-ёқ) кабилар. Масалан: *Биз ҳатто якшанба кунлари ҳам дарс тайёрлаймиз.*

Юкламаларнинг баъзилари сўз ёки гапга сўроқ, таажжуб, кучайтирув, таъкид, айирув, гумон каби маъноларни қўшиш билан бирга, қўшма гап қисмларини, содда гапларда эса уюшиқ бўлакларни бир-бирига боғлаш учун хизмат қилади. Масалан: *Низомжон* — ўрнидан турди-да, ҳардамхаёллик билан кўчага кетди. (С. Аҳм.) Далада самовар шақиллаб қайнаб турса-да, теримчилар чой ичишига вақтни қизғанар эдилар (О.)

Юкламаларнинг -ми, -оқ (-ёқ), -гина (-кина, -қина) каби турлари сўзларга қўшиб ёзилади: *Ўқидингми?*, *бу-гуноқ*, *кечаёқ*, *кечагина*, *оппоққина* каби. Қолган турлари эса чизиқча (—) билан ёзилади: *сен-чи?*, *айтгин-чи?*, *келди-да, укам-ку, мен-а!* каби.

185- машқ. Гапларни кўчиринг. Ёрдамчи сўзларни айтинг, уларнинг маъно ва вазифасини тушунтиринг. Юкламаларни алоҳида изоҳланг.

1. Ҳозир унинг кўкси гоҳ оғринтирувчи, гоҳ юпантитувчи кечинмалар билан, бутун руҳига сингган totли ҳасрат билан тўла эди. (О.) 2. Мабодо ўзингиз душманга зарба беришингиз керак бўлиб қолса-чи, унда нима қиласиз? (А. Бекимбетов.) 3. Сиддиқжон этагини қоқиб ўрнидан турди-ю, жадаллаганича кўча эшигига қараб кетди. (А. Қ.) 4. Таппа ўзини ёстиққа ташлайди-ю, уй-куга кетади. (О.) 5. Бектемирнинг гўё нафаси ўчган, юракнинг болғадай кўкракда турганини ҳам сезмайди. (О.) 6. Эшон гоҳ у ёққа, гоҳ бу ёққа бош тортган қўйларни йўлга солишга уринарди. (О.) 7. Ёнида чўққайган бола билан дам мактабдан, дам футболдан гаплашади. (О.) 8. Яхши одамлар ҳам бор экан-ку, дунёда дейман ичимда. (Ў. Ў.)

186- машқ. Гапларни ўқиб, юкламаларни аниқланг, тиниш белгиларининг қўйилиш сабабларини ва грамматик хусусиятларини тушунтиринг. Сўз юкламаларга алоҳида, қўшимча юкламаларга алоҳида изоҳ беринг.

1. Кўзларимиз экранда-ю, хаёлимиз бир-бири мизда. (Ў. Ў.) 2. Номини унутмас халқлар, замонлар, Жонажон шоирнинг баҳти ҳам шу-да. (Ў.) 3. Фақат одамзод баҳти учун қилинганд мөҳнатина чинакам ва боқий шуҳрат келтириши мумкин. (Ч. Сэмнер.) 4. Меливой ака ҳамроҳининг саволига жавоб бермади-ю, ўзига-ўзи гапиргандек сўзлади. (О. Ҳ.) 5. Ҳамроҳи ерга теккан жойларининг чангини қоқди-да отига минди. (О. Ҳ.) 6. Икромжон гапга аралашмай бир чеккада жимгина ўтирибди. (С. Аҳм.) 7. Наҳотки, бирор билан тўғриликча кинога ҳам тушиб бўлмаса?! (Ў. Ў.) 8. Агар дўстликни ҳам билмаса асли, Кимга керак ахир, инсон деган ном. (А. О.)

УНДОВ СУЗЛАР

147- §. Ундов сўзлар ҳис-ҳаяжон, ҳайдаш-чақириш каби маъноларни ифодалаб, кўпинча ундов сифатида қўлланади, баъзан отлашиб, гап бўлаги вазифасида келиши мумкин; баъзан эса сўз ва гапларга қўшимча маъно қўшади: *Оббо Комилжон-э, оббо Комилжон-э, сўзга жуда устасиз-да.* (Ў.) *Вой-вуй!* Асл жаннат дене, тақсир. (С. Ан.) *Вой, қўлимни ари чақди.* (С. Аҳм.) *Оҳ-оҳ-оҳ!* *Отангиизга раҳмат!* *Камол топинг, дўстим!* (А. Қ.)

Ундов сўзлар якка ҳолда (*оҳ, вой, э*) ёки такрорлашиб (*оҳ-оҳ, беҳ-беҳ, бай-бай, вой-бўй* каби) қўлланиши

мумкин. Ундов сўзлар тақрорланган ҳолда қўлланганда чизиқча (-) билан ёзилади: *оҳ-воҳ*, *бай-бай* каби.

Ундов сўзлар маъно хусусиятларига кўра ҳис-ҳаяжон ва ҳайдаш-чақириш ундовларига бўлинади.

Ҳис-ҳаяжон ундов сўзларига эҳ, оҳ, уҳ, ҳо, ҳе, э, эй, уф, туф,вой, ура, и-и, ҳув, марш, алло, салом, хайр, офарин, ана, мана кабилар; ҳайдаш-чақириш ундов сўзларига эса *куч-куч*, *баҳ-баҳ*, *қурай-қурай*, *ҳай* (*чу*), *ту-ту-ту*, *кишт-кишт*, *так-так* кабилар киради.

Ҳис-ҳаяжон ундов сўзлари гап бўлакларидан кўпинча вергул билан ажратилади, кучли ҳис-ҳаяжон билан айтилганда эса, ундов белгиси қўйилади.

Қўйидаги ундовлар энг кўп қўлланади. Уларни ёддан билишга ва ёзишини эсда сақлашга ҳаракат қилинг:

Эҳ, оҳ, уҳ, ма, ҳи (ҳим), бе, ҳо, ҳе, э, эй ҳа, уф, туф, дод,вой, ҳаҳ, ҳақ, оббо, ура, ўҳӯ, э-ҳа, э-ҳе, и-и, ие, ҳув, ҳов, ҳай, ҳеъ, тсс, марш, бас, ҳорманг, раҳмат, қани, алло, салом, хайр, офарин, балли, баракалла, ажабо, ай (эй), айюҳаннос, ай-ҳай, алвидо, бай-бай, беҳ-беҳ, оҳ-оҳ, воіей, э-воҳ,вой-бўй,вой-бўй-ӯ, ҳой-ҳой, ҳа-кишт.

187- машқ. Гапларни кўчиринг. Ҳис-ҳаяжон ундов сўзларини топиб, ҳар бирининг маъно ва грамматик хусусиятларини таърифланг, ёзилни ва тиниш белгиларига диққат қилинг.

1. Йўғ-э! Ким экан улар! (Ү. Ү.) 2.— Лаббай! Ҳа, мен... Ие, оббо! Қачон? Шофёрга айтинг, дарров етиб келсин. (Ү. Ү.) 3. Э, нималар деяпсиз Ларисахон, Ленинград дегандаёқ тушунганимиз ҳаммасига! (О. Е.) 4. Ҳой, Қумри, ахир укангга қарасанг-чи, ичаги узилиб кетди-ку! (Ф. Ф.) 5. Э, ўғлим, қаттиқ нон даво бўлади. (О.) 6. Вой, она қизимдан айланай... Эпломассан, болам. (Р. Ф.) 7. Войдод! Зўравоннинг дастидан дод!.. (М. Исм.) 8. Уф, бирам зерикиб кетаётиман. (А. Қ.) 9. Кампирга ер остидан қараб қўйди-да, чуқур уҳ тортди. (С. Ан.) 10.— Ҳой, эчки беҳининг пўстлоғини шилиб ташлайди-ку! (С. Аҳм.)

188- машқ. Гапларни ўқиб, ундов сўзларни топинг. Маъноларини тушунтиринг ва услубий жиҳатдан таърифланг.

1. Ҳой, азаматлар, уйқуни бас қилинглар. (*Гоголь*)
2. О, дўстлар, биласиз баҳт учун кураш неча-неча аср давом этганин. (Ү.) 3. Ҳо, баракалла! Ана энди чинакам фронтчи қиз бўлдингиз. (З. *Фатхуллин*.) 4. Бай-бай-бай! Мунча ҳам ширин ухляяпти! Менга бер-чи, бола кўта-риш эсимда бормикин... (А. Қ.) 5. Балли, бу шароитга

мослашиш белгиси. (С. Ан.) 6. Үҳ, ўҳ, ўҳ! Жуда ярашипти-ку, Хуморхон! (А. К.) 7. Эҳ, Қомил, қачонгача оёғимга тушов, йўлимга ғов бўласан! (И. Р.) 8. Ҳа, улар қачонлардир Назира билан дарс тайёрлаб ўтиришган жойга келишган эди. (С. Н.) 9. Вой, нега қуллуқ қилишар экан? Ҳеч-да! (А. К.)

ТАҚЛИД СЎЗЛАР

148- §. Шарпа-товушга ва ҳолатга тақлидни билдирадиган сўзлар тақлид сўзлар ҳисобланади. Масалан: *шиқ-шиқ, гумбур-гумбур, милт-милт* каби.

Тақлид сўзлар кўпинча жуфт ва такрорланган ҳолда (*вағир-вугур, ғарч-ғурч, қий-чув, дук-дук, лип-лип* каби), баъзан эса якка ҳолда (*ярқ, ғуж, жимир, милт* каби) қўлланади.

Тақлид сўзлар ёрдамчи сўзлардан фарқ қилиб, гапда аниқловчи тўлдирувчи, ҳол каби вазифаларда кела олади: *Ойимлар шиқ-шиқ тугма олиб бердилар. Чакалоқнинг инга-ингаси эшишилди. Сув шилдир-шилдир оқмоқда. Борғинг, қий-чувни бостиринг.*

Тақлид сўзлар маъносига кўра икки катта гуруҳга бўлинади:

1. Товушга тақлидни билдирувчи: *ғув-ғув, дунур-дунур, дук-дук, тақ-туқ, қий-чув, ғарч-ғурч* каби.

2. Ҳолатга тақлидни билдирувчи: *ғуж-ғуж, ялт-юлт, лип-лип, апил-тапил, милт-милт* каби.

Қўйидаги тақлид сўзлар тилимизда фаол қўлланади. Уларнинг ёзилишини билиб олинг:

анг-анг, гур, тарс, қарс, гумбур-гумбур, ялт-юлт, ярқ, лип-лип, шақ, шиқ, тарс-турс, тарақ-туруқ, тақ-туқ, вишвиш, пиқ-пиқ, пақ-пақ, дук-дук, пирр, гув-гув, дув-дув, шип, трик-трак, лим-лим, биж-биж, лик-лик, ялт, ярақ-юруқ, апил-тапил, гир-гир, ғув-ғув, лапанг-лапанг, пир-пир, диф-дир, қалт-қалт, хиппа, ғинна, гун-гун, паққа, қулт-қулт, ғовур-ғувур, вақир-вугур, тақа-тақ, паға-паға, данг, динг, ҳанг-манг, ғарч-ғурч тап-тап, ғир-ғир, қулт-қулт, шалл-шалл.

189- машқ. Гапларни кўчириб, тақлид сўзларни ажратинг. Маъносига кўра турини аниқлаб, гапдаги вазифасини тушунтиринг.

1. Узоқдан дук-дук овоз келарди. 2. Ғовур-ғувур бирдан тиниб, шундай майнин ва осуда бир жимлик чўқдики, гўё бутун бепоён дашт Машрабга қулоқ соларди. (О. Е.) 3. Шу он арава бирдан чайқалиб, тарақа-туруқ

бўлиб кетди. (*M. Исл.*) 4. Буларнинг бириси қўлида йилт этиб шам ёқилди. (*C. А.*) 5. Ҳа, ана! Ўша ёқда лип-лип этган ўт кўринди. (*C. Аи.*) 6. Ҳамма ёқни темирнинг шақир-шуқур садоси қоплади. (*O.*) 7. Фала-ғовур ичидан аллакимнинг баланд овози янгради. (*M. Исл.*) 8. Боягидек дукур бор, лекин қаёқдан келаётгани маълум эмас. (*M. Исл.*) 9. Отанинг гаплари юрагига жиз-жиз тегади-ю, пиқ-пиқ кулаётган Қўчқорга қараб ўшқирди. (*O. Ё.*) 10. Моҳира бувининг боғидаги Мирза теракларнинг учидан ола қарғалар яхлаган қанотларини шақ-шақ уришади. (*O. Ё.*)

МОДАЛ СҮЗЛАР

149- §. Модал маъно ифодалаб, гапда кириш сўз, гап бўлаги ёки бутун бир гап вазифасида қўлланадиган сўзлар модал сўзлар ҳисобланади. Қўйидагилар модал сўзлар туркумiga киради: албатта, шубҳасиз, ҳақиқатан, табиий, дарҳақиқат, эҳтимол, балки, айтидан, чамаси, шекилли, зарур, даркор, бор, майли, хўп, йўқ, дуруст, бўлти, демак, хуллас, модомики, дарвоқе, айтгандай, айтмоқчи, афсус, эсиз, аттанг, ажабмас, мазмуни каби-лар. Модал сўзлар фикрға аниқлик, гумон, мақсад, талаб, шарт, мавжудлик, тасдиқ, инкор, мавжуд эмаслик, маъқуллаш, таъкидлаш, якунлаш, эслатиш, ачиниш каби маъноларни қўшади: *Демак, тўққиз-үн тош йўл босишимиз керак...* (*O. Ҳ.*) *Майли, кийимларим ҳам санъат учун хизмат қилсин.* (*O. Ҳ.*) *Йўқ, бу ҳали ҳам ўша кучли, оташин қалб!* (*Ac. М.*)

Модал сўзлар гап бошида келганда, ундан сўнг, гап ўртасида ҳар икки томондан, гап охирида келганда эса ундан олдин вергул билан ажратиб ёзилади.

190- машқ. Гапларни кўчиринг. Модал сўзларни топиб, уларнинг маъно ва грамматик хусусиятларини тушунтиринг, юкламалардан фарқини кўрсатинг.

1. Хуллас, Белоруссиянинг Мозир деган шаҳари яқинида иккинчи марта яраландим. (*O. Ҳ.*) 2. Албатта... бу ерда ким яхши, ким ёмон, ҳаммаси менга маълум... (*Усмон Умарзода*). 3. Жаннат, жаннат дейишади-ю, жаннат деганлари Қорабулоғимиздан яхшимикан?—деди у ўзида йўқ қувониб. (*M. Исл.*) 4. Ўзининг мажруҳлиги учун ноилож фронтга бормаган қилиб кўрсатмоқчи бўларди шекилли, кексаларга ўхшаб сўзларди. (*O. Ҳ.*)

5. — Хоназаровга кўрсатиш керак.— Кўрсатган. Фойда-си йўқ. (Ас. М.) 6. Демак, шу бола ҳам ўқча учибди-да. (С. Аҳм.) 7.— Бўлти, сиз нима десангиз шу-да, Ҳожи опа, мен тайёрман. (О. Ҳ.) 8.— Йўқ, рост гапим, юрагим-нинг чуқур тагидан чиққан сўзим шу. (О. Ҳ.).

65-топшириқ. Танлаган бадин асарингизнинг 5—6 бетини ўқиб, модал сўзларни топинг ва маъно ҳамда грамматик хусусиятни изоҳланг.

191- машқ. Гапларни ўқинг. Ёрдамчи сўзларни топиб, уларни таърифланг. Гапдаги вазифаси ва грамматик хусусиятларини изоҳланг.

1. Ҳайдар ота баъзан кечалари унинг олдига кириб, бирпас-яримпас гаплашиб ўтирадиган бўлди. (А. Қ.)
2. Шип-шип пойабзал товуши эшитилди, эшик қулфи учтўрт марта шириқлагандан сўнг, қия очилди. (Ў. Ў.)
3. Нечук эканки, Саида раиснинг таклифини маъқул кўрмади-ю, мажлис аҳли унинг раъийга юради. (А. Қ.)
4. Классик адабиётни ҳам, ҳозирги замон поэзиясини, прозасини ҳеч қолдирмай ўқирди. (М. Қориев.) 5. Тўғрисини айтсан, Даврон Бакировичнинг номини эшитганимда, юрагим бирдан шиф этиб кетди. (Ў. Ў.) 6. Хўп, мен сен билан кейин гаплашаман. (А. Қ.) 7. Болаликсан! Ҳам ҳеч гап бўлгани йўқ-ку! (А. Қ.) 8. Мен Анвар билан Султонали можаросини фақат кеча Мирзо Боисдан эшитдим. (А. Қ.) 9. Бай-бай... мен еган қаймоқларни ариқ қилиб оқизсангиз ҳеч қандай тўғон туриш бермайди. (А. Қ.) 10. Унинг хурраги ҳам нечукдир адабийроқ эди: «плук-қум... пирр... плук-қум... пирр...». 11. Ие, шунчалик қурт боқасизлар-у, қанча пилла чиқишини билмайсизларми? (А. Қ.)

192- машқ. Матнни ифодали ўқинг. Ёрдамчи сўзларни топиб, маъно ва қўлланиш хусусиятларини изоҳланг.

ОТАХОН КОМПОЗИТОРНИ ЭСЛАБ...

Радио орқали Успенский ҳақида очеркимни беришлиари керак эди. Бундан унинг мутлақо хабари йўқ эди. Радиони қўйишига қўйдиму, аммо ўзимни бир оз ноқулай ҳис қила бошладим. Чунки Виктор Александрович бундай нарсаларни унча хуш кўрмасди...

Радиода берилаётган эшиттириш тугади. Виктор Александровичнинг кўзларида ёш пайдо бўла бошлади... Утириклигигидаёқ ўзинга ўзбек халқ музикаси сарчашма-

ларидан ҳайкал қўя олганини ҳаёлига ҳам келтирмасди. Чунки «Шашмақом»ни нотага кўчирапкан ёки «Фарҳод ва Ширин» музикали драмасини соф миллий музика заминида яратаркан, ҳеч қачон мукофот, шон-шуҳрат ҳақида ўйламаган эди.

Бир ўйлаб кўринг-а, унинг музикали драмаси 3000 тактдан иборат бўлса, 1000 тактидан кўпи мақомлар асосида ёзилгандир. Агар биз уни биргина «Фарҳод ва Ширин» музикали драмасидаги Ширин ариясини миллий руҳда ёзиш учун унинг 24 вариантини яратганлигини кўз олдимизга келтирсак, бу алломанинг миллий музикали драма ёзишда қандай машаққатли, айни вақтда шарафли ишларни амалга оширганлигининг гувоҳи бўламиз.

(Ян Пеккер.)

СИНТАКСИС

ГАП

150- §. Гап фикр билдириш, хабар бериш вазифасини бажарадиган, турли ҳис-туйғуларни ифодалайдиган бир сўз ёки бир неча сўзлар йиғиндиси, нутқнинг грамматик жиҳатдан шаклланган, нисбий интонацион ҳам мазмунан тугалликка эга бўлган бирлигидир. Масалан: *Ой. Нозик жимжитлик. Салқин шамолларгина қизнинг сочлари билан ўйнашарди.* (О.) Бунда учта гап бор: 1. Ой. 2. Нозик жимжитлик. 3. Салқин шамолларгина қизнинг сочлари билан ўйнашарди. Бу гапларнинг ҳар қайсиси маълум фикр билдиради.

Гапдаги сўзлар бир-бири билан ўзаро боғланган бўлади, уларнинг ҳар бири гапда бирор грамматик функцияни — гап бўлаги вазифасини бажариб келади. Масалан: *Илгор пахтакорлар мажбуриятларини ошириб бажардилар.* Бу гапда *пахтакорлар* — эга, *илгор* — аниқловчи, *мажбуриятларини* — тўлдирувчи, *ошириб* — ҳол, *бажардилар* — кесимдир.

Гап бўлаклари иккига — бош бўлаклар ва иккинчи даражали бўлакларга бўлинади.

Бош бўлаклар (эга ва кесим) гапнинг асосини ташкил қиласди. Иккинчи даражали бўлаклар (аниқловчи, тўлдирувчи, ҳол) гапнинг бош бўлакларини аниқлайди, тўлдиради ёки изоҳлайди.

ГАПНИНГ МАҚСАДГА ҚУРА ТУРЛАРИ

151- §. Ҳар қандай гап сўзловчининг мақсадини: хабар бериш, тингловчидан бирор воқеа-ҳодисани сўраш, буюриш, маслаҳат каби маъноларни ифодалайди. Шунга кўра гаплар тўрт турга бўлинади: **дарак гап, сўроқ гап, буйруқ гап, ундов гап.**

ДАРАК ГАП

152- §. Бирор воқеа-ҳодисанинг бажарилиши ҳақида-ги тасдиқ ёки инкор билдирувчи гап **дарак гап** ҳисобла-нади. Масалан: *Биз тўғаракларга фаол қатнашамиз.* Дарак гап юз берган, юз бериши мумкин бўлган воқеа-

ҳодисани тасдиқ ё инкор қилиш йўли билан билдиради: *Ҳаммамиз шанбаликда яхши ишладик гапида тасдиқ мазмуни; У ишламайди. У ишлаган эмас гапларида инкор мазмуни ифодаланган.*

Дарак гаплар бир текис, тинч оҳангда талаффуз қилинади. Интонация гап охирига томон пасая боради. Улар бошқа гап турларига қараганда нутқимизда кўпроқ ишлатилади. Ёзувда дарак гапларнинг охирига одатда нуқта қўйилади.

193- машқ. Қуйидаги матнда нечта гап бор? Тиниш белгиларига эътибор бериб кўчиринг. Даствабки бешта гапни морфологик ва синтактик таҳлил қилинг.

Темир (Фанини кўриб юзини буради): Оғайнилар! Юрт вайрон, молу жонлар таланган. Эл оч, ярим яланғоч. Одам боласининг бағридаги ҳамма яралари қонаб ётибди. Ўртоқ Полторацкий — бу азамат рус — сиз мусулмонлар учун, сизнинг юртингиз, озодлигингиз, қора кўз бола-чақангиз учун ўз жонини қурбон қилди. Полторацкийни инглиз босқинчилари отиб ўлдиришиди. Мана, ўртоқ Полторацкийнинг юрак қони билан сизга ёзган хати!

Кўйлагини йиртиб солади, унинг куйган этларини кўрган халқ бир тебраниб олади, ғазабга келади. Башкин, Сандийлар писиб чиқиб кетишади. (К. Яшин.)

194- машқ. Дарак гапларни кўчиринг, ularнинг қандай оҳангда талаффуз этилишини кузатинг. Гапнинг бош бўлакларини айтинг.

1. Шу бир соатлик концертда сизлардан кимлар нима билан иштирок этади. (М. Исм.) 2. Уларнинг ҳолидан хабардор бўлиб туринг. (А. Иванов.) 3. У ўрнидан турди ва болаларга қаради. (М. Исм.) 4. Бу йил Содиқ аканинг қизи билан Халил аканинг ўғли Тошкентдан олий маълумот... олиб қайтадилар... (С. Абд.) 5. Содиқ Исмоилов эллик бешларга кириб қолган кекса муаллим. (М. Исм.) 6. Анчагина эслик бола бўлиб, катталар орасида ҳам яхшига мисол эди. (М. Исм.) 7. Болангизни ҳақ одам олдида ноҳақлик билан ҳимоя этганингиз яхшими? (М. Исм.) 8. Мана сенга қоғоз билан қизил қалам, шунда сен битта эълон ёзасан. (К. И.)

СҮРОҚ ГАП

153- §. Сўзловчига номаълум бўлган нарса, ҳодиса, воқеа ҳақида сўроқни ифодалайдиган гап сўроқ гап са-

налади. Масалан: *Бугун театрга борасанми? Шаҳноза имтиҳонга қандай тайёрланди?*

Сўроқ гаплар қўйидаги хусусиятларга эга:

1. Сўроқ гаплар таркибида сўроқ олмошлари иштироқ қиласади: *Жамоат ишларига ким фаол қатнашади? Нега курсдошингиз яхши ўқимайди? Дарсга қачон борасиз?*

2. Сўроқ гаплар таркибида сўроқ юкламалари (-ми, -чи, -а, я) ёрдамида тузилади: *Машғулотга яхши тайёрланяпсизми?*

— Узингиз-чи?

3. *Наҳот, наҳотки, юкламалари ёрдамида: Наҳотки унинг ҳақида, унинг баҳти ҳақида ўйлайдиган одамлар ҳам бўлса? (Ас. М.)*

4. Бу воситалар бўлмагандага, сўроқ гап фақат оҳангнинг ўзи билангина ифодаланиши мумкин: *Талабалар меҳнат семестрида ишлайди? Бундай вақтда оҳанг, одатда, гапнинг охирига томон кўтарила боради. Охирги сўз кучли талаффуз қилинади, у мантиқ жиҳатдан ажратиб кўрсатилади.*

Ёзувда сўроқ гапнинг охирига сўроқ белгиси қўйилади.

195- машқ. Гапларни ўқинг. Дарак гапларни алоҳида, сўроқ гапларни алоҳида кўчиринг. Гап бўлакларини аниқланг. Сўроқ гапларнинг қандай воситалар ёрдамида ифодаланганини айтинг.

1. Инсон боласини табиат шундай ҳам чиройли яратадими? (С. Аҳм.) 2. Бу кеча ҳам уларнинг маслаҳати пишмади. (С. Аҳм.) 3. У вақтлар Мўътабар миттигина қиз эди. (М. Муродов.) 4. Мен бир куй тўқиганман, билмадим, меҳмонларга маъқул бўладими, йўқми? (О.) 5. Тешабойни кўра олмайдиган ичи қоралар, айниқса, жирраки бойлар камми? (М. Исм.) 6. Буни эшишиб, Эътибор нима қиласкин? Узини-ўзи бир нима қилиб қўймасмикан? Ё севинармикан. (С. Аҳм.) 7. Ҳамма ўйнаб-кулиб ўтирганда, нега бу хаёл суришдан бўшамайди? (О.) 8. Иссиқхонанинг ўзиданоқ ишни битказиб, қайтариб юборибсан? (О.) 9. Сиз йўқмидингиз? Урушдамидингиз? Оёқни қаерга қўйиб келдингиз? (А. К.) 10. Пулдорларга эгилиш пасткашлик эмасми? (О.) 11. Бир муҳимроқ воқеа рўй берган дейман. (О.)

196- машқ. Гапларни мазмунига, оҳангига риоя қилиб ўқинг, тинниш белгиларини қўйиб кўчиринг. Дарак ва сўроқ гапларни айтинг.

1. У ўрнидан турди ва болаларга қаради. (*M. Исм.*)
2. Ҳеч қаерга бормайсиз шу ерда кўрикдан ўтасиз. (*C. Абд.*)
3. Қаерга келиб қолдик қизим. (*O. Е.*)
4. Бу сувни қаёқдан олиш мумкин (*O. Е.*)
5. Агар шу кетишда ўсиб бораверса ким билади ҳали ким бўп кетади. (*O. Е.*)
6. Кўпчилик ўқитувчилар унга алоҳида эътибор билан қарашар эди. (*Ў. У.*)
7. Еттинчи синфгача у ҳар йили мақтов қоғоз олиб ўқиди. (*Ў. У.*)
- 8.— Дадамлар сизни борган заҳотингиз мактабга директор қип қўяман деяптилар-ку, нима дейсиз (*O. Е.*)
9. Кўз қаерда бўлса меҳр ҳам ўша ерда бўлади. (*Мақол.*)
10. Ким бирорвга чуқур қазиса, унга ўзи йиқилади (*Мақол.*)
11. Ахир ишонч киши қалбининг ҳукми, у ҳеч вақт йўқотилмайди (*M. Ко-риев.*)

БУЙРУҚ ГАП

154- §. Буйруқ, илтимос, маслаҳат, ялинниш, истак-тилак, дўқ-пўписа, чақириш каби маъноларни ифода этган гаплар буйруқ гаплар ҳисобланади. Масалан: *Ўтинг, Замон ака, бу ёқдан яхши кўринади.* (*M. Исм.*) *Кийим-бош, қурол-яроғ бериссин.* (*A. О.*)

Ялинниш, илтимос, маслаҳат каби маънолар ифода этилганда, гапнинг охирига нуқта қўйилади: *Бизникига келинг. Тортинмасдан келаверинг. Ёлғончи бўлманг, бехавотир бўласиз.* (*Эртакдан.*)

Дўқ, чақириш, қатъий буюриш каби маънолар ифода этилганда гап охирига ундов белгию қўйилади: *Уйдан жўна! Уруш оловини ёқувчилар жиловлансин!*

Буйруқ гапларнинг кесими қўйидагича ифодаланади:

1. Буйруқ майлиниг II шахс бирлигидаги феъл билан: *Қозонга яқинлашма, қораси юқар! Ёмонга яқинлашма, балоси юқар.* (*Мақол.*) *Мақтанчоқ бўлманг, хижсолат тортмайсиз.* (*Эртакдан.*)

2. Кесимга айрим юкламалар қўшилиб келади: *Кетмасдан кўринг-чи! Бормасдан кўринг-чи!*

3. Расмий нутқда буйруқ гапнинг кесими мажхуллик нисбати формасидаги феъл билан ифодаланади. Масалан: *Пахта йигим-теримига барча ишчи кучлари жалоб қилинсин! Пахта нобудгарчилигига йўл қўйилмасин!*

197- машқ. Буйруқ гапларни топиб, уларнинг қандай мазмун ифодалашини тушунтиринг. Кесимнинг ифодаланишини изоҳланг.

1. Қундалик дафтарингни кўриш эсимдан чиқиб қолади. Олиб кел, бир кўрай,— деди. (*M. Исм.*) 2. Улар-

нинг ҳолидан хабардор ҳам бўлиб туринг. (A. Иванов.) 3. Қемадан чиққандан кейин тия етакласак, ҷарчадим демайсанми? (С. Абд.) 4. Бўш хаёлларни ирғитиб ташланг,— деди Эргашев.— Анови Нусратни ҳам ҳайдаб юборинг. Диққатни бир жойга йиғиб, ишга киришинг. 5. ...Томирлари тўғри турсин, букилиб қолмасин. Томирлар орасида бўш ҳаво бўлмасин. (С. Назар.) 6. Юринг, ҳўжалигимиз билан таниширай,— деди менга. Атрофига панжара тўсилган ҳовлига чиқдик. (С. Ан.) 7. Кейин Баҳромга бўлган воқеани бошдан-оёқ сўзлаб бердим. 8. Юринг эшикка чиқайлик, ўзи ҳам шу ерда, ҳаммасини айтиб беради. (М. Қориев.)

198- машқ. Сўроқ, буйруқ гапларни кўчиринг. Тиниш белгиларини тушунтиринг.

1. Нима десанг де-ю, барибир қонунга бўйсунишинг шарт. (Ж. Абд.) 2. Қаршимда колхоз бош чўпони Мавлон аканинг ўғли Яшин кулиб турарди. (Р. Мурод.) 3. Бир жойдаги одаммиз, яна бир-бirimизга ишимиз тушади, отахон! (О.) 4. Қексалар! Сиз ҳам шу ёшингизни эсланг! (С. Аҳм.) 5. Йўловчи, қудуқдан сув олиб ичганингда, шу гул тагига бир пиёла сув қуй! (С. Аҳм.) 6. Айтар сўзни айт, айтмас сўздан қайт. (Мақол.) 7. Ишни эплолмагани учун ўз вазифасидан бўшатилсин. (С. Аҳм.) 8. Йўлчи, юр ука, менга ҳамроҳ бўл! (О.) 9. ...Юрагингиздан чиқариб ташлай қолинг. Менга ачинманг, парвоналар қатори куйиб кул бўлай... (М. Қориев.) 10. Ўзингга муносиб гапни гапир! Енгил бўлма! (А. Қ.) 11. «Ахир дунёда киши яқин дўстсиз яшashi мумкинми?» дерсиз. Йўқ, албатта. Борди-ю, буни тақдир кўп кўрсачи? Тақдирнинг бундай қаҳрига сиз кўнармидингиз? (М. Қориев.) 12. Йндинга сени ҳам гул кўргазмасига олиб бораман. Қўрасан!

УНДОВ ГАП

155- §. Фикрни ҳис-ҳаяжон билан ифодаловчи гаплар ундов гап ҳисобланади. Масалан: *Яшасин 1 Май байрами! Мусобақадош ҳамкасабаларимизга қизғин салом! Яша, ҳур Узбекистон!*

Ундов гаплар шодлик, қувонч, суюниш, қўрқув, тантана, таажжуб, қайfu, афсусланиш каби турли эмоцияларни ифодалайди ва кўтаринки интонацияда айтилиши билан бошқа гап турларидан фарқ қиласи. Ёзувда ундов гапнинг охирига ундов белгиси қўйилади. Масалан:

Ўз қилмишларингиздан уялинг. (A. K.) Вой, қоматингдан онанг ўргилсин! (A. K.) Қадамларингизга ҳасанот! Шоирларимиз, санъатчиларимиз мана шундоқ йўқлаоб келишса қандоқ яхши! (A. K.)

Ҳар қандай дарак, сўроқ, буйруқ гапларни турли ҳис-ҳаяжон билан айтиш натижасида ундов гап ҳосил қилинади. Масалан:

1. Дарак гап

Ундов гап

Ҳиди ҳам йўқдир, балки.

Ҳиди ҳам йўқдир, балки!

2. Сўроқ гап

Ундов гап

Биронта ошнаси бўлганда, шафтоли сайлига айтмасмиди?

Биронта ошнаси бўлганда, шафтоли сайлига айтмасмиди!

(A. K.)

3. Буйруқ гап

Ундов гап

Қўйинг, мени хафа қилгиниз келмаса, ўзингизни ўтга урманг, жон синглим.

Қўйинг! Мени хафа қилгиниз келмаса, ўзингизни ўтга урманг, жон синглим! (M. Исм.)

Айрим ундов гаплар таркибида ундовлар ва баъзи юкламалар келади: Эҳ, айб ўзимда! (M. Исм.) Ҳай-ҳай, ундей деманг, айланай! (M. Исм.)

Баъзи гапларда ундов мазмунидан ташқари, сўроқ мазмуни ҳам бўлғанлигидан, гап охирида ҳам сўроқ, ҳам ундов белгилари қўйилади. Масалан: Улардан устун, ҳаёт ўзаги инсон-чи, инсон?! Ватан! Ватан! (Шуҳрат.) Қурилишида обрўйинг ошади, шу ердан кўтарилиб кетасан, деб айтгани келдингми?! (C. Аҳм.)

199- машқ. Ундов гапларни ифодали ўқинг. Уларнинг қандай эмоционал ҳолатни ифодалаганини аниқланг. Бош бўлакларни айтинг.

1. У гап қўзилатиш ҳақида бораётганини дарров тушиundi. — Сал қолди, раис.— Сал, сал! Қачон бажарилади деяпман? (C. Ан.) 2. Омон бўйлсин рус ҳалқи! Қоийилман-эй, тилингиз айланганига! (Х. F.) 3. Эшакка тескари миндириб кел! Сазойи қилиб кел! Ҳамма кўрсин! Юзига қора сурт итваччанинг! Тез бор! (M. Исм.)

4. Айтмоқчи, бу сизларнинг аудиторияларингиз-ку! (П. К.) 5. Йўқолинг, менинг сиздек отам йўқ! (М. Исл.) 6. Дарҳақиқат, ўйлаб қаранг, бу қандай гап! Эҳе... қанча чўлу, қанча даштлар обод бўлади, қуш учса қаноти, қулун юрса туёғи куядиган қум ва чўлларда шаҳар ва қишлоқлар вужудга келади. (С. Назар.) 7. Йўқ, сенинг бошингни қотираётган нарса бошқа, оғайни, буни мен яхши биламан. (Ж. Абд.)

200- машқ. Дарак, сўроқ, буйруқ, ўндов гапларни алоҳида-алоҳида кўчиринг. Гапда дарак, сўроқ, буйруқ ва ўндов мазмуни қандай воситалар билан ифодаланганини айтинг.

1. Қулоғим, сизларда, меҳмонлар!—деди у тик турганича. (Ж. Абд.) 2. Илм, фан ва фикр олами ниҳоятда кенг ва чуқур. (О.) 3. Балли, Раъно, ана жиннилик!—деди дадаси,—атлас кўйлак ҳайф сенга, бўздан бошқаси, албатта, ҳайф! (А. Қод.) 4. Зап битибди-да, жонивор! (Ҳ. Ф.) 5. Ҳа, ҳўқиз уйларинга элтиб берилсинми? Ахир борилсин, арз қилинсин-да!!! (А. К.) 6. Эринг ота-онасидан кечсинми?—деди. (А. К.) 7. Сен қанақа чўққига интилган эдинг? (А. К.) 8. Ўн йил! Ўн йилдан бери касал эканми? (А. К.) 9. Сиз йўқмидингиз? Нега йиғланади? А? Йиғланмасин! (А. К.) 10. Бу жойлар менга ёқади, жуда-жуда! (Ж. Абд.) 11. Сен чала қолган ерларинггагина ачиняпсан,—деди Бектемиржон, ҳаммасига. (Ж. Абд.)

СУЗ БИРИКМАСИ

156- §. Гапда сўзлар бир-бири билан боғланган бўлади. Бу боғланиш маълум грамматик қонун-қонидалар асосида аниқлашади. Масалан: *Ҳусниддин шаҳримиздаги бошқармалардан бирида хизмат қиласди*. (Мирм.) гапида грамматик жиҳатдан шаклланиб, ўзаро боғланган бирикмалар мавжуд:

1) Ҳусниддин хизмат қиласди; 2) бошқармалардан бирида хизмат қиласди; 3) шаҳримиздаги бошқармалардан бири; 4) шаҳримиздаги бошқармалар; 5) бирида хизмат қиласди.

Ҳар бир сўз бирикмаси камида икки мустақил сўздан ташкил топади. Ҳар икки сўз биргаликда мураккаброқ тушунчани англатиш учун хизмат қиласди. Демак, ўзаро семантик, грамматик жиҳатдан боғланган икки ёки ундан ортиқ мустақил сўзлар қўшилмаси **сўз бирикмаси** дейилади.

Сўз бирикмасининг юқорида келтирилган кўришишлари эркин бирикма саналади. Эркин бирикмаларни турғун бирикмалардан фарқ қилиш керак. Чунончи, бош кўттармоқ, кўзи учмоқ, тахта бўйлиб қолмоқ каби иборалар ҳам структурасига кўра сўз бирикмаси ҳисобланади, аммо бу бирикмалар таркибидаги сўзлар гап бўлаги сифатида ажратилмайди, чунки улар нутқ пайтидан олдин ўзаро бириккан ҳолда мавжуд бўлади, нутқда ҳам шу ҳолича қўлланади, ҳозир бузилмас бирикма ҳолатига келиб қолган. Бундай бирикма таркибидаги сўзларнинг ҳар бири мустақил тушунча билдирамай, бутунича қўчма маъно ифодалайди, гапда ҳам битта вазифада келади. Бирикмаларнинг бу турлари турғун бирикмалар саналади.

Эркин бирикмалар синтаксиснинг ўрганиш манбайдир. Унда ўзаро боғланниб келаётган ҳар бир сўз мустақил тушунча билдиради, гапнинг бўлаги вазифасида келади, алоҳида сўроқقا жавоб бўлади.

157- §. Сўз бирикмасини қўл қўймоқ, имзо чекмоқ, яланг оёқ, бош яланг каби қўшма сўзлардан ҳам фарқлаш лозим. Қўшма сўзлар сўз бирикмаси каби маълум даражада мураккаброқ тушунчани ифодаласа-да, содда сўз каби гапда биргина гап бўлаги вазифасини бажаради, сўз бирикмаси (эркин бирикма) таркибидаги сўзлар эса, юқорида айтиб ўтилганидек, алоҳида-алоҳида гап бўлаги вазифасида келади. Сўз бирикмаси синтактик категория сифатида синтаксисда ўрганилса, қўшма сўзлар қайси сўз туркумiga оидлигига, хослигига кўра морфологияда ўрганилади, лексик маъносига кўра лексикологияда ҳам текширилади. Қўшма сўз таркибидаги сўзлар маълум даврда маълум синтактик муносабатда бўлган, албатта. Лекин бу синтактик алоқа ҳозир унтутилган бўйлиб, боғланма таркибидаги сўзлар битта қўшма сўз ҳолатига келиб қолган. Масалан: **бешиктерватар — бешикни тебратмоқ, отбоқар — отни боқмоқ, шолипоя — шолининг пояси.**

201- машқ. Кўчиринг. Сўз бирикмаларини аниқланг.

1. Ой кўкда мағрур сузади. Унинг ҳусн-жамолига қанчадан-қанча севишган қалблар шайдо кўзлари билан термуларкан. Ой шуъласи нафис ва шаффоф. У жозиба кучи билан киши қалбини иситади, юракда ҳали йўқ хиссийтларни уйғотади, кейин уни аста-секин алангалатади. Айниқса, навбаҳор кезларида бундай кечалар ғоят сеҳр-

ли ва мўъжизақордир. (*M. Кориев.*) 2. Ўша йили Абдуллаларнинг синфиға янги бола келди. (*Ў. У.*) 3. Ҳовлида оёқ шарпасини эшитиб, ўгирилиб қаради. (*O. Е.*)

202- машқ. Гапларни сўз бирикмаларига ажратиб кўчиринг. Бирикмаларнинг турларини аниқланг. Кўп бўлакларини ва уларнинг қайси сўз туркуми билан ифодаланганини тушунтиринг.

1. Улар сандал атрофиға ўтиришди. (*P. Ф.*) 2. Яқиндагина келтирилган болалар ҳали хоналарга жойлашмаган. (*P. Ф.*) 3. Темирчилар бирин-сирин коржомаларини ечиб чекка-чеккада ўтиришди. (*P. Ф.*) 4. Полиз ям-яшил бўлиб яшиаб ётибди. (*O. Е.*) 5. Ашрафжоннинг овози тўсатдан ўзгариб, шиддатли янгради. (*O. Е.*) 6. Думалоқ, лўппи юзли бу йигит Ботирнинг эски таниши эди. (*C. Назар.*) 7. Қишлоқ активлари дехқонларнинг аксарияти билан гапни пишириб қўйиши. (*Й. Сураймон.*) 8. Қиз бувисининг кўзини шамғалат қилиб, яна бурилиб қаради. (*Й. Сураймон.*) 9. Қўлимдаги адресга кўра ҳарбий академияни қидириб топдим. (*F. F.*) 10. Болаларнинг қувноқ шовқини, шод қийқириқлари уни ҳурсанд қилиш ўрнига, аксинча, асабини қўзғатди. (*X. F.*) 11. Заргарларнинг, косибларнинг, кулолларнинг бозорлари ҳам чаққон эди. (*П. Т.*)

СУЗЛАРНИНГ ЎЗАРО СИНТАКТИК МУНОСАБАТИНИ ИФОДАЛОВЧИ ВОСИТАЛАР

158- §. Гандаги сўзлар ўзаро синтактик алоқага киришган — ўзаро боғланган бўлади. Бу синтактик муносабат турли-туман воситалар орқали шаклланади.

1. **Сўз ўзгартувчи аффикслар** — келишик, эгалик, шахс-сон аффикслари сўзларнинг ўзаро боғланишида, синтактик муносабатнинг аниқлашувида энг фаол восита ҳисобланади. Масалан: *Биз Ватанимизни жон-дилдан севамиз* гапида **-имиз**, (эгалик), **-ни** (келишик), **-дан** (келишик), **-миз** (шахс-сон) аффикслари сўзларнинг гандаги муносабатини, ўзаро боғланишини ифодалаб келмоқда.

2. **Ёрдамчи сўзлар** (кўмакчи, боғловчи, боғлама) ҳам сўзларни бир-бири билан боғлайди ва бу билан синтактик алоқанинг ифодаланишида муҳим роль ўйнайди: *Қалам билан ёздим. Укам учун олдим. Рўзнома ва ойномаларга обуна бўлдим. Имтиҳон ва синовларни топширдим* каби.

3. **Сўз тартиби** — сўзларнинг ўзаро синтактик муно-

сабатга киришувини таъминловчи воситалардан бири. Масалан: *оидин кеча, яхши бола, темир йўл* каби. Бирикма таркибидаги сўзларнинг ўрни алмаштирилса (тартиби ўзгартирилса), маъно бутунлай ўзгариб кетади: *оидин кеча* — сифатловчили бирикма; *Кеча оидин* — эга ва кесим (предикатив бирикма).

4. **Интонация** ҳам синтактик алоқанинг бир тури бўлиб, бирикма таркибидаги сўзларни боғловчи воситалардандир. Интонация синтактик алоқанинг турини, сўз бирикмасининг хусусиятини кўрсатади: *Бу китоб...* Со ли штири нг: *Бу — китоб; Кўп қаватли / бино.* Со ли штири нг: *Кўп / қаватли бино.*

203-машқ. Гапларни кўчиринг. Сўз ўзгартувчи аффикслар орқали синтактик муносабатга кирган сўзларни ва шу сўзлардан таркиб топган бирикмаларни аниқланг.

1. Сутдек оппоқ тонг отяпти. (*X. T.*) 2. Ногаҳон боланинг кўзи ўзидан йигирма қадамча нарида турган юмронқозиққа тушди. (*O. X.*) 3. Институтнинг пастки курслари шаҳар атрофида мудофаа иншооти қуришга ёрдамлашгани чиқиб кетган. (*Ш.*) 4. Сой бўйидаги мажнунтоллар панасида бир йигит билан қиз шивирлашиб гаплашмоқда эди. (*П. К.*) 5. Тоҳир орқасига ўгирилиб Қувасойнинг қуий томонларига кўз югуртирди. (*П. К.*)

66-топшириқ. Берилган сўзларни қатнаштириб, сўз бирикмалари тузинг. Сўз бирикмасида сўзлар қандай воситалар билан муносабатга киришганини тушунтиргинг.

1. Ватан, бахт, ота, она, шамол, серсавлат, қизил, янги, катта, ҳамма, ҳеч, нарса, биз, ўзи, ёз, кел, кет, бор, узоқ, кўп, беқиёс, кўн, бўйи, бу, ер, кеча, кундуз.

204-машқ. Аффикслар воситасида синтактик муносабатга киришган бир нечта гап тузинг.

205-машқ. Гапда сўз тартиби ва интонация орқали алоқага киришган сўз бирикмаларини аниқланг.

1. Ҳаммамиз буталарғанасига ўтиб ўтирик. (*O. X.*)
2. Ҳаммаси боғчадагидек бир тартибда жойлаштирилган. (*Э. А.*) 3. Нозик, эпчил бармоқлар орасида беозоргина ушланган ингичка игна дўппи юзида нафис излар қолдириб борди. (*M. Исм.*) 4. Очиқ деразадан Шодасойнинг салқини билан қаердандир пишган беҳи ҳиди анқиб кирди. (*Ас. М.*) 5. Ёшлиқ йиллар, олтин дамлар ана шундай ўтаверади. Үқиш ҳам ўз йўли билан бораверди. (*М. Қориев.*) 6. Остонада жуссаси кичикроқ чўзинчоқ

юзли, сийрак сарғиши сочли, бошига эскириброқ қолган чуст дўппи, эгнига коломенка китель кийган йигит пайдо бўлди. (С. Ан.) 7. Тоғ ҳавоси жудаям иссиқ эмас эди. (О. Х.) 8. Ҳамма корхоналарда бирдай иш тугагани учун бекат зум ўтмай одамларга тўлди. (Ж. Абд.)

67- топшириқ. «Менинг севган касбим» деган темада ёзма иш ёзиб, сўзларнинг қандай воситалар орқали боғланганини изоҳланг.

ТЕНГ ВА ЭРГАШ БОҒЛАНИШ

159- §. Сўзларнинг гапдаги синтактик алоқаси икки хил бўлади: тенглашиш ва эргашиш (тобеланиш). Гапда бир хил вазифада келган бўлакларнинг тенг боғловчилар воситасида ёки санаш интонацияси орқали боғлалиши тенг боғланиш деб аталади. Масалан: *Ўрик ва бодом гуллади*. *Ўрик, бодом гуллади* каби. Тенг синтактик алоқада бўлган бўлаклар орасида тобелик бўлмайди. Эргаш боғланиш эса бири ҳоким, бири тобе бўлган гап бўлакларнинг синтактик алоқасини ифодалайди. Масалан: *бизнинг хўжалигимиз; китобни ўқимоқ; қизил гуллар* каби бирикмаларда *бизнинг, китобни, қизил сўзлари* тобе, *хўжалик, ўқимоқ, гуллар* ҳоким сўзлар ҳисобланади.

Тобе сўз ҳоким сўзни бирон-бир томондан аниқлайди, тўлдиради ёки изоҳлайди. Тобе сўз, одатда, бирон келишик аффиксини қабул қиласида ёки у кенг маънода белги билдирувчи сўз билан ифодаланади (*яхши бола, пўлат сандиқ* каби).

Сўзларнинг эргашиш йўли билан боғланиши учхил бўлади:

1. Мослашув. 2. Бошқарув. 3. Битишув.

1. **Мослашув.** Ҳоким ва тобе сўзнинг шахс-сонда ўзаро мослашиб келиши **мослашув** саналади. Масалан: *Биз ўқидик. Рустам ўқиди. Менинг укам. Бизнинг хўжалигимиз* каби.

Бу бирикмаларнинг биринчи ва иккинчисида *ўқидик* сўзи биз сўзи билан, *ўқиди* сўзи *Рустам* сўзи билан шахс (I шахс, III шахс) ва сон (кўплик, бирлик) да мослашиб келяпти. Кейинги бирикмаларда эса *мен* сўзи билан *ука* сўзи, *биз* сўзи билан *хўжалик* сўзлари қаратқич ва қаралмиш муносабатида шахс-сонда ўзаро мослашиб келмоқда.

206- машқ. Матидан мослашув йўли билан боғланган бирикмаларни топиб, мослашув алоқасини кўрсатувчи аффиксларни тушунтиринг. Отларни топиб, уларнинг тузилиши ва ясалишини изоҳланг.

1. Отасининг келиб-кетгани Аъзам хаёлини ўғирланган эди. (Ш.) 2. Навоий шарафига тантанали қабул молосими ўтказилди, зиёфат берилди. (Л. Батъ.) 3. Унинг плани жўн ва умидли эди. (У. Умарзода.) 4. Заҳар солмоқ эмиш касби илоннинг, зулм аждарлари озори жоннинг. (Ўйғун ва И. Султон.) 5. Аслида совхозимизнинг яйловлари атиги ўттиз саккиз минг қўй-қўзини тўйдирешга қодир. (С. Аҳ.) 6. Мен шу ерда қоладиган бўлдим, сизлар энди кетаверинглар, Самаржон, сиздан бир илтимос, бизнинг уйга телефон қилиб айтиб қўйинг. (М. Қориев.) 7.—Форобийнинг таълимотини қайси оқимга мансуб, деб биласиз? (А. О.) 8. Низомжон бошидан ке-чирганларини завқланиб гапириб берди. (С. Аҳм.)

68- топшириқ. Куйидаги сўзлар иштирокида мослашув муносабатидаги бирикмалар тузинг. Бир-бираидан фарқини тушунтиринг.

Мен, китоб, ўқувчи, синфдош, курсдош, гул, ўқимоқ, учрашмоқ, йифилмоқ каби.

2. **Бошқарув.** Тобе сўзининг ҳоким сўз талаб қилган келишик аффиксини олиши (бош ва қаратқичдан ташқари) ёки кўмакчи билан келиши **бошқарув** дейилади. Масалан: дарсни **тайёрламоқ**, имтиҳонга **тайёрланмоқ**, сиздан кичик, қалам билан ёзмоқ, пахта учун **курашмоқ** каби боғланишларда **тайёрламоқ**, **тайёрланмоқ**, кичик, ёзмоқ, **курашмоқ** — ҳоким сўзлар талабига кўра тобе сўзлар келишик қўшимчалари (-ни, -га, -дан) ёки кўмакчилар (билин, учун) билан қўлланади.

Бошқарув муносабатида ҳоким сўз вазифасида кўпроқ феъллар келади (*ватанин севмоқ; Гулни севган, тиканни ҳам севади каби*), аммо ўрни билан сифатлар ва равишлар ҳам ҳоким сўз вазифасида қўлланиши мумкин (*жондан азиз, шакардан ширин, сендан катта, отдан баланд* каби).

Одатда, келишик аффикси ва кўмакчилар билан келган сўзлар (улар кўпроқ тўлдирувчи ва ҳол бўлади) кесим томонидан бошқарилади (кесим феъл, от, сифат, равиш, модал сўзлар билан ифодаланиши мумкин). Бошқарувда кесим (ҳоким сўз) бошқарувчи, тўлдирувчи ёки ҳол (тобе сўз) эса бошқарилувчи дейилади.

207- машқ. Гаплардан бошқарув йўли билан муносабатга кирешган сўз бирикмаларини аниқлаб, уларнинг қандай келишиклар ёрдамида ўзаро алоқага киршганини тушунтиринг.

1. Қозоннинг қулоғини қай тарафдан қўйиш дегрез ихтиёрида. (А. О.) 2. ...Қабулхонадан чиқаркан, зимма-

сига олган юкининг оғирлигини ўйларди. (И. Р.) 3. Ҳазратовнинг дағдағасидан бошқа ҳеч нарсани англаёлмадим. 4. Деразадан кираётган шабада календарни варақлай бошлади. (И. Р.) 5. Ботир онаси ning таъзиялари ўтгандан кейин холасининг бир оғиз гапи билан шу ерга келган эди. (Р. Ф.)

69- топшириқ. Тубандаги сўзлар иштирокида бошқарув муносабатидаги сўз бирикмалари тузинг.

Ўқимоқ, китоб, дарс, гапирмоқ, ёзмоқ, юрмоқ, кесмоқ, бошламоқ, тингламоқ, боргламоқ, эшитмоқ, кетмоқ, бормоқ, катта, яхши, гўзал, тез, баланд, паст.

3. Битишув. Битишувли алоқада ҳоким сўз тобе сўз билан асосан тартиб ва интонация ёрдамида бирикади. Масалан: *аълочи студент, ақлли бола, чаққон қиз, эзтиборли киши, биринчи курс, шошиб гапирди, туртиниб юрди, шиқ-шиқ тугма, тез юрди* каби.

Битишувда тартиб етакчи роль ўйнайди. Шунинг учун тартибнинг ва интонациянинг (оҳангнинг) ўзгариши бундай алоқа асосида ташкил топган сўз бирикмасининг грамматик характеристини ҳам ўзгартиради. Солиштиринг: *гўзал боғ* (битишув), *боғ гўзал* (мослашув).

Сифатловчи ва сифатланмиш (*чаққон қиз*), равиш ҳоли ва феъл кесим (*жилмайиб гапирмоқ*) ўзаро битишув йўли билан алоқага киришади. Аниқловчи вазифасидаги ёки ҳолат билдирувчи сўзлар асосан тобе сўз, аниқланмиш ёки кесим вазифасидаги сўзлар эса ҳоким сўз бўлади.

208- машқ. Матнни кўчиринг, битишув йўли билан алоқага киришган сўз бирикмаларини аниқланг.

1. Яхши қанд едирап, ёмон панд едирап. (*Мақол.*)
2. Заргаров саҳродағи ишларнинг миқёсини яхши тасвирилаб берди. (*Ас. М.*) 3. Ўт ўчирувчи машиналар кетмакет етиб келиб, тўппа-тўғри алангага ўзини урди. (И. Р.)
4. Унинг кўйлагига чиққан тер эгри-буғри ва оппоқ из солиб, қотиб қолган эди. (*Ш.*) 5. У онаси ning тоғдай юраги, қуёшдай иссиқ меҳри олдида ўзини ожиз сезгандай бўлди. (*Ш.*) 6. Дунёда гўзал, лобар қизлар жамми? (*Ш.*)

209- машқ. Гапларни намунадагидек таҳлил қилинг. Бундаги алоқаларни аниқланг. Сўзлар ўртасида эргаш алоқа қандай восита ёрдамида шаклланганини тушунтиринг.

1. Уларнинг бу хонаки мунозараси ўша куни парма-

чиларнинг йиғилишида ҳам давом этди. (И. Р.) 2. Нодиронинг хонаси одамга лиқ тўла эди. (И. Р.) 3. Мактабнинг катта залида созандалар саф тортиб музика чалишмоқда. Ёшлар бирин-кетин рақсга тушмоқда. 4. Тонг бўзариб ёришди. (Ш.) 5. Йўлчи Унсинни эшик олдида тўхтатди. (О.) 6. У хонадан чаққон юриб чиқиб кетди. (Ж. Абд.)

Н а м у н а: Колхознинг ҳисоб-китоб ишларини Одил эплаб турибди.

- 1) Одил эплаб турибди — (мослашув, III шахс бирликда шаклланган);
- 2) Колхознинг ишлари — (мослашув, III шахс);
- 3) ҳисоб-китоб ишлари — (битишув, сўз тартиби);
- 4) ишларини эплаб турибди — (келишикли бошқарув ва битишув).

210- машқ. Мослашув, бошқарув муносабатидаги сўз бирикмаларини топинг. Уларнинг боғланишидаги фарқларни чизмада кўрсатинг.

1. Ҳамро ака Мансуровнинг товушидан ўзини бепарволикда айблаб, таъна қилаётганини сезди, қовоғини солди, оғирлигини бир оёғидан иккинчи оёғига ағдарди. (С. Ан.) 2. Зум ўтмай ичкаридан икки боланинг баравр йиғлаши эшитилди. (У. Ҳ.) 3. Ширин хаёллар, яхши орзулар оғушидаман. (М. Қориев.) 4. Қамолов яна бир колхоз даласини кўздан кечиргач, «Октябрь» колхози томонга жўнади. (С. Назар.) 5. Қуёш ҳали Шарқдан бош кўтармасдан, ер бетини худди докадай юпқа туман пардаси қоплаган эди. (Ф. Ниёзий.) 6. Даларайхонларининг бинафша гуллари киши кўзини ўйнатади. (С. Ан.) 7. Ермат шаҳардан пиёда қайтиб, ўлгудай ҳоригани учун ҳамма отларга Йўлчи қаради. (О.)

Гапларнинг тузилишига кўра турлари

160- §. Гаплар тузилишига кўра икки турли бўлади:
содда гаплар, қўшма гаплар.

Таркиби айрим гапларга бўлинмайдиган гаплар содда гаплар саналади: *Поччам Лабзакда туради.* (О.) *Бунда икки юздан ортиқ бола дам олади* (С. Аҳм.)

Икки ёки ундан ортиқ содда гаплардан ташкил топган гаплар қўшма гаплар ҳисобланади: *Қизиқ экансан, нега энди атайлаб йиқитсан, сенда қасди борми?* (М. Қориев.) *Қиши бўлмайди, қўй текин, она-болалик фил тўрт танга.* (Ғ. Ғ.) *Мард бир ўлар, номард юз ўлар.* (Мақол.)

211- машқ. Қуйидаги гапларнинг тузилишига кўра содда ёки қўшма гап эканлигини аниқланг. Содда гап қисмларини бирикмаларга ажратиб кўринг.

1. Йломов дўнг бошида чўнқайиб, дараҳтларга кўмилган район маркази томонга назар солди. (Э. А.)
2. Эски деворларни бузаётган бульдозерга тикилди, бирдан тутақиб кетди. (*Мир.м.*) 3. Русановнинг билинда жига бор, дўстларинг кутиб қолишиди. (Х. F.) 4. Бошқа хоналарда чироқ ўчибди. Болалар ухлаб қолишибди... (С. Ан.) 5. Отабек хомуш ўтирас, Ҳасанали эса унинг холини таъқиб этмоқда эди. (А. Қод.) 6. Шу тобда бирдан эшик очилди-ю, талабалардан бири ҳужрага бошини суқди. (О.) 7. Қимирлаган қир ошар. (*Мақол.*) 8. Тинчлик урушни енгади! Яшасин тинчлик! 9. Сабрим чидамай, юқорига интилдим. (Х. F.) 10. Йўлларга тушиб қолган кесакларга қоқилиб, уйдим-чуқурларга оёғи тушиб, мункиб юра бошлади. (*Мир.м.*)

161- §. Содда гаплар дастлаб икки турга бўлиниади: икки составли гаплар, бир составли гаплар.

Эга ва кесими мавжуд бўлган гаплар икки составли гап ҳисобланади: *Кулмоқ ҳамиша умрни узайтиради.* (*«Асқия».*)

Икки составли гап эга ва кесимнинг ўзидангина таркиб топган бўлиши ҳам мумкин. Бу икки составли гапнинг энг содда кўриниши саналади. Бундай гап содда йиғиқ гап дейилади. Масалан: *Баҳор келди. Ўқиш бошланди. Биз жўнадик каби.* Эга ва кесимдан ташқари, аниқловчи, тўлдирувчи, ҳол иштирок этган гаплар содда ёйиқ гап дейилади: *Дуторимнинг торлари қўши булбулдай куйлайди.* Ё эга состави, ё кесим состави мавжуд бўлган содда гап бир составли гап ҳисобланади: *Субҳидам. Қуёш ётоғидан бош кўтарди.* (*П. Қ.*) *Субҳидам*— бир составли гап. Залда тартиб сақлансин! Бу кесим составидан тузилган бир составли гап.

Бир составли гап бир сўздан ҳам, бир неча сўздан ҳам тузилиши мумкин. Масалан *Июнь. Қуёш олов сочади. Ям-яшил ўтлоқ!* Ҳулкар бу ерга келса, қандай қувонади. (*П. Қ.*)

212- машқ. Икки составли ва бир составли гапларни аниқлаб, уларни алоҳида-алоҳида кўчиринг.

1. Ҳаёт қизиқ! Толибжон ҳеч шундай бўлади, деб ўйламаган эди. (*Ш. У.*) 2. Ҳаво иссиқ. Жийда япроқлари қимир этмасди. (*Ж. Абд.*) 3. Умидли дунё. Ишонч билан яшаганинг иши ўнгидан келаверади. (*Ж. Абд.*) 4. У ер-

ларда ўрмонлар, боғлар барпо қилишнинг аҳамияти чи-
зиб берилади. (Ж. Абд.) 6. Бу хаёлнинг ҳаммасини
ҳақиқатга айлантириш керак. Мумкин эмасни қийиндан
ажратиш керак. Хатодан жиноятни айира билиш керак.
(А. К.) 6. Дарс гўё бир дунёга ўхшайди. Унинг поёни
йўқдек... Бир кунда келинчакдек бир неча бор турланади.
(М. Қориев.) 7. Тўй, баҳт, омонлик. Лекин дил тинч
эмас. (Ҳ. Ф.) 8. Машинада бир оз юриб, тепаликка қўта-
рилдик. Пастда қўйлар ёйилиб юрибди. (С. Ан.)

БИР СОСТАВЛИ ГАПЛАР

162-§. Содда гаплар эга ва кесимнинг мавжудлигига
қараб бир составли ва икки составли бўлади.

Икки составли гапларда бош бўлақлар — эга ва кесимнинг иккиси ҳам мавжуд бўлади: *Дугоримнинг торлари қўши булбулдай сайрайди*. (Қўшиқдан.) *Маҳмудхон шаҳарга кетди*.

Бир составли гаплар ё эга составидан, ёки кесим составидан ташкил топади: *Ойни этак билан ёпиб бўлмас*. (Мақол.) *Чекилмасин* — бу гаплар фақат кесим таркибидан иборат. Қиши. *Ҳамма ёқни қор қоплаган*. *Баҳор*. *Ҳамма ёқдан атиргуллар ҳиди анқийди*. Бу гаплардаги қиши, баҳор сўзлари бир составли гап бўлиб келган.

Бир составли гаплар қуйндаги турларга бўлинади:

1. Шахси аниқ гаплар.
2. Шахси ноаниқ гаплар.
3. Шахссиз гаплар.
4. Атов (номинатив) гаплар.

163-§. Шахси аниқ гаплар. Қесими феъл билан ифодаланиб, ҳаракатни бажарувчи шахс ёки предмет — эгани бевосита кўрсатиб турадиган бир составли содда гап шахси аниқ гап дейилади. Чунки бундай гапларда эга мустақил ифодаланган бўлмайди. Гапнинг кесими биринчи ва иккинчи шахсдаги феъл билан ифодаланади. Улар кўпроқ диалогик нутқларда қўлланади. Масалан: *Қўшиқ деб ёздим юрак унларини*. *Уйлаб қарасам, мулоҳаза қилиб кўрсам, сизнинг ўзингиз қўшиқ экансиз*. *Билмаймиз, қачонлардан бери юракда яширин эди бу туйғу*. *Уни курашиб, изтироб чекиб ҳам юракдан чиқариб ташлай олмадим*. (М. Қориев.)

213-машқ. Бир составли гапларни ажратиб кўчиринг. Эга составидан ташкил топган гапларни алоҳида-алоҳида кўчиринг.

Уста Мўмин яккақўл бир, косиб эди. Асрорқул унинг дамини босиб, бўлак ишларига қарашиб, дўконида ётиб юрди. Бу одам ўзи ўттиз бешларга бориб қолган бўлса ҳам, бола-чақа қилолмаган, отасидан қолган мерос — тегирмонни айлантириб, кунини ўтказиб юрган экан. Кейинчалик Ҳайдар ота иккови ошина бўлиб қолди. Ҳайдар ота баъзан кечалари унинг олдига кириб, бирпаст яримпас гаплашиб ўтирадиган бўлди. Шунда Асрорқул тегирмони тўғрисида гапириб хафа бўлаверганидан кейин Ҳайдар ота бир куни Ултармага бориб, тегирмондан хабар олди. Асрорқул қочгандан кейин Ултарманнинг амин-оқсоқоли тегирмонни «пошшолик бўлди» деб ўзиники қилиб олган экан.

Орадан бир неча ой ўтиб, бир кун Ҳайдар ота шаҳарга борган эди, «оқ пошшо тахтдан тушди» деган гапни эшитиб қолди. «Ундоқ бўлса тезроқ бориб Асрорқулдан суюнчи олай» деб келса, Асрорқул йўқ: бу хабарни аллақачон эшитиб, Ултармага жўнабди. Лекин икки ҳафтадан кейин бўшашганича қайтиб келди. Ҳайдар ота «ҳа?» деса, «Оқ пошшо тахтдан тушгани билан оқ амин аминлигидан тушмабди», — деди (A. K.)

164- §. Шахси ноаниқ гаплар. Бош бўлаги феъл билан ифодаланиб, ҳаракат бажарувчи шахсни аниқ кўрсатмайдиган бир составли гап **шахси ноаниқ гап** дейилади. Шахси ноаниқ гапнинг бош бўлаги III шахсдаги феъл билан ифодаланади, лекин бажарувчи шахс аниқ кўрсатилмайди. *Қуш эдим, қанотимни қайирдилар.* (Ҳ. Ҳ.) *Кўчатни кўпинча баҳорда экадилар.* Бундай бир таркибли гапларда асосий эътибор ҳаракатга қаратилади.

214- машқ. Шахси ноаниқ гапларга б 6 та мисол келтиринг, уларнинг шахси аниқ гаплардан фарқини тушунтиринг.

165- §. Шахссиз гаплар. Бош бўлак орқали ҳаракат бажарувчи шахсни топиш мумкин бўлмаган гаплар **шахссиз гаплар** дейилади. Бу тип гапларда ҳаракат бажарувчи умуман қатнашмайди, уни киритиш мумкин эмас. Шахссиз гапларнинг бош бўлаги учинчи шахс формасидаги феъл билан ифодаланиб, кўпинча составли бўлади:

а) равишдош ва бўлмоқ феълидан: *Ойни этак билан ёниб бўлмайди.* (Мақол.)

б) шарт майли, ҳаракат номи ва *керак, зарур, даркор, тўғри келади, мумкин сўзларидан:* *Ишни ўз вақтида бажарииш керак каби.*

215- машқ. Берилган гаплар ичидан шахсиз гапларни топиб, уларга тавсиф беринг. Кесимларнинг ифодаланишини тушунтиринг.

1. Шундай қилиб, ясама қор одамни идорага олиб борибдилар. (*O. X.*) 2. Кўп ўтмай тандир кабобни очиш маросимини бошлашди. (*O. X.*) 3. Айтадиган гаплари кўп бўлса ҳам, айтолмай бир-бирларига қараб туриша-веришади. (*C. Aҳм.*) 4. Ватан, менинг ишқ-муҳаббатим қуёш каби асло қаримас. 5. Бу ерда ўртоқ Эргашевнинг ҳушёрлигига тан бериш керак. (*A. Қ.*) 6. Эшик очиқ бўлса ҳам, сўраб кир. (*Мақол.*) 7. Деҳқон бўлсанг, куз ҳайда, куз ҳайдамасанг, юз ҳайда. (*Мақол.*) 8. Бу чақириққа «лаббай» деб жавоб бериш лозим. 9. Кўнгилга армон бўлмасин деб, чиллаёсин ҳам қилдиришга тўғри келди. (*A. Қ.*) 10. Ҳақиқатан, қизиқ бир ном: ҳайвонларнинг ошқозонини «ишкамба» дейдилар. (*C. А.*) 11. Водилга шу йўлдан борилади. Пахтадан мўл ҳосил етиштириш учун кўп чора ва тадбирлар амалга оширилсин. 12. Тун. Ҳамма ширин уйқуда ётиби. (*O. X.*)

166- §. Атов гаплар. Бирор предмет ёки ҳодиса-воқеа-нинг нутқ ёзланиб турган пайтда мавжудлигини кўрсатадиган бир составли гаплар атов гаплар дейилади. Атов гаплар от ёки отлашган ёзлар билан ифодаланади. Улар бир сўз билан ифодаланганидек, бир неча сўз билан ҳам ифодаланиши мумкин.

Атов гапдан кейин одатда унинг мазмунини аниқлаштирувчи гап келиши талаб қилинади. Масалан: *Уй жимжит. Демак, тинчлик. (Х. F.) Субҳидам. Қуёш ётогидан бош кўтарди. (П. Қ.) Майнинг охiri. Кундуз соат тўрт чамаси. Янги шаҳар кўчалари. Илк баҳор шамоллари ёқимли эсади.*

216- машқ. Атов гапларни ажратиб кўчиринг. Унинг нечта сўз, қандай бирикмадан ташкил топганини айтинг.

1. Ям-яшил ўтов, Ҳулкар бу ерга келса, қандай қувонади. (*П. Қ.*) 2. Қип-қизил саратон қуёши. Мулойим жилмайиб саховат билан нур соча бошлади. (*Ў. X.*) 3. Ҳовли зим-зиё. Ариқдаги сув шалдираб оқади. (*Х. F.*) 4. Үруш. Ойниса айвон устунига суюнганича қотиб қолди. (*Х. F.*) 5. Қўшиқ. Санъатнинг бу турини севмаган ким бор. 6. Меҳмонлар ҳамма билан қучоқлашиб кўришдилар. (*O. X.*) 7. Меҳнат. Меҳнатнинг таги роҳат. 8. Ҳунар. Ҳунардан ризқинг унар. (*Мақоллар.*)

167- §. Сўз-гаплар. Бир сўздан иборат бўлиб, эга ва

кесим составига ажралмайдыган, бошқа сўзлар билан кенгая олиш имкониятига эга бўлмаган гаплар **сўз-гаплар** дейилади. Улар тасдиқ, инкор, сўроқ, таажжуб, ҳис-ҳаяжон кабиларни ифода этиб, контекст билан деярли боғлиқ бўлади. Сўз-гаплар, асосан, экспрессив-модал муносабатларни ифода этгани учун ҳам кўпроқ диалогик ва баъзан монологик нутққа хосдир. Масалан:

— Энди сўзингиздан айнаманг, хўпми?

— Майли,— деди Фазлиддин. (О.)

— Йўқ,— деди Отабек, лекин унинг таажжуби ўй эгасига очиқ кўриниб турар эди. (А. Қод.)

Иўлчи эшикчани очиб кирди:

— Ассалом, Ҳорманг, ота! (О.)

Кишилар ўртасидаги оддий муомалада тез-тез ишлатилиб турадиган бир сўзли ёки фразеологик характердаги этикет бирикмалар сўз-гаплар вазифасида қўлланадиган бўлиб қолган: *салом, ассалом, ёқимили шитаҳа, марҳамат, саломат бўлинг, қуллук, ош бўлсин, яхши боринг, хуш кўрдик, лаббай, жоним билан, бажонидил* кабилар.

217- машқ. Берилган гапларнинг турини айтинг. Сўз-гапларнинг ифодалаётган маъносини тушунтириб беринг.

1. — Машиначингиз менга ёқмади, какетканি ўхшатолмас экан. Бошқасини топамиз.— Хўп. (Ҳ. F.) 2.— Тешавой, сой бўйида кутиб турмоқчимисиз?— Ҳа. (Ҳ. F.) 3. — Юқоридан бирон нима олиб келишларини айтдим. — Раҳмат. Одамларни чақиртирдингизми? 4. Марасул: ...Мен сизни доктор қиласман, академик қиласман! Насиба (*кулимсираб*): Ростми? (А. Қ.) 5. Ҳа, лаббай? Салим Салимов? Хўш, хўш? Билетни олди? Тайёрланяпти? Хайрият. (Ҳ. F.)

70- топшириқ. Ўзингиз биронта бадини асаддан турли маънодаги сўз-гапларга мисоллар топиб уларни изоҳлаб беринг. Одоб-ахлоқ тарзидағи сўз-гапларга мисол топинг.

168- §. Тўлиқ ва тўлиқсиз гаплар. Гаплар нутқ мақсади талабига мувофиқ тўлиқ ва тўлиқсиз ҳолда айтилади.

Тўлиқ гапларда нутқ мақсади учун талаб қилинган барча гап бўлаги мавжуд бўлади: *Тўғри сўз қиличдан ўткир. (Мақол.) Машраб вужуди қалт-қалт титраб чангол орасидан аста мўралаб қаради.* (О. Ё.)

Тўлиқсиз гапларда нутқ мақсади учун талаб қилинган зарур гап бўлакларидан бири ёки бир нечтаси нутқ

услуби талабига кўра иштирок этмайди. Аммо ифодаланмаган бўлак нутқ жараёни ва контекстдан англашилиб туради. Масалан:

- Сизлар қачон далага жўнайсизлар?!
- Бир оз тайёргарлик кўриб бўлайлик.
- Вақт алламаҳал бўлди-ку?!
- Бўлдик, кетяпмиз.

Тўлиқсиз гап тузилиши тўлиқ гапдаги айрим бўлакларнинг эллипсис («тушириш») ҳодисасига учраши натижасида шаклланади. Гапда қўйидаги гап бўлаклари эллипсисга учраши ва шу йўл билан тўлиқсиз гап шаклланиши мумкин.

1. Кесим туширилади:

- Иўл бўлсин?
- Мактабга.

2. Кесимга тобе сўзлар (ҳол, тўлдирувчи) туширилади:

- Бугун жўнайсанми?
- Жўнайман.

3. Эга ва кесим туширилади:

- Маҳмуджон нималар ҳақида сўзлади?
- Мактаб-тажриба участкаси ҳақида.

Тўлиқсиз гапларда тиниш белгилари қўйидагича ишлатилади:

1. Тўлиқсиз гап охирига нуқта қўйилади:

- Қаёққа отланяпсиз?
- Тоққа.

2. Тўлиқсиз гаплар олдинги гапдан тире билан ажратилиб, доим янги сатрдан ёзилади:

— Ўзим ҳам тасодифан эшиштдим. Қосимов ғам-ғуссасини ичига ютиб юрипти. Ўзинг бор, ҳол-аҳвол сўра.
— Албатта, бораман.

3. Кетма-кет сўроқ билдирувчи тўлиқсиз гаплардан кейин сўроқ белгиси қўйилади:

— Нега биз билан хурсандчилик қилгингиз келмайди?
— Шу дамда кўнгилга хурсандчилик сиғадими?

71-топшириқ. Бирорта бадиий асарнинг бир неча саҳифасини ўқиб кузатинг. Тўлиқ ва тўлиқсиз гапларни ажратиб, тўлиқсиз гапларда туширилган бўлакни аниқлаб, тиниш белгиларининг қўйилишига эътибор қилинг ва изоҳланг.

ГАП БЎЛАҚЛАРИ

169- §. Гап таркибидағи сўзлар турли вазифани ба жаради,— гапнинг турли бўлаклари бўлиб келади. Бу

сўзлар ўзаро боғланганда, ўзаро муносабатга киришгандагина гап бўллаги бўла олади. Масалан: *Шавкат бирпасда жонланиб кетди* (*Ў. Ў.*) гапида қўйидаги гап бўллаклари мавжуд: *Шавкат* (ким?) — эга; *жонланиб кетди* (нима қилдй?) — кесим; *бирпасда* (қачон?) — равиш ҳоли.

Ҳар бир гап бўллаги ўзи муносабатга киришган сўз билан маълум синтактик алоқада бўлади:

- 1) *Шавкат жонланиб кетди;*
- 2) *бирпасда жонланиб кетди.*

Ҳар бир гап бўллаги ўзининг қайси сўз билан ифодалинишига ва бошқа гап бўллаги билан бўлган грамматик муносабатига кўра белгиланади.

Гап бўллаклари вазифаларига, гапдаги мавқеига қараб дастлаб иккига бўлинади: 1. Бош бўллаклар. 2. Иккинчи даражали бўллаклар.

1. Икки составли гапнинг асосини ташкил қилган бўллаклар — эга ва кесим бош **бўллаклар** ҳисобланади. Масалан: *Ортиқ девор тагидаги қўэзиларни кўриб қолди.* (*П. К.*)

2. Бош бўллаклардан бирига эргашиб, уларни аниқлаб, тўлдириб, изоҳлаб келадиган бўллаклар **иккинчи даражали бўллаклар** ҳисобланади.

Иккинчи даражали бўллакларга аниқловчи, тўлдирувчи ва ҳол киради: *Тепада* (ҳол) *бир парча* (аниқловчи) *оқ* (аниқловчи) *булут сузиг юрибди.* (*П. К.*)

218- машқ. Бош ва иккинчи даражали бўллакларни аниқлаб, бош бўллакларнинг қайси сўз туркуми билан ифодаланганигини айтинг.

1. У беихтиёр яна ўзи ва қизининг келажаги ҳақида ўйлаб кетди. (*Ў. Ў.*) 2. Кечга бориб қорасовуқ турди. (*Ў. Ў.*) 3. Рустам хаёл билан харсанг тош ёнига ўтириди. (*Ш.*) 4. Иккиси қадрдонларча кўришди. (*Т. Т.*) 5. Мен отпуска олиб жиянни қидириш учун йўл олдим. (*О. Ҳ.*) 6. У айниқса ўқишиш бошланган куни яйраб, яшнаб кетарди. (*О. Е.*) 7. Қоп-қора нозик ва майин соchlари қўнғир-қўнғир бўлиб бўйнига тушиб турарди. (*Ш.*)

БОШ БУЛАКЛАР

170- §. Эга ва унинг ифодаланиши. Гапдаги фикр қарашли бўлган, икки составли гапнинг мутлақ ҳоким бўллаги ҳисобланган бош бўлак эга деб аталади. Масалан: *Администратор* (эга) *минг тавозе билан ўн бешинчи тошомабиннинг олдига борди.* (*С. Аҳм.*)

Эга доимо бош келишик шаклида келади. У қуйидаги сўз туркумлари билан ифодаланади:

1. От билан: *Рустам имтиҳонларга ўз вақтида тайёргарлик кўрди.*

2. Олмош билан: *Сен ўзингни мақтама... (Мақол.)*

3. Сифат билан: *Яхши — иш битиур, ёмон — иш ийтирур. (Мақол.)*

4. Сон билан: *Қизиқ, бири — қочоқ, бири — қаҳрамон. (С. Аҳм.) Икки карра икки — тўрт.*

5. Сифатдош билан: *Эшигтан кўрганни енгар. (Мақол.)* (Ўқиган ўқдан ошар, ўқимаган туртқидан шошар. (Мақол.)

6. Ҳаракат номи билан: *Ишламоқ иштаҳа очар. (Мақол.)* *Ўқиш — улғайиши. (Мақол.)*

7. Модал сўзлар билан: *Бор — борича, йўқ — ҳолича. (Мақол.)*

8. Тақлидий сўзлар билан: *Қўшини ҳовлидан чақалоқнинг инга-ингаси эшитилиб туради.*

9. Эга бутун бирикма билан ифодалана олади. Масалан: *Ўзбекистон Жумҳуриятининг пойтакти — Тошкент. Дўстнинг минги ҳам кам, душманнинг бири ҳам кўп. (Мақол.)*

219- машқ. Кўчиринг. Гапларнинг эгаларини аниқланг. Эга қайси сўз туркуми билан ифодаланганини айтинг.

1. Ақлли ўзини айблар, ақлсиз — дўстини. (Мақол.)

2. Ўлмас нохушлик билан қовун палласидаги ион қуюқларига қаради. (Е. Шукуров.) 3. Бирлашган ўзар, бирлашмаган тўзар. (Мақол.) 4. Мастира Машрабнинг кўзларига қадалиб қаради. (О. Е.) 5. Ялқов билан анқов — душман учун катта ов. (Мақол.) 6. Учови правление аъзоларидан бир неча кишини чақириб маслаҳатлашди. (А. Қ.) 7. Қамтарлик кишига зебу зийнатдир. (Мақол.) 8. Ўқишиш — бошқа, уқишиш — бошқа. (Мақол.) 9. Яхши қанд едирап, ёмон панд едирап. (Мақол.)

171- §. Кесим ва унинг ифодаланиши. Гапда эганинг умумий белгисини билдирадиган бўлак кесим дейилади. Масалан: *Котиба хотин баракнинг брезент эшигини кўтариб ичкарига кирди. (С. Аҳм.)* Кесим гапнинг шаклланишидаги асосий белгиларни кўрсатувчи бўлак ҳисобланади. У феъл билан ифодаланганда, эганинг иш-ҳараратини, ҳолатини тасдиқ ёки инкор қилиш ўйли билан аниқлайди. Масалан: *Каттакон ер ўчоқ олдида бир қария чирсиллаб ёнаётган ўтга қараб жимгина ўтирибди. (С. Аҳм.)* Айтишиларича, у қишилоққа қайтмабди.

Кесим феълдан бошқа сўз туркумлари билан ифодаланганда, эганинг белгисини, хусусиятини кўрсатади. Масалан: *Бол яхши, болдан ҳам бола яхши.* (Мақол.) *Акам — муҳандис, опам — ўқитувчи.*

Кесим қайси сўз туркуми билан ифодаланишига кўра икки хил бўлади: **феъл кесим, от кесим,**

1. Феъл кесимлар қўйидаги кўринишларга эга:

а) соф феъл кесимлар: *Хўроз нима учун саҳарда қичқиради.* (А. Қ.) *Мен институтга кетдим;*

б) равишдош билан ифодаланган кесим: *Мотор гуриллаб, машина олдинга интилди;*

в) сифатдош билан ифодаланган кесим: *Ит ҳурап — карвон ўтар.* (Мақол.);

г) ҳаракат номи билан ифодаланган кесим: *Ўқиши — улғайши.* (Мақол.) *Мақсадим — ўқимоқ.*

2. От кесим. Феъл формаларидан бошқа сўз туркумлари билан ифодаланган кесим кенг маънода **от кесим** дейилади.

От кесимлар қўйидагича ифодаланади:

а) от билан: *Тешабой ашаддий душману, сиз хизматни қилаётган депо хўжайини дўстми?* (М. Исм.) *Яхши рўзгор — жаннат, ёмон рўзгор дўзах* (Мақол.);

б) сифат билан: *Усти ялтироқ, ичи қалтироқ* (Мақол.);

в) сон билан: *Бирники — мингга, мингники — туманга.* (Мақол.) *Бу биринчиси. Икки марта икки — тўрт;*

г) олмош билан: *Мақсадим — шу. Ўзим ҳар жойдаман, кўнглим сандадур.* (Қўшиқ.);

д) равиш билан: *Сиздан умидим кўп;*

е) модал сўз билан: *Иўқолинг, сиз билан ади-бади айтишишига вақтим иўқ!*

Кесимлар одатда эга билан шахс-сонда мослашиб келади.

172-§. Кесимлар тузилишига кўра, асосан, уч хил бўлади: **содда кесимлар, составли кесимлар, бирикмали кесимлар.**

1. Содда кесимлар бир сўз билан ифодаланади: *Қани, чал.* *Бойвачалар эшигинг, дуторни қийворади бу йигит* (О.) — содда феъл кесимлар. *Илм, фан ва фикр* олами ниҳоят кенг ва чуқур. (О.) *Кеча — ойдин* — содда от кесимлар.

2. Составли кесимлар феъл-феъл, от-феъл шаклида тузилади. *Йигит супанинг бир четига қисилиб ўтиргач, тинғирлатиб дуторини созлай бошлади.* (О.) *Илгарила-*

ри бу ер чакалакзор эди. Биринчи гапнинг составли кесими феъл-феъл типида, иккинчи гапнинг кесими эса от-феъл типида тузилган.

3. Бирикмали кесимлар кўпроқ бир неча мустақил сўзлардан ташкил топган бирикмалар билан ифодалана-ни: *Бу бино* — «Олимлар ўйи». *Душанба* — *Тожикистон жумҳуриятининг пойтакти*. *Ватанимиз баҳтиёр ав-лодлар диёрдидир*.

220- машқ. Гапларнинг кесимларини топиб, қайси сўз туркуми билан ифодаланганини ва кесимнинг қайси турига кирнишни айтинг.

1. Олтита болани бағрига олган Маҳкам тақачи — шу. (Р. Ф.) 2. Мўътабар эшикни секин ёпиб чиқиб кетди. (Р. Ф.) 3. Санасангиз-санамасангиз ҳам ҳаммаси қирқта. (О.) 4. ...Тез ҳал қилиш керак, талабгорлар кўп. (Ў. Ў.) 5. Бу қарорни амалга оширишдаги биринчи қадам — ўқиш, ўқиганда ҳам аъло ўқиш эди. (Ў. Ў.) 6. Мингбулоқ ўзи яхши, сув сероб, лекин у қаровсиз. Кўчалари тор, қинғир-қийшиқ. (Ў. Ў.) 7. Ўнинг Воҳид Миробидов ҳақидаги гаплари ҳам қизиқ. (О. Е.) 8. Та-биатда ҳеч қандай сирли куч таъсирида рўй берадиган нарса йўқ. (Ж. Абд.)

173- §. Эга билан кесим орасига қуйидаги ҳолларда тире қўйилади:

1. Эга от, сифат, сон, сифатдош билан; кесим ҳам от, сифат, сон, олмош, модал сўз билан ифодаланганда: *Яхши рўзгор* — *жаннат*. *Ёмон рўзгор* — *дўзах*. (Мақол.) *Яхши* — хунук либос билан ҳам яхши. (Мақол.) *Бор* — *бор ишда бор, ишламаган нонга зор*. (Мақол.)

2. Гапнинг эгаси ҳам, кесими ҳам ҳаракат номи билан ифодаланганда: *Ўқииш* — *улғайшиш*. (Мақол.)

3. Эга ёки кесим кўрсатиш олмоши билан ифодаланганда: *Бу* — *сиз учун катта синов*. *Мақсадим* — *шу* каби.

I. Эслатма: Қуйидаги ҳолларда эга ва кесим орасига тире қўйилмайди.

1. Кесим от билан ифодаланиб, -дир эди (экан, эмиш), бўлмоқ кабилар билан бирга келса: *Акам муҳандисдир*. *Онам ўқитувчи*дир. *Уша кезларда у тракторчи* эди. *Меҳнат қилган хор бўлмас*, дўст-дushmanга зор бўлмас. (Мақол.).

2. Эга кишилик олмоши билан ифодаланса: *Мен ака, сен ука*.

3. Агар эга составидан англашилган воқеа-ҳодиса мазмуни кесим составидан англашилган мазмунга ўхша-

тилиб, улар орасида ўхшатиш юкламаси **худди** келса:
Бепоён жумҳуриятимиз худди ўхшаши йўқ чаманзор.

4. Кесим сифат, равиш, тартиб сон, кишилик олмоши билан ифодаланса: *Бол ширин, болдан бола ширин.* (*Мақол.*) *Оға-ини тутув бўлса, от кўп, опа-сингил тутув бўлса ош кўп.* (*Мақол.*) *Биз биринчи. Буларнинг ҳаммаси бизники.*

5. Кесим бор ёки йўқ сўзи билан ифодаланса: *Энди обрўйим бор, дилда ғурурим бор.*

II. Эслатма. Иккни атоқли от кетма-кет қўлланиб, иккни жой оралигини билдирса (бир нарсага тенг ва алоқадорлик билдириганда), улар орасига ҳам тире қўйилади: *Тошкент — Янгийўл поездси, Жаул — Ленц қонуни каби. Макон, замон, миқдор чегарасини билдирувчи 20—30-йиллар, XIX—XX аср каби ҳолларда ҳам тире қўйилади.*

221-машқ. Гапларни кўчиринг, бош бўлакларни топиб, тагига чизинг, тиренинг қўйилиш сабабларини баён қилинг.

1. Элга эл қўшилса — давлат, элдан эл кетса — меҳнат. 2. Туяга юк азоб беради, одамга — виждон. 3. Кишиларга муҳаббат — энг яхши одат. 4. Ер — хазина, сув — олтин. 5. Ўқиш — бошқа, уқиш — бошқа. (*Мақоллар.*) 6. Амал — асов отдек гап. (*Ў. Х.*) 7. Тошкент — Узбекистон жумҳуриятининг пойтахти. 8. Межмонларнинг аксарияти ўрта ёшли — ўттиз-қирқ орасидаги одамлар эди. (*О.*) 9. Эргашев — мажлис раиси — лабини бурди ва бошини чайқади. (*А. Қ.*) 10. Яхши рўзгор — жаннат, ёмон рўзгор — дўзах. Оземак — тани соғлиқ, оз демак — ҳикматга боғлиқ. Оз емак — соз емак. Аччиқ тил — заҳри илон. (*Мақоллар.*) 11. Бир хизматчининг қизини ўз қариндошига... олиб беради ... Бу — бир. (*О.*) 12. Бу қиз Гулнор эди. (*О.*) 13. Томчи — ел бўлмас, душман — эл бўлмас. 14. Бирники — мингга, мингники — туманга. Давлатинг — ота-онанг. Қўл югуриги — ошга, тил югуриги — бошга. Фарзанд — белнинг қуввати. (*Мақоллар.*)

ИККИНЧИ ДАРАЖАЛИ БУЛАКЛАР

174-§. Иккинчи даражали бўлаклар бош бўлаклар билан (бошқа иккинчи даражали бўлаклар билан ҳам) боғланиши ва гапдаги вазифасига кўра уч турга бўлинади: **аниқловчи, тўлдирувчи ва ҳол.**

175-§. Аниқловчи. Аниқловчи предметнинг белгисини ёки бир предметнинг бошқасига қарашли эканлигини

билдириб, қандай?, қанақа?, қайси?, қанча?, кимнинг?, ниманинг, қаернинг? сўроқларидан бирига жавоб бўлади. Аниқловчи отга боғланиб, аниқловчи аниқланмиш биримасини ҳосил қиласди. *Одам боласи яхши гапнинг гадоси, дейдилар* (Т. Т.) гапидаги бир гуруҳ аниқловчилар (*одам, яхши, гапнинг*) ифодаланиши ва маъноси жиҳатидан иккинчи гуруҳ аниқловчилардан (*одам, гапнинг*) фарқланади. *Яхши* аниқловчиси сифат билан ифодаланиб, предметнинг белгисини билдирган. Иккинчи гуруҳ аниқловчилар: *одам* (белгисиз — қаратқич келишик қўшимчасиз), гапда от билан ифодаланган. Шунга қўра аниқловчилар иккига бўлинади: **сифатловчи аниқловчи ва қаратқич аниқловчи.**

176- §. Сифатловчи аниқловчи предметларнинг белгихусусиятини, миқдор-даражасини билдиради. Сифатловчи ўзи аниқлаган сўзга битишув йўли билан тобе вазиятда бириқиб, сифатловчи-сифатланмиш биримасини ҳосил қиласди. Сифатловчи содда сўз ва сўз биримаси билан ифодаланади: *Шарқ томондаги баҳайбат тоғ остида эса қудратли бир оқишилик кўзга ташланяпти.* (Ў. У.)

177- §. Қаратқич аниқловчи бирор предмет ё шахснинг ўзи ифодалаган шахс ёки предметга қарашли эканлигини кўрсатади: *Бу йилги баҳорнинг кеч келиши кўпларнинг тинка-мадорини қуритди.* (С. К.) Бу гапда қаратувчи — *кўпларнинг* сўзи қаралмиш — *тинка-мадори* сўзининг *кўпларга* қарашли эканлигини ифодалаган. Қаратувчи ўзи аниқлаган сўзга мослашув йўли билан, тобе вазиятда бириқиб, қаратувчи-қаралмиш биримасини ҳосил қиласди.

222- машқ. Аниқловчиларни топиб, сифатловчи аниқловчиларга алоҳида, қаратувчи аниқловчиларга алоҳида изоҳ беринг. Қайси сўз туркумлари билан ифодаланганини тушунтиринг.

1. Ҳаво дим. Иссиққа тоб беролмаган ғўзалар хомуш. (*Ж. Абд.*)
2. Үнг қўлда эса осмонўпар қорли чўққилар, чўққилар этагида Мингбулоқнинг ям-яшил толзорлари кўзга чалинар, яқинда у ерда ҳам яна бир катта қурилиш пойдевори қўйилиши керак эди. (*О. Е.*)
3. Темиржон яхшироқ билмаган-нетмаган одам ҳақида ўринсиз қарор чиқариб қўяётгани учун ўзи дакки берди. (*Ж. Абд.*)
4. Қисқаси ғаройиб, айни пайтда оддий мактаб портфели эди. (*Ч. Айт.*)
5. Сурхонбойнинг қўзлари хидалашиб кетгандай бўлди. (*И. Р.*)
6. Иссиқ шамол ўрнини муздек тоғ ҳавоси эгаллади. (*Ў. Ум.*)
7. У оҳу

боласидай бағоят гўзал экан. (Ч. Айт.) 8. Паранжиллик кимса нарироқ борғач, итлар вовиллашиб юборди. (Мирм.) 9. Қуёш тиф ураётган пайтдаги дашт манзарасидан гўзалроқ нарса бўлмаса керак. (Ч. Айт.)

178- §. Аниқловчиларнинг предмет ёки шахсни қайта номлаш учун қўлланадиган тури изоҳловчи дейилади.

Изоҳловчилар гапдаги вазифаси, маъноси жиҳатидан аниқловчига ўхшаса-да, от билан ифодаланиши жиҳатидан ундан фарқ қиласди. Масалан: *Сулаймон ота Зул-Фиқор* амакиникига бориб хабар қиласди. (М. Исл.) Изоҳловчи изоҳланмиш билан қатор келиб, унвонни, машғулот — қасбни, жинсни, қариндош-уруглик муносабатини ҳурмат қилиш, лақаб ва тахаллусни ифодалайди.

223- машқ. Гапларни ўқинг. Изоҳловчиларни аниқлаб, маъносини тушунтиринг, уларнинг сифатловчилардан фарқини айтинг.

1. Иқбол сатанг, Мехринисани кулдирди-ю, кўнгли жойига тушиб ошхонага кетди. (Р. Ф.) 2. Отаси Иноят оқсоқол яна тирикчиликнинг пайига тушди. (С. Аҳм.) 3. Содиқ темирчи Раззоқнинг ҳорғини кўзларига боқиб сўради. (Ҳ. Ф.) 4. Сиз ўртоқ Тўқсона афанди, ўзингизнинг Тўқсобалигингиздан шунаقا орланасизми? (С. Аҳм.) 5. Faфур тоғамнинг ўғли-чи, Азамат. (Ҳ. Ф.) 6. Қишлоқда уни катта-кичик «Ўмматали паратка» дерди. (С. Аҳм.) 7. Асқар понсонот деган қонхўр босмачи ўт қўйган уйлардан эди. (А. Қ.) 8. Оқсоч хотин қизларни ювинтириб, тарантириб, яхши кийимларини кийгизиб меҳмонхонага олиб чиқди. (А. Қ.) 9. Қурбон ота сада остидаги супага жой қиласди. (А. Қ.)

224- машқ. Ўзингиз қариндош-уруг, қасб, лақаб маъносини ифодалайдиган изоҳловчилар иштирокида бир неча гап тузинг.

179- §. Тўлдирувчи ва унинг ифодаланиши. Гапнинг бирор бўлагига (кўпинча кесимга) бошқарув йўли билан боғланиб, уни тўлдириб келган иккинчи даражали бўлак тўлдирувчи дейилади. Масалан: *Омон менга қаради, мен унга қарадим.* (Ғ. Ғ.) *Водийларни, тоғларни ошиб, Далаларда ёлғиз адашиб, келиб қолди юртингга Омон.* (Ҳ. О.) Сизга нима бўлди ўзи? (О. Е.)

Тўлдирувчи қуйидагича ифодаланади:

1. От билан: *Дилишод мактубни холосига бериб, кўчага циқиб кетди.* (М. Исл.) *Мансуров одамлар билан хайрлашиди.*

2. Отлашган сифат билан: *Яхшига қора юқмас, ёмонга эл боқмас.* (Мақол.)

3. Отлашган сон билан: *Бешни бешга қўйисак, ўн бўлади.*

4. Сифатдош билан: *Билмагандан билган яхши, тўғри иши қилган яхши. (Мақол.)*

5. Ҳаракат номи билан: *Унинг кулиб боқишиларини бир зум ҳам унумайман.*

Тўлдирувчилар бирикмали ҳолда ҳам ифодаланади: *Ёшлиқдан ота-она ҳурматини ўрнига қўйишига интил!*

Одатда, тушум келишигидаги сўз билан ифодаланган тўлдирувчилар воситасиз; жўналиш, ўрин-пайт, чиқиш келишиги, кўмакчилар билан шаклланган тўлдирувчилар эса воситали тўлдирувчилар саналади.

Воситали тўлдирувчи белгили (тушум келишик қўшимчасини олган ҳолда) ва белгисиз (келишик қўшимчасисиз) келади: *Одамни меҳнат улғайтиради* (белгили). *Бир туп ток эксанг, бир туп тол эк.* (Мақол.) (белгисиз).

225- машқ. Гапларни ўқиб, тўлдирувчиларни топинг. Уларни ўзи боғланган сўз билан бирга кўчириб ёзинг. Тушириб қолдирилган келишик қўшимчалари ва кўмакчиларни қўйинг.

1. Дадаш меҳрибон одамлар... суҳбатлашиш... завқланар эди. (И. Р.) 2. Темиржон у... ўзгача севинч ва ҳаяжон... кутиб олди. (Ж. Абд.) 3. Сен мен... гап... чалғитма. (Ч. Айт.) 4. Юмалаб келаётган ёғоч ёшгина бақувват қайнин... босиб, эзиб келмоқда... (Ч. Айт.) 5. Мана риёкор ота... икки оғиз ширин сўзи туғдирган умид ... Тўтиқиз ... кўнгли кўтарили. У худди бувиси ... холаси ... кўргандай суюнди. (М. Исм.) 6. Аҳмад икковлари косиб ... шогирд тушганлар Аъзам тиззасидаги маҳси ... ҳафсала ... пишиқ тикади. (О.)

180- §. Ҳол ва унинг ифодаланиши. Ҳол кесимга боғланиб, ундан англашилган иш-ҳаракатнинг ўринини, пайтини, ҳолатини, бажарилиш сабабини, мақсадини билдирадиган иккинчи даражали бўлакдир.

Ҳол маъно ва вазифасига кўра бир неча турга бўлиниди: равиш ҳоли, ўрин ҳоли, пайт ҳоли, сабаб ҳоли, мақсад ҳоли. Масалан: *эртага борамиз, оҳиста қадам ташлади.*

Равиш ҳоли. Иш-ҳаракатнинг қай тарзда бажарилишини кўрсатиб, феъл билан ифодаланган гап бўлагига битишув йўли билан боғланадиган ҳолнинг туридир. Равиш ҳоли кўпинча равиш ва равишдош билан ифодаланади. Масалан: *Маъсуда хаҳолаб кулиб юборди.*

(Р. Ф.) Нодиров машинани тез ўнгга буриб, йўлга тўғрилади. (И. Р.)

Ўрин ҳоли ҳаракатнинг бажарилиш ўрнини билдириб, қаे р (-га, -да) да н?, қаерга ч? сўроқларидан бирига жавоб бўлади: *Теварак-атрофда ҳеч ким йўқ. Сой томонга кетганди.*

Сабаб ҳоли ҳаракатнинг бажарилиш сабабини англатиб, нима учун? нимага? (нега?) нима сабада н? сўроқларидан бирига жавоб бўлади: «*Ичкарида бўлаётган бақириқларни эшишиб, қўрққанидан юраги қинидан чиқаёди.* (Мирм.)

Пайт ҳоли ҳаракатнинг бажарилиш пайтини англатиб, қачон?, қачонгача?, қачондан бери? сўроқларидан бирига жавоб бўлади: *Ҳар кеч соат саккиз-да шу ерга келади.* (Р. Ф.)

Мақсад ҳоли ҳаракатнинг бажарилишидан кўзда тутилган мақсадни билдириб, нимага?, нима учун?, нима мақсадда? сўроқларидан бирига жавоб бўлади: *Ўз кўзи билан кўриб ишонши мақсадида яна бир келиб кетди.*

Миқдор-даражага ҳоли ҳаракатнинг бажарилиш миқдорини ва даражасини кўрсатиб, қанча?, қанчалик?, неча марта? сўроқларидан бирига жавоб бўлади: *Сиздайларни кўп кўрганимиз.*

226- машқ. Гапларни ўқиб, ҳолларни аниқланг. Маъносига кўра турларини айтинг. Ҳолнинг сўрғи, ифодаланиши, қайси сўзга боғланишини намунадагидай тушунтиринг.

1. Боғдан чиқиш учун бир неча одим юргач, ишком ичида суюниб турган қизга кўзи тушди; уялганидан бир зумда қизарип-бўзарип кетди, кетмонга тикилиб қадамни тезлатди. (О.) 2. У қасддан Суқсуройни хонга олиб берди. (А. Эшонов.) 3. Бир чимдим ухлаш учун кўзини юмди. (О.) 4. Эрталаб атайин Сизни излаб келган эдим. (С. Нуров.) 5. Бугун жўрттага қилгандай ёмғир ҳам тинмади. Олинг, атайлаб сиз учун қилдим. (С. Зуннунова.) 6. Музaffer aka, булар атайин сизни излаб келибди. (П. К.) 7. У мени қасддан қаматмоқчи бўлиб, қалбаки ҳужжатлар тўғрилабди. (П. К.) 8. Биз атайлаб ўқиш учун шу даргоҳга келганимиз. 9. Бултурги хатоларни такорламаслик учун ҳозирдан ишга киришдик. Колхозчилар дам олиш учун шийпонга йифилишган. (С. Назар.) 10. Концерт тугаши билан ҳаммадан олдин чиқиб кийимларини олдилар. Трамвай бекатига етмасдан момақалдироқ гумбурлаб, чақмоқ чақди, бирдан чеалклаб

ташлангандек жала қуя бошлади. (*M. Қориев.*) 11. Бир неча кундан кейин уйимизга буқчайган бир кампир келди. 12. Биринчи қор учқунлаб турганда, шу маҳаллалик Мұхим бува деганинг ташқисига күчдик. (*A. Қ.*) 13. Ботир билан Нор хола кечки овқатдан кейин гулзор лабига қўйилган катта ёғоч каравотда чой ичиб ўтирган эдилар, шошилганича Қодирқул кириб келди. (*C. Назар.*) 14. Меҳмонар кеча Самарқанднинг диққатга сазовор жойларини кўрдилар.

227- машқ. Гапларни синтактик таҳлил қилинг. Иккинчи дара жали бўлакларни топиб, ҳар бирининг вазифасини, ҳоким бўлакка муносабатини аниқланг.

1. Ўртага бир оз жимлик чўкди. Ҳаёлимда ҳар турли фикрлар кезади. Демак, илгари Анварни севган экан-да, мени бўлса лақиллатиб юрган экан-да. Ахир битта юракка икки муҳаббат ҳеч қачон сифмайди-ку. (*M. Қориев.*) 2. Яқинда «Ғалаба» колхозига бордим. Паркент бурунгидан обод бўлиб кетибди... Колхоз идораси ўзгариб кетибди... Бухгалтерия аввалги жойида экан. Раиснинг илгариги кабинети чорвачилик бўйича бухгалтерга тегибди. Ичкарига кирдим. Нуриддин ака ўша-ўша, ўзгарамади. (*C. Ан.*) 3. Баҳор кечаси. Юлдузлар қора баҳмалга қадалган беҳисоб гавҳарлардек йилтирамоқда. Ботир билан Бўстон катта қишлоқ кўчасидан ёнма-ён юриб келадилар. (*C. Назар.*) 4. Жувон ўтдек чақнаб турган кўзларини катта-катта очиб менга қараб туради. (*C. Аҳм.*) 5. Икковлари гангир-гунгур гаплашиб ўтиришди. (*O.*)

228- машқ. Тўлдирувчи ва ҳолларни топиб, уларнинг ифодаланишини ва фарқларини айтинг. Ҳоким бўлак билан муносабатини тушунтиринг.

1. Мен кейинда қолмаслик учун зулукдай қора-байримнинг тақимига аста қамчи босдим. Бехосдан отим олиб қочди. Эгардан ўмбалоқ ошиб тушишимга сал қолди. Кучли шамол шляпамни қаёққадир учириб кетди, сочларимни тўзғатди; пиджагимдан юлқилади, нафас олишга қўймай, бўғизимга тиқилди. Зўр бериб жиловни тортаман. Отимнинг узун бўйни камондай эгилади. (*C. Ан.*) 2. Ўйлайсан, ўтган кунларни эслайсан. Ҳаётнинг мураккаблигига, ўжарлигига тан беришга мажбур бўласан. Фақат ана шу қийинчиликлар гирдобидан ўз ақл-идрокинг кучи билан нурафшон йўл ахтарасан, баҳтиёрлик сари интиласан. (*M. Қориев.*) 3. Ботир ан-

чагача электр ёруғида китоб ўқиди. Нималарни дир ёзди. Карим полвон янги газеталарни бир кўздан кечириб каравотга чўзилди. Ботир ҳам каравотга чиқиб ётди. (*C. Назар.*) 4. Ойниса танча устидаги чойнакни кўтариб, қулт-қулт совуқ чойни ютди. (*O.*)

229- машқ. Матнни таҳлил қилинг: бош бўлаклар билан иккинчи даражали бўлакларни аниқланг. Уларнинг ифодаланишини, ўзаро боғланишини схема асосида кўрсатинг. Синтактик алоқани реаллаштирувчи воситаларни тушунтиринг.

Кўплаб китоб ўқиш, ўқиганда ҳам уни тушуниб ўқишида ҳикмат катта. Китоб ўқишининг фойдаси ҳақида Ибн Синонинг ҳаётидан олинган ушбу лавҳа диққатга сазовор: Бухоро амири Нух Ибн Мансурнинг саройида жуда бой кутубхона бўлган, аммо унга киришга ҳаммага ҳам рухсат этилмаган. Бир тасодиф туфайли Ибн Сино ўша кутубхонага кириш ва китоблардан фойдаланиш ҳуқуқига эга бўлган. Амир касал бўлиб қочади, уни сарой табиблари даволай олмайди. Шунда Бухоро табиблари орасида энди ном чиқариб келаётган Абу Али ҳақида гапириб қолишади. Амир уни саройга чақириларини буюради. Ибн Сино амирни даволайди. Амир эса уни сарой табибларига бошлиқ қилиб тайинлади. Шу сабабли ҳам уни илмий адабиётларда «Шайх-ар раис» («Олимлар сардори») деб аташади. Амир Ибн Синодан хурсанд бўлиб, «Яна нималарни истар эдингиз?»— деб сўрайди. Абу Али эса амирдан кутубхонадан фойдаланишга рухсат беришини сўрайди. Амир рухсат беради. Бу кутубхона ҳақида Ибн Сино қўйидагиларни ёзади:

«Мен кўп хонали уйга кирдим: ҳар бир хонада китоб солинган устма-уст қўйилган сандиқлар бор эди: бир хонада арабча ва бадиий китоблар, иккинчи хонада мусулмон ҳуқуқига доир ва ҳоказо, ҳар бир хонада бирор фанга доир китоблар бор эди. Мен қадимги муаллифлар китобларининг рўйхатини ўқидим ва ўзимга кераклигини сўрадим. Мен кўпчилик, ҳатто номини ҳам билмайдиган китобларни кўрдим, мен бунчалик кўп китобларни олдин ҳам, кейин ҳам кўрмаганман. Мен бу китобларни ўқидим, улардан фойдаландим ва ҳар бир кишининг ўз фани соҳасидаги аҳамиятини тушундим».

ГАПНИНГ УЮШИҚ БЎЛАҚЛАРИ

181- §. Гапда бир хил синтактик вазифани бажариб, бир хил сўроққа жавоб бўлган бўлаклар гапнинг уюшиқ

бўлаклари ҳисобланади. Уюшиқ бўлаклар одатда бир сўз туркумига мансуб бўлади. Улар ўзаро тенг боғловчилар, тенгланиш интонацияси орқали бирикади. Масалан: *Қарғам, шолғом, сабзи-ниёз, мева-чева — бари муҳайё.* (Ҳ. F.)

Гапнинг бош бўлаклари ҳам, иккинчи даражали бўлаклари ҳам уюшиб келиши мумкин. Масалан: *Ўнда на газаб, на нафрат, на қарғиш бор эди.* (Г. Н.) — эгалар уюшган. *Дунёда пулдан, буюмдан ҳам азизроқ нарсалар бор.* (Ҳ. F.) — тўлдирувчилар уюшган.

Уюшиқ бўлакларда сон, эгалик, келишик қўшимчалари уюшиб келган сўзларнинг энг охиргисига қўшилади ва улар учун умумий бўлади. Боғловчи билан бирикканда эса, боғловчи уюшиб келувчи сўзларнинг энг охиргисидан олдин келади. Боғланиш кўмакчи орқали содир бўлганда эса кўмакчи охирги уюшиқ бўлакдан сўнг келади. Масалан: *Ҳам кўзлари, ҳам лаблари билан ширингина қилиб кулди.* (М. Исл.) *Бу дараҳтларни Ҳиндистондан, яна аллақаердан олдириб келибди.* (М. Исл.)

Уюшиқ бўлакларда сон, эгалик, келишик қўшимчаси ҳар бир уюшиқ бўлакка қўшилиб, кўмакчи, боғловчи эса уюшиб келувчи бўлакларда такрорланиб қўлланиши ҳам мумкин. Масалан: *Меҳнатда, ижодда, санъатда, фанда каттадир ёшлиарнинг қўшиган ҳиссаси.* (Ү.) Алимардон ҳам қувонч, ҳам завқ билан унга бурилиб қаради. (Ү. Ҳ.) *Комбайнчи ҳам слесарь, ҳам токаръ, ҳам монтажчи, ҳам агроном бўлиши керак.*

230- машқ. Уюшиқ бўлакларнинг тагига чизинг, уларнинг ўзаро қандай боғланганини, қайси гап бўлаги уюшаётганини тушунтиринг.

1. Ойшабону тилга кирди: еримиз оз, сувимиз камчил, батракларимиз йўқ. (Ҳ. F.) 2. Санда гоҳ афсусланиб, гоҳ куйиб ва гоҳ кулиб гапириб берди. (А. К.) 3. Ҳар биримиз ўз институтимизни, талабалик вақтларимизни эсладик. (О. Е.) 4. Эртадан кечгача заводдан чиқмайди, янги паҳталарни ёйдирди, қуритади. (М. Исл.) 5. Ҳаётжон Фуломжоннинг мардлигига, чидам, қаноат ва садоқатига, азаматлигига қойил қолди. (М. Исл.) 6. Даррани қозиқдан олди, силтаб кўрди: вазмин, майнин, лекин заҳардек аччиқ, ништардек ўткир, қилинчек кескир! (М. Исл.) 7. Бу чойхонага бозор-ӯчарга сангиб тушиб қолган деҳқон, камбағал косиб, қозоқ, қирғиз ва бошқа оддий фуқаро киролмас эди. (Ғ. Ғ.) 8. Тешабойга ҳам, Аширмирзога ҳам шундай туюлди. (М. Исл.)

Уюшиқ бўлакли гапларда умумлаштирувчи сўзлар

ҳам ишлатилиши мумкин. Умумлаштирувчи сўзлар вазифасида жамловчи от, белгилаш, кўрсатиш олмошлари келади. Ўюшиқ бўлак ва умумлаштирувчи сўз бир хил сўроққа жавоб бўлади. Умумлаштирувчи сўз ўюшиқ бўлаклардан олдин ҳам, кейин ҳам қўлланиши мумкин. Масалан: *Боғдаги мевалар: ўрик, олма, олча, шафтолилар гуллади. Беморнинг ҳис-туйғулари, ўй-хаёллари ва келажак ишлари ҳамма-ҳаммаси врачанинг қўлида.*

182-§. **Ўюшиқ бўлакли гапларда тиниш белгиларининг ишлатилиши.** Ўюшиқ бўлаклар орасига қўйидаги ҳолларда вергул қўйилади:

1. Боғловчи ишлатилмасдан, фақат оҳанг ёрдамида ўзаро алоқага кирганда: *Дўст меҳфи, ёр муҳаббати ҳар қандай оғатни даф қила олишини билиб турибди.* (*C. Аҳм.*)

2. Такрор ишлатиладиган боғловчидан олдин: *На отам бор, на онам бор. (Кр.) Манзура гоҳ кулади, гоҳ йиғлайди.*

3. Зидловчи боғловчилар ёрдами билан боғланган ўюшиқ бўлакли гапларда зидловчи боғловчидан олдин: *Аёл ғамгин, лекин сеҳрли кўзларини бир нуқтага қадади.*

4. Уюшиқ бўлаклар жуфтлик ҳосил қилганда, ҳар бир жуфтлик орасига: ...*Ёзади ё қўйл қўяди, буюради ё ялинади, койийди ё мақтайди.* (*O.*)

Қўйидаги ҳолларда икки нуқта қўйилади:

1. Уюшиқ бўлаклардан олдин келган умумлаштирувчи сўздан сўнг: *Ҳамма ерда: корпус тагида, ичида, анҷор бўйида, завод саҳнида, иш билан қайнашган одамлар.* (*M. Исм.*)

2. Ҳужжат ва буйруқларида, илмий асарларда, иш қоғозларида умумлаштирувчи сўз бўлмаган ўринларда ҳам ўюшиқ бўлаклардан олдин икки нуқта қўйилади: Масалан: *Пахта йиғим-теримини ўюшқоқлик билан ўтказиш юзасидан хўжалик бошқаруви қарор қилади:*

1) терим агрегатлари таҳт қилиб қўйилсин;

2) дала шийпонларида колхозчиларга барча қулайликлар тутғдирисин;

3) теримчилар дала шийпонларида иссиқ овқат билан таъминланисин.

Режа ёки иншонинг режаси тузилганда:

1. Кирниш: ...

2. Асосий қисм: ...

3. Холоса: ... кабилар.

Эслатма: 1. Масалан, мисол тиپидаги сўзлардан кейин ҳам баъзан иккى нуқта, баъзан вергул қўйилади. 2. Ўз ичидаги вергул билан ажратилган ўюшиқ бўлаклар орасига, агар улар гурухлаштирилган бўлса, нуқтални вергул қўйилади: *Меҳнат, ижод, одам шарафи; Дил ёрги, ҳаёт қувончи — ҳаммасининг асли, маъбад Сен, Ватаним — тинчлик таянчим.* (С. Н.) 3. Умумлаштирувчи сўз ўюшиқ бўлаклардан кейин келса, ундан олдин тире қўйилади: *Қудрат, Воҳид, Замон — ҳаммаси шу ерда ўт билан курашиб ётарди.* (М. Исм.)

231- машқ. Гапларни кўчиринг. Умумлаштирувчи сўзларни ажратиб (қайси гап бўлаги ўюшган бўлса, ўша гап бўлагини белгиловчи чизиқ чизилади) қандай сўроққа жавоб бўлишини, тушириб қолдирилган ўринларга тиниш белгиларини қўйиб кўчиринг.

1. Қаранг бунча ҳам гул япроқлари чиройли йирик нафис тиниқ Буларни Москва яқинидаги Иваново-Вознесенск тўқимачилик корхоналарига сотай деса уларнинг хўжайинлари Миркамол Санхоев билан тузган шартномамиз бошқалардан пахта сотиб олишга йўл қўймайди. (Газ.) 2. Наҳотки у эрта-индин узоқ айрилиқ бошланишини ҳис қилмайди, юраги эзилмайди. (П. Қ.) 3. Фулом қаерда Дилшод қаерда бошқа қочирилганлар қаерда ҳаммасини айттирамиз. (М. Исм.) 2. Бофнинг турли жойларида ҳар хил мевали дарахтлар нок, ўрик, жийда ва ҳоказо анчагина. (О.)

АЖРАТИЛГАН БЎЛАҚЛАР

183- §. Ажратилган бўлаклар қайси гап бўлагига оидлигига қараб, унинг маъносини изоҳлаб, аниқлаштириб, бўрттириб келади ва ўша гап бўлагидан қисқа пауза билан ажратилади. Улар ўзи алоқадор сўзлардан (бир сўз билан ифодаланишига, состави кенгроқ бўлишига қараб), вергул ёки тире билан ажратилади: *Кишида, далада иш йўқ кезларда, китоб ўқииди. Эрталаб Ойниса айвондаги супада хўппа семиз тўшакни тапиллатиб уриб қоқаётганида, почтальон жувон — Олияхон қора чарм сўмкасини елкасига осганича липиллаб кириб келди.* (Ҳ. F.)

Одатда гапнинг иккинчи даражали бўлаклари ажратилади.

184- §. Ажратилган аниқловчилар — предметнинг белгисини қайта аниқлаш, бўрттириш, бошқа бир аниқловчининг маъносини изоҳлаш, аниқлаштириш мақсадида қўлланади. Масалан: *Онаси ҳам боласининг, баҳти қора жигаргўшасининг кўзларида шу зору муштоқлик оловини кўрди.* (М. Исм.) *Хозирча унинг, Воронаевнинг,*

бажариши лозим бўлган иш йўқ, деди-да, ўзини четга олди. (Павленко.)

185- §. Ажратилтган изоҳловчилар, одатда, эгага (баъзан ундалмага) оид бўлиб, унинг маъносини конкретлаштиради, изоҳлайди. Ажратилган изоҳловчилар изоҳланмишдан кейин келади ва ундан маҳсус пауза билан ажратилади. Масалан: *Лекин биз — ленинградликлар — бир ёқадан бош чиқариб колхозга ёрдам берайлик. (О. Е.) Қоровул бошлиғи, барваста лейтенант, буларни объектларга бўлди. (Ҳ. Ф.) Жўрахонга ўхшаган гавдали хотин — билим юртининг мудираси — синфга кирди. (М. Исл.)*

232- машқ. Кўчиринг, ажратилган изоҳловчи ва ажратилган аниқловчиларни аниқланг. Фарқларини тушунтиринг.

1. Ток остида ўтирган икки дўст — Даврон билан Сергей иссиққа дош бериб қизғин суҳбатлашмоқда... (*Е. Шукуроф.*) 2. Сен, туғишган укам, охири мени йиқитиб, юзимга оёқ кўйдинг-а! (*П. Қ.*) 3. Ана, у кичкина, қора мунчоқдай кўзларини очди. (*Ғ. Ғ.*) 4. Икки чөл, ҳақоратланган мўйсафидлар, бошларини солинтириб, қайтиб кетди. (*М. Исл.*) 5. Улар биринчи самолёт учувчиши — ёшгина лейтенант бўйруғи билан сафга тизилдилар (*Ҳ. Ф.*) 6. Машинадан хўжалик раиси Матқовул ака—паканагина, семиз одам тарвуздай юмалаб чиқди (*О. Е.*) 7. Мана, Саври сатанг дутор ва чилдирма куйига йўргалай кетди. (*О.*) 8. Устига кўк кийим кийган, яғриндор бир мўйсафид ичкарига кирди. (*М. Г.*) 9. Бояги йигитнинг, Авазнинг, қўли гул экан. (*П. Қ.*) 10. У вақтда эндиғина ўттиз бешга тўлган барваста йигит, Дадавой, Лобарга бир кўришдаёқ ёқди. (*Ҳ. Ф.*) 11. Сиз ўзингиз-чи, Муса Назарович, факультетга бориб кўпчиликдан сўраб кўрдингизми? (*П. Қ.*) 12. Йўғ-а, ундаи деманг, Ўлмас ака, сиз ҳам акам қаторисиз. (*Е. Шукуроф.*) 13. Бувам, яъни онамнинг отаси, ҳозир раиснинг ўрнида турибди. (*Павленко.*) 14. Унинг Холбек деган тенгдоши — ўнг кўзи билан қулоғининг орасида данакдай қора холи бор бола — бир кун Авазнинг бутун ошиқларини қоқлаб ютиб олди. (*П. Қ.*) 15. Ёшлар — Фируза, Шерали ва бошқа талабалар Мирзачўлга бориб ишлаш истагини билдириди. (*Ҳ. Ф.*) 16. Сен, онаси, боҳабар бўлиб тур, тагин Варваранинг бошига бир кулфат солишмасин, уларнинг қўлидан ҳар бало келади. (*М. Г.*) 17. Бир вақтлар сиз ҳам, Темир Акбарович, хато қилишдан қўрқмаслик керак, деб дадил гапирав эдингиз. (*П. Қ.*)

186- §. Ажратилган тўлдирувчилар ўзидан олдин келган тўлдирувчининг маъносини аниқлаштиради: *Фируза, кеча-кундуз ўйлайман сени, меҳрибонимни.* (Х. Ф.) Акангнинг хотинига — келин аянга ўйлан, деяпти. (С. Аҳм.) Модомики, одам бир марта яшар экан умрбод бир киши билан — ўз севгилиси билан яшаши зарур. (Х. Ф.)

187- §. Ажратилган ҳол ўзидан олдин келган ҳолнинг маъносини изоҳлайди. Оддий гап бўлаги, сўз бирикмаси шаклида бўлади: *Сойда, қўши ёнғоқнинг тагида, оппоқ қорга кўмилиб узоқ турди.* (О. Е.) Юқоридан, Нижнийдан, пиёда келмадим, кемага тушиб келдим, сув устида пиёда юришишмайди. (М. Г.) Пастликка — Лабзак томонга туша бошлидик. (Х. Ф.) Бир оқшом Мирза Ёдгорнинг тантана билан пойтахтга киришининг учинчи куни, Султонмурод шам олдида ғамгин, танҳо ўтирас эди. (О.)

Ажратилган иккинчи даражали бўлакларнинг сўроғи ва вазифаси, одатда, ўзлари алоқадор бўлган гап бўлагининг сўроғи ва вазифасига тенг келади.

СУЗ ТАРТИБИ

188- §. Ўзбек тилида одатдаги тартибга кўра эга гап
эга кесим
бошида, кесим гап охирида келади: **Топшириқ шундай**
эди. (В. Катаев.)

Ёйиқ содда гапда иккинчи даражали бўлаклар эга ва кесимга боғланади. Эгага боғланган гап бўлаклари эга ва кесимга боғланган гап бўлаклари кесим составини ташкил этади: *Икки нафар оқсоч аёл судра-судра қилиб эски паранжига ўралган келинни олиб чиқдилаф* (С. Н.) Бу гапнинг биринчи қисми эга состави (*икки нафар оқсоч аёл*), иккинчи қисми эса кесим состави (*судра-судра қилиб эски паранжига ўралган келинни олиб чиқдилар*) дир. Одатдаги бу тартиб маълум даражада эркин бўлиб, уларнинг ўринларини алмаштириш грамматик ҳолатни ўзгартирмаслиги ҳам мумкин. Масалан, *Биз даладан кеч қайтдик.* Лекин бу гапларда дастлабки грамматик ҳолат (ҳар сўзининг дастлабки вазифаси) сақланган бўлса ҳам, сўз тартибининг ўзгариши гапнинг умумий мазмунига маълум даражада таъсир этган: логик урғу ҳар бир гапда бошқа-бошқа бўлакка тушган.

Гап бўлакларининг ўрин алмашиши — одатдаги тартибининг ўзгариши инверсия ҳисобланади. Инверсия тур-

ли стилистик талабларга (эмоционалликка) кўра содир бўлади: *Яшасин ҳалқлар дўстлиги!*

Мени кутгил ва мен қайтарман,
Фақат кутгил жуда интизор.
Кутгил ёмғир зериктирганда,
Мени кутгил ёққанида қор. (К. Симонов.)

Сўз тартибининг ўзгариши грамматик ҳолатни ўзгартириши ҳам мумкин. Бунда қўйидаги ҳолат кўзга ташланади:

1. Эга ва кесимнинг ўрни ўзаро алмашса, эга кесим
эга кесим
га, кесим эгага айланади: *Етти кун — бир ҳафта.* — *Бир*
эга кесим
ҳафта — етти кун.

2. Сифатловчи сифатланмишнинг ўрни ўзаро алмашса, сифатланмиш эгага, сифатловчи кесимга, яъни сўз бирикмаси гапга айланади: *Баланд тог.* — *Тог* — *баланд.*

3 Қаратувчи қаралмишда белгисиз қаратувчининг ўрни қаралмиш билан ўзаро алмашса, қаратувчи эгага, қаралмиш кесимга айланади: *Дала чеккаси.* — *Чеккаси — дала.*

Эгага нисбатан кесимнинг ўрни қатъиyroқ бўлади. Одатда у гапнинг кейинги қисмида жойлашади. Айрим ўринларда эга ўзига ёки кесимга тобе сўзлардан кейин келади. Шунда ҳам у кесимдан олдин (у билан ёнма-ён) келади: *Боланг учун сен ҳам абгор бўлмагин.* («Ширин ва Шакар».)

Эга ва кесимнинг одатдаги тартиби ўзгариши ҳам мумкин. Бу қўйидаги ҳолларда юз беради:

1. Маълум фикр ифодаси бўлган гап сўроқ, буйруқ, ундов интонацияси билан айтилганда, кесим эгадан олдин жойлашиши мумкин. Қани, чал *Бойваччалар, эшигинг, дуторни қийворфади бу йигит!* (О.) *Яшасин ҳуррият! Битсин истибдод! Ииқилсин золим подшо!* (М. Исм.)

2. Диалог шаклидаги кўчирма гапларда, муаллиф гапида эга, одатда кесимдан сўнг келади: *Тирик! Тирик!.. қичқиришиб болалар.* (О.) *Минорадан тушолмай қолди буваанг, тушириб қўй!* — деди *ҷўтирип ҳалфа.* (Эртакдан).

3. Бадиий асарларда, айниқса, поэтик асарларда эганинг кесимдан кейин келиши ҳоллари учрайди.

Маълум қонуният, сабаблар асосида гап бўлаклари одатдаги тартибининг ўзгариши **инверсия** дейилади.

Вагранка ёлқинида
Бўртиб кетарди юзлар,
Станоклар ёнида
Қўшиқ айтарди қизлар.

4. Тўлдирувчи одатдаги сўз тартибига кўра ўзи бошқарилган сўздан олдин келади: *Аччиқ ўйин ширин турмушни бузар.* (*Макол.*)

Агарда гапда ҳам воситали, ҳам воситасиз тўлдирувчи бўлса, олдин воситасиз тўлдирувчи, кейин воситали тўлдирувчи келади. Урин-пайт келишигидаги тўлдирувчи чиқиши келишигидаги тўлдирувчидан олдин келади ва ҳоказо. *Аҳмаджон пахтани ҳаммадан кўп теради. Хўжалигимизда пахтадан мўл ҳосил олинди.*

5. Сифатловчи-аниқловчи одатда сифатланмишдан олдин келади. *Масалан: гўзал боғ, ойдин кеча каби.*

Тартиб ўзгарса, аниқловчи кесимга, аниқланмиш эгага айланади: *Боғ — гўзал, Кеча — ойдин каби.*

Қаратқичли аниқловчининг гапдаги тартиби эркин. Унинг ўрни гапнинг мазмуни, жанр тури ва ҳоказолар талабига кўра ўзгариши мумкин. Шунда ҳам қаратқич билан қаралмиш ўртасидаги грамматик муносабат ўзгармайди: *менинг уйим — уйим менинг, шаҳарнинг кўрки — кўрки шаҳарнинг.* Заҳар солмоқ эмиши касби илоннинг, зулм аждарлари озори жоннинг. (*Ўйғун ва И. Султон.*)

6. Ҳоллар кесимдан олдин келади. Баъзан пайт, сабаб, мақсад ҳоллари гапнинг бошида, ўртасида ҳам кўллана олади: *Эрталаб атайнин сизни излаб келган эдим.* (*С. Нуров.*) *Қувонганидан қичқириб юборди.*

232- машқ. Ўқинг. Бош бўлакларни аниқлаб, уларнинг одатдаги тартиби ўзгаришини ва унинг сабабларини изоҳланг.

1. Келган ким экан?— бир оз исигач, шивирлаб сўради оқбона. (*A. Нуриевсов.*) 2. Севинганидан чапак чалиб, энтикиб-энтикиб нафас олди Дўндиқ. (*O.*) 3. Агар душманга қўқисдан дуч келинса, аҳиллик билан жангга кириш кераклигини уқтиради сержант. (*O.*) 4. Ҳамма ерда: корпус томида, ичидা, анҳор атрофида, завод саҳнида иш билан қайнашган ғодамлар. (*M. Исм.*) 5. Нон... шундай қизариб пишганки, кўргандайёқ тамшанади киши. (*O. Е.*) 6. Юрган— дарё, ўтирган— бўйра,— дейдилар. Қутурган бир дарё эдик, мана, кўриб турибсизки, бўйра бўлиб қолибмиз,— деди

чол хўрсиниб. (О.) 7. — Эй, тегма, ит ёмон,— деди бобом мени чақириб. (О.)

71- топшириқ.

Бирорта насрий ва шеърий жанрдаги асарни танлаб, улардаги гап бўлакларининг тартибини солиштиринг. Қайси бирида грамматик тартиб кўпроқ ўзгаришини аниқланг ва изоҳлаб беринг. Тартиб ўзгариши билан боғлиқ ўринларга характеристика беринг.

УНДАЛМА

189- §. Сўзловчининг нутқи қаратилган шахс ёки предметни кўрсатадиган алоҳида сўз ёки сўз бирикмаси **ундалма** дейилади. Ундалма баён қилинаётган фикрга тингловчининг диққатини яна жалб қилиш учун ишлатилади. У бир сўз билан ҳам, икки ёки ундан ортиқ сўз билан ҳам ифодаланиши мумкин. Масалан: 1. Ўқтам Замонович, азиз дўстим, эллик ёшинг қутлуг бўлсин! (Ҳ. Ф.) 2. Мана буларнинг кўз ёши, қурбонларнинг қони қўймайди, болам. (Р. Ф.)

Ундалма гапнинг бошида, ўртасида, охирида келади. Ундалма гапнинг бошқа бўлакларидан вергул билан ажратилади. Масалан:— Зап гапларни айтасиз-да, Дилдорхон.— Хафа бўлманг, қизим! Кўн емасак, озроқ ермиз... — Чироғим, қишилоқни бир айлантириб келайми? (Ё. Ш.) Эшигдим, Мунаввархон, хотинлар ўртасида обрўйингиз баланд экан. (С. Ан.) Ўртоқлар! Кўчат келгунча кичкина мажлисчамиз бор, шуни ўтказиб олсан, қаршилик ийқми? (Ш.) Биродарлар! Унда дафвозани бузманлар, унчалик баланд эмас. (В. Катаев.)

Эслатма. Баъзан бадиий асарларда, айниқса, поэзияда ундалмалар тири билан ажратилиши мумкин. Тонглар, тонглар — севаман сизни! (Ҳ. О.)

233- машқ. Гапларни кўчириб, ундалмаларни аниқланг. Маъносини тушунтиринг. Нечта сўз билан ифодаланганини айтинг. Тушнирилган ўринларга тиниш белгиларини қўйинг.

1. Салтанатхон ҳар ким ҳар нарса деса ўзингизга олиб хафа бўлаверасизми? (Р. Ф.) 2.— Ҳе-ей янгаси қурмағур-ей Ижроқум буванинг ўзидаим бор-да айб. (С. Ан.) 3. Чашмалар булоқлар мафтунман сизга.

(Г. Нуруллаева.) 4. Мудир жаноблари мен тарбия бобида ҳеч қандай хато қилганим йўқ. (О.) 5. Эй юксак са-мода порлоқ Чўлпоним, Сирли Коинотда сири пинҳоним. (Ш.) 6. Дараҳтлар бўстонлар Бугунги учрашувга сиз-лар гувоҳсиз. (М. Исм.) 7. Эй зулм кўрганлар жафо чекканлар Бизга озодлик вақти етиб келди. (М. Исм.) 8. Онажон Фоғиржон Унутма мени. (Х. Х.) 9. Қовоғи-дан қор ёғади, нима гап ўзи аммажон?— деди раис юз-лари лўппигина оқ ҳалатли жувонга. (С. Ан.) 11. Сени унугтолмас юрагим асло эй Ўрта Осиё, Ўрта Осиё (В. Инбер.) 12. — Йўлчибой ака қаерда жим бўлиб кетдингиз далада ҳали ҳам иш борми? (О.) 13. Э йигитча бунақаси ярамайди (В. Катаев.) 14. Зап иш бўлди-да Арслон ака (О. Х.)

КИРИШ СУЗ

190- §. Сўзловчининг баён этаётган фикрига муносабатини билдирадиган сўз ёки сўз бирикмаси кириш сўз ёки кириш бирикма дейилади. Масалан: *Умуман, Салоҳиддин шу ерга етиб борган бўлиши мумкин.* (Мирм.) *Дарҳақиқат, Жамила ўзининг бир «бозорчи қиз» бўлиб қолганини фаҳмламай юради.* (Мирм.)

Кириш сўз ва кириш бирикмалар ундалмалар кабин гапнинг бошида, ўртасида, охирида келади. Гапнинг бошқа бўлакларидан вергул билан ажратилиб, гап бўлаклари билан грамматик жиҳатдан боғланмайди.

Эслатма: 1. Киритма гаплар қавс ичига олинади: *Мен бу йи-гитни* (бу йигит қўшинимиз Сулаймон аканинг ўғли бўлади) яхши танийман.

2. Кўчирма олинган асар, муаллифнинг номи ва фамилияси ҳам қавс ичидаги берилади: *Раъйиниздан қайтсангиз, бўлмаса мен ота-онамни дейман.* (Абдулла Қаҳҳор. «Қўшичинор чироқлари».)

3. Драматик асаддаги ҳар хил ремаркалар ҳам қавс ичидаги берилади: ... (Ўзича жилмайиб қўйди) ... (Тескари қарайди.)

4. Тингловчиларнинг сўзловчининг фикрига бўлган муносабатини билдирувчи сўз ва бирикмалар қавс ичидаги берилади: (Залда жон-ланши) (Қарсаклар.) (Залда кулги.) кабилар.

Қўйидаги кириш сўзлар нутқимизда кўпроқ қўлланади:

Албатта, сўзсиз, ҳақиқатан, дарҳақиқат, тўғри, уму-ман, англашиладики, маъблумки, хуллас, қисқаси, шун-дай қилиб, англашимча, модомики, ниҳоят, айниқса, шу-

нингдек, рост, дарвоқе, дуруст, ҳар ҳолда, холос, очиғи, эҳтимол, афтидан, чамаси, шекилли, баҳтимизга, толеимизга, ҳайрият, шукур, иши қилиб, кошки, кошкйди, шояд, афсус, афсуски, эсиз, аттанг, баҳтга қарши, аксиға, аксиға олиб, шубҳасиз, муқаррар, ажаб(ки), тажжуб(ки), менимча, фикримча, фаҳмимча, айтишларича, назарида, эсимда, маълумот беришicha, эшишишимча, бошқача айтганда, бир сўз билан айтганда, яъни, тўғрироғи, айнан, одатда, одат бўйича, одатдагига мувоғиқ, одатга мувоғиқ, хусусан, асосан, зотан, биринчидан, иккинчидан..., демак, аксинча, аввало, ҳолбуки, ваҳоланки, деярли, жумладан, кўрдингки, билдингки, тушунасизки, қани, марҳамат қил, кечир каби.

234- машқ. Кириш сўзлар иштирок этган гапларни ажратиб кўчиринг. Кириш сўзларнинг гап ёки бўлагига қандай қўшимча маъно кўшаётганини тушунтиринг. Ясама сўзларни топиб, ясалиши ва ёзилишини айтинг.

1. Меҳмон (фамилияси Ёвқочев экан, сўраб билиб олди). Эрталаб туриб овга отланди. (*С. А.н.*) 2. Дарвоқе, Анварга кўп меҳнатим синган. (*А. Қод.*) 3. Фарида бу рангни Наримон яхши кўради деб танлаган эмас эди, албатта. (*П. К.*) 4. Иккинчидан, эртага вилоят ёш ёзувчиларининг анжумани очилади. (*О. Е.*) 5. Ҳайриятки, мен «муборакнома»ни ўқитиб кўрган эканман. (*С. Аҳм.*) 6. Айтгандай, сизга расм юборганимни Тошкентдагилар била кўрмасинлар. (*F. F.*) 7. Йигирманчи августда, албатта Ленинградда бўлишим керак. (*F. F.*) 8. Чамамда, етти-саккиз йил бўлди, шекилли. (*М. Исм.*) 9. Очиб кўриш керак, афтидан, клапанларини кир босганга ўхшайди. (*Ф. Н.*) 10. Демак, у Ҳафиздан жуда қаттиқ хафа бўлган. (*Мирм.*)

235- машқ. Кириш сўзлар ва кириш бирималар мавжуд бўлган гапларнинг тинни белгиларини қўйиб чиқинг. Кириш сўзларнинг қайси сўз туркумига ондлигини тушунтиринг.

1. Наҳотки, Умид телефон орқали ўзининг командировкага кетаётганини айтмаса. (*Мирм.*) 2. Ольга Петровнадан ҳамма миннатдор албатта. (*М. Исм.*) 3. Афтидан у бизни кўрмади шекилли. (*М. Исм.*) 4. Сизнингча Ғуломjon қандай йўл тутиши керак? (*М. Исм.*) 5. Менимча бу саратон иссиқ бошланади. 6. Балки сиз ҳам ҳозир менда бўлган ҳаяжоннинг мингдан бирини боидан кечирғандирсиз. (*«Ш. ю.» ж.*) 7. Ҳа айтмоқчи қайтишда шу ердан ўтасизлар-ку, ўшанда ҳайрлашарсиз. (*М. Исм.*)

8. Аксинча тошкентликлар жуда яхши одам бўлади. (Е. Ш.) 9. Дарҳақиқат у уйда худди бирор ушлаб қоладигандек жуда эрта чиққанини пайқади. (С. Ан.) 10. У биринчи семестрни «аъло» билан тугатди (имтиҳон биттагина эди зачётларга эса баҳо қўйилмайди) четдан қараганда ҳаммаси яхши боряпти. (П. К.)

МУРАККАБЛАШГАН СОДДА ГАПЛАР

191- §. Икки таркибли содда гапларнинг асосини — ядросини эга ва кесим ташкил қиласиди. Эга ва кесим ҳар қандай содда гапнинг грамматик асоси ҳам ҳисобланади.

Содда гапларнинг йифиқ («эга-кесим» типида тузилиши), ёйиқ («эга — иккинчи даражали бўлак-кесим» типида тузилиши) турлари юқорида кўриб ўтилди. Содда гапларнинг ё кесим таркибидан («иккинчи даражали бўлак-кесим типида тузилиши»), ё эга таркибидан («эга» ёки «аниқловчи-эга» типида тузилиши) иборат бўлган бир таркибли гаплар сирасига кириши ҳам қайд этилди.

Нутқимизда содда гаплар ҳамма вақт ҳам ўзларининг юқоридагидай структура кўринишида учрайвермайди.

Айниқса, ёзма нутқда гапларнинг шундай кўринишдаги турлари учрайдики, улар маълум даражада бошқа сўз (бўлак)лар ҳисобига кенгайиши мумкин. Бу жиҳатдан уларнинг тузилиши ҳам, мазмуни ҳам маълум даражада кенгайган — мураккаблашган бўлади. Аниқки, оддий — типик икки таркибли гаплардан тубдан фарқ қиласиди. Қиёсланг: 1. *Бола келди*. 2. *Ўқиган бола келди*. 3. *Яхши ўқиган бола келди*. 4. *Бизнинг мактабимизга яхши ўқиган бола келди*. 5. *Дўстим, бизнинг мактабимизга яхши ўқиган бола келди*. 6. *Дўстим, бизнинг мактабимизга яхши ўқийдиган бола — Маҳмуджон келди* ва ҳоказо.

Кўриниб турибдики, 1-гапни 6-гап билан, 2-гапни 5-гап билан бирдай деб бўлмайди. 6-гапда ундалма (*дўстим*), ажратилган бўлак (*Маҳмуджон*) каби сўзлари келиб, бу гап мураккаблашган. У дастлабки гаплардан ҳам мазмун, ҳам тузилишига кўра ажралиб турибди. Демак, бундай типдаги гапларни содда гап тури деб ажратиш лозим бўлади.

Содда гапнинг кириш сўз, ундалма, ажратилган бўлак, сифатдош ва равишдош обороти ҳисобига кенгайган тури **мураккаблашган содда гап** дейилади.

Шунга кўра мураккаблашган содда гапларнинг:

1. Кириш сўзли мураккаблашган содда гап. 2. Ундалмали мураккаблашган содда гап. 3. Ажратилган бўлакли мураккаблашган содда гап. 4. Оборотли мураккаблашган содда гап каби турларини ажратиб кўрсатиш мумкин.

192- §. I тип мураккаблашган содда гап.

Бунда содда гап кириш сўз ва кириш ибора ҳисобига кенгаяди. Кириш сўз гап тузилишини кенгайтириш билан бирга, айрим гап бўлаги маъносига ёки бутун гап мазмунига қўшимча ҳолда таъкидлаш, тасдиқлаш, санашиб каби оттенкаларни ҳам қўшади.

Масалан: *Виктор (Лизанинг укаси) ишчи-ёшлар мактабида, кичкина Лиза билан Каромат ... иккинчи сменада ўқишишади. (Ас. М.) Тавсия этилган адабиётларни ўқиши зарур, албатта. Бугун мен, биринчидан, кутубхонага боришиш зарур, иккинчидан, вақт топсан, ойимларни кўриб келишим керак каби.*

193- §. II тип мураккаблашган содда гап. Содда гап таркибида баъзан ундалмалар ишлатилади. Бу сўз сўзловчининг нутқи қаратилган шахс ёки предметга — эгага илова қилиш маъносини билдиради. У бир жиҳатдан эгага ўхшаса ҳам гапнинг бошқа бўлакларидан ажратилиб талаффуз қилинади. Масалан:

1. Ҳой, ишчилар,
Эзилган меҳнатчилар,
Битсин золим бойлар!
Эркингни қўлдан берма,
Яша, хизматчилар! (Ҳ. Ҳ.)
2. Омон бўлинг, сиз ёшлар!

194- §. III тип мураккаблашган содда гап. Ажратилган аниқловчи, ажратилган изоҳловчи, ажратилган тўлдирувчи, ажратилган ҳол ва бошқалар содда гап таркибида келиб, шу бўлаклар сўрогига жавоб бўлади. Ўзи алоқадор бўлак маъносини тўлдиради, изоҳлайди, аниқлаштиради, содда гапнинг мураккаб кўринишининг ҳосил бўлишинга хизмат қиласди. Бу ажратилган бўлаклар ўзи алоқадор бўлаклардан маълум пауза билан ажратилиб туради. Бу ҳодиса кўпроқ ёзма нутқ учун хос ҳодиса бўлиб, бундай мураккаблашган содда гаплар оғзаки нутқда асосан қўлланмайди. Масалан: 1. *Мирзачўл қисқа вақт ичидা, 5—6 йил мобайнида ватанимизнинг йирик пахтачилик майдонига айланди.* 2. *Улар, эру хотин эрталабки салқинда ҳовлидаги гуллардан бир қучоқ гул-*

даста ясаб, йўлга тушишиди. (Мирм.) 3. Мен Ҳафизага — қизимга гапираётубман. (А. Қ.) 4. Биз мана шу жамоа хўжалиги ҳаётидан нафис фильм, янги картина яратмоқчимиз (А. Қ.) каби.

195- §. IV тип мураккаблашган содда гап. Содда гап ҳар хил бирикмалар, оборотлар — равишдош, сифатдош ва ҳаракат номи оборотлари билан кенгайиши мумкин. Бунда бирикмалар, оборотлар ҳар хил гап бўлаги вазифасида келиши мумкин.

Масалан: Ҳисобини билмаган ҳамёнидан айрилар. Ўт билан ўйнашган ёнар. (Мақоллар.) Одамларнинг шовқин-суронини босиб, гудок ўқирди. (М. Г.) Каримнинг диққат бўла бошлаганилиги башарасидан ҳам билиниб турар эди. (Ойдин.) Бу масалада биз ўзаро бир ёқадан бош чиқармоғимиз керак. (О.) Элмуроҳ тобора куннинг қандай ўтаётганини сезмай бошлади (П. Т.) кабилалар.

236- машқ. Қуйидаги гаплар ичидан мураккаблашган содда гапларни топиб, қайси гап бўлаги ҳисобига мураккаблашганини изохланг. Бу бўлаклар вазифасида қандай оборот ва бирикмалар келганини тушунтиринг.

1. Ботир, меҳмонлар билан саломлашиб, айвон тўридаги уйга ўтди. (С. Н.) 2. Fўппон, ишда тўрт кишининг ишини қилгани каби, овқатда ҳам тўрт кишининг овқатини ер эди. (С. Аҳм.) 3. Очиқ деразадан кирган салқин шабадага қарамай, ҳар иккисининг пешанасида томчи томчи тер йилтирас эди. (О.) 4. Ҳозирги музafferакиятларимиз колхозда яширган имкониятларга қараганда, хамир учидан патир бўлиб кўринди. (О.) 5. Эркак, аёл — ҳаммаси ўн чоқли одамни бошлаб, Йўлчи маҳалладан гузарга чиқди. (О.) 6. Бени йиллик қаҳрамонларининг олдинги сафларида ижодий фикр эгалари — новаторлар бормоқда. 7. Қутидор ҳовлисига қайрилар экан, бек билан хайрлашди. (А. Қод.) 8. Чиқаётган қуёшни саломлаб, яшил дараҳтларда қушталар сайдрай бошладилар. 9. «Алифлайло» деган бир китоб бор, буни бизда «Минг бир кечা» деб ҳам юргизадилар. (F. F.)

72- топшириқ. Ўзингиз мустақил равишда оборотли, ажратилган бўлакли мураккаблашган содда гапларга бир неча мисол топинг. Бундай гапларни оддий содда гаплардан нима билан фарқланнишини айтинг.

ҚУШМА ГАПЛАР

196- §. Икки ёки ундан ортиқ содда гапнинг мазмун ва интонацияга кўра бирикувидан ташкил топган гап

қўшма гап саналади. Масалан: 1. *Бу йил баҳор яхши келди.* 2. *Олтин куз кирди.* 3. *Кун совуқ, лекин бозор қайнайди.* (О.) 4. *Ўқитувчи келса, биз дарсни бошлиймиз.*

Бу гапларнинг биринчи ва иккинчиси содда, учинчи-си ва тўртинчиси эса қўшма гаплардир.

Қўшма гап таркибий қисмларининг мазмунан ўзаро муносабати, тузилиши ва бирикишига кўра дастлаб катта икки гуруҳга бўлинади: I. Икки қисмли (садда гапли) қўшма гаплар. II. Уч ва ундан ортиқ компонент (садда гап) ли мураккаб ёки мураккаблашган қўшма гаплар.

Дастлабки I тур қўшма гаплар таркибий қисмлари— содда гапларнинг ўзаро мазмун ва тузилиш муносабатига кўра, боғланган қўшма гаплар, эргаш гапли қўшма гаплар, боғловчисиз қўшма гапларга бўлинади.

237- машқ. Гапларни кўчириб, содда ва қўшма гапларни ажратинг. Содда ва қўшма гап орасидаги фарқларни кўрсатинг.

1. Яхшидан от қолади, ёмондан дод қолади. 2. Севдирган ҳам тил, бездирган ҳам тил. 3. Вақтинг кетди, бахтинг кетди. (*Мақоллар.*) 4. Одамга андиша керак, лекин ундан илгарироқ инсоф керак. (А. К.) 5. Яна икки марта айланиб чиқамиз. (Ў. Ум.) 6. Ярим асрга яқин умр кўрдим. (Ҳ. Н.) 7. Мудроқ кўзларинг билан боқиб, пешонамни силаб овутгансан. (Ҳ. Н.) 8. Аям оёғим куйганини эшишиб ҳушидан кетаёзди. (А. К.) 9. Шундай қилиб, орага бошқа гап сифмати-ю, қувончим ичимда қолаверди. (А. К.) 10. Бироқ опаси воқиф бўлгач, Равшанинг Гулбодомга кўринмай юришини таъкидлади. (С. К.) Рустамовнинг блиндажига бор, дўстларинг кутиб қолишади. (Ҳ. Ф.) 12. Қамишлар орасида уларнинг бошигоҳ кўринади, гоҳ сувга шўнғигандек йўқ бўлиб кетади. (С. А.)

БОҒЛАНГАН ҚЎШМА ГАП

Боғланган қўшма гап қисмлари бир-бири билан бириктирувчи, зидловчи, айиравчи ва инкор муносабатларини ифодаловчи тенг боғловчилар, тенг боғловчи вазифасидаги -у (-ю) каби юкламалар воситасида боғланади: Эҳтимол, бу бошқаларга тўғри келар, аммо мен бундай қилолмайман. (Ў. Ум.) Кўзларимиз экранда-ю, хаёлимиз бир-биримизда. (Ў. Ум.) Кўнғироқ чалинди ва дараже бошлианди.

Боғланган қўшма гаплар содда гапларнинг ўзаро

мазмун муносабатларига, тенг боғловчиларнинг боғланнишидаги хусусиятларига кўра қўйидаги турларга бўлинади: биритиувчи боғловчили боғланган қўшма гаплар, зидловчи боғловчили боғланган қўшма гаплар, айиув боғловчили боғланган қўшма гаплар, инкор боғловчили боғланган қўшма гаплар.

197- §. Биритиувчи боғловчили боғланган қўшма гаплар. *Ва, ҳам (ҳамда) боғловчилари, боғловчи вазифасида келувчи -да, -у (-ю) юкламалари қўшма гап қисмларини биритириб боғлайди: Шу-шу бўлди-ю, Низомжон қизлар звеносига йўламай қўйди. (С. Аҳм.) Баҳор келди ва гуллар очилди. Меливой ака ҳамроҳининг саволига жавоб бермади-ю, ўзига-ўзи гапиргандек сўзлади. (О. Ҳ.)*

Одатда қўшма гап қисмларини боғлаган юкламалардан кейин вергул қўйилади, юклама эса ўзи қўшилган сўздан чизиқча (—) билан ажратилади.

238- машқ. Гапларни кўчиринг. Бўғланган қўшма гапларни тошиб, уларнинг қисмлари қандай боғловчи воситасида боғланганини кўрсатинг.

1. Энди унинг хаёлида ҳамма нарса бўш ва маъносиз эди. (О.) 2. Унинг юрагида бўлаётган гапларни қиз сезарди-ю... унга сир бой бермасди. (С. А.) 3. Туробжон бу гапни айтди-ю, аммо хотинининг аҳволини кўриб аччиғидан тушди. (А. Қ.) 4. Олдимдан катта одамлар ўтиб туради, лекин шафтолига кимса боқмайди. (О.) 5. Мадраса, хонақоҳ, шифохона, ҳаммом ва бошқа катта бинолар азamat пештоқлари, гумбазлари билан самога тиккайган. (О.) 6. Шу пайт тоғ чўққисидан катта бир тош юмалади ва йўлдаги бошқа тошларни қўпориб, даҳшатли тошбўрон бошланди. (С. А.) 7. Энди Ёдгорнинг хўжайиндан қарзи икки юз тангага ва отасидан қолган қарзи билан минг тангага етган эди. (С. А.) 8. Ўқиши ҳам яхши, талabalар орасидаги обрўси ҳам яхши. 9. Дўстлар тўпланишиди ва биз узоқ суҳбатлашдик. 10. Ҳадемай экинзор ва тўқайларни оралаб ўтган сўқмоқ ва арава йўлларидан қатнай бошлади. (А. Қ.)

198- §. Зидловчи боғловчили боғланган қўшма гапларда қисмлардан англашилган мазмун бир-бирига зид (қарама-қарши) қўйилади ёки воқеа-ходисалар қиёсланади ва қўшма гап қисмлари аммо, лекин, бироқ каби боғловчилар ва шу боғловчилар ўрнида ~~ж~~ўлланадиган -у (-ю), -да юкламалари орқали боғланади. Масалан: Санобарнинг практикаси тугай деб қолди, лекин ҳамон гаплашмаймиз. (Ў. Ум.) Ёмғир тинди-ю, шамол тўхтамади.

Зидловчи боғловчили боғланган қўшма гапларда зидловчи боғловчидан олдин доим вергул қўйилади. Агар қўшма гап қисмлари зидловчи боғловчи вазифасидаги юкламалар билан боғланган бўлса, юкламадан олдин дефис (-), ундан кейин вергул қўйилади. Масалан: *Дарсга ҳамма келди, лекин Рустам келмади. Қор ёғди-ю, ҳаво очилмади.*

239- машқ. Аввал биринтирувчи боғловчили, сўнг зидловчи боғловчили қўшма гапларни топиб, кўчиринг.

1. ... юраги жиз этиб кетди, аммо буни унга сездирмади. (С. А.) 2. Буни Мамлакатнинг отаси ҳам тезда пайқаб қолди-ю, лекин кимлигини ундан сўрамади. (Ў. Ум.) 3. Мартнинг охири. Кундуз соат уч чамаси. Янги шаҳар кўчалари қуруқ ва тоза, илк баҳор шамоллари эсади. (О.) 4. Низомжон конвертни дадасининг қўлига берди-ю, физиллаганича чиқиб кетди. (С. Аҳм.) 5. Нурига энди кеча ва жимжитлик нечундир қўрқинчлироқ туюлди. (О.) 6. Қирларда лолақизғалдоқлар гулхани ёнади, аммо қуш малла тўнини ечмай тура беради. (С. А.) 7. Холбек уларнинг орасида бир жарга ўхшаб турар ва бу жар йил сайин улканлашар эди. (П. Қ.)

240- машқ. Кўчиринг. Нуқталар ўрнинг мос боғловчиларни қўйинг. Биринтирувчи боғловчили ва зидловчи боғловчили боғланган қўшма гапларни аниқланг. Қўшма сўзларни топиб, қўшиб ёки ажратиб ёзилиш сабабларини тушунтиринг.

1. Кеч куз бўлса ҳам ҳали—унча совуқ тушмаган... салқин этни жунжиктиради. (Ў. Ум.) 2. Улар анча йўл босишиди... ҳамон йўл кўринмас эди. (Ў. У.) 3. Ана шундан кейингина Низомжоннинг ҳуши ўзига келди. (С. Аҳм.) 4. Дунёда яҳши китоблар жуда кўп... бу китоблар уни ўқиб биладиган кишилар учунгина яхшидир. («Ақл ақлдан қувват олади».) 5. Машина ҳўп яҳши нарса ... унинг ҳам ўзига яраша нағмалари бор. (С. Аҳм.) 6. Нури ҳар гал оғир юмуши қилдирап эди ... бу сафар қизга иш буюрмади. (О.) 7. Тантибойваччанинг нафаси ичига тушиб кетди ... у уялган каби ўзини билмасликка солди. (О.) 8. Одам сийрак ... машиналар турна қатор ўтиб турибди. (Ў. Ум.) 9. У ёқ-бу ёқдан гапга солди ... овутмоқчи бўлди ... бемор оғиз очмади. (Ў. Ум.) 10. Мажлис бир лаҳза жим қолди ... ундан-бундан товушлар чиқа бошлади. (А. Қ.) 11. Мактабда энди ташкилий ишларни йўлга қўйман деб тургандим ... Абдумаликка ёрдамга бориш керак. (П. Қ.) 12. У ўзича янги ҳамроҳи-

нинг Фойибга муносабатини билиб олиш йилинжида эди ...
Хожининг юз ифодасидан ҳеч нимани уқиб бўлмасди.
(О.Х.)

199- §. Айиравчи боғловчили боғланган қўшма гаплар. Айиравчи боғловчили боғланган қўшма гаплар кетмакет юзага келадиган ёки алмашиниб турадиган икки ва ундан ортиқ воқеа-ҳодиса, ҳаракатни ифодалайди.

Гоҳ, баъзан, дам, ё, хоҳ, бир каби боғловчилар қўшма гап қисмларини айриб боғлаш учун ишлатилади. Улар, одатда, такрорланиб қўлланади: *Ё сиз келинг, ё мен борай. Баъзан бизлар бориб турамиз, баъзан улар келиб туришади.*

Айиравчи боғловчилар ҳар бир қисм бошида такрорланиб қўлланади, такрорланган кейинги боғловчидан олдин вергул қўйилади. Масалан: *Бу ишини хоҳ сиз бажаринг, хоҳ мен бажарай.*

241- машқ. Гапларни кўчиринг. Айиравчи боғловчили боғланган қўшма гапларни аниқланг, уларнинг уюшиқ бўлаклari гаплардаги фарқини тушунтиринг. Тиниш белгиларининг қўйилиш сабабларини изоҳланг.

1. Бу юмшоқ, мулоҳазали одамга ётоқдагиларнинг меҳри ошиб қолган эди. (Ас. М.) 2. У бошқа бригадаларга бош бўлганларни кўрди ва кузатди. (Ж. Абд.) 3. Шундан кейин ишчиларнинг трассадаги турмуши, Монхидилнинг шахсий ҳаёти тўғрисида саволлар ёғила бошлади. (Ж. Абд.) 4. Тўтиқиз ўзини гоҳ онасининг бағрига, гоҳ холасининг қучоғига отиб йиғлайди. (М. Исм.) 5. Болалар ухлаб қолди-ю, лекин катталар алламаҳалгача ухлашмади. (Ҳ. Ф.) 6. Ё унинг товуши чиқмайди, ё одам йўқ. (Ас. М.) 7. Баъзан бу чизиқлар миллиметрнинг ўндан бири даражасида гоҳ ўнгга, гоҳ чапга бурилиб турарди-да, унинг изларидан ингичка йўлканнинг майда ўхаш чизиқлари ҳосил бўларди. (И. Р.) 8. Йиғидан охири кўзи тинди, лекин ўзи тинмади. (М. Исм.)

242- машқ. Боғланган қўшма гапларни турига кўра ажратиб кўчиринг, тиниш белгиларининг қўйилишини тушунтиринг.

1. У болаларини соғинган, дераза орқали бўлса-да, уларни ва албатта хотинини ҳам бир қўриб олмоқчи эди. (Э. А.) 2. Элмуродга ташаккур эълон қилди ва ёнидан ўз соатини чиқариб тақдим этди. (Ш.) 3. Кеч эди ... лекин уни кўрди, дафъатан кўзи илинди. (Э. А.) 4. Машрабнинг кўнглидаги бутун ғурбат бирдан булуфтадай тўзғиди ва у ерга сакраб тушди. (О. Е.) 5. Ҳозир паранжи

йўқ, лекин унинг чоракларга эниб қолган доғлари ҳали ҳам бор. (П. К.) 6. Қитоб ичидан икки буқланган хат ерга тушди-ю, қиз мисоли оловдай ёнди. (О. Е.) 7. Бу одат эскирган бўлса эскиргандир, аммо ҳозир Малоҳатга маъқул эди. (И. Р.) 8. Тоғининг ичкарисига на машина кира олади, на арава чиқа олади. (П. К.) 9. Ошхона томондан паловнинг ҳиди кела бошлади, аммо чол жойидан қимирламай ўтираверди. (Ў. Ум.) 10. Аброр Шукурович энсаси қотиб, папкани ёпди-да, кабинетдан чиқди. (О. Е.)

243- машқ. «*Менинг севган касбим*» деган мавзуда иншо ёзинг. Унда боғланган қўшма гаплар ва уларнинг турлари иштирок этсин. Тиниш белгиларининг қўйилишига эътибор қилинг.

ЭРГАШ ГАПЛИ ҚУШМА ГАП

200- §. Эргаш гапли қўшма гаплар тенг ҳуқуқли бўлмаган содда гаплардан (бош ва эргаш гапдан) ташкил топади. Масалан: *Қўшининг тинч бўлса, сен тинч бўласан. Пахта режаси ошиги билан бажарилди, шунинг учун ҳам манинг юзида табассум.* Бу мисолларнинг ҳар иккаласида биринчи қисм эргаш гап, иккинчи қисм бош гапdir. Бош гап мазмунан мустақилдай кўринса ҳам эргаш гап томонидан тўлдирилади, изоҳланади. *Ҳаво булат бўлса, ҳам, биз қишлоққа жўнадик.*

Аниқлананаётган, изоҳлананаётган ёки тўлдирилаётган гап бош гап, аниқлайдиган, тўлдирадиган, изоҳлайдиган гап эса эргаш гап саналади. Ў бош гапга доим мазмунан тобе бўлади. Бунинг чизмаси қуйидагича:



Эргаш гап бош гапга эргаштирувчи боғловчилар орқали бирикади: *-ки, -са, чунки, негаки, нимагаки, шунинг учун, сабабки, башарти, гўё, токи, гарчи каби.* Булардан ташқари, *шекилли, бўлмаса, борди-ю, мабодо* каби сўзлар ҳам эргаш гапни бош гапга боғлаш учун хизмат қиласиди. Масалан: *Биз шундай кутубхона бино қиласилликки, бутун эл қошида манзур ва мўжтабар*

бўлсин. (О.) Ярим йўлга келишганда, Юсуф ака нимадир эсига тушиб орқасига қайтди. (У. Ум.)

Эргаш гап қуйидаги шаклланган кесим орқали бош гапга боғланади:

1. Эргаш гапнинг кесими феълнинг шарт майли шакли билан ифодаланади: Масалан: *Ким яхши ўқиса, у дўйстлари ҳурматига сазовор бўлади.* Баъзан эргаш гап кесими таркибида -да ҳам ишлатилади: *Ер лой бўлса-да, биз далага чиқамиз.*

2. Эргаш гап кесими феълнинг равишдош шакли билан ифодаланади. Масалан: Эрта билан соат саккизларда булат қуюқлашиб, ҳамма ёқни қоронғилик босди. (*Мирм.*)

3. Эргаш гапнинг кесими феълнинг сифатдош шакли билан ифодаланади. Бунда кесим таркибида -да, сайин, -дан, сўнг, -дан бери, -дан бўён, -дан кейин, замон каби сўз ва элементлар бўлиши мумкин. Масалан: *Ўқитувчи келганда, биз синфда тўплланган эдик. У кетгандан бери, қўлим шига бормайди.*

4. Эргаш гапнинг кесими сифатдошнинг бўлишсиз шакли (-мас)дан аввал (олдин, илгари) шаклида таркиб топган бўлади. Масалан: *Тонг ёришмасдан, Чўлбо-бо далага отланди.* (*Х. Ф.*)

5. Эргаш гапнинг кесими сифатдош (-ган, -дай, -дек) шаклида бўлади. Масалан: *Қақраган ер намга ташна бўлганидек, жангчининг юраги ҳам тинчликка ташна бўлади.*

Эргаш гапли қўшма гапларда эргаш гап биринчи ўринда ҳам, бош гапдан кейин ҳам келиши мумкин. Ҳар икки ҳолда ҳам бош ва эргаш гаплар вергул билан ажратилади: 1. *У келса* (э. гап), мен жўнайман (б. гап). 2. *Шунга эришайликки* (б. гап), орамизда бирорта ғаламис қолмасин (э. гап). (*М. Исл.*)

Эслатма: Салқин шабада гулзорларда чарх уриб, гулларнинг ҳидини ўғирлаб қочмоқда эди. (*Мирм.*) Яхшилик қиласанг, яхшилик кўрасин. (*Мақол.*) Сингари гапларни эргаш гапли қўшма гаплар билан аралаштирумаслик керак.

244- машқ. Эргаш гапли қўшма гапларни кўчиринг, эргаш гапнинг бош гапга қандай восита ёрдамида боғланганини айтинг. Боғланган қўшма гапларни эргаш гапли қўшма гапларга айлантиринг.

1. Очилнинг эришган ютуғи шу бўлдики, у Замиранинг ишончини оқлади. 2. Агар у очиқдан-очиқ ишимизга тўғаноқ бўлаверса, илдиз-пилдизи билан суғуриб ташлаймиз. (*Мирм.*) 3. Ҳурмат қиласанг, ҳурмат кўрасан.

(*Мақол.*) 4. Зангори осмон шундай тиниқ, шундай бегуборки, кўзни олади. (*О.*) 5. Қоратойим қандай бўлса, сен ҳам менга шундайсан. (*О.*) 5. Вали ака калласини қимирлатди ... аммо буни Ғуломжон кўрмади. (*М. Исм.*) 7. Улар хаспўшлаш учун қанчалик уринмасинлар, бироқ кўз боғламачиликни Навоий олдида ўтказа олишдан ожиз эдилар. (*О.*) 8. Гўё ҳаёт тамомила ухлагандай, ҳамма ёқ жимжит эди. (*П. К.*) 9. Сўз билан иш бир бўлмаса, эл хуш кўрмас. (*«Ақл ақлдан қувват олар».*) 10. Меҳнатни аямасанг, бу ерда ҳосил қайнайверади. (*О.*) 11. Қор ёғди — дон ёғди. (*Мақол.*)

245- машқ. Эргаш гапли қўшма гапларни топиб, уларни боғланган қўшма гапларга айлантиринг. Гап тузилишида ва тиниш белгиларида юз берган ўзгаришларни тушунтиринг.

1. Ёмоннинг яхвиси бўлгунча, яхшининг ёмони бўл. (*Мақол.*) 2. Кун чиққунча, биз далага етиб борамиз. 3. Жамол хола гапини тугатгач, Манзура хола «тўғри айтадилар, қўзим» деб қўйди. (*Ҳ. Н.*) 4. У ерга анчагина эскирган қирғиз кигизи солиниб, устига кўрпача тўшалган эди. (*М. Исм.*) 5. Табнат оқ ёпинчиини ташларташламас, куртаклар кўз уқалай бошлади. (*М. Исм.*) 6. Шамси ўрнидан туриб, дўпписини икки буклаб «Богаро»ни шунақаям авждан айтибдики, ҳаммаси қойил қолишибди. (*С. Аҳм.*) 7. Энди ўт ёқаман деб турганда, кўча эшиги бирдан тақиллаб қолди. (*М. Исм.*) 8. Шу ўйин амри биланми, у эшикни қаттиқ итарди. (*М. Исм.*) 9. Сенга бир аломат нарса олиб келдимки, кўрсанг ҳайрон қоласан. (*М. Исм.*) 10. Меҳнат қилсанг, роҳат кўрасан. (*Мақол.*) 11. Мен келсам, сен кетибсан.

БОҒЛОВЧИСИЗ ҚЎШМА ГАП

201- §. Икки ёки ундан ортиқ содда гапнинг боғловчисиз ёки боғловчи вазифасидаги грамматик воситаларсиз, фақат интонация ёрдамида бирекишидан таркиб топган қўшма гап боғловчисиз қўшма гап дейилади. **Масалан:** *Ўсма кетар, қош қолар... Яхши ўғил қанд едирар, ёмон ўғил панд едирар. Мард бир ўлар, номард минг ўлар.* (*Мақоллар.*)

Боғловчисиз қўшма гаплар ўз таркибидаги содда гапларнинг ўзаро мазмун муносабатига кўра икки групхга бўлинади:

1. Боғланган қўшма гапларнинг боғловчисиз тури.
2. Эргашган қўшма гапларнинг боғловчисиз тури.

Биринчи тур (боғланган қўшма гапларнинг боғловчисиз тури) да ҳар бир қисм тенг ҳуқуқли бўлиб, улар тенгланиши интонацияси орқали бирикади: *У ҳаддан ташқари хомуши, касал товуқдай қанотлари осилган эди.* (A. K.)

Бундай қўшма гап таркибига кирган содда гаплар мазмунидан ҳаракат, воқеа-ҳодисанинг бир пайтда ёки кетма-кет юз бериши англашилиб туради. Масалан: *Қўнғироқ чалинди, дарс бошланди. Атлас кўйлак кийган қизлар саватларда мева теряптилар, йигитлар ташияптилар.* (С. Нуров.)

Шунингдек, қўшма гап қисмлари воқеа-ҳодиса, нарса-предметнинг қиёсланиши, таққосланиши, бир-бирига зид қўйилишини билдиради. Масалан: *Қор ёғди — дон ёғди. Ҳаво булат бўлди, ёмғир ёғмади.*

Бундай боғловчисиз қўшма гаплар боғланган қўшма гапларга синоним бўлиб, уларда тиниш белгиларининг қўлланиши қўйидагича.

1. Воқеа-ҳодисаларнинг бир пайтда, кетма-кет юз беришини ифодалаган боғловчисиз қўшма гап қисмлари орасига вергул қўйилади: *Зал жим, ҳалқ парда очилишини кутар эди.* (А. К.) *Пахта нозик ўсимлик, парвариши ниҳоятда мураккаб.* (О.)

2. Боғловчисиз қўшма гап қисмлари бир-бирига зид ёки қиёслаш, ўхшатиш мазмунини ифодаласа, улар орасига тире қўйилади:

Кўприклар ясадик — золимлар ўтди,
Ариқлар чиқардик — ёвлар қурилди. (*«Хат»дан.*)

246- машқ. Үқинг. Боғловчисиз қўшма гапларни кўчиринг ва уларнинг ҳар бирига изоҳ беринг.

1. Низомжон бўшашиб кета бошлади. Асрор ака уни тўхтатди. (С. Аҳм.)
2. Низомжон йиғилиб қолган гапларни энтикиб, шошилиб гапирав, Дилдор бўлса бепарвогина унинг гапларига қулоқ солиб борар эди. (С. Аҳм.)
3. Икковга бирор ботолмас, отлиққа яёв етолмас. (Мақол.)
4. Албатта сой лаби соя-салқин бўлади, шаҳардагидек дим эмас. (И. Р.)
5. Қўлқопини ечиб чеккаларини ушлади, куни билан рулда ўтириб толиқкан вужудида қон ҳорғин-ҳорғин гупилларди. (Ас. М.)
6. Машина сакрар, руль ҳам бўйсунмай ҳар замонда тралери фирчиллаб ғашга тегар эди. (Ас. М.)
7. Бирор марта раъйингни ҹайтарганимидим, гапиравермайсанми? (Ш.)

Боғловчисиз қўшма гапларнинг иккинчи тури тенг бўлмаган қисм (гап)лардан ташкил топади. Бундай қўшма гап таркибидаги содда гаплардан шарт, сабаб ёки натижа, тўсиқсизлик каби мазмун англашилади. Масалан: *Қўшининг тинч — сен тинч* (*Мақол.*) — шарт. *Битта беретка олиб юборинг, шаҳарда қизларнинг ҳам масига беретка кийши расм бўлиб кетган* — сабаб. *Ўтирганлар қисталанг қилди, ашулачи торни қўлига олди* — натижа каби.

Бундай боғловчисиз қўшма гаплар эргаш қўшма гапларга синоним бўлиб келади. Қиёсланг: *Қўшининг тинч — сен тинч* (боғловчисиз қўшма гап). *Агар қўшининг тинч бўлса, сен тинч бўласан* (эргаш гапли қўшма гап).

Бундай турдаги боғловчисиз қўшма гапларда қуидаги тиниш белгилари ишлатилади:

1. Иккинчи гап биринчи гапнинг натижасини, сабабини билдирса, биринчи гапдан кейин икки нуқта қўйилади: *Онахоннинг юраги шув этиб кетди; тўппончани ўз кўзи билан биринчи кўриши эди.* (*Ас. М.*)

2. Иккинчи гап биринчи гапдаги бирор бўлакнинг маъносини изоҳласа, биринчи гапдан кейин икки нуқта қўйилади. Яхшиси шу: биздан хавотир олмай, эрта билан капсанчилар олдига боргин. (*А. К.*)

3. Тўсиқсиз боғловчисиз қўшма гап қисмлари орасига вергул қўйилади: *Ўйида чакса уни йўқ, том бошида қўш тандир.* (*Мақол.*)

4. Боғловчисиз қўшма гап таркибидаги гаплар бир пайтда ёки кетма-кет бўлган воқеа-ҳодисаларни билдириганда, ўзаро вергул билан ажратилади. *Баҳор келди, гуллар очилди.*

5. Боғловчисиз қўшма гап қисмлари зид муносабатда бўлса, улар орасига тири қўйилади. *Ит ҳуравар — карвон ўтар.* (*Мақол.*)

6. Уҳшатиш муносабатини билдирувчи боғловчисиз қўшма гаплар орасига ҳам тири қўйилади: *Сув келди — нур келди.* (*Мақол.*)

247-машқ. Үқинг. Боғловчисиз қўшма гапларни ажратиб кўчиринг. Уларнинг ҳар бирига изоҳ беринг. Эргашган қўшма гапларни боғловчисиз қўшма гапга айлантиринг. Фарқини тушунтиринг.

1. Пахтакорлик шунчалик ота-бободан мерос, у билан эгизаклар биздаги урф-одат. (*F. F.*) 2. Қиши келди — соvuқ кунлар бошланди. 3. Олтин-кумушнинг эскиси бўл-

мас, ота-онанинг баҳоси бўлмас. (*Мақол.*) 4. Сиз кетишингиз билан, у бизга кўп нарсаларни гапириб берди. (*A. К.*) 5. Теракзорлар хушбичим, боғларда ҳамма ёқ жим. Ер ҳам, кўк ҳам мовий ранг, ҳавонинг юзи тиниқ. (*M. M.*) 6. Узоқда баланд-паст тоғлар яшнайди, тепалар, адирлар ранг-баранг гуллар билан ясанади. 7. Ботир акам сизга юборган эдилар, ҳужрага қўйиб чиқдим. (*C. Аҳм.*) 8. Анжир ҳазон бўлай деганда, Қўқондан амаким келди. (*A. К.*)

248- машқ. Қуйидаги гапларни боғловчисиз қўшма гапларга айлантиринг. Гап қурилишида юз берган ўзгаришни тушунтиринг.

1. Тўлаган aka нима дейишини билмай қолганини кўриб, Сафаров беш-олти букланган аризасини унинг қўлидан олди. (*A. К.*) 2. Майли десангиз, уриниб кўраман. (*M. Исл.*) 3. Сиддиқжон гарчи табелчи ҳақида Болтабойга қайтиб оғиз очмаган бўлса ҳам, учинчи куни табелчи бехосдан унинг номини айтди. (*A. К.*) 4. Инсон фазилати шундай катта бир дунёки, уни одам ҳаётини бойитадиган маънавий ҳазина деса бўлади. (*M. Исл.*) 5. Иброҳимов яна ким сўзга чиқмоқчи эканини сўраган эди, ҳеч ким қўл кўтартмади. (*A. К.*) 6. Дўконда эдим, Ёрмат йўқ, сен извошни қўш, бир ерга бориб келамиз. (*O.*) 7. Жўра ота ҳақида гап сотишни яхши кўрар эди, дарров тили қичиди. (*O.*) 8. Уни-буни қуйинглар, биз кимни мусобақага чақирамиз? (*O.*) 9. Боғнинг рангдор маржон чироқлари ҳам сўнди, ҳамма ёқ жимжит бўлиб қолди. (*Ac. М.*) 10. Бева-бечораларнинг, етим-есирларнинг оҳ-воҳига қулоқ сол, улар марҳаматингга муентазир. (*C. Нуров.*) 11. Орадан ҳафта, ўн кун ўтди, ундан ҳамон дарак йўқ.

73- топшириқ. Бирорта бадний асарнинг бир неча саҳифасини ўқинг. Боғловчисиз қўшма гапларни топиб, эргаш гапга айлантиринг, қурилиши ва мазмунидаги фарқларни ажратинг.

249- машқ. Матнни ифодали ўқинг. Тузилишига кўра гап турларини фарқланг ва услубий жиҳатдан ўзига хослигини ажратинг.

Унинг ўпкаси тўлди. Қўзларига яна ёш келди. Ўзини қанчалик босмасин, қуишилиб келаётган бу ёшни тўхтата олмади. Шу алфозда қанча юрди, билмайди, қаршисидан келаётган машинанинг чироғи кўзларини қамаштириб юборди. Машина унинг ёнига келиб таққа тўхтади.

— Шу маҳалда қаёққа? — Назира ҳовлиқиб машинадан тушаётган кишининг Нурмат aka эканини бил-

ди. Билди-ю, нима дейишини билмай қолди.

— Қаёққа кетаяпсан, ҳой, менга қара?— сўради яна раис ва ҳеч нарсани билмагандай рўмолчасини узатди.— Ма, юзингни артиб ол. Қаёққа кетяпсан?

— Шаҳарга...— бўшашиб жавоб берди Назира ёшларини артаркан.

— Шундай дегин? Қани, машинага чиқ-чи!

Нурмат ака бир зумда чамадонини машинага солди ва Назирани ёнига ўтқазди-да, қишлоқ томон ҳайдаб кетди.

— Қаёққа олиб кетяпсиз, тўхтатинг!— Назира жонхолатда раиснинг қўлига ёпишди.

— Қаёққа бўларди!— жилмайиб жавоб берди раис.— Ширинсойга! Сен бизни ташлаб кетармидинг?

Назира жавоб бермади. Нурмат ака ҳам анчагача жим борди.

— Нега хафалигингни билмайман, лекин ғам ёмон нарса,— деди ниҳоят раис.— Уни енгмасанг, ҳаётинг бузилади, орзуларинг пучга чиқади. Уни енгиш керак! (*Ў. Ўм.*)

ҚУЧИРМА ВА ҮЗЛАШТИРМА ГАПЛАР

202-§. Ўзгаларнинг ҳеч ўзгаришсиз айнан берилган гапи қўчирма гап ҳисобланади. Масалан: «Одобсилик бўйса ҳам,— деди Мирзо Султонали,— муборак хоналарига бостириб келдим». (*A. Қод.*)

Қўчирма гап муаллиф гапи билан боғловчи вазифасидаги демоқ феълининг деб (дея), деган шакллари орқали боғловчисиз муносабатга киришади. Масалан: «Айтадиган гапинг шуми?»— деди Миразиз. (*C. Аҳм.*) Мен кулиб дейман: «Тоғам яхши, лекин қурумсоқ». (*O.*)

250-машқ. Қўчирма гапли қўшма гапларни аниқланг. Қўчирма гап билан муаллиф гапининг ўзаро алоқасини тушунтиринг.

1. «Савдо аҳли билан буржуйлар қирилиб кетсин»,— дейди хуноб бўлиб у. (*O.*) 2. Баъзилари менга ўқрашиб:— «Жим ўтири-е»,— деб қўйиншди. (*O.*) 3. Тушунтир ўзинг?— дейди менга жаҳлдан қизариб Турғун. (*O.*) 4. Шунаقا, ўртоқ Низомиддинов,— деди Бўтабой,— бу душманинг иши. (*C. Аҳм.*) 5. Ўйлар эди: «Ишнинг қизиги кейин келади. Чол тўғри айтятпими? Ё довдираяптими?..» (*C. Аҳм.*) 6.— Хўп, хўп,— деди кулиб маҳдум,— Анвардан эшитганим бор эди, жанобларининг тавсиф-

ларини эшитганман. (A. Қод.) 7. Олдинига иккиланиб турган Үмматали таваккал қилиб: «Бор!»— деди (Ш.)

251- машқ. Кўчирма гап ва муаллиф гапини топиб, уларнинг ўрники аниқланг. Тиниш белгиларининг қўйилишига эътибор беринг.

1. «Қизиқ экан. Раънога кўрсатаман буни...»,— деди у ўз-ўзича руҳланиб. (Ҳ. Н.) 2. «Сиз мени мазах қилмай қўя қолинг!»— деди зарда қилиб хўжайин. (Н. С.) 3. Даалилим йўқ,— деди Бўтабой қурслик билан,— шунга чақирганмидингиз?» (С. Аҳм.) 4. — Нима кўрдингиз деди полвон.— Ҳеч нарса,— деди қўрбоши. (А. К.) 5. «Қам бўлманг,— деди пулни узатиб,— яна хизматингиздаман». (А. Қ.) 6. Навбат ўзига келганда, айвондан туриб маҳдум бақирди: «Раъно акангнинг қўлига сув қўй!» (А. Қод.) 7. «Бозорни кўрдингми? Қўй бозорига бордингми?»— сўрайди дадам, мулоим табассум билан. (О.)

203- §. Кўчирма гапли қўшма гапни нутқ мақсадига кўра ўзлаштирма гапга айлантириш ҳам мумкин. Масалан: «*Одобосизлик бўлса ҳам,—деди Мирзо Султонали,—муборак хоналарига бостириб келдим*» (А. Қод.)— кўчирма гап. *Мирзо Султонали одобосизлик бўлса ҳам муборак хоналарига бостириб келганлигини айтди*—ўзлаштирма гап.

204- §. Кўчирма гап билан муаллиф гапида тиниш белгиларининг ишлатилиши:

1. Кўчирма гап ёзувда қўштириноққа олиниб, биринчи сўз бош ҳарф билан ёзилади. Масалан: «*Қалай, Турғунбой, хипчин қалай!*»— сўрайди Аъзам. (О.)

2. Кўчирма гап муаллиф гапидан кейин келса, муаллиф гапидан сўнг икки нуқта қўйилиб, кўчирма гап қўштириноқ ичига олинади. Кўчирма гапнинг охирига, гапнинг мазмунига қараб, нуқта, сўроқ ёки ундов белгиси қўйилади. Бунда нуқта кўчирма гап охиридаги қўштириноқдан кейин, сўроқ ва ундов белгилари эса қўштириноқдан олдин қўйилади. Масалан: *Хўжалик раиси деди: «Биз бу йил пахтадан мўл ҳосил етиширамиз»*.

3. Кўчирма гап муаллиф гапидан олдин келса, унда тиниш белгилари, кўчирма гапнинг мазмунига кўра, қўйидаги чизма асосида қўйилади:

«Кўчирма гап»,— муаллиф гапи.

«Кўчирма гап?»— муаллиф гапи.

«Кўчирма гап!»— муаллиф гапи.

4. Кўчирма гап муаллиф гапининг ичидаги берилса, гап

мазмунига кўра тиниш белгилари қўйидаги чизма асосида қўйилади:

Муаллиф гапи: «Кўчирма гап»,— муаллиф гапининг давоми.

Муаллиф гапи: «Кўчирма гап?»— муаллиф гапининг давоми.

Муаллиф гапи: «Кўчирма гап!»— муаллиф гапининг давоми.

Муаллиф гапи кўчирма гапнинг орасида келса, унда тиниш белгилари қўйидагича қўйилади:

1. Кўчирма гапнинг муаллиф гапидан олдинги қисмида тиниш белгиси бўлмаса ёхуд вергул (ёки икки нуқта) бўлса, бу белгилар туширилиб қолдирилади, муаллиф гапи эса икни томондан вергул ва тире билан ажратилиди. Масалан: *«Меҳнатни сев,— деб такрорлайди ойим,— меҳнат кишига баҳт келтиради»*.

2. Кўчирма гапнинг муаллиф гапида олдинги қисми аслида нуқта билан тугаган бўлса, бу нуқта муаллиф гапидан олдин эмас, кейин қўйилади. Муаллиф гапидан олдин эса вергул ва тире, муаллиф гапи охиридаги нуқтадан сўнг тире қўйилиб, кўчирма гапнинг давоми бош ҳарф билан бошланади. Масалан: *«Гап дарсни ўз вақтида бажармаганингда,— деб қўйди акам.— Ўз вақтида бажарсанг, ойинглар уришимас эди»*.

3. Кўчирма гапнинг муаллиф гапидан олдинги қисми сўроқ ёки ундов белгиси билан тугаган бўлса, муаллиф гапидан олдин ўша белги ва тире қўйилади, муаллиф гапидан сўнг эса нуқта ва тире қўйилиб, кўчирма гапнинг давоми бош ҳарф билан бошланади. Масалан: *«Жўнаймизми?— деб сўради укам.— Ойимлар қачон жўнар экан,— деб сўраяптилар»*.

4. Кўчирма гап диалог характерида бўлиб, янги йўлдан бошланса, ундан олдин тире қўйилади. Масалан:

— Уқтам, ҳозир! нечанчи синфда ўқийсан?

— 10- синфда ўқийман.

Эслатма: 1. Пичинг, кесатиқ, баъзан маъноси эскирган сўзлар қўштириноқ ичida берилади: *Вазнга путур етганлиги тўғри*. «Қалблар» сўзини кўпчилик маъносида ишлатилганлигини бошқа ёкка йўйибсиз... бу билан «гуноҳим» устидан мени ушлаб олмоқчи бўйибсиз. Менимча, «қалб» ва «юрак» сўзлари кўпчилик маъносида... учраб туради. Аҳли «фуқаро», «шоҳи»га назмда жавоб қайтармоқни буюради. (M. K.)

2. Бадиий асар номлари, рўзнома, ойнома, ташкилот номлари, шартли тушунчалар ва шу кабилар ҳам қўштириноқ ичida берилади: *«Қутлуғ қон» романи, «Шарқ юлдузи» фабрикаси, «Халқ сўзи»*

рўзномаси каби. Ташкилот, корхона кишилар номи билан номланса қўштироққа олинмайди: *Навоий номли театр, Низомий номидаги Тошкент давлат педагогика институти* каби.

252- машқ. Гапларни ўқинг. Кўчирма гапли қўшма гапларни толиб, дафтарингизга кўчиринг. Кўчирма гап ва муаллиф гапининг ўзаро боғланишини, қўштироқ ва тиренинг қўйилиш сабабларини изоҳланг. Бу белгилар қўйилмаган бўлса, уларни қўйиб чиқинг. 6, 7- гапларни ўзлаштирма гапга айлантириб, уларнинг тиниш белги-ларидаги фарқларини тушунтиринг.

1. Хотин индамай дастурхонни йиғишириб олди, қо- зонга қуяётиб эштилар-эштилмас деди: «Уша асал- нинг пулига анор ҳам берар эди». (А. Қ.) 2. «Мактабга бор!»— дейди онам. (О.) 3. «Офарин! Офарин!»— деб юборди Фуломжон хурсанд бўлиб. (М. Исм.) 4. Давлат- беков қўлини кўксига қўйиб: Хўп бўлади, хўп!—деб ту- пар эди. (П. Қ.) 5. Мен умумхалқ бошлаган ишдан чет- да қолмайман, деди Мөҳри ҳаяжон ичидা. (Ш. Р.) 6. Бир кекса ўқитувчи: «Кўнглинимизни чироги олиб чиқиб кетилган уйдай қилиб кетяпсиз, Содиқжон»,— деган эди. (Ш.) 7. «Бўтабой акам масалангни мажлисга сола- ман дедилар»,— деди. (А. Қ.) 8. «Бегуноҳ гўдакнинг са- ҳарда қилган дуоси қабул қилинади. Уйғотинг қизин- гизни!»— деди (А. Қ.) 9. «Гумонингизни айтинг бўлма- са»,— деди элликбоши тажанг бўлиб. (А. Қ.) 10. Буюк ёзувчи Алексей Максимович Горький шундай деган эди: «Ўз фольклорингизни тўплангиз ва ундан ўрганингиз».

253- машқ. Кўчирма гапларни ўзлаштирма гапга, ўзлаштирма гапларни кўчирма гапга айлантиринг. Фарқларини тушунтиринг.

I. 1. Баъзан ўз-ўзича дейди: «Зуваласи пўлат дега- ника бор». (Ас. М.) 2. «Сиз заводда ишлайсизми?»— сў- ради Махсудов. 3. «Аҳмад машина ҳайдашига ўқимоқ- чи»,— деди Коля. (Ҳ. Н.) 4. «Ўзлари тиниб қолар»,— дейди бувим қўлини силтаб. (О.) 5. «Майли»,— Қундуз- хон гўё сеҳрлангандек жавоб берди. (С. Аҳм.) 6. «Хўш, қандай яигиликлар бор?»— деди Ўқтам. (О.)

II. 1. Астахов чол билан суҳбатлашишни кўпдан бўён орзу қилганини, лекин қўли тегмаганини айтди. (О.) 2. У пахта терганлигини айтди. 3. Ўқитувчимиз она ти- лини яхши билмасдан, бошқа фанларни чуқур эгаллаш мумкин эмаслигини таъкидлади.

МУНДАРИЖА

ФОНЕТИКА ОРФОЭПИЯ ВА ИМЛО

Орфоэпия ҳақида маълумот	11
Унли товушларнинг талаффузи ва имлоси	11
Унли товушлар таснифи	20
е, ё, ю, я, (ёлашган) унлиларнинг талаффузи ва имлоси	20
Ундош товушлар таснифи	22
Жарангли ва жарангсиз ундош товушлар талаффузи ва имлоси	24
Сонор товушлар талаффузи ва имлоси	39
Ўзбек адабий тили ундошларининг таснифи	44
Айриш ва юмшатиш белгиларининг ишлатилиши ва имлоси	46
Фонетик ўзгаришлар	47
Нутқнинг фонетик бўлиниши	53

ЛЕКСИКОЛОГИЯ

Сўзларнинг асосий ва кўчма маънолари	68
Сўз маъносининг тараққиёти	70
Сўзларнинг услубий бўёғи	73
Фразеологик бирликлар	74
Сўзларнинг шакл ва маъно муносабатига кўра турлари	76
Тарихий жиҳатдан ўзбек тили лексикасининг таркиби	84
Қўлланиш доирасига кўра ўзбек тили лексикаси	86
Қўлланиш доираси чегараланган лексика	87
Эмоционал-экспрессив бўёқдорлик жиҳатдан ўзбек тили лексикаси	93
Нутқ услублари ва услубий жиҳатдан ўзбек тили лексикаси	95
Нутқнинг тасвирий ва ифодавий воситалари	106

МОРФОЛОГИЯ ВА ИМЛО

Кириш	113
Сўзнинг морфологик таркиби	113
Сўзларнинг тузилишига кўра турлари	114
Қўшимчаларнинг турлари	117
Сўз туркumlари	120
От	121
Сифат	135
Баъзи сифат ясовчи қўшимчалар ва уларнинг ёзилиши	137
Сифатларнинг қўлланиш хусусияти	142
Сон	145

Сонларнинг қўлланиш хусусияти	149
Олмош	150
Олмошларнинг келишиклар билан турланиши	158
Феъл	160
Сифатдош яшовчи қўшимчалар ва уларнинг ёзилиши	169
Равиш	170
Равишшоц ясовчи қўшимчалар ва уларнинг ёзилиши	178
Ёрдамчи сўзлар	183
Кўмакчилар	184
Боғловчилар	185
Юкламалар	187
Ундов сўзлар	188
Тақлид сўзлар	190
Модал сўзлар	191

СИНТАКСИС

ГАП

Гапнинг мақсадга кўра турлари	194
Дарак гап	194
Сўроқ гап	195
Буйруқ гап	197
Ундов гап	18
Сўз бирикмаси	200
Сўзларнинг ўзаро синтактик муносабатини ифодаловчи воситалар	202
Тенг ва эргаш боғланиш	204
Гапларнинг тузилишига кўра турлари	207
Бир составли гаплар	209
Гап бўлаклари	213
Бош бўлаклар	214
Иккинчи даражали бўлаклар	218
Гапнинг уюшиқ бўлаклари	224
Ажратилган бўлаклар	227
Сўз тартиби	229
Ундалма	232
Кириш сўз	233
Мураккаблашган содда гаплар	235
Қўшма гаплар	237
Боғланган қўшма гап	233
Эргаш гапли қўшма гап	242
Боғловчисиз қўшма гап	244
Кўчирма ва ўзлаштирма гаплар	248

На узбекском языке

АБДУРАХМАНОВ ХАЛИК, РАФИЕВ АБДУРАЗИК,
ШАДМАНКУЛОВА ДИЛОРАМ

**ПРАКТИЧЕСКАЯ ГРАММАТИКА УЗБЕКСКОГО
ЯЗЫКА**

Ташкент «Ўқитувчи» 1992

Муҳаррир *Х. Юсупова*
Бадиий муҳаррир *Ж. Одилов*
Техн. муҳаррир *С. Турсунова*
Мусаҳҳиҳлар *Л. Мирзааҳмедова, А. Одилов*

ИБ № 5822

Теришга берилди 12.10.91. Босишга рухсат этилди 13.08.92. Формати $84 \times 108_{\text{из}}$. Литературная гарнитураси. Кегли 10 шпонсиз. Юқори босма усулида босилди. Шартли б. л. 13,44. Шартли кр. отт. 13,65. Нашр л. 12,69. Тиражи 10000. Зак. № 50.

«Ўқитувчи» нашриёти. Тошкент—129. Навоий кўчаси, 30. Шартнома 13—91—91.

Ўзбекистон Матбуот Давлат қўмитасининг Янгийўл ижара китоб фабрикаси. Янгийўл ш., Самарқанд кўчаси, 44. 1992.

Янгиюльская арендная книжная фабрика Госкомпечати Республики Узбекистан. г. Янгиюль, ул. Самаркандинская, 44. 1992.

A 15

Абдураҳмонов X. ва бошқ.

Ўзбек тилининг амалий грамматикаси: Маданият ва санъат ўқув юрт. ўқув. қўлл./Х. Абдураҳмонов, А. Рафиев, Д. Шодмонқулова.— 2- қайта ишланган ва тўлдирилган нашри.— Т.: Ўқитувчи, 1992.—256 б.

1.1,2 Автордош.

Абдурахманов X. и др. Практическая грамматика узбекского языка.

Учебное пособие для учебных заведений культуры и искусства.

ББҚ 81.2Ўз—2я 73